



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

UNIVERSITY MICROFILMS
SERIALS ACQUISITION
3 9015 00392 573 5
University of Michigan - BUHR



PROPERTY OF
*University of
Michigan
Libraries*

1817



ARTES SCIENTIA VERITAS









SELECTÆ

E

PROFANIS SCRIPTORIBUS

HISTORIÆ.

QUIBUS ADMISTA SUNT

VARIA HONESTE VIVENDI PRÆCEPTA,

EX IISDEM SCRIPTORIBUS DEPROMPTA.

NOVA EDITIO PRIORIBUS LONGE EMENDATIOR.

PHILADELPHIÆ:

WILEY THOMAS ET WILLIAM BRADFORD, JOHN CONRAD
T. CO. PATRICK BYRNE, JOHN M'CULLOCH, H. ET P.
ICE, J. ET J. CRUCKSHANKS, SAMUEL F. BRADFORD,
MATHW CAREY, W. W. WOODWARD, BENJAMIN JOHN-
ON, THOMAS DOBSON, WILLIAM FRY, JAS. THACKARA,
ET HENRY SWEITZER.

.....
1803.



MS
George D. Howard
11-16-1934

MS
116

Ad. Sd

MS

PREFACE.

THE approbation with which the world has received my little Latin collection of select stories from the Old Testament, has determined me to present it with a second collection from profane authors, together with some of their moral precepts. My design has been, in both, to put into the hands of children, and others that begin to learn the Latin tongue, some little pieces, that might be easy to understand, and at the same time might improve their morals. No doubt can be made but that the Holy Scriptures afford us those advantages, which is the reason probably, that has induced so many masters, both in a public and private character, to make their scholars read that collection.

That this might, as far as possible, merit the same esteem, I thought it incumbent on me not to lose sight of those two objects, clearness of thought and expression, and usefulness of matter. With respect to the former, I have been obliged, and especially in the first part, to retrench from the stories and maxims I borrowed the thoughts which were subtle or obscure; to change sometimes expressions which were refined, and too far fetched for children, into others that were more simple; to shorten phrases which were too long; and lastly, paying greater regard to plainness and facility than sound, to place the words in a more natural order; that manner of ranging them, which is so great a beauty to the Latin tongue, being a burden to all who first begin to translate the authors who have written in it. For this reason the reader will find all the words almost of the first chapters of this book placed according to their natural and common construction. When we teach children language, it is sufficient at first to teach them rules, and make them know words. The time will follow, when they must attend to elegance. It is not till after the foundations of an edifice have been well laid, that we employ our thoughts about the decorations of the apartments.

The means I have taken to facilitate the understanding of the originals, have undoubtedly made them lose somewhat of their force and beauty : but, I dare promise, enough of these is left to render them pleasing and profitable to children. And I thought it would be doing no injury to the intention of the illustrious dead, whose works are designed for posterity, if in favour of tender years, which are to be taught betimes to reap advantage from the lessons they have set, and to apply the remedies (as one of them expresses it*) which they have prepared for all mankind, I diminished somewhat of their majesty and ornaments. These will disclose themselves to their young disciples in all their brightness, and in all their charms, as soon as they shall be capable of understanding them.

With all the facility we have endeavoured to give this little piece, we may now and then have left in it places somewhat difficult to children. It is not therefore to be expected, that they who have but a slender knowledge of the first rudiments of the Latin tongue, should with ease understand it without the help of a master. It will be with this, as with the easiest classic authors, to understand which every one at first has need of an interpreter and guide. The advantage that it has above them, which yet we are far from intending to banish out of schools, is, that it unites, and places, as it were, in one point of view, a great number of maxims and examples, which may not only by their variety gain the attention of youth, but also contribute to the forming of their manners ; the greatest advantage that can be drawn from reading Heathen authors.

We shall there see, that these Heathens, even in the midst of the darkness of idolatry, teach us, that the Providence of God is not only watchful over all men in general, but over every individual : That he knows our most secret thoughts : and that it is he who inspires us with good ones, as well as condemns and punishes the evil : that the true worship due to him consists in purity

* *Posterorum negotium ago. Illis aliqua, quæ fòsint prodesse, conscribo. Salutares admonitiones, velut medicamentorum utilium compositiones, literis mando.* Senec. Epist. viii.

PREFACE.

v

of heart ; and that unlawful desires are no more permitted than criminal actions: that he proves good men by afflictions, and gives them strength to bear them : that the happiness of man consists neither in pleasures, nor honours, nor opulence ; but in virtue : that we ought not to indulge the body with any thing further than what is necessary for its support : that it is our duty to suffer injuries, not to render evil for evil ; but to do good to all mankind, even our very enemies : that there is no such thing as true friendship, but what has virtue for its foundation and end : That it is better to lose our quiet, our liberty, our life, than to be wanting to our duty, &c.

Good examples, generally of greater force than precept, especially on the minds of young people, here present themselves in great variety, and render virtue more lovely and respectful. Sometimes we see generals of armies, whether Greeks or Romans, who having gone through the greatest employments of the state, and enriched their country with the spoils of their enemies, died so very poor, as not to leave enough to defray their funeral expences. Sometimes, fathers renouncing the tenderest sentiments of nature, to secure the public liberty, and maintain the discipline of the army : or children inspired with courage by filial piety, and rendered ingenious to preserve the lives of those from whom they received their own. The richest bribes were not able to tempt the noble disinterested spirit of Curii, the Fabricii, the Phocions, or that of Xenocrates. Nor the roughest threats, prison, exile, or death, to shake the constancy of the Cato's, the Marelli, the Regulli. Ill usage by them is borne with patience, is dissembled, forgot, pardoned. With them friendship is sacred, religious, sincere ; liberty, prudent and industrious : a frugal table, and plainness in dress, in furniture and house, is equally the taste of great generals and philosophers. Judges and magistrates are clear, just, disinterested. Kings have the bowels of fathers for their subjects. Virtue is practised through love of duty, without any view of recompence ; and nothing appears interesting that is not entirely agreeable to justice. In a word, the reader has here an assemblage of several strokes of morality and history, many of which may serve as rules and models for

different conditions of life, and at the same time give some pleasure by the diversity of matter which they treat of; so that this little work, though designed for children, will not, perhaps, displease persons of more advanced years, who will here find summed up, what they formerly read dispersed up and down in various authors.

If, amid so many examples of different virtues, we have mixed some of contrary vices, it was only to show the deformity of the latter, and to make them the more detested. We know what Livy has said of history in general*, That it furnisheth examples of every kind: some of which are patterns to be imitated, and others are admonitions in regard to what we ought to shun.

The examples I have chosen, are sometimes a little diffuse and circumstantial, and the precepts of morality more largely explained. Often, on the other hand, both are concise, and no more than the answer of some great general or philosopher. The latter have this advantage, that they are the more easily retained. They are a sort of lively strokes, that penetrate deep: agreeable to the observation of Seneca†, who tells us, in his time, they made children learn moral maxims comprised in few words. And Quintilian ‡ likewise advises to teach them, by way of diversion, the wise sayings of great men, and certain verses selected out of the poets.

As I found it necessary to mix precepts with examples, as Cicero has done, that they might illustrate and enforce each other; I thought I could not do better than dispose this great field of matter agreeably to the method he has followed in his first Book of Offices, and

* *Hoc illud est præcipuè in cognitione rerum salubre ac frugiferum, omnis te exempli documenta in illustri posita monumento intueri: inde tibi tuæque reipublicæ, quod imitare, capias; inde foedum ineptu, foedum exitu, quod vitæ.* l. i. in præf.

† *Facilius singula præcepta incidunt circumscripta, et carminis modo inclusa. Ideò pueris et sententias ediscendas damus: quia complecti eas puerilis animus potest.* Senec. Epist. 33. Vide et Epist. 38. 94.

‡ *Etiam dicta clarorum virorum discere inter lusum electos ex poetis maximè locos.* Quintil. l. i. c. 2.

to reduce to a certain order, precepts and facts which are so diversified, that it would be difficult to retain them without such help, Cicero, every one knows, reduces his whole subject to Prudence, Justice, Fortitude, and Temperance, I have followed that division, being the plainest and the best known, dividing into four books what I had to say upon these Four Virtues; and have prefixed a very short one concerning God, Religion, and the Nature of Man. That which follows it upon Prudence is short likewise; because I straitened myself with respect to the sciences, and to what relates to them.

The title of each chapter is generally a maxim proper to be remembered; because it contains in a few words the chief subject of the chapter.

The Arabic figures that occur in almost all the chapters serve to distinguish the different sections.

All that is contained in a chapter has not always a necessary connexion with the title. I thought it sufficient if it had a relation to the same subject.

I did not think myself obliged to make all the chapters of equal length: but was generally ruled by the copiousness and importance of the subject.

Nor have I been in any pain, through a scrupulous exactness, to bring into the several chapters a certain number of examples, and a certain quantity of morality. I sometimes give more, sometimes less. There are even some that contain nothing else but moral precepts. I am persuaded, that the uniformity, which some, perhaps, would desire, would be less pleasing to children.

As there is a sort of connexion between all the virtues, and often one great action, according to the different lights in which we view it, may be considered; for instance, as an act of prudence, or justice; I have placed sometimes under one title what might be as well placed under another. It would be needless to say what determined me to this way, or that, because whatever occurs in a collection like this, has its advantage, and if so, of what consequence is it that it be placed under one head rather than another?

I have made use of all the ancient profane authors, Greek as well as Latin, which I thought might contribute to the execution of my design. I have sometimes even, blended them, as it were, together upon the same fac

or the same maxim, to make the object I proposed to the reader the more visible, and to avoid repetition. I have generally preferred, as I ought, the Latins to the Greeks; and have been exact in my references to both, that those who would, might with ease have recourse to the originals.

If I have often abridged historical facts, and precepts of morality, it was to retrench what appeared less agreeable to my plan, or to prevent my work from growing too large.

I have not engaged myself in reconciling historians with one another, in relation to the truth of a fact, or its circumstances. I cite my authority; that ought to be my warrant, and it is enough for me.

I scarce any where pass my judgment, or make reflections upon the passages I have produced in this work from the ancients, leaving that care to the masters, who will do it by word of mouth to more advantage than I could by writing.*

Seneca, the philosopher, abounds with maxims and examples, many of which I have thought proper to make use of: and the rather, because this author is usually not read in schools, and remains unknown to scholars the rest of their lives. It is true, he betrays almost always an affectation in his style; but his expression is short, and his thoughts lively; and he embellishes his discourse with natural comparisons and images, which entertain the imagination: so that with the alterations I have taken the liberty of making in what I have borrowed from him, I hope he will be able to please, and be intelligible to children, without any prejudice to them. I do not imagine I shall lie under any censure for having turned to a more favourable sense, certain passages of this author, and perhaps of some others likewise, with a view to render them proper for children. We meet in this philosopher, as well as in all the Heathen writers,

* *Ipse præceptor aliquid, imò multa quotidie dicat, quæ discipuli secum audita referant. Licet enim satis exemplorum ad imitandum ex lectione suppheditet, tamen viva illa, ut dicitur, vox alii plenius, præcipitque præceptoris, quem discipuli, si modò rectè sint instituti, et amant, et verentur.*
uinctil. l. ii. c. 2.

principles of morality, which ought not to be instilled into Christians without some correctives, to reduce them to that standard of truth which our religion has taught us.

Good men have the comfort of seeing the custom by degrees prevailing, of sanctifying the public and private instruction of youth, by explaining to them, and making them every day get by heart some passages of scripture, which serve for a rule of conduct in the course of their lives. By these means they lay up insensibly a rich treasure, infinitely more valuable than what they inherit from their parents. Though that be sufficient to teach them the whole of their duty, since the word of God is a fruitful and an inexhaustible fund: yet they may add to it another, which though indeed of less value, is not without its use. What I mean is, they may furnish their memories with the purest maxims, both in prose and verse, which are to be found in profane authors, as we before said the Heathens used to do. These maxims, it must be owned, come to us through suspected channels: but that is no objection to their use, since they are eternal, and flow from the only source of truth and happiness. Those that shall think it proper to teach their children such lessons, will find this collection for their purpose: and it is partly for that reason I have added some verses out of Publius Syrus.

Though man's reason has been much obscured by original sin, yet has he light enough left to trace the great lines of his duty. Those Heathen philosophers, who were content to be guided by the faint lights of the law of nature, gives us sometimes such solid and pure principles of religion, that they seem to be not far from the doctrine of the gospel. And then it is proper to point out to youth the likeness; and to observe what a shame it is that Christians, who have received the inestimable gift of faith, should have less rational sentiments of morality than those of a Heathen. Sometimes, on the contrary, we find in those pretended sages of antiquity such gross errors, that we plainly see how the divine light, without which man sits in darkness, has not shined upon them. And thence we should take occasion to let children know how reason has been weakened and obscured by sin, and how imperfect the morality of the Heathens is. The conclusion of all which is, that it is JESUS

CHRIST whom we should give ear to: that it is the gospel we ought to consult, as a sure and infallible oracle; that it is the Christian religion only, which has the privilege of showing truth without any of its debasements by error. If therefore any principles of the Heathens should be found in this book, not agreeable to the doctrine of the gospel, we trust the piety and vigilance of the masters will take care to observe to their scholars in a few words, in what particular those principles deviate from it.

There have been Heathens, no doubt, who, persuaded that it was reason which gave man his distinguished excellence and merit, endeavoured to follow it on many occasions, and practised it in several moral virtues. But beside their want of the knowledge and love of the only true God, and JESUS CHRIST his Son, the only foundation for true solid virtue; some of them, who passed for the most virtuous, lie under the imputation of great vices. Therefore we are far enough from proposing them here as perfect patterns. We report some of their great actions, and wise sayings, without diving into the motives of either, or examining what inconsistencies they have fallen into upon other occasions. We generally show their beautiful side, and so far as they may serve for an example of the virtue we recommend.

If the masters, who may set their pupils to translate this little book, would give themselves the trouble to read in the originals, the lives of the philosophers and great generals, which we have given them but an imperfect knowledge of, they would find there a great many fine things to be picked up, from whence the youth under their care might be insensibly, and very profitably, acquainted with the actions and sentiments of the heroes of antiquity.

It would not be improper likewise to let them into some knowledge of the several authors they translate; telling them, by the by, as it were, who they were; in what age they lived; and what subjects they wrote upon, &c. It is a great degree of learning, which costs little time, and is sure to be attended with good advantage.

Those masters, who have been well versed in the Ancients, and shall cast their eyes on this collection, will observe, perhaps, that we have omitted several examples and precepts of great beauty. They will be so

d then as to supply this defect, by word of mouth, or other way. For my part, beside the necessity I was under of confining myself to certain bounds in every chapter, I chose the youth should read, some time or other the originals themselves, certain bright passages, which were too long to suit my purpose, without being extremely hurt. Some others there are as well short as long, which slipped my memory. For this fault I humbly crave pardon, as well as for all the others I may have been guilty of in this little book: in compiling which I shall think my time happily spent, if it shall please God to give his blessing to it, by rendering it serviceable to the



SELECTÆ
E
PROFANIS SCRIPTORIBUS
HISTORIÆ.

LIBER PRIMUS.

DE DEO.

CAPUT I.

Consensus populorum omnium probat Deum esse.

Animal nullum est præter hominem, quod habeat notitiam aliquam Dei. At inter homines gens nulla est tam fera, quæ non sciat Deum esse habendum, etiamsi ignoret qualem habere deceat. Quoniam verò in re omni consensus firma gentium omnium est vox naturæ, et argumentum veritatis; confitendum est numen aliquod divinum esse. Cicero 1 *De legib. n. 14.* 1 *Tuscul. n. 43, 44.*

2. Consuetudo disputandi contra Deos est mala et impia, sive id fit seriò, sive simulatè. Itaque cum Protagoras, sophista maximus temporibus suis, posuisset i principio libri cujusquam, se dubitare an Dii essent; jus

Atheniensium exterminatus est ex urbe eorum atque agro, librique ejus combusti sunt in concione. Ferunt quoque talentum argenti fuisse propositum primum ei qui illum occidisset. Sic etiam dubitatio de Diis non potuit poenam effugere. *Seneca Epist.* 117. *Cicer.* 2 *De nat.* n. 62. 1 *De nat.* n. 29. 63. *Diod. Sic.* l. xiii:

CAPUT II.

Agnoscimus Deum ex operibus ejus.

1. QUIS est tam vecors, qui, cum suspexerit in caelum, non sentiat Deum esse? *Cicero* 1 *Tusc.* n. 70. *De arusp. resp.* n. 19. 2 *De Divin.* n. 148. 2 *De nat.* 15, et 90.

Pulchritudo mundi, ordo rerum caelestium, conversio solis, lunae, siderumque omnium, indicant satis aspectu ipso ea omnia non esse fortuita: et cogunt nos confiteri naturam esse aliquam praestantem aeternamque, quae, sit admiranda humano generi. *Ibid.*

2. Quemadmodum, si quis venerit in aedes aliquas, aut in gymnasium, videritque ibi distinctionem rerum omnium, ordinem, disciplinam; intelliget aliquem esse profectum, qui praesit, et cui pareatur; sic si quis intueatur motus perpetuos et certos, vicissitudines, ordines rerum caelestium tot tantarumque; necesse esse ut fateatur haec cuncta gubernari a mente aeterna. Cum autem nec mens nec potestas humana possit hoc efficere; Deus unus potest esse architectus et rector tanti operis ac muneris. *Ibid.*

CAPUT III.

Natura Dei est optima et praestantissima.

1. Sententiae veterum philosophorum de natura Dei fuerunt variae atque inter se dissidentes; quas longum ac difficile esset dinumerare. Naturam duce intelligebant Deum esse: sed non conveniebat inter illos, quae Deus esset. Itaque cum tyrannus Hiero quaesivisset *Simonide*, non solum poeta suavi, verum etiam viro docto

to sapientēque, quid Deus esset; postulavit sibi diem unum ad deliberandum. Cū idem quæreretur postridie ex eo, petivit biduum, et deinceps sæpius duplicavit numerum. Admirans Hiero requisivit cur ita faceret: *Quia, inquit, res videtur mihi tantò oòscurior, quantò diutius eam considero. Cicer. 1 De nat. n. 121. Ibid. n. 4, 5. Ibid. n. 60.*

2. Si, cū intramus templa, solemus esse compositi animo, habitu, incessuque: si accessuri ad sacrificium, submittimus vultum, aptamus togam, et studemus omni modo significare modestiam; debemus quoque disputare verecundè de naturâ Deorum, ne affirmemus aliquid temerè. *Seneca Quæst. 7. c. 30.*

Non possumus loqui rectè de numine divīno, nisi simus illustrati lumine ejus. Nam numen divinum est fons luminis, sicut et bonitatis. *Jamblic. de myster. c. 18.*

3. Deus non potest intelligi alio modo, nisi mens quædam libera, segregata à materiâ, omnia sentiens et movens. *Simplic. in Epict.*

Quid interest inter naturam Dei, et nostram? Pars melior nostri est animus: in illo pars nulla extra animum, totus est ratio. Effugit oculos, visendus est cogitatione. *Cicer. 1. Tusc. n. 66. Senec. 1 Quæst. præfat. 7. c. 30.*

4. Quomodo possumus intelligere Deum, nisi sempiternum? Natura, quæ dedit nobis notionem Deorum, insculpsit quoque in mentibus, ut credamus eos æternos et beatos. Thales interrogatus, quid esset Deus? *Quod, inquit, caret initio et fine. Cic. 1 De nat. n. 25. et 45. Diog. Laërt. in Thal.*

5. Nihil est quod Deus non possit efficere, et quidem sine labore ullo. Etenim ut membra hominum moventur mente ipsâ ac voluntate, sine contentione ullâ; sic omnia possunt fieri, moveri, mutari, numine Deorum. *Cicer. 3 De nat. n. 92.*

6. Quocumque flexeris te, habebis ibi Deum occurrentem tibi: nihil vacat ab illo, ipse implet opus suum. *Senec. 4 Benef. c. 8.*

7. Commoda quibus utimur, lux quâ fruimur, spiritus quem ducimus, dantur nobis et impertiuntur à Deo. *Cic. pro Ros.*

Dii fundunt munera sine intermissione diebus ac noctibus. Beneficia illorum nunc offeruntur ultro, nunc

dantur orantibus. Quis est qui non senserit munificentiam Deorum? Nemo est expers beneficiorum cœlestium: nemo est, ad quem non aliquid manaverit ex fonte illo benignissimo. *Am. n. 131. Senec. 4 Benef. c. iii. 4.*

CAPUT IV.

Deus regit ac videt cuncta.

1. Mundus administratur providentiâ Deorum, iidemque consulunt rebus humanis, nec solùm universis, verùm etiam singulis. *Cic. 1. Divin. n. 117.*

Hoc sit persuasum hominibus omnibus, Deos esse dominos ac moderatores rerum omnium, et ea, quæ gerantur, geri numine ac iudicio eorum: eosdem intueri, quali mente quisque sit, et habere rationem piorum atque impiorum. Si mentes fuerint imbutæ his opinionibus, metus supplicii divini revocabit multos à scelere. *2 De leg. n. 15.*

2. Ne quis putet se lucrari quicquam, si non habeat aliquem conscium delicti sui. Nam ille, in cuius conspectu vivimus, scit omnia. Patemur Deo: approbemus nos ei. *Senec. apud Lactant l. vi.*

Vivendum est, tanquam vivamus in conspectu omnium: cogitandum est, tanquam aliquis possit inspicere in pectus intimum; et potest. Nam quid prodest aliquid esse absconditum hominibus? Nihil clausum est Deo: interest animis nostris, et intervenit cogitationibus mediis, imò nunquam discedit. *Senec. Epist. 83.*

Qui crediderit Deum inspicere cuncta, non peccabit neque clanculùm, neque apertè. *Democrat. sentent.*

3. Cùm Thales interrogaretur an facta hominum fallerent Deos: *Illos ne cogitata quidem fallunt*, inquit. Admonuit nos hoc responso, ut vellemus habere non solùm manus puras, sed etiam mentes, cùm numen cœleste adsit cogitationibus nostris secretis. Sextus Pythagoricus dixit simili sententiâ: *Agens injustè nequaquam latebit Deum, et ne cogitans quidem.* *Valer. l. iii. c. 2. Sexti sentent.*

CAPUT V.

Deus colitur et placatur pietate.

1. PRIMA officia debentur Diis immortalibus, secunda patriæ, tertia parentibus, deinceps gradatim reliquis. *Cic. 2 Offic. n. ult.*

Tria sunt colenda maximè juvenibus, Dii, parentes, leges. *Stobæus Serm. 1.*

Vir bonus est summæ pietatis erga Deos : itaque sustinet animo æquo quicquid acciderit ei. Scit enim id accidisse lege divinâ, quâ universa reguntur. *Senec. Ep. 76.*

Pietate adversus Deos sublatâ, fides etiam, et societas humani generis, et excellentissima virtus, justitia, tollitur. *Cic. 1. Nat. n. 4. 2. De leg. n. 17.*

Debemus colere Deos. Cultus autem Deorum optimus est, ut veneremur semper eos mente purâ, integrâ, incorruptâ. Deus habet locum nullum in terrâ gratiorem animâ purâ. Non templa sunt struenda illi è saxis congestis in altitudinem : est consecrandus cuique in suo pectore. *Hieroc. in Pyth. carm. Senec. apud Lact. l. vi.*

Pietas et sanctitas efficiet Deos placatos. *Cic. 2. Offic. n. 11.*

2. Animadverto Deos non tam lætari precibus adorantium concinnatis arte et curâ, quàm illorum innocentiam et sanctitatem ; et eum esse gratiorem Diis, qui intulerit delubris eorum mentem puram et castam, quàm illum, qui cum carmine meditato accesserit. *Plin. in Paneg.*

Deus colitur non corporibus opimis taurorum contrucidatis, non auro, non argento, non stipe infusâ, in thesauros ; sed voluntate piâ et rectâ. Itaque boni, sunt religiosi etiam oblatò farre ac farinâ ; mali contrâ non effugiunt impietatem, quamvis cruentaverint aras multo sanguine. *Senec. Ep. 116. 1. Benef. c. 6.*

Facito sacra Diis castè et purè pro facultate, atque placare eos et quando ieris cubitum, et quando tempus matutinum venerit, ut sint animo benevolo in te. *Hesiod. Oper. ver. 336.*

CAPUT VI.

Deus est colendus, magis piè, quàm magnificè.

1. *HOMINES adeant cùsque ad Deos, adhibeant pietatem, amoveant opes.* Significat hæc lex probitatem esse gratam Diis, et sumptum esse removendum ab eorum cultu. Cùm enim paupertas debeat esse probro nemini inter homines, non est arcenda ab adytis Deorum. Præsertim cùm nihil sit futurum minùs gratum ipsi Deo, quàm viam ad colendum se et placandum non patere omnibus. *Cic. 2. Leg. n. 19. 25.*

Cùm Socrates faceret sacra tenuia de facultatibus exiguis, putabat se non præstare minùs, quam eos qui de magnis opibus cæderent hostias multas. Etenim aiebat non decere Deos, ut gauderent potiùs sacrificiis magnis, quàm exiguis: quia cùm scelesti sint plerumquè ditiores viris bonis, eorum sacrificia futura essent acceptiora. Itaque existimabat sacra illa et munera esse maximè grata Diis, quæ offerrentur ab hominibus maximè piis. *Xenoph. 1 Memor.*

2. Apud veteres Romanos Dii colebantur magis piè, quàm magnificè, placabantque eos, eò efficacius, quò simpliciùs, ex libamentis victùs sui, farre et salc. *Livius, l. iii. c. 57- Valer. l. ii. c. 1.*

L. Papyrius imperator adversùs Saninites dimicaturus fecit votum Jovi, si vicisset, pocillum vini. Imagines fictiles Deorum erant tum laudatissimæ: nullæ conficiebantur ex auro, nullæ ex argento. Nec deinde rempublicam pœnituit eorum qui coluerant Deos tales. Quippe Jupiter videbatur esse magis propitius, cùm statuæ ejus fingerentur ex argillâ, non verò conflarentur ex auro. Simulacra Deorum lignea aut fictilia, sunt dicata Romæ in templis usque ad Asiam devictam, unde luxuria invasit urbem. *Plin. l. xiv. c. 13. Juven. Sat. xi. 116.*

3. Alexander magnus dicitur coluisse magnificè Deos à pueritiâ. Cùm aliquando faciens sacrum injecisset manibus ambabus thura in ignem; Leonidas pædagogus ejus: *Adolebis, inquit, sic cùm subegeris regiones eas, ubi thura nascuntur. Interea utere farcè præsentibus.* Postea Alexander, Arabiâ, regione thuriferâ redactâ in ditionem

suam; memor reprehensionis olim factæ à Leonidâ, misit ei thura multa, odoresque alios, admonuitque ne vellet posthac esse parcus in honoribus Deorum. *Plut. in Alex.*

CAPUT VII.

Impii non placant Deum donis.

IMPII audiant Platonem, qui vetat dubitare quâ mente Deus sit futurus in eos; cum vir nemo probus velit donari se ab improbo. *Cicer. 2 Leg. n. 41.*

Jucundum non esset viro probo accipere dona, quæ non ignoraret dari animo malo. Si pietas adsit, nihil non potest esse gratum Deo: contrâ autem, si desit. *Hierocl. in Pyth. cærm.*

Scelesti inducunt in animum suum, se posse placare Jovem donis et hostiis; at perdunt operam et sumptum. *Plau. in Rudente.*

Bias navigabat aliquando cum impiis: quum verò, tempestate exortâ, navis quateretur fluctibus, ilique invocarent Deos: *Silete*, inquit, *ne Dii audiant vos navigare in hâc nave.* Idem respondit nihil homini impio percontanti quid esset pietas. Cùmque ille sciscitaretur causam silentii: *Taceo*, inquit, *quia quæris de rebus nihil pertinentibus ad te.* *Diog. Laert. in Bian.*

2. Puras Deum, non plenas, aspicit manus. *P. Syrus.*

Mentes Deorum possunt placari pietate, et religione, et precibus justis, non superstitione contaminatâ, neque hostiis cæsis ad perficiendum scelus. *Cicer. pro Cluent. n. 194.*

Æschinus dicit apud Terentium patri: Pater, tu comprecare Deos potius, quàm ego. Nam certò scio eos obtemperatos tibi magis, quòd es vir melior multò, quàm ego sum. *Terent. Adelph. act. iv. sc. 5.*

Cultus primus Deorum est, credere Deos. Deinde, scire eos esse qui præsent mundo, qui gerunt tutelam generis humani, curiosi singulorum. Vis propitiare Deos? Esto bonus. Quisquis imitatus est eos, satis coluit. *Senec. Ep. 95.*

Ille honorat Deum optimè, qui facit mentem suam similem Deo, quantum potest fieri. *Sexti sentent.*

Dilige Deum plùs quàm animam. Si non diligis Deum, non ibis ad Deum. Non amàbis autem Deum, nisi habueris in te aliquid simile Deo. *Ibid.*

Conandum est, ut efficiamur similes Deo, quantum licit homini. Homo autem efficitur similis Deo prudentiâ, sanctitate. *Plato in Thæet.*

CAPUT VIII,

Mens bona et inventio artium veniunt à Deo.

1. VIRTUS non advenit à naturâ, neque à doctrinâ, sed à numine divino. Natura non dat virtutem. Naschimur quidem ad hoc, sed sine hoc. *Plato in Menon. Senec. Ep. 90.*

Nemo vir bônus est sine Deo. An potest aliquis exsurgere supra fortunam, nisi adjutus ab illo? Ille dat consilia magna et erecta: ille habitat in unoquoque viro-
rum bonorum. Si videris hominem interritum periculis, intactum cupiditatibus, felicem inter adversa, placidum in tempestatibus, despicientem quasi ex loco superiore humana omnia; nonne admiraberis eum? Nonne dices: *Virtus illa est major et altior corpusculo, in quo est; vis divina descendit illuc.* Sen. Ep. 41.

Si quis est animo eccellente, et moderato; si quis ridet quicquid cæteri mortales timent aut optant; cælestis potentia agitat eum ac regit, res tanta non potest stare sine adminiculo numinis.

Itur ad astra frugalitate, temperantiâ, fortitudine, aliisque virtutibus. Dii non sunt fastidiosi, non invidi. Admittunt nos, et porrigunt manum ascendentibus. Imò Deus venit ad homines, et ih homines. Mens bona nulla est sine Deo. *Ep. 73.*

2. P. Scipio Africanus nihil cœpit priusquam sedisset diutissimè in cellâ Jovis, quasi acciperet inde mentem divinam, et consilia salutaria reipublicæ. Propterea solitus erat ventitare in Capitolium ante diluculum. *Victor. De vir. ill. c. 49. A. Gellius, l. vii. c. 1.*

Cicero in oratione pro Syllâ palàm prædicat, consilium patriæ servandæ fuisse injectum sibi à Diis, cum Catilina conjurâset adversus eam. O Dii immortales! *Vos profectò incendistis tum animum meum cupiditate con-*

servandæ patriæ. Vos avocâstis me à cogitationibus omnibus cæteris, et convertistis ad salutem unam patriæ. Vos denique prætulistis menti meæ clarissimum lumen in tenebris tantis erroris et inscientiæ. Tribuam enim vobis quæ sunt vestra. Nec verò possum dare tantum ingenio meo, ut dispexerim sponte meâ in tempestate illâ turbulentissimâ reipublicæ, quid esset optimum factu. *Ib. n. 40.*

Nihil insolens et gloriosum exiit unquam ex ore Timoleontis: qui quidem cùm audiret laudes suas prædicari, nunquam dixit aliud quàm se habere atque agere gratias maximas Diis, quòd cùm statuissent liberare Siciliam à dominatu tyrannorum, voluissent se potissimum esse ducem hujus operis. Putabat enim nihil rerum humanarum agi sine numine Deorum. *Corn. Nepos in Timol. c. 4.*

3. Quidquid boni egeris, puta acceptum esse à Diis; inquebat Bias. *Diog. Laërt. in Bian.*

M. Antoninus, in libro de vitâ suâ, agit gratias Diis verbis multis, quòd dederint sibi sæpius monita et adjumenta ad instituendam vitam sapienter; quod eriperint se et juvenem et senem ab occasionibus multis peccandi; quòd concesserint bonos parentes, præceptores, amicos. *M. Ant. l. i. c. 17.*

Cùm divitiæ soleant afferre hominibus aut amorem voluptatis, aut animi superbiam; opus est homini auxilio divino, ut modestiam colat. *Excerpt. Nic. Damas.*

Credendum est neminem virorum bonorum talenti fuisse, nisi adjuvante Deo. Et nemo unquam fuit vir magnus sine afflatu aliquo divino. *Cic. 2. De nat. n. 165.*

Si mens, virtus, fides, concordia inest in genere humano; unde hæc potuerunt defluere in terras, nisi à superis? *Ibid. n. 79.*

4. Cura prisorum in inveniando, benignitas in tradendo, est donum Deorum. Si quis fortè credit illa potuisse excogitari ab homine, intelligit ingratiè munera Deorum. *Plin. l. xxvii. c. 1. 2.*

Ne dixeris illa, quæ invenimus, esse nostra. Semi-na artium omnium insita sunt nobis, et Deus magister ex occulto acuit et excitat ingenia. *Senec. 4. Benef. c. 6.*

CAPUT IX.

Templa ad augendam pietatem exstructa sunt.

CENSEO delubra esse excitanda Diis in urbibus. Nec sequor magos Persarum, quorum consilio Xerxes dicitur inflammâsse templa Græciæ. Indignabantur quippe includi parietibus Deos, quibus omnia, deberent esse patentia ac libera, quorumque hic mundus omnis esset templum et domus. Græci et Romani meliùs sensère ac fecère: qui, licèt agnoscerent divinum numen esse ubique diffusum, tamen, ut auerent pietatem nostram in Deos, voluerunt illos incolere easdem urbes, quas nos. Affert enim hæc opinio religionem utilem civitatibus. Siquidem bene dictum est à Pythagorâ doctissimo viro, pietatem et religionem maximè versari in animis, cùm rebus divinis operam damus in templis, cernentes simulacra Deorum. *Cic. 2. Leg. n. 26.*

Thales, qui fuit unus è sapientibus illis septem, dixit, oportere homines existimare, Deos omnia cernere; Deorum omnia esse plena: ut ubique tam sanctè castèque agerent, quàm si in fanis essent maximè religiosi.

Olim tanta reverentia præstabatur templis, ut in iis excreare aut mingere nefas esset. *Arrianus in Epiet. l. iv. c. 11.*

CAPUT X.

Tuta et honorata inter hostes pietas.

1. Cùm Galli, captâ urbe Româ, Capitolium obsiderent, et intenti essent ad id, ne quis hostium posset evadere; juvenis Romanus convertit in se civium atque hostium admirationem. Sacrificium erat statum genti Fabiæ in colle Quirinali. Ad quod faciendum cùm C. Fabius Dorso descendisset è Capitolio, ferens sacra manibus; per medios hostes transiit: et nihil motus voce cujusquam et minis, in Quirinalem collem pervenit. Ibi omnibus rebus peractis solemniter regressus est viâ eadem, quâ iverat, similiter constanti vultu graduque, sperans

Deos, quorum cultum ne in mortis quidem periculo deseruisset, futuros esse sibi propitios. Et quidem pietas ejus tuta fuit ab hostibus, rediitque in Capitolium ad suos incolumis, Gallis, aut attonitis miraculo juvenilis audaciæ, aut motis religione; cujus negligens non erat gens illa. *Livius, l. v. c. 46.*

2. Cùm Camillus pergeret ad delendam urbem Veios, decimam partem prædæ voverat Apollini. Urbe captâ ac direptâ, ut liberaretur eo voto, senatus misit nave tres legatos, qui ferrent Delphos patram auream, donum Apollini. Hi excepti à Liparensibus piratis haud procul freto Siculo, devecti sunt Liparas. Mos erat civitatis prædam dividere, velut partam publico latrocinio. Fortè eo anno erat in summo magistratu Timasitheus quidam; vir similior Romanis quàm suis; qui et legatos et Deum, cui mittebatur donum, reveritus ipse, multitudinem quoque justâ religione implevit: adduxit in publicum hospitium legatos, prosecutus est eos etiam cum præsidio navium Delphos, et inde reduxit Romam sospites. Senatus hospitium propterea cum illo institui voluit, donaque ei publicè sunt data. *Livius, l. v. c. 21. et 28.*

CAPUT XI.

Publica religio privatis affectibus prælata.

Cùm Galli ad Romam ferro et igne vastandam accelerare dicerentur, et nulla spes esset urbem posse defendi; multi Romanorum per agros dilapsi sunt, multi urbes petierunt finitimas, asportantes quæcumque habebant pretiosissima. *Liv. l. v. c. 40.*

Interim virgines Vestales, omissâ rerum suarum curâ, cùm consultassent, quæ sacra secum ferenda essent, et quæ relinquenda, quia vires decrant ad ferenda omnia; defoderunt in loco sacro quædam condita in doliolis; alia ferentes, onere inter se partito, ingressæ sunt viam quæ ducebat ad Janiculum. Eas cùm conspexisset Albinus è plebe Romanâ homo, plaustro conjugem ac liberos vehens inter cæteram turbam quæ urbe excedebat; ratus est irreligiosum esse, sanctas virgines pedibus ire, portantes manibus sacra populi Romani, se verò ad suos in vehiculo conspici. Itaque statim omisso, quod inceperat,

itinere, descendere uxorem ac liberos jussit, virgines sacraque in plaustrum imposuit, et pervexit Cære, quod iter erat Vestalibus. Aded tunc in ultimo etiam casu religio publica antecellebat privatis affectibus, salvumque erat discrimen rerum divinarum et humanarum. *Florus*, l. i. c. 13.

CAPUT XII.

Impii seriùs ocyùs dant pœnas.

1. Dionysius major, Siciliae tyrannus, ut crudelitatem exercuit in suos, sic fuit impius in Deos furtis et cavillationibus. Cùm in fanum Jovis venisset, detraxit ei aureum amiculum, quo fuerat à tyranno Gelone exornatus: atque in eum etiam cavillatus est, dicens: *Æstate grave esse aureum amiculum, hieme frigidum.* Eique lanenum pallium injecit, quod dicebat aptum esse ad omne tempus. Idem Æsculapio barbam auream demi jussit: *Neque enim, inquit, convenit, barbatum esse filium, cùm in omnibus fanis pater ejus Apollo imberbis sit.* Fano quodam expilato navigabat Syracusas; et cùm secundissimè cursum teneret: *Vidētis-ne, inquit, amici, quàm bona navigatio detur sacrilegis à Diis immortalibus?* Non exsolvit quidem statim Dionysius debita impietati supplicia: at postea insidiis suorum oppressus, interfectus est. Divina enim ira plerumque lento gradu procedit ad vindictam sui, tarditatemque supplicii gravitate compensat. *Cic. 1 De nat. n. 38. Just. l. xx. c. 5. Valer. l. i. c. 1.*

2. Cùm à Sicilia rediens Pyrrhus rex Epiri, classe præterveheretur Locros, thesauros fani Proserpinæ spoliavit, et pecuniâ in naves impositâ, ipse terrâ est profectus. Quid ergo evenit? Classis ejus postero die lacerata est fœdissimâ tempestate, omnesque naves, quæ sacram pecuniam habebant, ejectæ sunt in litora Locrorum. Quâ tantâ clade edoctus tandem rex esse Deos, jussit pecuniam omnem conquisitam referri in thesauros Proserpinæ. Nec tamen unquam postea quicquam prosperi evenit ei: pulsusque ex Italiâ, ignobili morte occubuit, cùm temerè noctu ingressus esset Argos. Lanceâ primum leviter vulneratus fuerat à juvene quodam Argivo. Matrem habebat hic anum pauperulam, quæ inter alias mulieres

spectans prælium è tecto domûs, quum videret Pyrrhum ferri toto impetu in auctorem vulneris sui; timens vitæ filii, protinus tegulam corripuit, et utrâque manu libratam demisit in caput regis. Quo vulnere dejectus ex equo Pyrrhus, à Zopyro quodam est obruncatus. *Liv. l. xxix. c. 18. Plut. in Pyrrho.*

3. Longo post tempore Q. Pleminius præpositus præsidio Romanorum in urbe Locrorum, cum à sacrorum spoliatione non abstinisset, et eodem Proserpinæ thesauros diripisset, quos olim Pyrrhus; ex senatusconsulto prætor et legati Locros missi, præcipuam, ut mandatum erat, curam religionis habuere. Omnem enim sacram pecuniam, quæ apud Pleminium et milites erat, in thesauris Deæ reposuerunt, cum eâ quam duplam Româ attulerant, ac piaculare sacrorum fecerunt. Ipse Pleminius, antea à suis hostiliter laceratus, et naso aribusque mutilatis, propè exanimis relictus, Romam missus est, causam dicturus. Sed ante causæ dictionem teterrimo genere morbi in carcere est consumptus. *Liv. l. xxix. c. 19. 21. cap. 9. Valer. l. ii c. 1.*

4. Xerxes ante navale prælium, quo victus est à Themistocle, miserat quatuor millia armatorum Delphos, ad diripiendum templum Apollinis, quasi gereret bellum non tantum cum Græcis, sed etiam cum Diis immortalibus. Quæ manus tota deleta est imbribus et fulminibus: ut intelligeret quàm nullæ essent hominum vires adversum Deos. *Justin. l. ii. c. 12.*

5. Contrâ Agesilaus, rex Lacedæmoniorum, magnam templis reverentiam habuit. Maxima laus fuit victoriæ, quam de Atheniensibus et Bœotis apud Coroneam adeptus est, quod antetulit iræ religionem. Cum enim plerique ex fugâ se in templum Minervæ coniecissent, et quæreretur ab eo quid his vellet fieri; eos vetuit violari; etsi aliquot vulnera acceperat in prælio, et iratus videbatur omnibus qui adversus se arma tulerant. Neque solum in Græciâ sancta habuit templa Deorum, sed etiam apud barbaros summâ religione omnia simulacra atque aras conservavit. Sic Alexander magnus, cum Thebas everteret, non est oblitus pietatis erga Deos; sed cavito summo studio ne Deorum ædes, et alia sacra loca violarentur. In expeditione quoque Asiaticâ cum à Persis repeteret pœnas, abstinuit à locis omnibus quæ Diis dicatæ

erant: quamvis Persæ hoc potissimum injuriæ genere sæviissent in Græciâ. *Corn. Nep. in Agesil. c. 4. Polyb. l. v.*

CAPUT XIII.

Quæ vota facienda sint Deo.

1. DEUM roga bonam mentem, bonam valetudinem animi, deinde corporis. Quidni tu hæc vota sæpe facias? Scito te esse omnibus cupiditatibus liberum, cum eò perveneris, ut Deum nihil roges, nisi quod rogare possis palam. Quanta nunc dementia est multorum hominum! Insurrant Diis vota turpissima: si quis admoverit aurem, conticescent; et quod scire homines nolunt, Deo narrant. Tu sic vive cum hominibus, tanquam Deus videat; sic loquere cum Deo, tanquam homines audiant. *Senec. Ep. 10.*

Pædalii, gens Indica, nihil aliud petebant à Diis quàm justitiam. *Exc. Nec. Damas.*

Dicebat Apollonius has tantùm preces esse profundendas ab homine accedente ad Deorum templa: *O Dii, quæ mihi conveniunt præstate.* *Philost. l. i. c. 2.*

2. Socrates, qui fuit quasi quoddam terrestre oraculum humanæ sapientiæ, arbitrabatur nihil ultrà petendum esse à Diis, quàm ut bona tribuerent: cum ii soli scirent, quid unicuique esset utile; nos autem plerumque ea expeteremus votis, quæ foret melius non impetrâsse. Etenim involuta densissimis tenebris mens mortalium effundit sese in cæcas præcationes. Divitias appetit, quæ fuerunt multis exitio; honores concupiscit, qui complures pessumdederunt: splendida conjugia sollicitè quærit, quæ ut aliquando illustrent, ita nonnunquam funditis domos evertunt. Desinat tandem stultè inhiare iis rebus, quæ multorum malorum causa sæpe sunt, seque totam permittat arbitrio Deorum: quia qui tribuere bona solent, etiam eligere aptissima possunt. *Valer. l. vii. c. 2.*

Permites ipsis expendere numinibus, quid

Conveniat nobis, rebusque sit utile nostris.

Nam pro jucundis aptissima quæque dabunt Dii.

Carior est illis homo, quàm sibi, &c.

Juven. Sat. x. ver. 347.

Laudabat Socrates has antiqui poëtæ preces: *O Jupiter, ea quæ bona sunt, nobis orantibus, aut non orantibus, tribue: quæ verò mala, etiam orantibus ne concede.* Plat. in Alcib. 2.

CAPUT XIV.

Homo præcipuum opus Dei.

1. ANIMAL hoc providum, sagax, memor, plenuræ consilii, quem vocamus hominem, generatum est à supremo Deo præclarâ quâdam conditione. Solum est enim ex tot animantium generibus particeps rationis et cogitationis, cùm cætera sint omnia expertia. Quid est autem ratione præstantius? Quæ cùm adolevit et perfecta est, nominatur ritè sapientia. *Cicer. 1 Leg. n. 22. 27.*

Propter ingeneratam homini à Deo rationem, est aliqua ei cum Deo similitudo, cognatio, societas. Itaque ad commoditates hominum tantam rerum ubertatem natura, hoc est Deus, largita est, ut ea, quæ gignuntur, meritò videantur donata nobis esse consultò, non autem nata fortuitò. Artes præterea innumerabiles repertæ sunt, docente naturâ: quam imitata ratio, consecuta est multa ad vitam necessaria, aut commoda.

2. Eadem natura hominem non solùm mente ornavit, sed etiam dedit ei figuram corporis habilem et aptam ingenio humano. Nam cùm cæteris animalibus caput in terram pronum dedisset: solum hominem erexit, excitavitque ad cæli, quasi cognationis domiciliique sui, conspectum.

Pronaque cùm spectent animalia cætera terram,
Os homini subline dedit, cælumque tueri
Jussit, et erectos ad sidera tollere vultus.

Ovid. Met. i. ver. 84.

Omitto opportunitates habilitatesque alias corporis, moderationem vocis, orationis vim, quæ conciliatrix est humanæ societatis.

3. In primâ rerum constitutione cùm Dii universa disponerent, rationem hominis habuerunt. Non est hominum ultuarium et incogitatum opus. Cogitavit nos antè natura, quàm fecit. Ita est: carissimos nos habuerunt Dii, habentque, et in orbe proximos ab ipsis collocave-

runt, qui maximus honos tribui potuit. *Senec. Benef. vi. c. 23. et. ii. c. 29.*

Qui se ipse norit, intelliget se habere aliquid divinum, semperque et faciet et sentiet aliquid dignum tanto munere Deorum. *Cicer. 1. Leg. n. 59.*

Decet eos, qui student præstare cæteris animalibus, summâ ope niti, ne vitam transeant veluti pecora, quæ natura finxit prona, atque obedientia ventri. Constamus animo et corpore. Alterum nobis commune est cum Diis, alterum cum belluis. Animus debet imperare, corpus verò servire. Itaque admiranda et detestanda est pravitas eorum, qui dediti gaudiis corporis, in luxu atque ignaviâ ætatem agunt: ingenium autem incultu et socordiâ sinunt torpescere. *Sallust. Bell. Cat. c. 1. Bellum Jugurth. c. 2.*

CAPUT XV.

Virtus proprium atque unicum hominis bonum.

UT ad cursum natus est equus, ad arandum bos, ad indagandum canis; sic homo ad duas res natus est, intelligendum, et agendum convenienter naturæ, id est, rationi: in quo positum est Honestum, et quod proprium atque unicum est in terris hominis bonum. Non enim refert ad felicitatem ejus, quantum agrorum aret, à quàm multis salutetur, quàm prælioso lecto cubet: sed quàm bonus sit. Bonus autem est, si sit in eo ratio ad naturæ voluntatem accommodata et perfecta, quæ virtus et Honestum vocatur. *Cic. 2. De fin. n. 39. Senec. Epist. 76.*

In quatuor partes Honestum dividi solet; prudentiam, justitiam, fortitudinem, et temperantiam. Ex singulis autem illis virtutibus certa officiorum genera nascuntur, in quibus colendis sita est omnis vitæ honestas, et in negligendis turpitudine. Itaque de unaquaque eorum agemus, et quatuor libris complectemur quæ pertinent ad quatuor illas virtutes. 1. *Offic. n. 14. n. 3.*

LIBER SECUNDUS.

DE PRUDENTIA.

CAPUT I.

Inest mentibus insatiabilis cupiditas veri videndi.

Munus proprium Prudentiæ est indagatio atque inventio veri. Qui enim maximè perspicit quid in re quæque verissimum sit, is prudentissimus haberi solet. *Cicer. 1. Offic. n. 15.*

Tributum est à naturâ generi omni animantium, ut se vitam corpusque tueatur, declinet ea quæ videntur nocitura, et inquirat ac paret omnia quæ sint ad vivendum necessaria. At inquisitio atque investigatio veri, propria est hominis, qui unus est rationis particeps: et naturâ inest mentibus nostris insatiabilis quædam cupiditas veri videndi. Itaque cùm sumus necessariis negotiis et curis vacui, tum avemus aliquid videre, audire, addiscere, et putamus cognitionem rerum aut occultarum aut admirabilem esse ad beatè vivendum necessariam. In scientiâ excellere pulchrum ducimus: errare autem, nescire, decipi, malum et turpe. *Cicer. 2. Off. 18. 1 Tusc. n. 44.*

CAPUT II.

Scientia pabulum animi.

1. In ipsis rebus, quæ discuntur et cognoscuntur, insunt profectò invitamenta quædam, quibus movemur ad discendum cognoscendumque. Etenim an non videmus eos, qui ingenuis studiis atque artibus delectantur, aliquando non habere rationem nec valetudinis nec rei familiaris, et maximis laboribus consequi eam, quam ex discendo ca-

piunt, voluptatem? Quem ardorem studii censetis fuisse in Archimede, qui dum in pulvere describeret quædam attentius, ne senserit quidem Syracusas, patriam suam, esse captas? Quid de Pythagorâ et Platone loquar, qui judicaverunt veniendum sibi esse eò, ubi aliquid esset quod disci posset, tantas regiones barbarorum obiêrunt, tot maria transmiserunt? Quid de Democrito, qui dicitur oculis se privâsse ut animus quàm minimè abduceretur à cogitationibus, qui patrimonium neglexit, agros incultos deseruit? *Cicer. 5. De fin. n. 48, &c. h. 87.*

2. Carneades laboriosus et diuturnus sapientiæ miles, nonaginta expletis annis, habuit eundem finem vivendi ac philosophandi. Ita quidem se inquirendæ veritati addixerat, ut, cùm recubisset cibi capiendi causâ, manum ad mensam porrigere oblivisceretur, aliò abstractus cogitationibus. *Valer. l. viii. c. 7.*

Est animorum ingeniorumque nostrorum naturale quoddam quasi pabulum, consideratio contemplatioque naturæ: et indagatio ipsa rerum magnarum occultarumque habet oblectationem. *Cicer. 4. Acad. n. 127.*

CAPUT III.

Pertinax labor et disciplina naturam vincunt.

1. In Demosthene, Græcorum oratorum principi, tantum discendi studium tantusque labor fuisse dicitur, ut tandem superaret impedimenta naturæ diligentia atque industria. Cùm ita balbus esset, ut rhetoricæ artis, cui studebat, primam literam non posset dicere; perfecit exercitatione, ut nemo putaretur locutus planius eo. Deinde perduxit ad gratum auribus sonum vobem suam, quæ propter exilitatem acerba erat. Laterum firmitate destitutus, mutuatus est à labore eas vires quas corporis habitus negaverat. Conjectis in os calculis, summâ voce versus multos pronuntiabat inambulans, et ardua loca celeri gradu scandens. *Cicer. 1. De orat. n. 260. Valer. l. viii. c. 7. Quintil. l. x. c. 3. l. xi. c. 3.*

Declamitans in maris littore, in quod se fluctus illidebat, consuescebat concitatæ multitudinis fremitus non *expavescere*. Cellam quoque ædificâsse subterraneam dicitur, in quâ duos tresve menses continuos aliquando in-

clusus, operam dabat gestui et voci, et quidem mediâ parte capitis abrasâ, ut in publicum sine verecundiâ prodire non posset. Sic diu præliatus adversus naturam, victor abiit, et malignitatem ejus pertinacissimo animi robore superavit. *Ibid.*

Nihil est quod non expugnet pertinax opera, et intenta ac diligens cura. *Senec. Ep. 50.*

Labor omnia vincit

Improbis. *Virgil. 1 Georg. ver. 146.*

2. Erat Cleanthi tardum obtusumque ingenium: erat et summa rerum omnium inopia. At ubi ejus animus sapientiæ amor occupavit, tarditatem ingeni acri studio ac diligentia vicit, Zenoni interdium assistens auditor; inopiam verò, aquam è puteo noctu hauriens, acceptâ ab hortulano mercede. Aiunt eum aliquando in judicium vocatum fuisse, quòd robusto admodum ac pingui corpore esset, cum nullam artem, unde viveret, videretur profiteri. At ubi quæstus sui ac victus testes adhibuit, hortulanum, cui aquam hauriebat, et mulierem, apud quam pinsebat; non solùm est dimissus, sed etiam ab Areopagitibus judicibus donatus decem minis, quas noluit accipere. *Diog. Laërt. Clean.*

3. Accipimus Stilponem Megaricum philosophum hominem sanè acutum fuisse et temporibus suis probatum. Scribunt ipsius familiares hunc naturâ et ebriosum et et mulierosum fuisse: neque hoc scribunt vituperantes eum, sed potiùs ad laudem. Significant enim vitiosam naturam ab eo sic edomitam et compressam fuisse doctrinâ, ut nemo unquam vinolentum illum viderit, nemo in eo vestigium libinis deprehenderit. *Cic. De fato, n. 10.*

Zopyrus, qui profitebatur se pernoscere hominum mores naturasque ex corpore, oculis, vultu, fronte, magno in conventu dixit Socratem stupidum esse et bardum; addidit etiam mulierosum: in quo Alcibiades, qui aderat, dicitur cachinnum sustulisse. Ipse vero Socrates, *Hæc vitia sibi ingenita fuisse naturâ non dissimulavit: sed ratione à se dejecta*, dixit. Et sane vitia ex naturalibus causis nasci possunt. sed extirpari et funditus tolli non possunt, nisi voluntate, studio, disciplinâ. *4 Tusc. n. 80.*

Animus hominis, quicquid sibi imperat, obtinet. *P. Syr.*

Cicero Quintum fratrem laudans, quòd eos, quibus præerat in Asiâ provinciâ, contineret in officio, ostendit

his verbis quid doctrina posset efficere: *Tibi fuit hoc facilimum, cujus natura talis est, ut etiam sine doctrinâ videatur moderata esse potuisse: ea autem adhibita doctrina est, quæ vel vitiosissimam naturam posset excolere.* 1 Epist. ad Quint.

CAPUT IV.

Quæsitæ vitæ periculo scientia.

1. PLATONICUS philosophus, nomine Taurus, discipulos ad philosophiam summo studio capessendam excitabat multis exemplis, et eâ re quam dicebat Euclidem Socraticum factitasse. Caverant decreto Athenienses, ut, si quis civis Megarensis deprehensus esset pedem Athenas intulisse, id ei capitale foret. Tum Euclides Megarensis, qui ante id decretum consueverat Athenas commorari, et audire Socratem, tunicâ longâ muliebri indutus, pallio versicolori tectus, et caput atque os velatum habens, nocte ex urbe Megaris Athenas commeabat, ut saltem aliquo tempore consiliorum sermonumque Socratis fieret particeps; rursusque sub lucem eâdem veste illâ tectus domum redibat, millia passuum multa emensus. Sic ille vitæ periculum adire non dubitabat, comparandæ sapientiæ causâ. *A. Gellius, l. vi. c. 10.*

2. Antisthenes discipulos hortabatur ad dandam operam sedulam sapientiæ: at pauci obtemperabant. Itaque tandem indignatus dimisit à se omnes, inter quos erat et Diogenes. Cùm verò hic, incensus magno audiendi philosophi studio, ad eum tamen ventitaret, eique adhæret pertinaciter; minatus est Antisthenes, se percussurum illi caput baculo, quem solebat manu gestare, et his minis non territum reipsa percussit aliquando. Non recessit propterea Diogenes; sed animo obstinato ad imbuendum pectus philosophiæ præceptis, *Percute, inquit, si ita placet. Ego tibi caput præbebo. Neque verò tanturum invenies fastem, ut me à tuâ scholâ abigas.* Admisit tandem tam cupidum doctrinæ discipulum Antisthenes, et eum maximè amavit. *Ælian. l. x. c. 16. Diog. Laert. in Antist.*

CAPUT V.

Doctus indocto multùm præstat.

1. Accessit ad Aristippum philosophum paterfamilias, rogavitque ut filium suum susciperet erudiendum. Cùm verò ille pro mercede petisset quingentas drachmas; pater deterritus pretio, quod ignaro avaroque homini nimium videbatur, dixit se minoris empturum esse mancipium. Tum philosophus: *Eme, inquit, & habebis duo.*

2. Alius paterfamilias quæsit ab eodem Aristippo, quid commodi consecuturus esset filius suus, si eum literis institui curaret? *Si nullum alium fructum percipiet, respondit ille, hunc cerè quòd in theatro* (cujus tam erant sedilia marmorea) *non sedebit lapsis super lapidem.* Hoc gemino responso innuebat vir prudens, eos, quorum ingenium excultum non fuisset, similes videri posse aut mancipiorum aut lapidum. Tantumque doctrinæ tribuebat, ut interrogatus quodnam discrimen esset inter homines doctrinâ excultos, & indoctos? responderit: *Idem quòd inter equos domitos & indomitos. Diog. Laërt. in Arist.*

Ut ager, quamvis fertilis, sine culturâ fructuosus esse non potest; sic sine doctrinâ animus. Cultura autem animi philosophia est, quæ extrahit vitia radicibus, præparat animos ad satus accipiendos, eaque mandat his & serit, quæ cùm adoleverint, fructus ferent uberrimos. *Cicer. 2. Tusc. n. 13.*

Salsè ridebat Diogenes Sinopensis inertiam et incuriam Megarensium, qui liberos nullis bonis artibus instruebant, curam verò pecorum diligentem habebant. Dicebat enim: *Malle se Megarensis alicujus arietem esse, quàm filium.* Non absimili sententiâ, sed aliam ob causam, dixit de Herode Judæorum rege Augustus: *Meliùs est Herodis porcum esse quàm filium.* Abstinebat quippe Herodes à porcis; à filiorum cæde non abstinebat. *Ælian. l. xii. c. 56. Macrob. 2 Satur. c. 4.*

CAPUT VI.

Vir doctus potius non vult ditescere, quam non potest.

1. Cùm Thaleti Milesio paupertatem verterent vitio cives sui, et contenderent studium philosophiæ esse inutile ad rem augendam etiam cupienti; voluit ille objur-gatores suos convincere, ostendereque philosophum facere posse pecuniam, si ei ita visum fuerit: eaque arte est usus. Intellexerat, ut aiunt, ex astrologiâ olearum uber-tatem hoc anno fore. Itaque hieme nondum exactâ, pau-corum nummorum copiâ instructus, conduxit parvo pre-tio omnia præla et trapeta quæ Mileti et in Chio insulâ erant, cùm nemo contrâ licitaretur. Ubi verò conficiendî olei tempus venit, multis undique et simul ad præla acceden-tibus, ille ea elocavit tanti quanti voluit, et magnâ inde pecuniâ coactâ, probavit facile esse philosophis ditescere si velint: sed eos in alia longè præstantiora studium con-ferre. *Cicer. 1 Divin. n. 112. Aristot. 1 Polit. c. 11.*

2. Ego, inquit Vitruvius de se ipso, parentum curâ et præceptorum doctrinâ paravi animo possessiones et divitias, quarum ea proprietas est, is fructus, ut nihil desideretur amplius. Nonnulli hæc levia judicantes, pu-tant eos tantùm esse sapientes qui pecuniâ sunt copiosi. Itaque ad id unum contententes, audaciâ adhibitâ opes et notitiam consequuntur. Ego autem non ad pecuniam parandam architecturæ aliisque artibus studium dedi: sed putavi sequendam potius tenuitatem cum bonâ famâ, quàm abundantiam cum infamiâ. Neque est mirandum quòd ita ignotus sim pluribus. Cæteri architecti rogant et ambiunt, ut architectentur: mihi autem à præceptoribus est traditum; oportere eum, qui curam alicujus rei suscipit, rogari, non verò rogare. *Vitruv. præfat. l. vi.*

CAPUT VII.

Ea viatica paranda sunt, quæ cum naufrago enatent.

1. Aristippus philosophus Socraticus, de quo suprâ, interrogatus quid differret sapiens ab insipiente? *Mitte*, inquit, *utrumque ad ignotos; et disces*. Quæ responsio, quàm vera esset, ipsius exemplo probatum est. Cùm ejectus naufragio in littus Rhodiorum, animadvertisset geometricas figuras; exclamavit primum: *Bene speremus, & amici, hominum enim vestigia conspicio*. Deinde in oppidum Rhodum contendit, et rectâ gymnasium devenit, ibique de philosophiâ disputans, magnis muneribus est donatus; ita ut vestitum, et quæ opus essent ad victum, præstaret iis, qui unâ naufragium fecerant. Cùm deinde comites ejus, in patriam reverti cupientes, interrogâssent eum quidnam vellet domum renunciarî, mandavit dicerent: *Ejusmodi possessiones et viatica liberis parari à parentibus oportere, quæ etiam è naufrago unâ possent enatari*. Namque ea sunt vera præsidia vitæ, quibus neque fortunæ iniquitas, neque publicarum rerum mutatio, neque belli vastatio potest nocere. *Diog. Laërt. in Aristip. Vitruv. præfat. l. vi.*

2. Theophrastus homines hortando, ut docti potius essent, quàm fortunæ confiderent, prædicabat. *Doctum solum ex omnibus, neque in alienis locis peregrinum esse, neque, amissis familiaribus et necessariis, inopem amicorum: sed in omni civitate civem censeri: adversosque fortunæ casus posse despiciere*. *Ibid.*

Sancitum erat legibus Grecorum, ut parentes omnes à liberis alerentur. Athenienses verò illos tantùm parentes ali à filiis jubebant, qui eos artibus erudissent. Etenim fortuna facillimè adimit hominibus munera, quæ dedit: disciplinæ verò cum animis conjunctæ, nullo tempore deficiunt, sed permanent stabiliter ad summum exitum vitæ. Itaque ego, inquit Vitruvius, maximas infinitasque parentibus ago atque habeo gratias, quod Atheniensium legem probantes, me erudiendum curaverunt. *Ibid.*

3. Multi ex iis Atheniensibus, qui, acceptâ magnâ clade in Siciliâ, domum reverti sospites potuere, adiêrunt Euripidem, se ei salutem suam debere confitentes; dixeruntque alios fuisse emissos è vinculis, quod edocuisset dominos suos quædam ipsius carmina, quæ memoriâ tenuerant: alios, qui post adversam pugnam errabant per agros omnium egeni, fuisse cibo et potu recreatos propter decantatos ejus versus aliquos. Erant quippe Siculi præ cæteris Græcis studiosissimi atque appetentissimi tragædiarum Euripidis: quarum si quid afferretur ab iis qui in insulam appellebant, illud avidè arripiebant, lætisque secum invicem communicabant. Quinetiam memoriæ proditum est, cùm navis Caunia, quam lembi prædatorii premebant, ad Siculum littus confugisset; Siculos primò noluisse eam recipere: at ubi interrogati Caunii an nôssent Euripidis carmina, se nôsse responderunt, tum verò liberum ejs receptum patuisse. *Plut. in Niciâ.*

CAPUT VIII.

Literæ ornamenta hominum sunt et solatia.

1. Si non tantus fructus perciperetur ex liberalium artium studiis, quantum percipi constat, sed ex his delectatio sola peteretur; tamen hæc animi remissio judicanda esset libero homine dignissima. Nam cætera neque temporum omnium sunt, neque ætatum, neque locorum. Hæc studia adolescentiam alunt, senectutem oblectant, secundas res ornant, adversis perfugium ac solatium præbent, delectant domi, non impediunt foris, pernocant nobiscum, peregrinantur, rusticantur. *Cicer. pro Archiâ, n. 16.*

Si tempus in studia conferas, omne vitæ fastidium effugeris, nec noctem fieri optabis tædio lucis, nec tibi gravis eris, nec aliis supervacuus. *Senec. de Tranq. c. 3.*

Videmus literas et ingenuas artes non solum beatæ vitæ oblectationem esse, sed etiam levamentum miseriarum. Itaque multi cùm in potestate essent hostium, multi in custodiâ, multi in exilio, dolorem suum literis levaverunt. Demetrius Phalereus, cum è patriâ pulsus esset injuriâ, contulit se Alexandriam ad Ptolemæum

regem; multaque præclara in illo calamitoso otio scripsit. Dicitur eum monuisse regem, cujus hospitio utebatur, ut conscriptos de regno imperioque libros sibi compararet atque perlegeret: *Quia*, inquit, *quæ amici non audent monere reges, hæc in libris scripta sunt.* Cicer. de fin. l. v. n. 53. Plutarch. Apoph.

2. Quamdiu respublica Romana per eos gerebatur, quibus se ipsa commiserat, in eam curas cogitationesque ferè omnes suas conferebat Cicero, et plus operæ ponebat in agendo, quàm in scribendo. Cùm autem dominatu unius Julii Cæsaris omnia tenerentur; non se angoribus deditit, quibus fuisset confectus, nec indignis homine docto voluptatibus. Fugiens conspectum sceleratorum, quibus omnia redundabant, urbe relictâ rura peragrabat, abdebatque se, quantum licebat, et solus erat. Cùm verò nihil agere animus ejus non posset, neque vellet languere eam solitudinem, quam ipsi afferebat necessitas, non voluntas; existimavit molestias honestissimè deponi posse, si se ad philosophiam retulisset, cui adolescens multum temporis tribuerat, discendi causâ: omne studium curamque convertit ad scribendum: atque ut, qui antea occupatus profuerat civibus suis, aliquid quoque iis prodesse posset otiosus; elaboravit ut, doctiores fierent et sapientiores: pluraque brevi tempore eversâ republicâ scripsit, quàm multis annis eâ stante scripserat. Sic paruit virorum sapientum præcepto, qui docent non solum ex malis eligere minima oportere, sed etiam excerpere ex his si quid insit boni. Cicer. 2 Offic. n. 2 et 3. 3 Offic. n. 1. et. c. 1 Tusc. n. 5.

3. Doctrinæ studia et optimè felicitatem extollunt, et facillimè minuunt calamitatem; eademque et ornamenta hominum maxima sunt, et solatia. Senec. ad Polyb. c. 36.

Ipse Dionysius junior, cùm tyrannide excidisset, interrogatus quid Plato philosophiaque ipsi profuissent: *Ut*, inquit, *tantam fortune mutationem aequo animo feram.* Plut. Apoph.

Est gaudium mihi, inquit Plinius, et solatium in litteris: nihilque tam lætum est, quod non per has lætius fiat: nihil tam triste, quod non per has sit minùs triste. Itaque infirmitate uxoris, et amicorum periculo aut morte turbatus, ad studia, unicum doloris levamentum.

confugio : quæ præstant ut adversa patientiùs feram. *Plin. l. viii. Epist. 19.*

CAPUT IX.

Quæ in scientiæ studio sint vitanda.

1. Duo vitia vitanda sunt in cognitionis et scientiæ studio, naturali sanè et honesto. Unum ne pro cognitis habeamus incognita, hisque temerè assentiamus. Quod vitium effugere qui volet, (omnes autem velle debent) adhibebit et tempus et diligentiam ad considerandas res. Alterum est vitium, quod quidam nimis magnam operam conferunt in res obscuras atque difficiles, easdemque non necessarias. Quibus vitiis declinatis, quod operæ curæque ponetur in rebus honestis et cognitione dignis, id jure laudabitur. *Cicer. 1 Offic. n. 18.*

Si quis tamen ita teneatur discendi studio ut eos deserat quos tutari debet; ab officio decedit, et à justitiâ, quæ in hominum tuendis commodis maximè cernitur, et contemplationi cognitionique rerum anteponenda est. Quod optimus quisque judicat, et re ipsâ ostendit. Quis est enim tam cupidus perspicendi rerum naturæ, ut, si ei subito allatum sit periculum aliquod patriæ, propinquorum, amicorum, cui subvenire possit, non statim abiciat res cognitione dignissimas? *n. 153.*

2. Cupere omnia scire, cujuscumque modi sint, curiosorum est: duci verò cupiditate scientiæ ad magnarum rerum contemplationem, summorum virorum esse est putandum. *Cicer. 5. de fin. n. 49.*

Iti operosè agendo nihil agunt, qui in literarum inutilium studiis detinentur. Ecce Romanos quoque invasit studium supervacua discendi. Cujus errores ista minuent? cujus cupiditates prement? quem fortiorem, quem justiorem, quem liberaliorem facient? *Senec. de Brev. c. 13, 14.*

Cùm gloriaretur quidam quòd multa didicisset; dixit ei Aristippus: *Sicut qui plurima comedunt, non meliùs valent, quàm qui sumunt necessaria; sic eruditi habendi sunt, non qui plurima legerunt ac didicerunt, sed qui utilia.* *Diog. Laërt. in Arist.*

3. Anniceris Cyrenæus magnificè de se sentiebat ob artem equitandi, & curruum regendorum peritiam. Volens igitur specimen artis Platoni exhibere, juncto curru multos cursus circumegit in Academiâ, sic servans primam orbitam arenæ impressam à rotis currûs sui, ut ne tantillùm quidem ab eâ declinaret. Obstupère omnes rei miraculo, et aurigam ad cælum laudibus extulère. Uni Platoni talis peritia reprehensione potius, quam gloriâ digna visa est; dicitque: *Fieri non posse, ut, qui curam impenderet ad eò diligentem, rebus tam exilibus, et nullius utilitatis, ea non negligeret, quæ essent multis potiora, et verè digna admiratione.* Ælian. l. ii. c. 27.

Quædam supervacua est artis imitatio, quæ vanum laborem habeat. Qualis illius fuit, qui continuè & sine frustratione in acum inferebat grana multa ciceris ex spatio distante missa. Quem cum spectasset Alexander, donasse eum dicitur ejusdem leguminis modio. Quod quidem præmium fuit illo opere dignissimum. *Quintil. l. ii. c. 21.*

Turpe est difficiles habere nugas,
Et stultus labor est ineptiarum.

Mart. l. ii. Epig. 86.

Histrionum, gladiatorum, equorum studio occupatus & obsessus adolescentum animus, quantum loci bonis artibus relinquit! *De Corr. Eloq. c. 9.*

4. Etiam si longa homini vita suppeteret, tempus parcè dispensandum esset ut sufficeret necessariis. Nunc quæ dementia est, supervacua discere in tantâ egestate temporis? *Seneca, Ep. 48.*

Non tam benignè & liberaliter tempus natura nobis dedit, ut liceat aliquid ex illo perdere. Vide tamen quantum etiam diligentissimis pereat. Aliud cuique valetudo sua abstulit, aliud valetudo suorum: aliud privata negotia, aliud publica occupaverunt: vitam nobiscum dividit somnus. Ex hoc tempore tam angusto, tam rapido, tam nos auferente, quid juvat majorem partem mittere in vanum? *Ep. 117.*

CAPUT X.

Qui rectè vivit, is scientiam utilem & necessariam est adeptus.

Si quis animum virtuti consecravit, et sequitur quocunque vocat illa: si intelligens se sociale animal esse, et in commune bonum genitum, mundum ut unam omnium domum spectat: si semper tanquam in publico vivit: si sciat nec malum esse ullum, nisi quod turpe est, nec bonum, nisi quod honestum; ad hanc legem ac regulam agat cuncta & exigat: si judicet miserimos omnium mortalium, quantiscumque opibus refulgeant, homines ventri ac libidini deditos, quorum animus inertis otio torpet: hæc si quis et sciat et præstet, consummavit scientiam utilem atque necessariam. Reliqua oblectamenta otii sunt. *Senec. 7 Benef. c. 1, 2.*

Plùs prodest, si pauca præcepta sapientiæ teneas, sed illa tibi in promptu et in usu sint. quàm si multa quidem didiceris, sed illa non habeas ad manum.

CAPUT XI.

Naturá tam docere cupimus, quàm discere.

1. Impellimur naturá, ut prodesse velimus quamplurimis, in primisque docendo et tradendis comparandæ prudentiæ rationibus. Itaque non facile est invenire, qui non tradat alteri quod sciat ipse. Ita non solùm ad discendum propensi sumus, verum etiam ad docendum. *Cicer. 3 de fin. n. 65.*

Cupio, dicebat olim Seneca scribens ad Lucilium, in te transfundere omnia quæ ad sanandos animi morbos efficacia expertus sum. Gaudeo aliquid discere, ut doceam, nec me ulla res delectabit, licet eximia sit et salutaris, quam mihi uni sciturus sum. Nullius boni jucunda possessio est sine socio. Mittam itaque tibi ipsos libros, unde salutaria hausi: et ne multum operæ impendas in totis libris *perlegendis*, imponam notas, ut tu, qui sectaris profutu-

ra, protinus accedas ad ea quæ probo & miror. Plùs tamen tibi & viva vox & convictus sapientum proderunt, quàm libri. Primùm quia homines amplius oculis, quam auribus credunt: deinde quia longum est iter per præcepta, breve et efficax per exempla. Cleanthes non expressisset moribus Zenonem, si eum tantummodo audisset. Vitæ ejus interfuit, secreta perspexit, observavit illum, an ex præceptis suis viveret. Plato et Aristoteles plùs ex moribus quàm ex verbis Socratis taxère. *Senec. Ep.* 6.

Ex commodato librorum usu, ac sermone de iis habito, fluxit illa studiorum animorumque conjunctio Polybii & Scipionis Æmiliani, cujus fama non Italiam modò ac Græciam pervasit, sed remotissimas etiam gentes. *Polyb. l.* xxxi.

2. Xenophontem in angiportu obviura habuit Socrates. Quumque videret adolescentem vultu specioso admodum et verecundo, porrecto ne baculo, vetuit ne præteriret. Ut constitit, interrogavit eum Socrates, ubinam venderentur, quæ essent necessaria variis usibus civium? Ad quæ cùm expeditè respondisset Xenophon; percontatus est, ubinam homines fierent boni probique? Id verò nescire se, respondente adolescente: *Me igitur sequere*, inquit Socrates. Ex eo tempore Xenophon cœpit esse Socratis auditor. *Diog. Laërt. in Xenoph.*

3. Protagoram aiunt adolescentem, victus quærendi gratiâ, vecturas onerum corpore suo factitasse. Quod genus hominùm Latinè bajulos appellamus. Is aliquando caudices ligni plurimos funiculo brevi colligatos portabat è rure Abderà in oppidum, cujus civis fuit. Tum fortè Democritus, ejusdem civitatis popularis, homoque ante alios virtutis et philosophiæ gratiâ venerandus, urbe egrediens, videt adolescentem cum illo genere oneris tam impedito facilè atque expeditè incedentem. Propè accedit, juncturam posituramque lignorum scitè peritèque factam considerat, petitque ut paulùm acquiescat. Quod ubi Protagoras, ut erat petatum, fecit: animadvertit Democritus caudices illos brevi vinculo comprehensos librari continerique ratione quâdam quasi geometricâ. Itaque interrogavit, quis illum acervum lignorum ita composuisset? Et cùm ille à se compositum dixisset, desideravit uti solveret, ac denuo in eundem modum collocaret. Paruit bajulus, ac dissolutum fasciculum composuit simi-

liter. Tum Democritus solertiam hominis non docti demiratus: *Mi adolescens, inquit, cum ingenium solerter aliquid agendi habeas, sunt majora melioraque, quae facere tecum possis.* Abduxitque eum statim, secumque habuit; sumptum ministravit, philosophiam docuit, et esse eum fecit, quantus postea fuit. *A. Gell. l. v. c. 3.*

4. Hoc docenti et discenti debet esse propositum, ut ille prodesse velit, hic proficere. Qui ad Philosophorum scholas venit, quotidie secum aliquid boni referat: aut sanior domum redeat, aut sanabilior. Aliquid peccatur vitio praecipientium, qui nos docent disputare, non vivere: aliquid etiam vitio discentium, qui ad praecipitantes suos afferunt propositum, non animum excolendi, sed ingenium. Haec nobis dicere Attalum memini, inquit ipse de se Seneca, cum scholam ejus obsideremus, et primi veniremus, et ultimi exiremus. *Senec. Ep. 108.*

Perditæ luxuriæ adolescens Atheniensis Polemo, cum è convivio, non post occasum solis, sed post ortum surrexisset; domumque repetens, Xenocratis philosophi patientem januam vidisset; vino gravis, unguentis delibutus, sertis capite redimito, perlucidâ veste amictus, scholam ejus refertam turbâ doctorum hominum intravit, deinde consedit, ut clarissimum eloquium et prudentissima philosophi præcepta irrideret. Ortâ, ut par erat, omnium, qui aderant, indignatione, Xenocrates vultum in eodem habitu continuit, omissisque iis, de quibus tum disserebat, de modestiâ ac temperantiâ loqui cœpit. Cujus sermonis gravitate resipiscere coactus Polemo, primùm coronam capite detractam projecit, paulò post brachium intra pallium reduxit, deinde oris hilaritatem deposuit, ad ultimum totam luxuriam exiit, uniusque orationis saluberrimâ medicinâ sanatus, ex infami ganeone maximus philosophus evasit. *Valer. l. vi. c. 9.*

CAPUT XII.

Stultum est ea docere cæteros, quæ ipse expertus non es.

Cum Annibal Carthagine expulsus, venisset Ephesum ad Antiochum regem, invitatus est ab hospitibus

stis, ut Phormionem Peripaticum audiret. Quod cum se non nolle dixisset: locutus est homo copiosus aliquot horas de imperatoris officio, et de omni re militari. Ceteri, qui illum audierant, vehementer ejus oratione delectati, quæsiere ab Annibale, quidnam ipse de illo philosopho judicaret? Illic Pænus liberè respondisse fertur: *Se multos deliros senes vidisse; sed qui magis, quam Phormio, deliraret; vidisse neminem.* Neque mehercule injuriâ. Quid enim aut arrogantius aut loquacius fieri potuit, quàm Græcum hominem qui nunquam hostem aut castra viderat, et ne minimam quidem partem ullius publici muneris attigerat, dare præcepta de re militari Annibaldi, qui tot annos de imperio certaverat cum populo Romano, omnium gentium victore? Hoc mihi facere videntur omnes illi, qui, quod ipsi experti non sunt, id docent cæteros. *Cicer. 2. de Orat. n. 75, 76.*

CAPUT XIII.

Etiam seni discere decorum est.

1. Gloriabatur Solon, se, aliquid quotidie addiscentem, senem fieri. Quod et supremo vitæ die confirmavit. Nam cum assidentes ei amici, quidam de re inter se sermonem conferrent; caput jam morte instante gravatum erexit: interrogatusque cur id secisset; respondit: *Ut cum istud, quidquid est, de quo disputatis, percepsero, æquiore animo moriar.* Cic. de Senect. n. 26. Valer. l. viii. c. 7.

Cato major Græcas literas senex didicit: quas quidem avidè arripuit, quasi diurnam sitim explere cupiens.

Sophocles ad summam senectutem tragædias fecit. Propter quod studium cum rem familiarem negligere videretur, à filiis in judicium vocatus est, ut judices à rei familiaris administratione removerent eum quasi desipientem, quemadmodum apud Romanos bonis interdici solebat patribus malè rem gerentibus. Tum senex recitavit judicibus eam fabulam, quam proximè scripserat, quæsitivæque, num illud carmen hominis desipientis esse videretur. Quo recitato, sententiis judicum est liberatus. *n. 22.*

Diogenem admonebat quidam, ut jam senex quiesceret à laboribus. Cui ille : *Quid, inquit, si in stadio currerem, oporteretne me jam vicinum metae cursum remittere ? an non potius intendere ?* Ex Erasm. Apoph.

2. Senecam ætate provecum non pudebat ire ad philosophos, ut ipse refert his verbis : Quintam jam diem in scholam eo, et ab octavâ horâ disputantem Metronactem philosophum audio. Quid ergo, inquis, idem facies quod juvenes ? Næ ego mihi beatus videor, si hoc unum senectutem meam dedecet. In theatrum senex ibo, ad philosophum ire erubescam ? Quid stultius, quàm non discere, quia diu non didiceris ? Tamdiu discendum est quamdiu nescis : et tamdiu discendum est quemadmodum vivas, quamdiu vivis. *Senec. Ep. 76.*

Pudet autem me generis humani. Mihi Metronactis domum petenti transeundum est præter theatrum. Illud semper factum est. Ibi ingenti studio judicatur quis sit bonus histrio : at in illo loco ubi discitur quomodo quis fieri possit vir bonus, pauci sedent : et hi plerisque videntur ac vocantur inepti et inertes. Mihi contingat iste derisus. Æquo animo audienda sunt imperatorum convicia ; et ad honesta vadentem contemnendus est iste contemptus. Ibid.

Cur nescire, pudens pravè, quàm discere, malo ?

Horat. de arte poet. ver. 88.

Turpe est, quempiam multos annos continenter laborare atque exerceri, ut vel bonus grammaticus, vel rhetor, vel geometra, vel medicus fiat : ut autem vir bonus evadat, nunquam quidquam laboris in tanto temporis spatio insumere. *Galenus de affect. curand.*

3. Aurelius imperator sapientiæ studiis incumbere apud Sextum philosophum, ad ejus ædes propterea ventitans. E regiâ aliquando egredientem rogavit Lucius philosophus, qui modò Romam advenerat, quò pergeret, et ad quod negotium ? Tum Marcus ; *Seni etiam, inquit, discere decorum est. Itaque ad Sextum philosophum eo, ut sciam que nondum scio.* Lucius manibus in cælum sublatis, exclamavit. *O Jupiter ! Romanorum imperator jam senescens, tabellis è zona sushensis ad ludimagistrum pergit, puerorum instar !* Philost. l. ii.

CAPUT XIV.

Honos doctis habitus.

1. Dionysius tyrannus, qui sævitiæ et superbiæ natus videbatur, navem vittis ornatam misit obviam Platoni, gravissimo dicendi et vivendi magistro, venienti Syracusas. Ipse quadrigis albis excepit in littore egredientem è navi. *Plin. l. vii. c. 30.*

Consule ædes aliquas ingressuro, carum fores virgâ à lictore percutiebantur, monendi causâ adesse consulem: nisi ædes essent ejus hominis cui habendus ab ipso magistratu honos videretur. Itaque Pompeius cum ex Asiâ rediens Rhodum venisset, et Posidonii philosophi domum esset intraturus, fores ejus de more percuti à lictore vetuit, et fasces licoris Januæ philosophi submitit: is cui se omnia occidens que submiterat.

Gaditanus quidam Titi Livii nomine famæque commotus, ad visendum cum ab ultimis terrarum finibus venit, statimque, ut viderat, abiit. *Plin. l. ii. Ep. 3.*

2. Alexander magnus, captis Thebis, posteris Pindari poëtæ in eâ urbe nati pepercit, ipsiusque domum stari incolumem voluit. Inter spolia Darii regis Persarum capto unguentorum scrinio, quod erat auro gemmisque, ac margaritis pretiosum, varios ejus usus amicis demonstrantibus: *Imò Hercule, inquit, librorum Homeri custodia detur.* Cupiebat nempe ut pretiosissimum humani ingenii opus servaretur opere quàm maximè diviti. Prædicabat hunc poëtam complexum esse omnia bellandi ac regnandi præcepta: eumque tanto amore atque honore prosecutus est, ut Homeri amator cognominaretur. Interrogante aliquando Philippo patre, cur tantopere hoc uno poëtâ delectaretur, cæteros verò negligeret? *Ideo, inquit, pater, quod non quavis poësis regem decere mihi videtur, sicut nec quodvis vestimentum. Unius Homeri ingenua est, et magnifica, et verè regia.* Itaque Homeri libros secum inter bella ferre solitus erat; et, cum quiesceret, eos unâ cum puzione sub pulvino, cui incumbere, reponere; *militiæ viaticum et bellicæ virtutis institutionem appellans.* Cum quidam prosperè gestæ rei nuncius citato cursu accederet, vultu ingentem lætitiâ præferens: *Quid mihi nunciaturus es, inquit, tanto gaudio dignum? nisi forsitan Homerus revixit,*

Ælian. l. xiii. c. 7. Plin. l. vii. c. 29. Diogen. Chrys. Or. 2. Plut. in Alex. Idem. de Profec. Virtut.

3. Alcibiades quoque Homerum magno in pretio habuit. Itaque cùm fortè in scholam puerorum venisset, Homerum sibi petiit exhiberi. Cùm verò ludimagister se nihil Homeri habere respondisset : colaphum ei durum inflixit, et abiit. *imperitum* dicens, *et qui tales redderet pueros.* Ælian. l. xiii. c. 38.

Cùm Zoilus, qui Homeromastix, id est, Homeri flagellum, est vocatus, Alexandriam venisset, et sua contra Iliadem et Odysseam scripta Ptolemæo Philadelpho recitasset; animadvertens rex poëtarum principem vexari absentem et inauditum utpòte, mortuum : et eum, cujus ab cunctis gentibus scripta suspicerentur, à Zoilo vituperari : indignatus, nullum ei responsum dedit. Ille diutius Alexandriæ commoratus, et inopiâ pressus, summisit ad regem, postulans ut aliquid sibi tribueretur. Rex verò dicitur respondisse : *Homerum, qui antè annos mille decesserat, quotidie pascere multa millia hominum : debere pariter eum, qui se meliore ingenio profiteretur, fosse alere non modo se unum, sed etiam plures.* Vitruv. præfat. l. vii.

4. Sylla duxit aliquo præmio dignam sedulitatem etiam mali poëtæ. Nam cùm ille epigramma ipsi obtulisset; jussit præmium ei statim tribui, sub eâ tamen conditione, ne quid postea scriberet. Julius Cæsar civitate donavit liberalium artium doctores, et medicinam Romæ professos, ut eò libentiùs et ipsi urbem incoherent, et cæteri appeterent. Optimè ille quidem : solet quippe labor impèndi eò, unde emolumentum atque honos speratur. At sublatis studiorum præmiis, etiam studia pereunt. *Cicer. pro Arch. n. 25. Sueton. in J. Cæs. c. 42. Livius, l. iv. c. 35. Tacit. an. xi. c. 7.*

5. Mandatum est memoriæ, Platonem philosophum tenui admodum pecuniâ fuisse : atque eum tamen mercatum esse decem millibus drachmarum tres Philolai Pythagorici libros. Quidam dixerunt, amicum ejus Dionem Syracusanum eam pecuniam illi dedisse. Traditum est quoque Aristotelem libros pauculos Speusippi philosophi emisse talentis Atticis tribus. Isocrates pro unâ oratione viginti talenta accepit. Dicitur Octavia, cùm Virgilium audivisset recitantem illos de filio suo *versus, Tu Marcellus eris, &c.* deliquium animi passa

eset ; deinde, recepto animo, Virgilio dari jussisse pro singulis versibus dena sestertia. *A. Gell. l. iii. c. 17. Plin. l. vii. c. 30. Auct. vitæ Virgil.*

6. Græci magnos honores constituerunt athleticis, qui in Olympiis, Pythiis, Isthmiis, Nemæisque certaminibus vicerint. Nam non modò in publico Græciæ conventu laudes ferunt cum palmâ et coronâ ; sed etiam cùm revertuntur in suas civitates, triumphantes quadrigis invehuntur in patriam, et constitutis è re publicâ vectigalibus fruuntur per totam vitam. Quod cùm ego animadverto, inquit Vitruvius, admiror cur non iidem honores, atque etiam majores, tributi sint scriptoribus, qui infinitas utilitates perpetuo ævo omnibus præstant. Id enim eò magis dignum erat institui, quòd athletæ sua tantùm corpora exercitationibus efficiunt fortiora ; scriptores verò non solùm sua ingenia suosque sensus perficiunt, sed etiam omnium aliorum, ea in libris suis præcepta dantes, quæ plurimùm juvent ad animos exacuendos, et ad discendum. Quid enim Milo Crotoniates, quòd fuit corporis viribus invictus, prodest hominibus, aut cæteri qui eo genere fuerunt victores ? Pythagoræ verò, Platonis, Aristotelis, cæterorumque sapientum præcepta omnibus gentibus edunt novos quotidie fructus, quibus qui à tenerâ ætate satiantur, ipsi optimos habent sensus, et humanos mores civitatibus infundunt, æqua jura ac leges describunt, sine quibus nulla potest esse civitas incolumis. Cùm ergò tanta munera privatim publicèque fuerint hominibus præparata ab scriptorum prudentiâ ; non solùm palmas et coronas his tribui arbitror oportere, sed etiam et triumphos, et divinos, si fas sit, honores decerni. *Vitruv. l. ix. præfat.*

Animi remedia inventa sunt ab antiquis philosophis. Suspiciendi propterea sunt, et propè Deorum ritu colendi. Equidem quam venerationem præceptoribus meis debeo, eandem illis præceptoribus generis humani debere me existimo. Quid ergo ? si consulem videro aut prætorem, omnia faciam quibus honor haberi solet ; equo desiliam, caput adaperiam, semitâ cedam : Socratem cùm Platone, et Zenonem et Cleanthem non venerabor ? non tanta nomina colam ? *Senec. Ep. 64.*

CAPUT XV.

Modestia conjuncta cum doctrinâ.

Dicebat doctissimus, idemque sapientissimus, Socrates: *Se hoc unum scire, quod nihil sciret.* Diog. Laërt. in Socrat.

Cùm venisset Plato ad ludos Olympicos, frequentissimum omnium in Græciâ conventuum, Olympiæ contubernium inivit cum ignotis hominibus, ignotus iis et ipse. Ita verò eos cepit ac sibi devinxit tum morum suavitate, tum sermonibus ab omni affectatione sapientiæ alienis, ut peregrini illi plurimum gauderent fortuito talis viri contubernio ac convictu. Neque verò academix aut Socratis mentionem ullam fecit. Hoc solum illis declaravit, se Platonem appellari. Quum peractis ludis Athenas venissent; perhumaniter eos excepit. Tum hospites: *Age, inquit, monstra nobis illum tibi cognominem Socratis discipulum, cujus magna ubique fama est. Duc nos in academiam, et siste viro, ut aliquem ex ejus quoque colloquio fructum colligamus.* At ille leniter subridens, quemadmodum solebat: *Ego verò, inquit, ille ipse sum.* Obstupere illi, quòd socium tamdiu habuissent tantum virum, ignorantes: intellexeruntque posse eum sibi conciliare animos eorum quibuscum ageret, etiam sine consuetis illis de philosophiâ sermonibus. *Ælian. l. iv. c. 9.*

Magna est admiratio copiosè sapientèrque dicentis. Si verò inest in oratione mista modestiâ gravitas, nihil admirabilius fieri potest: maximè, cùm ea sunt in adolescente. *Cicer. de Offic. n. 14.*

CAPUT XVI.

Non refert quàm multos, sed quàm bonos libros habeas ac legas.

1. Est lectio necessaria; alit enim ingenium, et cogitando inveniendoque fatigatum reficit. Nec scribere tantum, nec tantum legere, debemus: sed invicem hoc illo commutandum est, et alterum altero temperandum, ut

quidquid lectione collectum est, prosit ad pabulum animi aut ad scribendum. Apes debemus imitari, quæ ducunt succum ex floribus ad mel faciendum idoneis, deinde disponunt per favos quidquid attulère. *Senec. Ep. 84.*

Alimenta corporis tunc demum in sanguinem et vires transeunt, cum sint concocta. Idem præstemus in his quibus aluntur ingenia; concoquamus illa.

2. Lectio omnis generis voluminum habet aliquid vagum et instabile. Faucis libris immorari et innutriri oportet, si velis aliquid trahere, quod in animo fideliter hæreat. Lectio certa prodest, varia delectat. Qui vult pervenire quò destinavit, unam sequatur viam, non per plures vagetur.

Librorum inopiam quereris. Non refert quàm multos habeas, sed quàm bonos. Distrahit animum librorum multitudo. Modò, inquis, hunc librum evolvere volo, modò illum. Fastidientis stomachi est multa degustare: quæ, ubi varia et diversa sunt, nocent, non alunt. Probatos itaque libros semper lege: et, si quando ad alios divertere libuerit, ad priores redi. Aliquid quotidie auxiliium adversus varias animi pestes compara: et cum multa percurreris, unum excerpe quod illo die concoquas. Hoc ipse facio. *Senec. Ep. 2. 45.*

Plinius major libros legens, adnotabat, excerpebatque. Nihil enim legit, quod non excerperet. Dicere etiam solebat, nullum esse librum tam malum, ut non eliquâ parte posset prodesse. *Plin. l. iii. Ep. 5.*

3. Pueri legant et discant non modò quæ diserta sunt, sed magis quæ honesta. Itaque non tantum auctores eligendi, sed etiam partes operis. Nam et Græci licenter quædam scripsère, et Horatium in quibusdam nolim interpretari. *Quintil. l. i. c. 14.*

Lacedæmonii libros poetæ Archilochi jusserunt ex suâ civitate exportari, quòd eorum lectionem arbitrabantur parum verecundam ac pudicam. Noluerunt enim eâ liberorum suorum animos imbui, ne plùs moribus noceret, quàm ingeniis prodesset. *Valer. l. vi. ex. 1.*

CAPUT XVII.

*Bibliotheca ad publicum et privatum usum
comparatur, non ad ostentationem.*

1. Antiquissima, cujus ad nos memoria venerit, Bibliotheca, ea est, quam extruxit apud Ægyptios rex Osymandias, et cujus in fronte inscripta erant hæc verba: *Ψυχῆς ἰατρειῶν*, hoc est, medica animæ officina. *Diodor. l. i.*

Pisistratus tyrannus, qui studia literarum plurimum fovit, dicitur primus comparasse Athenis libros disciplinarum liberalium publicè præbendos ad legendum; quorum numerum ipsi Athenienses deinde studiosiùs auxerunt. Sed Xerxes potitus Athenis, urbe ipsâ præter arcem incensâ, abstulit asportavitque ad Persas omnem illam librorum copiam. Multis autem post annis Seleucus rex, qui Nicanor appellatus est, eosdem libros referendos Athenas curavit. *A. Gell. l. vi. c. 17.*

Ingens postea numerus librorum in Ægypto à Ptolemæis regibus conquisitus et comparatus est, ad millia ferme voluminum septingenta. Sed ea omnia (aut saltem quadringenta millia, teste Seneca) in urbe Alexandriâ conflagrârunt bello inter Cæsarem et Pompeii liberos. *Lib. de Tranq. c. 9.*

Bibliothecam Ægyptiacam instruxerat Ptolemæus Philadelphus tum profanis libris, tum etiam sacris petitis è Judæâ. Nam cum ejus aures fama Hebrææ sapientiæ tetigisset; misit Eleazaro Judæorum summo pontifici dona multa, et epistolam, quâ orabat, ut divinos libros ad se mittendos curaret cum idoneis hominibus, à quibus in linguam Græcam ex Hebræâ verterentur. Ut regis votis ac precibus satisfaceret Eleazarus, misit selectos è singulis tribubus senos viros seniores, utriusque linguæ peritissimos; à quibus facta est illa celeberrima sacrorum librorum interpretatio, quæ Septuaginta Interpretum vocatur. Præerat autem Ptolemæi bibliothecæ vir factis et scriptis illustris, Demetrius Phalereus, quem Athenis pulsum rex benignè exceperat. *Joseph. l. xii. c. 2.*

2. Primus librorum copiam Romam advexit Æmilius Paulus, devicto rege Macedonum Perseo, cujus thesauros

ne aspicere quidem dignatus est: libros verò filiis suis, quia erant literarum studiosissimi, asportandos permisit. Deinde Lucullus è Ponticâ prædâ plures congeffit. Nam reges Attalici literarum amore capti, egregiam bibliothecam ad communem utilitatem et delictationem Pergami instituerant. *Isidor. Plut. in Æmil. Vitruv. l. vii. in præfat.*

Laudanda est Luculli impensa et studium in libris. Nam et multos et optimos acquisivit, eosque liberaliter dedit utendos. Patebat omnibus bibliotheca, et in porticus ei adjectas, velut ad Musarum ædem, veniebant maximè Græci, tempusque ibi jucundè inter se traducebant, ab aliis curis liberi. Sæpe cum iis versabatur Lucullus, et inter magnam doctorum virorum turbam ambulabat. *Plut. in Lucul.*

In Tusculano cùm essem, inquit Cicero, vellemque è bibliothecâ Luculli pueri quibusdam libris uti; veni in ejus villam, ut eos ipse, sicut solebam, inde promerem. Quò cùm venissem, M. Catonem, quem ibi esse nescieram, vidi in bibliothecâ sedentem, multis circumfusum Stoicorum libris. Erat enim in eo inexhausta aviditas legendi, nec satiari poterat: quippe qui reprehensionem inanem vulgi non reformidans, in ipsâ curiâ soleret legere sæpe, dum senatus cogeretur. Itaque magis tum in otio, maximâque voluminum copiâ, videbatur quasi helluo librorum, si hoc verbo in tam præclarâ re uti licet. Tum ego Catoni: *Certè, Cato, totam hanc coham jam Lucullo nostro hotam esse oportebit. Nam his libris cum malo, quàm reliquo oinatu villa delectari. Ætatem quidem video: sed infici tamen jam debet iis artibus, quas si, dum est tener, combiberit, ad majora veniet paratior.* Cic. 3 de fin. n. 2.

3. Quàm studiosus comparandæ ornandæque bibliothecæ ipse Cicero fuerit, patet ex multis ejus epistolis ad Atticum.

Tu, velim, des operam, ut quamprimum habeamus ea, quæ te nobis emisse et parasse scribis: et cogites quemadmodum bibliothecam nobis conficere possis. In tuâ humanitate positam habemus spem omnem delectationis, quam, cùm in otium venerimus, habere volumus. Ego quotidie magis, si quid mihi è forensi labore temporis datur, in literis conquiesco. Summum me librorum studium tenet, sicut odium jam cæterarum rerum. Bibliothecam tuam cave cuiquam despondeas, quamvis

acrem amatorem inveneris. Nam ego omnes meas vindemiolas eò reservo, ut illud subsidium senectuti parem. Noli desperare fore ut libros tuos facere possim meos. Quod si assequor, supero Crassum divitiis, atque omnium agros, locos, prata contemno. *Liò. i. Ep. 3. 6. 8. 9. 20.*

4. Comparandorum librorum impensa liberalissima est. At in eà habendus modus. Quid prosunt innumera- biles libri, quorum dominus vix totà vità indices per- legit? Onerat discentem turba; multòque satius est tra- dere te paucis auctoribus, quàm errare per multos. Nunc plerisque literarum ignaris libri non studiorum instru- menta sunt, sed ædium ornamenta. Paretur itaque quan- tum satis sit librorum, nihil in apparatus. Honestiùs, inquis, in libros impensas effundam, quàm in vasa pre- tiosa pictasque tabulas. Vitiosum est ubique, quod ni- mium est. An ignoscas homini aptanti armaria cedro atque ebore, et inter tot millia librorum oscitanti, cui voluminum suorum frontes maximè placent titulique? Apud desidiosissimos videbis quidquid orationum histori- arumque est, et tecto tenus extracta loculamenta. Sic- que sacrorum opera ingeniorum in speciem tantùm et cultum parietum comparantur. *Senec. de Tranquil. c. 9.*

Indoctum gloriantem bibliothecà ridet Ausonius hoc epigrammate:

Emptis quòd libris tibi bibliotheca referta est,
Doctum et grammaticum te, Philomuse, putas?
Hoc genere et chordas, et plectra, et barbita conde:
Mercator hodie, cras citharædus eris. *Epig. 43.*

CAPUT XVIII.

Memoria augetur curâ, negligentia intercidit.

1. Omnis disciplina memoriâ maximè constat, fru- straque docemur, si quicquid audimus, præterfluit. Qui- dam eam naturæ modò munus esse existimaverunt: sed ipsa excolendo, sicut alia omnia, augetur. Imò nihil æquè vel augetur curâ, vel negligentia intercidit, quàm memoria. *Quint. l. xi. c. 2.*

Maxima et una memoriæ augendæ ars, exercitatio est et labor. Quare pueri quorum tenacissima memoria est, statim *quamplurimè* ediscant: et quæcumque ætas operam ju-

vandæ studio memoriæ dabit, devoret initio tædium illud scripta et lecta sæpius revolvendi, et quasi eundem cibum remandendi. Quod ipsum fieri potest leviùs, si primùm pauca cæperimus ediscere, tum quotidie aliqua accessio fiat. *Quint. l. ii. c. 2.*

2. Quantum naturâ studioque valeat memoria, testis est vel Themistocles, quem constat unum intra annum optimè locutum esse Perficè: vel Mithridates, cui notæ fuerunt duæ et viginti linguæ earum, quibus imperabat, nationum: vel Crassus ille dives, qui, cùm Asiæ præsetet, sic tenuit quinque Græci sermonis differentias, ut jus cuique redderet eâdem linguâ, quâ quisque postulasset: vel Cyrus denique, quem omnium militum tenuisse nomina traditum est. Quinetiam dicitur Theodectes protinus reddidisse semel auditos quamlibet multos versus.

Memoriam in Themistocle fuisse ferunt singularem, ita ut quæcumque audierat aut viderat, hærerent animo. Itaque cùm Simonides, sive quis alius, se ei traditurum polliceretur artem memoriæ aliquam, quæ recens inventa erat: *Oblivionis, inquit, malle. Nam meminisse etiam que nolo: Oblivisci non possum quæ volo.* Cic. 4 Acad. 2. 2 fin. 104.

Etiam oblivisci quod scis, interdum expedit.

P. Syrus.

3. Seneca rhetor hoc scriptum reliquit de suâ memoriâ. Cùm senectus mihi jam fecerit multa desideranda, oculorum aciem retuderit; aurium sensum hebetaverit, nervorum firmitatem infraxerit; in memoriâ maximè incurrit. Hanc aliquando in me sic floruisse non nego, ut non tantum ad usum sufficeret, sed usque in miraculum procederet. Nam et reddebam duo millia nominum, quo ordine erant dicta: et plures quàm ducentos versus, qui singuli à singulis condiscipulis dati erant, referebam; ab ultimo incipiens usque ad primum. Nec tantum velox erat mihi memoria ad complectenda quæ vellem: sed etiam firma ad continenda quæ acceperat. Itaque sine cunctatione etiam nunc profert quasi modò audita, quæcumque apud illam aut puer aut juvenis deposui. Imminuta tamen est ætate, et longâ desidiâ, quæ juvenilem quoque animum dissolvit. Nam si qua ei commisi intra annos proximè elapsos, sic predidit, ut, etiamsi sapius ingerantur, toties tanquam nova audiam. *Sen. Lib. i. controv.*

Hortensius in auctione persedit totum diem ; et vesperere recensuit omnes res, et pretia, et emptores ordine suo, ita ut in nullo falleretur. *Ibid.*

Quidam recitatum à poëtâ carmen novum, suum esse dixit, et protinus memoriâ recitavit; cum ille, cujus carmen erat, hoc facere non posset. *Ibid.*

LIBER TERTIUS.

DE JUSTITIA.

CAPUT I.

Justitia omnium regina virtutum.

Justitia est omnium domina et regina virtutum : ejus splendor maximus : ex eâ boni viri vulgo justii appellantur. At unum Aristidem à Græcis cognominatum fuisse Justum accepimus. *Cicer. 2. Offic. 28. 1 Offic. 20.*

Hic Athenis natus, à pueritiâ firmo constantique animo fuit, nunquam ab eo, quod justum videbatur, discedens, et nullam fraudem nullumque mendacium admittens, ne joco quidem et in ludo. *Corn. Nep. et Plut. in Aristide.*

Ubi ad rempublicam accessit, non potentium amicorum præsidio niti voluit, sed consiliis factisque utilibus et justis. Non animum inflabant secundæ res, non frangebant adversæ. Id se patriæ debere existimabat, ut ei prodesset sine ullo pecuniæ aut honorum præmio.

Cùm aliquando eo præsentem pronunciarentur in theatro versus è tragœdiâ Æschyli de Amphiarao, qui dicebatur, *non velle videri justus, sed esse* : omnes converterunt in eum oculos, tanquam ad quem hæc laus pertineret, eumque cognominaverunt Justum. Quod cognomen ut novum erat et omnium amplissimum, ita Aristidi invidiam conflavit et Themistoclis æmuli, et concitatz ab illo multitudinis. Est enim hoc commune vitium in magnis liberisque civitatibus, ut invidia gloriæ comes sit ; et libenter detrahant de iis, quos vident eminere altius. Itaque mulctatus est decem annorum exilio, quod ostracismum vocabant. *C. Nepos in Chabr. c. 3.*

Et tempore, quo congregatus populus de ejiciendo Aristide ferebat suffragium testulis pro more inscriptum, dicitur illiteratus quidam et planè rudis tradidisse Aristidi ipsi ut uni è populo testulam, petiissequè ut inscriberet Aristidem. Admirante eo, et rogante num aliquid in illum peccassèt Aristides? *Nihil, inquit: neque est ille mihi notus. Sed hoc mihi non placet, quòd cupidè elaboraverit, ut præter ceteros JUSTUS appellaretur.* Aristidem ferunt nihil respondisse, sed inscripsisse testulæ nomen suum, hominique reddidisse.

Urbe excedens ut in exilium iret, supinas manus tetendit in cælum, Deosque oravit: *Ne ullum tempus populo Atheniensi incideret, quo Aristidis reminisci necesse esset.* Tertio post anno revocatus in patriam, immemor acceptæ injuriæ utilem operam præbuit civibus in bello et pace per annos multos. Illius abstinentiæ à pecuniâ nullum est certius indicium, quàm quòd, cum exercitibus et ærario præfuisset, in tantâ paupertate decessit, ut vix reliquerit quo efferretur. Unde factum est, ut filiæ ejus publicè alerentur, et è communi ærario dotibus datis collocarentur.

CAPUT II.

Hominem justum esse gratis oportet.

1. Te justum esse gratis oportet: et nullum justæ actionis præmium majus est, quàm justum esse. Nihil refert, quam multi æquitatem tuam noverint. Qui virtutem suam prædicari vult, non virtuti laborat, sed gloriæ. Non vis esse justus sine gloriâ? At meherculè, sæpe justus esse debes cum infamiâ, et tunc, si sapias, mala opinio justitiæ parta te delectabit. Nemo mihi videtur pluris æstimare virtutem, nemo magis illi esse devotus, quàm qui boni viri famam perdidit, ne conscientiam perderet. *Senec. Ep. 113. Ep. 81.*

M. Cato, genitus proavo Marco Catone, principe familiæ Portiæ, nunquam rectè fecit, ut facere videretur, sed quia aliter facere non poterat; eique id solum visum est rationem habere, quòd haberet justitiam. Esse, quàm videri, bonus malebat. Ita, quò minùs gloriam petebat,

ea magis illam adsequatur. *Patercul. l. ii. c. 35.*
Sallust. Catilin. c. 54.

2. Inveniuntur qui honesta in mercedem colant, et quibus non placeat virtus gratuita. At nihil habet illa in se magnificum, si quidquam venale habet. Quid enim est turpius, quàm aliquem computare quàm mercede sit vir bonus? Calcatis utilitatibus ad virtutem eundum est quocumque vocavit, quocumque misit, sine respectu rei familiaris. Interdum etiam sine ullâ sanguinis sui parsimoniâ vadendum: nec unquam imperium ejus detrectandum. Quid consequar, inquis, si hoc grâtis fecero? Quod feceris: Rerum honestarum pretium in ipsis est. Si non ipso honesto movemur, ut boni viri simus, sed utilitate aliquâ atque fructu, callidi sumus, non boni. *Senec. 4. Benef. c. 1. Cicer. 1 de leg. n. 41.*

Injustissimum est, justitiæ mercedem quærere. Reliquæ quoque virtutes per se colendæ sunt, et in iis sequi officium debemus, non fructum. Nam ut quisque maximè refert ad suum commodum quæcumque agit, ita minimè est vir bonus. *Cicer. 1 de leg. n. 48. et. 49.* Verum, ut olim querebatur Ovidius,

Non facîle invenias multis è millibus unum

Virtutem pretium qui putet esse sui.

Ipse decor recti, facti si præmia desint,

Non movet, et grâtis pœnitet esse probum.

Nil, nisi quod prodest, carum est.

De Ponto, Lib. ii. Eleg. 3.

CAPUT III.

Omni ratione colenda et retinenda justitia est.

Cic. 2 Offic. n. 42.

1. Quanquam omnis virtus nos ad se allicit, facitque ut eos diligamus, in quibus ipsa inesse videatur: tamen justitia et liberalitas id maximè efficit. *Cicer. 1 Offic. n. 56.*

Justis hominibus ita fides habetur, ut nulla sit in his fraudis injuriæque suspicio. Itaque his salutem nostram, fortunas, liberos rectissimè committi arbitramur. Mihi quidem videntur bene morati reges olim fuisse constituti ab hominibus, justitiæ fruendæ causâ. Nam cum inops

multitudo premeretur ab iis qui majores opes habebant, confugiebant ad unum aliquem, de cujus justitiâ et prudentia magna erat opinio: qui cum prohiberet ab injuriâ tenuiores, summos et infimos æquo imperio regebat. Eadem fuit constituendarum legum causa, quæ regum. Inventæ enim leges sunt, quæ cum omnibus semper unâ atque eâdem voce loquerentur. *Cicer. 2 Offic. n. 33. 41.*

2. Laudabat Agesilaus Lacedæmoniorum rex justitiam, ut virtutum omnium principem, affirmabatque nullum esse fortitudini locum sine justitiâ. Cum ei dicerent quidam à magno rege Persarum aliquid imperari: *An, inquit, ille major Agesilao est, si non sit justior?* rectè quidem sentiens magnitudinem esse metiendam justitiâ, quasi regiâ regulâ. *Plut. in Agesil.*

Dicente quodam coram rege Antigono, *Regibus omnia honesta et justa esse:* subjecit rex: *Omnino barbarorum quidem regibus, nobis vero sola honesta pro honestis, sola justa pro justis habenda sunt.* *Plut. Apoph.*

Cum Trajanus præfecto militum prætorianorum gladium daret, quo is cingendus erat ad custodiam imperatoris: educto eo è vaginâ, et in altum sublato: *Accipe, inquit, gladium hunc, ut eo, si justè imperem, pro me utaris: sin malè, contra me. Quoniam moderatorem omnium peccare minùs fas est, quàm ceteros.* *Dio. 78. A. Vict.*

3. Æthiopes pietatem et justitiam maximè colebant. Ædibus eorum nullæ erant fores: quumque in viis publicis multa jacerent, nemò quidquam eorum surripiebat. Celtæ quoque fores ædium nunquam occlusas habebant. *Nicol, Damasc.*

Interrogatus Leonides rex Lacedæmoniorum in quâ urbe quis maximè tutus esset? *Ubi, inquit, justitia polleat, et injustitia jaceat.* *Plut. Apoph.*

4. Justitia est constans et perpetua voluntas jus suum unicuique tribuendi. Itaque cum coram Agide Lacedæmoniorum rege laudarentur Elei, quod in Olympicis certaminibus justi judices essent: *Quid mirum, inquit, faciunt, si quarto quoque anno per unum diem justitiâ, utuntur?* *Justinian. Plut. Apoph.*

5. Nemo justus esse potest, qui quidquam æquitati anteponit. *Cic. 2 Offic. n. 38.*

Quo tempore Callicratidas, Lacedæmoniorum classis præfectus, pecuniâ maximè indigebat ad annonam nauticam comparandam; accessere ad eum quidam amici Lysan-

dri, et oblati talentis quinquaginta, postulaverunt unum quendam ex inimicis sibi condonari necandum. Quos ille, quia æquitatem pecuniæ anteponebat, valere jussit. Aderat tum Cleander: qui cùm dixisset: *Ego verò oblatam pecuniam accepiſsem, si Callicratidas fuiſsem. Et ego, reſpondit Callicratidas, si Cleander.* Sic Alexander magnus Parmenioni suadenti, ut acciperet pecuniam à Dario oblatam ad redimendam pacem, reſpondit: *Et ego hoc pecuniam, quàm gloriàm, mallem, si Parmenio eſsem.* Plut. Apoph. Q. Curt. l. iv. c. 11.

Vir bonus, quod honestè se facturum putaverit, faciet, etiamsi laboriosum erit: faciet, etiamsi damnosum erit: faciet, etiamsi periculosum erit. Rursus quod turpe erit, non faciet, etiamsi pecuniam afferet, etiamsi voluptatem, etiamsi potentiam. Ab honesto nullà re deterrebitur, ad turpia nullà spe invitabitur. *Senec. Epist. 76.*

CAPUT IV.

Communi utilitati consulere debemus.

1. Sumus ad justitiam nati: neque opinione, sed naturâ, constitutum est jus. *Cic. 1 de leg. n. 2.*

Justitia versatur in hominum societate tuendâ,tribuendoque suum cuique, et rerum contractarum fide. *1 Offic. 14.*

Justitiæ primum munus est, ne cui quis noceat, deinde ut communibus utatur, tanquam communibus: privatis, ut suis. Sunt privata nulla naturâ: sed quia aliquid eorum, quæ naturâ fuerant communia, obtigit cuique hominum variâ ratione, id quisque teneat. Si sibi plus eo appetet, violabit jus humanæ societatis. *n. 20.*

Quoniam (ut præclare scriptum est à Platone) non nobis solùm nati sumus, sed etiam patriæ, parentibus, amicis, cæterisque hominibus; et quæ in terris gignuntur, ad usum omnium hominum creantur: in hoc naturam debemus sequi, et communi utilitati consulere mutatione officiorum, dando et accipiendo; devincireque tum operâ tum facultatibus hominum inter homines societatem. *n. 21.*

2. Quantulum est ei non nocere, cui debeas etiam: prodesse! Parva laus est, si homo mansuetus homini est, si naufrago manum porrigit, erranti viam monstrat, cum

esuriēte panem suum dividit. Membra sumus corporis magni. Natura nos cognatos edidit. Hæc nobis amorem indidit mutuum, et sociabiles fecit : illa æquum justumque composuit : ex illius constitutione miserius est nocere, quam lædi ; et illius imperio paratæ sunt omnium manus ad se invicem juvandos. Itaque ille Terentianus versus in pectore et in ore sit :

Homo sum, humani nihil à me alienum puto.

Sen. Ep. 95.

3. Si hoc natura præscribit, ut homo homini, quicumque sit, consulat, ob eam causam quòd is homo sit ; certè violare alterum lege naturæ prohibemur. *Cic. 3 Offic. 37.*

Ut, si in corpore humano unumquodque membrum proximi membri vires atque valetudinem ad se traduceret, debilitari et interire totum corpus necesse esset ; sic, si unusquisque nostrum rapiat ad se commoda aliorum, detrahatque quod cuique possit, emolumentum sui gratiæ, societas hominum et communitas evertatur necesse est. *n. 22.*

Concessum est, non repugnante naturâ, ut quisque sibi malit acquirere, quàm alteri, quod pertineat ad usum vitæ ; at illud natura non patitur, ut aliorum spoliis nostras facultates, opes, copias augeamus.

Chrysippus hoc scitè dixit, ut multa : Qui stadium currit, eniti et contendere debet quàm maximè possit, ut vincat : supplantare eum, quicum certet, aut manu depellere, nullo modo debet. Sic in vitâ non iniquum est, sibi quemque petere, quod ad usum pertineat : alteri deripere, jus non est. *n. 42.*

4. Forsitan quispiam dixerit : Nonne igitur sapiens, si fame ipse conficiatur, auferet cibum homini ad nullam rem utili ? Minimè verò. Non enim cuiquam vita sua potior esse debet, quàm animi talis affectio, neminem ut violat commodi sui causâ. Et suum cuique incommo- dum ferendum est potius, quàm de alterius commodis detrahendum. *n. 29 et 30.*

Non solum naturâ, sed etiam legibus populorum, constitutum est, ut non liceat sui commodi causâ nocere alteri. Hoc enim spectant leges, hoc volunt, incolumem esse civium conjunctionem : et, si qui eam dirimunt, eos morte, exilio, vinculis, damno, coercent. *n. 5.*

CAPUT V.

Ipsa peccandi voluntas peccatum est.

1. Me quidem iudice, non is solus malus est, qui injuriam fecit, sed et qui facere in animo habuit. *Ælian. l. xiv. c. 28.*

Potest aliquis nocens fieri, quamvis non nocuerit. Omnia scelera perfecta sunt, quantum satis est culpæ, etiam ante effectum operis: latro antequam manus inquinet, latro est. *Senec. de Const. c. 7. Benef. l. v. c. 14.* quia, ut ait P. Syrus:

Exeritur opere nequitia, non incipit.

Vir probus, aut improbus, non ex operibus tantum, sed etiam ex voluntate spectatur. *Democr. Sentent.*

Bonus est, non qui non injuriam facit, sed qui ne vult quidem. *Stobæus Serm. 9.*

2. Fuit Lacedæmone civis nomine Glaucus, cujus justitia maximè celebrabatur. Itaque grandem pecuniæ summam ejus fidei credere non dubitavit civis quidam Milesius. Eam pecuniam repetentibus postea mortui Milesii liberis, retinere in animo habuit Glaucus, et oraculum Apollinis consuluit, an interposito jurejurando abnegare posset depositum apud se auri pondus. Respondit Pythia, ipsum daturum pœnas graves propter hanc retinendi depositi voluntatem. Ille pœnarum metu deterritus à scelere, non justitiæ studio inductus, depositam apud se pecuniam restituit. Verùm in cogitati sceleris pœnam cum totâ prole et domo interiit. Ipsam quippe peccandi voluntatem superi plectunt: quia qui scelus pectore deliberatum concepit, perinde nocens est, ac si illud admisisset. *Herodot. l. vi.*

Has patitur pœnas peccandi sola voluntas:

Nam scelus intra se tacitum qui cogitat ullum,

Facti crimen habet. *Juv. Sat. xiii. ver. 195.*

3. Aristides ille justus, interrogatus quid justum esset? *Aliena non concupiscere*, respondit. *Stobæus, Serm. ix.*

Naturæ, quæ lex est divina et humana, parere qui volet, nunquam committet ut alienum appetat. *Cic. 3 Offic. 23.*

Inimicus est, non solum qui injuriam infert, sed etiam qui de inferendâ cogitat. *Democr. Sentent.*

Vestalis incesta est etiam sine stupro, quæ cupit stuprum. *Senec. l. vi. Excerpt. contrav.*

Potestne fieri, ut, qui Jovi amicus fuerat, rem aliquam iniquam concupiscat, aut turpe aliquid cogitet? *Dio. Chrys. Orat. iv.*

Vir bonus non modò facere, sed ne cogitare quidem quidquam audebit, quod non possit prædicare. *Cic. 3 Offic. 77.*

4. Bene præcipiunt, qui vetant quidquam agere, quod dubites æquum sit, an iniquum. 1 *Offic. 30.*

Turpissimum est non modò plus putare quod utile videatur, quàm quod honestum; sed hæc etiam inter se comparare, et in his addubitare. *n. 18.*

Est totum sceleratum et impium genus eorum hominum, qui deliberant, utrùm id sequantur, quod honestum esse videant, an se scelere contaminent: in ipsâ enim dubitatione et deliberatione facinus inest, etiamsi ad scelus non pervenerint. Ergo ea omnino deliberanda non sunt, in quibus est turpis ipsa deliberatio. *n. 37.*

5. Actio recta non erit, nisi recta fuerit voluntas: ab hac enim est actio. Rursus voluntas non erit recta, nisi habitus animi rectus fuerit: ab hoc enim est voluntas. *Senec. Ep. 95.*

CAPUT VI.

Qui solo metu à peccato abstinet, non est innocens.

1. Non dicendus est justus, quisquis non infert injuriam: sed qui inferre impunè cum possit, libenter abstinet. *Philem.*

Non metu, sed officii causâ, peccatis abstinendum. *Democr. Sentent.*

Quidam parum curant, spontène, an metu, legibus pareant. Verùm non minùs fur est, qui metu à furto abstinet, furtum ipsum non perosus nec damnans, quàm

Ū qui furantur. Et illi homines non sunt belluis meliores: nam illæ quoque, si timeant homines aut canes gregem custodientes, à rapinâ abstinēt, *Dio. Chr. Orat.* 68.

Non dicam pudicam mulierem eam, quæ aut legem aut virum timuit, cùm à flagitio abstineret. Et non immeritò refertur in numerum peccantium, quæ retinuit pudicitiam metu pœnæ, non amore honesti. *Senec. 4 Benef. c. 14.*

Si quæ, metu dempto, casta est, ea denique casta est. *Ovid. 3 Amor. Eleg. 4.*

Non possumus pudicos dicere eos, qui à flagitio arcentur infamiæ aut legum ac judiciorum metu. Nam quid faciet is homo in tenebris, qui nihil timet nisi testem vel judicem? *Cic. 1 de Leg. n. 50, 51.*

Non est diuturnus magister officii timor. *2 Philip. n. 90.*

2. Etsi infamiæ ac suppliciorum metus hominem, qui à peccato abstinet, non præstat innocentem; sæpe tamen nonnihil confert, ut ille tandem vir bonus fiat. Nam dum illum à scelere avocāt, paulatim assuefacit parere divinis humanisque legibus quibus docemur domitas habere libidines, coercere omnes cupiditates, nostra tueri, ab alienis mentes, oculos, manus abstinere. Itaque sapienter admodum antiqui legum conditores, ut efferatos agresti vitâ, aut militiâ, populorum animos mitigarent, et ad mansuetudinem ac justitiam traducerent, Deorum primum metum iis injiciendum esse rati sunt: deinde ad terrorem impietatis, audaciæ, flagitii, carceres, vincula, variaque supplicia instituerunt: ut quos amor honesti in officio non retineret, ii gravitate pœnæ à scelere deterrentur. *Cic. 1 de Orat. n. 194. Livius, l. i. n. 19. Cic. pro Rosc. Amerin. 70.*

CAPUT VII.

Oderunt peccare boni virtutis amore.

Hor. l. i. Ep. 16.

1. Nobis persuasum esse debet, etiamsi omnes Deos hominesque celare possimus, nihil tamen avarè, nihil injustè, nihil libidinosè esse faciendum. *Cic. 3. Offic. n. 37.*

Philosophum nomine Peregrinum, virum gravem, vidimus, inquit A. Gellius, cum Athenis essemus, diversantem in tugurio extra urbem. Quumque ad eum frequenter iremus, multa herclè dicentem utilia et honesta audivimus: in quibus hoc præcipuum auditum meminimus: *Virum sapientem non peccaturum esse, etiamsi fecisset eum Dii atque homines ignoraturi forent. Non enim poenæ aut infamiæ metu non esse peccandum, sed justis honestique studio, et officio.* A. Gell. l. xii. c. 11.

2. Cum olim in Lydiâ, ut ferunt fabulæ, terra discessisset magnis quibusdam imbribus, in illum hiatum descendit Candaulis regis pastor Gyges, æneumque equum animadvertit, cujus in lateribus fores erant, quibus apertis, mortui hominis vidit corpus magnitudine inusitatâ annulumque aureum in digito; quem ut detraxit, suo ipse digito inseruit, et in cætum pastorum se recepit. Ibi cum palam ejus annuli ad palmam converterat, à nullo videbatur, ipse autem omnia videbat: idem rursus videbatur, cum in locum suum annulum inverterat. Itaque hæc opportunitate annuli usus, regem dominum interemit, ac sustulit quos obstare sibi arbitrabatur: nec in his eum quisquam facinoribus potuit videre. Sic repente annuli beneficium rex exortus est Lydiæ.

Ficta quidem et commentitia hæc fabula est, prolata à Platone. Sed hunc ipsum annulum si habeat sapiens, non magis sibi licere putet peccare, quàm si non habeat. Honestam enim bonis viris, non occulta, quæruntur: atque, si nemo sciturus, nemo ne suspicaturus quidem sit eos aliquid mali fecisse, non faciant. Cic. 3 Offic. n. 38.

CAPUT VIII.

Ea sola utilia sunt, quæ justa et honesta.

1. Homo justus, isque quem sentimus virum bonum, nihil cuiquam detrahet quod in se transferat: intelligetque nihil nec expedire nec utile esse, quod sit injustum. Qui hoc non didicerit, nec persuasum habuerit, bonus vir esse non poterit: et ab eo nulla fraus aberit, nullum facinus. Sic enim cogitans: *Est istud quidem honestum, verum hoc expedit:* is utile atque honestum, res à naturâ copulatas, audebit divellere. Qui fons est fraudum, male-

ficioꝝ, scelerum omnium. *Cic. 3. Offic. n. 15, 18, &c.*

2. C. Marius consulatûs ingens cupido exagitabat. A quo adipiscendo cûm longè abesse se cerneret; Q. Metellum, summum virum et civem, cujus legatus erat, criminari statuit, ut, ereptâ ei gloriâ confecti belli Jugurthini, ipse mitteretur in Numidiam cum imperio consulari. Itaque nec facto ullo nec dicto abstinuit, quo conciliare sibi militum animos posset. Multa criminose de Metello est locutus, multa de se magnificè. Dixit: *Bellum ab imperatore trahi consultò, quòd homo inanis, et superbia regis, imperio nimis gauderet: se paucis diebus habiturum Jugurtham in catenis, si dimidia pars exercitûs sibi permitteretur.* Deinde à Metello Romam missus, cûm ad populum eadem dixisset, quæ priùs in castris, et de se ingentia esse pollicitus; voti tandem compos fuit. Factus est ergo ille quidem consul, sed à fide justitiæque discessit, qui imperatorem suum in invidiam falso crimine adduxerit. *Sallust. Jugurth. c. 64. Cic. 2. Off. ib.*

3. Alter quoque Marius, cognomento Gratidianus, boni viri officio functus non est. Cûm prætor esset, et tribuni plebis collegium prætorum adhibuissent, ut res nummaria communi sententiâ constitueretur; conscripserunt communiter dictum, constitueruntque, ut omnes simul prætores ac tribuni post meridiem ad populum accederent, renunciaturi edictum illud, quod videbatur futurum gratissimum omnibus civibus. Cæteri quidem, alius alio, discessere: Marius à subselliis in rostra rectè iit, idque, quod communiter compositum fuerat, solus edixit. Ea res ei apud populum magno honori fuit: omnibus vicis statuæ erectæ, ad eas thus, et cerei incensi. Quid multa? Nemo unquam multitudini fuit carior. *Cic. ibid.*

4. Conturbantur nonnunquam homines in deliberatione, cûm id, in quo violatur æquitas, videtur non ita magnum; illud autem commodum, quod ex eo paritur, permagnum videtur. Sic Gratidiano videbatur non ita turpe, præcipere collegis et tribunis plebis popularem gratiam: valde verò utile videbatur consulem hac ratione fieri: quod sibi tunc proposuerat. At honestate dirigenda est utilitas; et quod turpe est, nunquam utile debet videri. Quid igitur? Possumusne Gratidianum virum bonum

num judicare? Nihil profectò minùs cadit in virum bonum, quàm præripere aliis gloriam, aut gratiam fallere. Nulla res tanti est, nec commodum ullum tam expetendum, ut propterea vir bonus ab officio discedat, et fidem ac justitiam violet. Nunquam enim est utile peccare, quia semper est turpe: et quia semper est honestum virum bonum esse, semper est utile. *Cic. ibid. n. 64.*

Damnum appellandum est cum malâ famâ lucrum.

P. Syrus.

5. Themistocles, victis navali prælio Persis, dixit Athenis in concione, se habere consilium reipublicæ salutare, sed illud vulgari non opertere: postulavitque ut populus daret aliquem quicum communicaret. Datus est Aristides. Hunc ille monuit, classem Lacedæmoniorum, quæ subducta erat ad Gytheum portum, clam incendi posse: docuitque hâc ratione frangi quoque posse opes Lacedæmoniorum, cum quibus de Græciæ principatu contendebant Athenienses. Quod Aristides cum audivisset, ad concionem expectatione suspensam rediit, dixitque: *Perutile videri consilium quod Themistocles afferret; sed minimè honestum esse.* Athenienses, quod honestum non esset, id quoque non esse utile judicaverunt: et, auctore Aristide, repudiaverunt eam rem, quam ne audierant quidem. Ubi nunc in uno inveneris cum amore honesti, qui tunc populi universi fuit? *Cic. 3 Offic. 49. Valer. l. vi. c. 5. Livius, l. iv. c. 6.*

CAPUT IX.

Qui adipisci veram gloriam volet, justitiæ fungatur officiis.

Cic. 2 Offic. n. 43.

1. Facillimè ad res injustas quisquis impellitur, cui est animo principatûs et gloriæ nimis cupido. Nihil verò honestum et gloriosum esse potest, quod justitiâ vacat; et nemo gloriam injustitiâ et immanitate est consecutus. *Cic. 1 Offic. 62, &c.*

An eos aliquid veræ laudis adeptos putas, qui exitio multarum gentium clari, non minores fuère pestes mortalium, quàm inundatio et conflagratio? Agebat infeli-

rem Alexandrum furor aliena devastandi. Non contentus paterno regno, arma toto orbe circumferebat, et nihil intactum relinquebat, immanium ferarum modo, quæ plûs, quàm exigit fames, mordent. Cùm ei civitas quædam offerret partem agrorum, et dimidium rerum omnium: *Eo, inquit, proposito, veni in Asiam, non ut id acciperem quod dedissetis: sed ut id haberetis quod reliquissen.* Senec. 3 Quæst. in procem. Ep. 94. 53.

2. Ubi ad fines Scytharum vincendo pervenit, unus ex eorum legatis hæc ei inter alia multa dixit, quibus ejus injustitiam et ambitionem arguerit: *Quid nobis tecum est? Nunquam terram tuam attigimus. An non licet nobis, qui in vastis sylvis vivimus, ignorare quis sis, et unde venias? Nec servire ulli possumus, nec imperare desideramus. Major fortiorque es fortasse, quàm quisquam: tamen alienigenum dominum pati nemo vult. Gloriaris te ad persequendos latrones venire, ipse omnium gentium latro. Lydiam cepisti, Syriam occupasti, Persidem tenes, Bactrianos habes in potestate, Indos petisti: jam etiam ad pecora nostra avaras manus porrigis. Quid tibi divitiis opus est, que te esurire cogunt, ita ut quo plura habes, eò acrius cupias, que non habes? Denique si Deus es, tribuere mortalibus beneficia debes, non sua crisiere: sin autem homo es; id quod es, semper esse te cogita.* Q. Curt. l. vii. c. 8.

Eleganter et veraciter Alexandro illi magno quidam comprehensus pirata respondit. Nam cùm rex hominem interrogasset, quo jure mare infestaret? ille liberâ contumaciâ: *Eodem, inquit, quo tu orbem terrarum: sed quia id ego exiguo navigio facio, latro vocor; tu, quia magnâ classe, imperator.* S. Aug. l. iv. de Civit. c. 4. ex Cic.

CAPUT X.

Quod tibi fieri non vis, alteri ne feceris.

1. Alexander Severus in expeditionibus bellicis aperto tabernaculo prandebat et cœnabat, militarem cibum, cunctis videntibus atque gaudentibus, sumens. Circumibat prope cuncta tentoria, et neminem abesse à signis patiebatur. Si quis de viâ in agros cujusquam deflexisset, aut fustibus subiciebatur in conspectu ejus, aut virgis, aut multæ pecuniariz; aut saltem verbis castigato ipse dicebat: *Visne hoc in agro tuo fieri, quod facis in alieno?*

Usurpabatque sæpius quod à quibusdam sive Judæis sive Christianis audierat, aut per præconem inclamari jubebat, quum aliquem puniret: *Quod tibi fieri non vis, alteri ne feceris.* Quam sententiam usque ad eò dilexit, ut et in palatio et in publicis operibus præscribi juberet. *Lamprid. in A. Sever. c. 51.*

2. Ab alio expectes, alteri quod feceris. *P. Syrus.*

Syraculis pulsus à Dionysio tyranno Dion, petierat Megaram. Ubi cum Theodorum principem hujus urbis domi convenire vellet, neque admitteretur, diu ante fores retentus; dixit comiti suo: *Patienter hoc ferendum est: forsitan enim et nos, cum in gradu dignitatis nostra essemus, aliquid tale fecimus.* Quam tranquillitate animi ipse sibi conditionem exilii placidiorem reddidit. *Valer. l. iv. c. 1.*

3. Vulpes ad cœnam dicitur ciconiam Prior invitasse, et illi in patinâ liquidam Posuisse sorbitionem, quam nullo modo Gustare esuriens potuerit ciconia: Quæ vulpem quum revocasset, intrito cibo Plenam lagenam posuit: huic rostrum inserens Satiatur ipsa, et torquet convivam fame: Quæ cum lagenæ frustra collum lamberet, Peregrinam sic locutam volucrem accepimus: *Sua quisque exempla debet æquo animo fatis.*

Phædr. l. i. Fab. 26.

CAPUT XI.

Injuriam pati satius est quàm facere.

Agis Lacedæmoniorum rex ultimus, ex insidiis captus et indictâ causâ ab Ephoris damnatus, cum ad laqueum abduceretur, conspiceretque, quendam ex ministris fentem: *Desine, inquit, ô homo, meam vicem flere. Nam sic iniquè et contra leges moriens, superior feliciorque sum iis qui mihi vitam eripi jubent.* Hæc locutus, ultro collum laqueo induit. *Plut. Aphob.*

Athenienses, quos multis beneficiis affecerat, ingratos expertus Phocion, in concionem prodit, et sapientissimè dixit: *Malo à vobis, Athenienses, malum accipere, quàm ipse vobis malum inferre.* *Eliau. l. ii. c. 16.*

CAPUT XII.

Quod meum non est, redeat ad dominum.

Pythagoricus quidam emerat à sutore calceos, rem magnam, non præsentibus nummis. Post aliquot dies venit ad tabernam, pretium soluturus. Quam cum clausam invenisset, et ostium diu pulsaret, fuit qui diceret: *Quid perdis operam tuam? Sutor ille, quem quaris, elatus et combustus est. Quod nobis molestum esse potest, qui in æternum nostros amittimus: tibi minime, qui scis futurum ut ille renascatur.* Quibus verbis jocabatur in Pythagoricum, qui metempsychosim, hoc est, migrationem animarum in alia corpora, fieri credebat. At philosophus noster tres aut quatuor denarios, quod pretium calceorum attulerat, non invitum domum retulit, subinde manu concutiens. Deinde cum intellexisset arrisisse sibi illud lucellum; reprehendens hanc suam non reddendi tacitam, ait ipse sibi: *Sutor ille tibi vivit. Tu redde quod debes.* Rediit ergo ad eandem tabernam, et per claustrum qua parte rimam invenit. quatuor denarios inseruit ac misit, pœnas à se exigens improbæ cupiditatis, ne alieno assuesceret. *Senec. 7. Benef. c. 20 et 21.*

CAPUT XIII.

Verbis non minus, quàm factis, fit injuria.

Maledicus à malefico non distat, nisi occasione. *Quintil. l. xiii. c. 9.*

Famæ damna majora sunt, quàm quæ æstimari possunt. *Livius, l. iii. c. 92.*

Nihil est tam volucre quàm maledictum: nihil facilius emittitur, nihil citius excipitur, nihil latius dissipatur. *Cicer. pro. Planc. n. 57.*

Providendum est in primis, ne sermo noster indicet vitium aliquod inesse in moribus nostris. Quod maximè solet evenire, cum joco, aut serio, de absentibus, detrahendi causâ, maledicè contumeliosèque dicitur. *Cicer. i Offic. n. 134.*

.....Absentem qui rodit amicum,
 Qui non defendit alio culpante, solutos
 Qui captat risus hominum, famamque dicacis,
 Fingere qui non visa potest, commissa tacere
 Qui nequit; hic niger est; hunc tu, Romane, caveto.
Horat. l. i. Sat. 4.

Lingua est maliloquax mentis indicium malæ.

Difficilem oportet aurem habere ad crimina.

In iudicando criminosa est celeritas. *P. Syrus.*

Cæca invidia est, nec quidquam aliud scit, quàm detrectare virtutes. *Livius, l. xxxviii. c. 49.*

2. Cùm Mardonius Xerxem ad bellum Græcis inferendum excitaret, deprimendø eorum in armis virtutem, iisque detrahendo: Artabanus ei respondit longâ oratione, in quâ hæc dixit de alienæ famæ detractioe feu calumniâ. Res est teterrima alienæ famæ detractio: in quâ duo sunt qui injuriam faciunt, unus cui injuriâ fit. Qui enim detrahit, injurius est, quod accusat non præsentem. Injurius quoque est qui credit detrahenti, antequam rem compertam habeat. Sic absenti fit duplex injuria: ab altero enim simulatur ut malus, ab altero talis temerè putatur. *Herodot. l. vii.*

CAPUT XIV.

Ex omni vita simulatio dissimulatioque tollenda est.

1. Cùm duobus modis, vi aut fraude, fiat injuria; fraus, quasi vulpecalæ, videtur, vis leonis: sed fraus odio digna majore. Injuria autem nulla capitalior est, quàm eorum, qui, cùm maximè fallunt, dant operam ut viri boni videantur. *Cicer. 1. Offic. n. 23.*

Bonitatis verba imitari, major malitia.

Malus bonum ubi se simulat, tunc est pessimus.

P. Syrus.

C. Canius, eques Romanus, homo nec infacetus, et satís literatus, cùm se contulisset Syracusas, otiandi causâ; dictitabat se emere velle hortulos aliquos, quod invitare amicos, et ubi oblectare se sine interpellatoribus, posset. Quod cùm percrebuisset; Pythius quidam, qui ar-

argentariam faciebat Syracusis, dixit ei hortos quidem suos non esse venales, sed licere illi uti iis, si vellet, ut suis. Et simul invitavit eum in hortos ad cœnam in posterum diem. Cùm ille promisisset, tum Pythius, qui, ut argentarius, erat apud omnes ordines gratosus, piscatores ad se vocavit, et ab his petivit, ut ante hortulos suos postridiè piscarentur.

Ad cœnam tempore venit Canius. Opiparè paratum erat convivium: cymbarum ante oculos multitudo: piscatorum quisque, quod ceperat, afferebat: ante pedes Pythii pisces abjiciebantur. Tum Canius: *Quæso*, inquit, *quid est hoc, Pythi? tantumne piscium, tansumne cymbarum?* Et ille: *quid mirum?* inquit. *Quidquid est piscium Syracusis, in hoc loco est: hïc aquatio: hïc villâ isti carere non possunt.* Incensus Canius cupiditate, contendit à Pythio ut hortos venderet. Gravatè ille primò rem accipere est visus. Impetrat tandem Canius. Emit hortos homo cupidus et locuples, tanti quanti voluit Pythius, et emit instructos: negotium conficit.

Invitat in hortos Canius postridie familiares suos: venit ipse maturè: cymbam nullam videt. Quærit ex proximo vicino, num feriæ quædam piscatorum essent, quòd nullos videret? *Nullæ quod sciam*, inquit ille, *hodie piscatorum feriæ sunt: sed hïc piscari nulli solent. Itaque heri mirabar quid accidisset.* Stomachari Canius. Sed quid faceret? Nondum enim erant latæ leges adversus eos qui dolo malo agerent. *Cic. 3 Offic. n. 14.*

2. Omnes aliud agentes, aliud simulantes, ut Pythius, perfidi, improbi, malitiosi sunt. Nam ex omni vitâ simulatio dissimulatione tollenda est. Et ratio postulat ne quid insidiosè, ne quid simulatè, ne quid fallaciter fiat. Itaque vir bonus, nec ut emat meliùs, nec ut vendat, quidquam simulabit aut dissimulabit. Si verò vir bonus est qui prodest quibus potest, nocet nemini; certè virum bonum non facilè reperiemus. *n. 60. 68. 64.*

Quædam video, propter depravationem consuetudinis, neque more turpia haberi, neque jure civili sanciri: at naturæ lege sancita sunt. *n. 69.*

CAPUT XV.

Improbi hominis est mendacio fallere.

Cicero pro Muræna. n. 62.

1. Vera dicere, justum est ; mentiri verò, injustum.
Plato de Justo.

In virum bonum non cadit mentiri emolumentum sui causâ. *Cic. 3 Offic. 81.*

Qui mentitur, fallit quantum in se est. Vir bonus præstare debet ne mentiatur. *A. Gell. l. x. c. 11.*

Volumus viros fortes et magnanimos, eosdem esse bonos, et simplices, veritatis amicos, minimèque falaces. Quæ virtutes ad justitiam pertinent. Itaque Aristides apud Athenienses, et Epaminondas apud Thebanos, tam alieni à mendacio et tam veritatis diligentes fuisse traduntur, ut ne joco quidem unquam mentirentur. Et Atticus ille, quicum Cicero vixit conjunctissimè, mendacium neque dicebat, neque pati poterat, *Illum odii, aiebat Achilles, æquè ac portas Plutonis, qui aliud quidem recondit in mente, aliud verò dicit.* *Cic. Offic. n. 63. Plut. in Arist. C. Nepos in Epam. et in Attic. Plut. Iliad. l. ix. ver. 310.*

2. Quid est in quo maximè elaborare debemus ? Ut mens sit justa, oratio mendacii expers. Hoc viri boni proprium est, nihil à veritate alienum loqui ut et nihil à justitiâ alienum exsequi. *M. Anton. l. iii. sect. 16. et l. iv. sect. 33.*

Qui injustè agit, impiè agit. Cùm enim natura homines ediderit, ut sibi invicem prosint, nec ullâ ratione obsint ; qui hoc naturæ placitum violat, adversus eam est impius. Eadem natura veritas quoque nuncupatur ; estque prima omnium, quæ vera sunt, causa. Itaque qui sciens volensque mentitur, impiè agit : quia fallendo injustè agit. *Idem, l. ix. sect. 1.*

Quod verum, simplex, sincerumque est, id naturæ hominis est aptissimum. *Cic. 1 Offic. n. 13.*

3. Assuesce dicere verum, et audire. *Sen. Ep. 68.*
Assuefaciendi maximè sunt pueri, ut vera dicant : *mentiri enim servile est, et omnium hominum odio dignum vitium.* Eâdem sententiâ dixit Apollonius : *Illibe-*

rale est mentiri: ingenium veritas decet. Plut. de Educ. puer. Philos. in Epist. Apoll.

Illiberalis et sordidus vulgò putatur quæstus eorum, qui emunt à mercatoribus quod statim divendant: quia nihil solent proficere, nisi admodum mentiantur. Nec verò quicquam est turpius vanitate, id est, mendacio. *Cicer. 1 Offic. n. 150.*

Persæ liberos suos à quinto anno ad vicesimum tria edocebant; equitare, sagittas arcu mittere, vera loqui. Turpissimum apud eos habebatur mentiri. Secundum mendacium, in proximo turpitudinis loco ponebant æ alienum: maximè, quòd qui ære alieno obstringitur, mendacio obnoxius esse soleat, et plerumque verba pro re dare. *Herod. l. i.*

Justitiam quoque liberi Persarum edocebantur à pueritiâ. Ac quemadmodum pueri in Græciâ in scholas itabant, literarum liberaliumve artium discendarum causâ: sic apud Persas pueri scholas frequentabant, ad accipiendam justitiæ disciplinam. Quam quidem ut citius et certius discerent, non solum eorum auribus præcepta justitiæ incuscabantur, sed etiam docebantur justas ferre sententias de iis, quæ inter ipsos exoriebantur, controversiis, et legitimas pro cuiusque delicti modo pœnas irrogare. Itaque bonam diei partem impendebant publici justitiæ præceptores in audiendis dijudicandisque puerorum disceptationibus. *Xenoph. l. i. Cyrop.*

4. *Hoc consequuntur mendaces, inquiebat Aristoteles, ut, quum vera dixerint, non illis credatur.* Similiter Cicerò dixit: *Mendaci homini, ne verum quidem dicenti, credere solemus.* *Diog. Laërt. in Arist. Cic. 2 de divin. n. 146.*

Iis, qui peccarunt, non facilè delicti venia conceditur, si interrogati deprehendantur mendaces. *Xenoph. l. iii. Cyrop.*

Quid interest inter perjurum et mendacem? Qui mentiri solet, non longè abest à perjurio. Quem ego, ut mentiatur, inducere possum, eum facilè exorare poterò, ut pejeret. Ut pœna à Diis immortalibus perjuro constituta est, sic et mendaci. *Cicer. pro Rosc. Comoed. n. 46.*

Veritas sermo est simplex. *Ammian. l. xiv.*

Veritas vel mendacio corrumpitur, vel silentio. *Ibid. l. xxxi.*

CAPUT XVI.

In vitio est, qui non obsistit, si potest, injuriæ.

Injustitiæ genera duo sunt: unum eorum qui inferunt injuriam; alterum eorum qui non propulsant, si possunt, ab iis quibus infertur. Neque enim is tantum in vitio est, qui injustè facit impetum in quempiam, aliquâ animi perturbatione incitatus: sed etiam qui non obsistit, si potest, injuriæ. *Cicer. 1 Offic. n. 23.*

2. Hominibus plures solent esse causæ prætermittendæ defensionis aliorum, deserendique officii. Nam inimicitias, aut laborem, aut sumptus suscipere nolunt nonnulli; quidam negligentia, pigritia, inertia præpediuntur: alii suis quibusdam studiis occupationibusve sic impediuntur, ut desertos esse patiuntur eos, quos tutari debeant. Hi omnes, dum altero genere injustitiæ vacant, in alterum incidunt. Communi enim utilitati non serviunt, et in vitæ societatem nihil conferunt studii, nihil operæ, nihil facultatum. *n. 27.*

3. Apud Ægyptios legibus cautum erat, ut, si quis iter faciens videret quempiam à latronibus circumveniri, aut aliquid injuriæ perpeti, nec ei auxilium ferret, cum posset, morte damnaretur. Si opem dare non posset; rem deferre ad iudices et injuriæ auctorem accusatione persequi jubebatur. Quod facere si neglexisset, plagis mulctabatur, et triduum carebat cibo. *Diod Sic. l. ii.*

Si is qui injuriam non propulsat ab aliis, cum potest, injustè facit; qualis habendus est is, qui non modò non repellit, sed etiam adjuvat injuriam? Quidam è Græciâ Romam attulerunt falsum testamentum L. Minutii Basili locupletis hominis. Quod ut facilius pro vero accipi posset, scripserant hæredes secum M. Crassum et Q. Hortensium, homines ejusdem ætatis potentissimos; qui cum illud falsum esse suspicarentur, sibi autem nullius culpæ in conscribendo testamento conscii essent; alieni facinoris munusculum non repudiaverunt. Graviter deliquisse mihi quidem videntur, qui etiam veras hæreditates consequuntur, si sint blanditiis et simulatâ amicitia quæsitæ. *Cicer. l. iii. Offic. c. 18.*

CAPUT XVII.

Inhumanum verbum est ultio.

1. Non ulcisci decet, ut vulgus putat, neque malefacere cuiquam hominum, quodcumque ab aliis ipse passus fueris. Nullo enim modo injuria facienda est. *Plato in Critone.*

Sunt quædam officia adversus eos servanda, à quibus injuriam acceperis. Est enim ulciscendi et puniendi modus. Atque haud scio an non satis sit eum, qui te laceraverit, injuriæ suæ pœnitere, ut et ipse ne quid tale posthac committat, et cæteri sint ad injuriam tardiores. *Cicer. Offic. l. i. c. 11.*

Ignoscere hominum est, ubi eum pudet, cui ignoscitur. *P. Syrus.*

Veteres Romani, acceptâ injuriâ, malebant ignoscere, quàm persequi. Et plus penè auxerunt imperium parcendo victis, quàm vincendo. *Sallust. Catil. c. ix. Livius, l. xxx. c. 42.*

Omnibus noxis veniam dare se dicebat Cato Major, præterquam suis. *Plut. in Cat. maj.*

Ignoscito sæpe alteri, numquam tibi. *P. Syrus.*

2. Beneficia beneficiis repensare honestum est, non autem injurias. Illic, vinci turpe est: hic, vincere. Ultio inhumanum verbum est, licet malâ consuetudine pro justo receptum. Quàm pulchrum est, hominem, velut nulli penetrabilem telo, nullis injuriis, nullis contumeliis perstringi! Ultio doloris confessio est. Catoni minori in balneo quidam os percussit, ignorans: qui enim illi sciens fecisset injuriam? Homini deinde satisfaciendi Cato, *Non memini*, inquit, *me percussum*. Non excaudit, non vindicavit injuriam. Melius esse putavit non agnoscere, quàm vindicare. Nihilne, inquires, mali ex impunitâ hominis petulantia ortum est? Imò multum boni. Cæpit ille Catonem nosse et mirari. Magni animi est injurias despicere. *Senec. l. ii. de irâ, c. 32. l. iii. c. 5.*

Quippe minuti

Semper et infirmi est animi exiguique voluptas

Ultio. *Juven. Satir. xiii. ver. 189.*

Ille magnus et nobilis est, qui, more magnæ feræ, latratus minutorum canum securus exaudit. Sæpe satius fuit dissimulare, quàm ulcisci.

Comessatores quidam cùm in uxorem Pisistrati incidissent, multaque protèrvè et fecissent et dixissent; postero die facti veniam à Pisistrato postulaverunt. Quibus ille respondit: *Vos deinceps magis operam date modestiæ. Mea verò uxor heri nusquam prodiiit.* Plut. Apoph.

3. Cùm Cumani Pittaco vinctum tradidissent hominem à quo filius ejus fuerat interfectus; illum impunitum dimisit, hæc præfatus: *Venia ultione melior est: illa namquæ mitis est ingenii, hæc ferini.* Simili sensu dixit Musonius philosophus: *Feræ, non hominis, est, querere, quomodo morsum pro morsu, malum pro malo, reddat.* Stobæus Serm. xix.

Non oblitus erat Aristides, Themistoclem sibi diu clam aut apertè fuisse adversarium in administrandâ republicâ. Noverat quoque se ejus maximè operâ pulsum fuisse in exilium. At ostendit quàm alieno ab ultione animo esset, cùm deliberaretur de ipso Themistocle è civitate ejiciendo testarum suffragiis. Opportuna certè oblata erat expetendæ vindictæ occasio. Nihil tamen ab eo aut dictum aut factum est, quod nocere posset inimico. Et ut priùs ei non inviderat florenti opibus et rerum gestarum gloriâ, sic tum noluit premere periclitantem, et eo dejecto exultare. *Plut. in Themist.*

T. Pomponius Atticus nullas inimicitias gessit, quòd et lædebat ipse neminem, et, si quam injuriam acceperat, malebat oblivisci, quàm ulcisci. *C. Nepos in Attic. c. 11.*

Magnanimo injuriæ remedium oblivio est.

P. Syrus.

Adrianus multos in privatâ vitâ inimicos expertus erat, quorum injurias, ubi imperator factus est, adèd neglexit, ut uni, quem capitalem habuerat, diceret: *Evaesisti.* Spart. c. 17.

Vulgatum illud, quia verum erat, in proverbium venit: *Amicitias immortales, inimicitias mortales esse debere.* Livius, l. xl. c. 46.

4. Cùm Dion expugnasset Syracusas, quas ab impotenti tyrannorum dominatu liberare cupiebat; Heraclides et Theodotus, infensi ejus hostes, se ultrò dedidère, *culpam fatentes, orantesque, ut benignior in ipsos esset,*

quàm ipsi in eum fuerant. Admonuerunt quoque decere Dionem, qui multis aliis virtutibus ornatus esset, iræ imperare, et ultionis cupidum non esse. Hæc illis precantibus et monentibus hortabantur amici Dionem; ne improbis hominibus, funestarum turbarum auctoribus, parceret: sed eos militum furori permitteret. Tum Dion: *Cæteris, inquit, ducibus atque imperatoribus plerumque sola belli et armorum exercitia cordi sunt: mihi verò, qui flurimum temporis in Academiâ consumpsi, cura fuit id discere, ut iram, ultionem, invidiam, pertinaciam, et alias hujusmodi pestes possem vincere: cujus victoriæ argumentum certum est non in amicos et viros bonos benignitas, sed erga iniquos et insensos inimicos placabilitas et lenitas. Heraclidem suferare mihi animus est, non potentiâ et prudentiâ, at humanitate et justitiâ: in his enim virtutibus vera fortitudo, magnitudo, gloria posita est: cùm miles, aut saltem fortuna, sibi vindicet partem gloriæ bello quæsita. Quòd si Heraclides et invidus, et infidus et malus est: ideone Dionem oportet virtuti suæ labem inurere iræ impotentiâ? Lege quidam humanâ definitum est, eum minus peccare adversus justitiam, qui acceptam injuriam ulciscitur, quàm qui prior infert: at naturâ utrumque ab eadem animi infirmitate proficiscitur. Nullius porrò hominis tam aspera tamque effera est improbitas, quæ non possit frequentibus beneficiis mansuescere et expugnari. His usus rationibus Dion, Heraclidem et Theodotum missos facit. *Plut. in Dion.**

CAPUT XVIII.

Injuriam beneficiis vincuntur speciosius quàm mutuo odio pensantur. Valer. l. iv. c. 2.

1. Usque ad ultimum vitæ finem non desinemus communi bono operam dare, adjuvare singulos, opem ferre etiam inimicis. *Senec. de otio, c. 2^a.*

Optimus injuriam ulciscendi modus est, ne similis sis eam inferenti. Contemnit me quisquam? ipse viderit. Ego mihi cavebo, ne quid contemptu dignum vel egisse vel dixisse deprehendat. Odit me quisquam? ipse viderit. At ego mitis esse et benevolus cuique pergam; et huic etiam ipsi qui me odit, errorem ostendere paratus ero,

non contumeliosè neque ut patientiam meam ostentem, sed benignè et ingenuè; interius enim me ita affectum esse oportet, ut ipsi Dii videant me eum esse qui nihil indignè agrè feram. *M. Anton. l. vi. c. 6. l. xi. c. 13.*

Amico nolì maledicere, ac ne inimico quidem: inquit bat Pittacus. Diog. Laërt in Pittac.

Laudante quodam Cleomenis dictum, qui interrogatus, quodnam esset boni regis officium, responderat, *Amicis bonè, inimicis malè, facere: Quanto rectius erat, inquit Socrates, amicis benefacere, ex inimicis autem amicos facere?* Plut. Apoph.

Sic invicem vivendum esse, dicebat Pythagoras, ut non ex amicis inimicos, verum ex inimicis amicos faciamus. *Diog. Laërt. in Pythag.*

2. M. Marcellus, cùm de eo consulatum tunc gerente Siculi questum Romam venissent, ultro de illis in senatum admittendis retulit, querentesque de se patienter sustinuit. Improbatis à patribus querelis eorum, clementer excepit orantes ut ab eo in clientelam reciperentur: nullas adversus illos inimicitias exercuit, et per reliquam vitam illis benefacere non destitit. *Plin. l. iv. c. 1. Plut. in Marcell.*

Cùm è carcere atque ipsâ urbe Atheniensium profugisset orator Demosthenes, respexit aliquos ex inimicis citato cursu vestigia sua subsequentes, et latebras pavidus quæsivit. At illi eum sæpius nomine compellatum tandem assecuti, oraverunt ut, positâ formidine, pecuniam acciperet, quam domo ei attulerant in viaticum et subsidium; adhortatique sunt ne casum ferret acerbius. Quibus Demosthenes: *Quomodo, inquit, fossus non graviter ferre, me eâ urbe carere, ubi tales inimicos habeam, quales alibi amici inveniri vix queant?* Plut. in Demosth.

3. Magni animi est, injurias in summâ potentâ pati: Nec quicquam est gloriosius principe impunè læso. *Senec. l. de Clem. c. 20.* •

• Cicero hanc laudem eximiam Cæsari tribuit, quòd nihil oblivisci soleret, nisi injurias. Omnium victor regressus in urbem, omnibus, qui contra se arma tulerant, ignovit. Simultates omnes, occasione oblatâ, libens deponebat. Ultro ac prior scripsit C. Calvo post famosa ejus adversum se epigrammata. Valerium Catullum, cujus versiculis famam suam laceratam non ignorabat, adhibuit

cœnz. C. Memmii suffragator in petitione consulatûs fuit, licèt asperrimæ fuissent ejus contra se orationes. *Cicer. pro. Ligar. n. 25. Patercul. l. ii. c. 56. Sueton. in Cas. c. 73.*

Vespasiani, inter cætera bona, illud singulare fuit, inimicitias oblivisci: adeo ut Vitellii hostis sui filiam locupletissimè dotaverit, et viro splendidissimo in matrimonium dederit. Ferebat quoque patienter contumelias, iis, ut erat facetissimus, dictis jocularibus respondens. *A. Vict. Epit. c. 17.*

CAPUT XIX.

Justitia victrix odii.

1. Cn. Domitius tribunus plebis M. Scaurum principem civitatis in judicium populi Romani vocaverat, iratus quòd ab eo in augurum collegium non fuisset cooptatus. Cùm opprimendi inimici summo studio flagraret, servus Scauri ad eum noctu pervenit, promittens se instructurem ejus accusationem multis et gravibus domini criminibus. At Domitius nefario indicio servi perfidi uti noluit. Continud enim et suis auribus obduratis, et indicis ore clauso, comprehendi hominem et ad Scaurum deduci jussit. Sicque in infesto accusatore justitia odium vicit. Hunc Domitium deinde populus, tum hanc ob causam, tum propter alias virtutes, libentiùs et consulem et censorem et pontificem maximum fecit. *Valer. l. vi. c. 4.*

2. Non minùs insigne justitiæ specimen dedit L. Crassus in nobili illâ accusatione, quam adversus Carbonem instituit, annos natus unum et viginti. Nam cùm scrinium rei, plura continens, quibus facilè opprimi posset, allatum ei fuisset ab illius servo; signatum, ut erat, remisit ad illum cum servo catenato, nolens causam obtinere alienâ fraude ac perfidiâ.

Quo pacto viguisse tunc inter amicos justitiã credimus, cùm inter accusatores quoque et reos eam tantum virium obtinuisse videamus?

CAPUT XX.

Utilitas ex inimicis capienda.

1. Vulgus hominum sat̄s habet nullo malo ab inimicis affici: at viri prudentes etiam utilitatem ex iis capiunt. Inimicus dicta factaque nostra observare infenso animo non cessat, captans nocendi occasionem: quam ne præbeamus, cavemus. Hæc autem cautio sensim affert studium et consuetudinem rectam et inculpatam vitam agendi. *Plut. de utilit. capiendâ ex inimic.*

Vis inimicum modestiâ afficere? noli eum illiberalem, libidinosum, scelestum nominare: ipse esto humanus, castus, probus. Hinc Diogenes, quem cum interrogasset quidam, quâ ratione ulcisceretur inimicum? *Si ipse, inquit, quâm optimus fiam.*

Cùm accepisset Philippus Macedoniæ rex se ab oratoribus Atheniensibus proscindi conviciis in concione: *Magnam, inquit, ejusmodi hominibus gratiam habeo. Dabo enim operam deinceps et verbis et factis, ut illos mendacii coarguam.* *Plut. Apoph.*

Verè dictum est ab Antisthene, eum, qui probitatem suam salvam esse velit, opus habere vel veris amicis, vel inimicis vehementissimis: quod illi admonendo, hi criminando à vitiis avertant. Sed quoniam nostrâ ætate amicitia voce valde exili ad liberas reprehensiones est prædita, loquax in adulando, muta in castigando; audienda est nobis ex inimicis veritas. Quemadmodum enim Telephus, ut ferunt fabulæ, domestico medico destitutus, vulnus hostili hastæ sanandum præbuit: ita necesse est, ut ii, quos deficit benevolus castigator, sermonem audiant infensi inimici peccata eorum insectantis, non considerantes animum maledicentis, sed reprehensionis veritatem atque utilitatem. *Plut. de utilit. capiend.*

3. Sicut qui volebat Jasonem Thessalum interficere, gladio vomicam ejus aperuit. eaque ruptâ salutem illi attulit; sic sæpe convicium, ab irato homine aut inimico jactum in nos, aperuit et sanavit morbum animi latentem aut neglectum. At plerique maledictis impetiti, non despicunt an verè aliquid ipsis objiciatur; sed quid vicissim possint arguere in maledicentibus.

Ab inimico tuo notatus aliquo crimine, illud, si verum sit, majore studio expurgare debes, quàm commonstratam aliquam vestis tuæ maculam; si falsum, quærenda tamen est causa, quæ criminationi occasionem dedit, cavendumque, ne deinceps committas aliquid aut affine aut simile ejus quod objectum fuit.

4. Multa sunt quæ inimicus magis apprehendit in nobis, quàm amicus: quoniam, ut ait Plato, cæcus amor est. Hiero, cùm ei quidam inimicus oris factorem exprobrasset, domum se ad uxorem recipiens: *Quid hoc, inquit, rei est? Cur tu mihi oris vitium non indicavisti?* Illa verò, ut erat pudica et simplex, *Existimabam, ait, omnes viros sic olere.* Adeò non animi tantum, sed etiam corporis vitia, sæpe nobis nota fiunt ab inimicis priùs, quam ab amicis. *Ibid.*

CAPUT XXI.

A litibus est abhorrendum.

1. Convenit hominem dando munificum esse, et in exigendo non acerbum; in omnique re contrahendâ, vendendo, emendo, conducendo, locando, æquum et facilem se præbere, multa multis de jure suo cedentem, à litibus verò abhorrentem. *Cic. de Offic. n. 64.*

Est autem non modò liberale, sed interdum etiam fructuosum, paulùm de jure suo decedere: et

Pecuniam in loco negligere maximum interdum est lucrum. *Ter. Adolph. Act. ii. sc. 2.*

Habenda quidem est ratio res familiaris, quam dilabî sinere, flagitiosum est; sed ita ut illiberalitatis avaritiæque absit suspicio. Et ut res familiaris quæri dibet iis rebus, à quibus abest turpitudine; sic conservari diligentia et parsimonia. *Cic. Ibid. n. 87.*

2. Isocrates vocatus in jus anno ætatis octogesimo secundo, orationem habuit, in quâ his verbis ostendit quam alieno à litibus animo semper fuisset: Sic vixi hactenus, ut nemo unquam me ullius injuriæ aut contumeliæ accusaverit; neque judex neque arbiter fuerit, qui de meis adversùs quemquam factis aut dictis pronunciarit. Etenim cavi, ne quid ipse erga quemquam delinquerem. Mihi verò si qua facta fuit injuria; non judicio quæsiyi

vindictam de inimicis, sed eorum amicis controversiam dirimendam permisi. *Isocrat. de Permut.*

3. Parum liberalem et nimis litigiosum esse existimo, vocare aliquem in jus propter maledicta. *Lysias Orat. 9.*

Negabat Musonius se vocaturum quemquam in jus. Se enim neque injuriâ neque contumeliâ affectum putabat, si maledictis lacessi, conspuî, verberari, contigisset: *Qui ignorant, inquiebat, quid honestum aut turpe revera sit, injuriam se pati censent, si quis aut torvis oculis ipsos intusatur, aut irrideat, aut percutiat, aut convicijs lacessat. At vir sapiens his omnibus non perturbatur: non illa pati, sed facere, turpe ducens. Itaque nemo mente præditus propterea ad accusationem et forum convertetur, utpote qui sibi nullam accepisse injuriam videatur.* *Stobæus, Serm. xix.*

CAPUT XXII.

Paci consulendum, nec bella acerbè gerenda.

1. Cùm sint duo genera decertandi, unum per disceptationem, alterum per vim: illud proprium hominis est: hoc belluarum: nec confugiendum est ad posterius, nisi ubi uti non licet superiore: semperque paci est consulendum. Quare ideo tantùm suscipienda bella sunt, ut sine injuriâ in pace vivatur. Partâ autem victoriâ, conservandi sunt ii, qui non crudeles in bello, non immanes, fuerunt. Sic Romani Sabinos, Æquos, Volscos, etiam in civitatem acceperunt: at Carthaginem et Numantiam funditus sustulerunt. *Cic. 1. Offic. n. 34.*

2. Cùm de imperandi gloriâ decertatur et armis fama quæritur, causas tamen omnino subesse oportet justas bellandi: et ejusmodi bella minùs acerbè gerenda sunt. Quod egregiè præstiterunt Ptolemæus rex Ægypti et Demetrius Antigoni filius. Cùm à Ptolemæo Demetrius victus esset; major ad Ptolemæum gloria venit ex moderatione, quàm ex ipsâ victoriâ. Siquidem et dimisit amicos Demetrii, non solùm cum suis rebus, verùm etiam additis insuper muneribus, et ipsius Demetrii privatum omne instrumentum ac familiam reddidit, dicens: *Se non propter prædam bellum iniisse.* Non multò post Ptolemæus iterum congressus cum Demetrio navali prælio,

ipse, amissâ classe, hostique concessâ victoriâ, in Ægyptum refugit. Tum Demetrius Ptolemæo benignitatis vices rependens, filium ejus, et fratrem, et amicos in Ægyptum remisit cum privato cujusque instrumento : ut appareret, eos, non odio sed laudis studio accensos, donis muneribusque inter ipsa bella contendere. Certè honestiùs tunc bella gerebantur, quàm nunc amicitix coluntur. *Ibid.* n. 38. *Justit. l. xv. c. 1, 2.*

CAPUT XXIII.

Justitiâ hostes vincere gloriosius est quam armis.

Factis honestis atque justitiâ hostes vincere, non minor. imò etiam utilior. res est, victoriâ armis partâ. Hic enim necessitate compulsi hostes cedunt, illuc sponte. Hæc victoria magnis cum damnis revocat ad officium mælesanos: illa verò sine detrimento in viam rectam reducit aberrantes. Præterea ubi armis res geritur, pars potissima victoriæ opes est militis: ubi verò justitiâ, totum decus eorum est qui præsumunt. *Polyb. l. v.*

2. Romani, Camillo duce, obsidebant jamdudum Falerios. Faliscorum urbem. Mos erat tunc apud Faliscos, ut plures simul pueri unius magistri curæ demandarentur. Qui scientiâ videbatur præcellere, erudiebat principum liberos. Is quum in pace solitus esset pueros lusus exercitationisque causâ extra urbem producere, eo more per belli tempus non intermisso, die quodam eos trahens longiùs à portâ, quàm solebat, in castra Romana perduxit, et Camillo tradidit, præfatus, se tradere Falerios in manus Romanorum, cum daret eos pueros. quorum parentes in eâ civitate principes essent. Quæ ubi Camillus audivit: *Non ad similem tui, inquit, populum est imperatorem venisti cum scelesto munere scelestus ipse. Nobis non est cum Faliscis societas, quæ factio sit humano: sed ea utrique populo est quam natura omnibus hominibus ingeneravit. Sunt belli, sicut pacis, jura, justique non minus, quàm fortiter bella gerere, didicimus. Arma habemus, non ad præsumendum eam astatem, cui etiam captis urbibus parcitur; sed adversus armatos, qui, nec lesi nec lacessiti à nobis, castra Romana obsurgant. Nos tu novo scelere victi,*

quantum in te fuit: ego Romanis artibus, virtute, opere, armis, vincam.

Denudari deinde ludimagistrum jussit, eumque pueris tradidit reducendum Falerios, manibus post tergum illigatis: virgas quoque eis dedit, quibus proditorem agerent in urbem, verberantes. Ad quod spectaculum concursu populi primum facto, deinde vocato à magistratibus senatu, tanta mutatio animis est injecta, ut ii, qui modò efferati odio iraque erant, statim pacem poscerent. Itaque Romanorum justitiam admirantes, ultro se iis dederunt, rati se melius sub imperio eorum, quàm legibus suis, victuros. Camillo et ab hostibus et à Romanis gratiæ actæ sunt. Pace Faliscis datâ, exercitus Romam redactus. *Livius l. v. c. 27.*

3. Pyrrhi bello maximum exemplum justitiæ in hostem est à Romanis datum. Cùm Pyrrhus Epiri rex bellum populo Romano intulisset, et de imperio certamen esset cum rege generoso ac potente; perfuga venit ab eo in castra Fabricii Consulis, et pollicitus est se Pyrrhum veneno necaturum, si sibi præmium proponeretur. Hunc Fabricius reducendum ad Pyrrhum curavit. Si specie utilitatis decipi se passus esset Fabricius, sustulisset unius perfugæ operâ magnum bellum et gravem populi Romani adversarium. Sed magnum dedecus fuisset et flagitium, venenis certasse cum hoste, non armis; et eum non virtute, sed scelere, fuisse superatum, cum quo laudis certamen erat Romanis. *Cic. 1 Offic. n. 40. 3 Offic. n. 86.*

Hanc Fabricii magnitudinem animi admirans Pyrrhus, exclamasse fertur: *Hic est ille Fabricius, qui difficilius ab honestate, quàm sol à cursu suo, averti potest.* Gratiâ et Fabricio et populo Romano egit: et ne ipse beneficio victus videretur, quoscumque tum habebat captivos Romanos dimisit sine pretio, et bene vestitos. Quinetiam ad pacem et amicitiam impetrandam misit Romam Cineram legatum cum muneribus pretiosis, tam fœminarum quàm virorum aptis usui. Quæ munera cum aspernati essent ii, quibus primum oblata fuerant, et ad alios ostiatim deferrentur; tantâ Romani omnes abstinentiâ fuere, ut nullus vir, nulla mulier, patere januam suam regis donis recipiendis voluerit: Et ne captivi, quos rex remiserrat, gratis reciperentur, totidem pro his Tarentinorum Samnitumque remissi sunt ad Pyrrhum. *Eutrop. l. ii.*

A. Gell. l. iv. c. 8. Plutarch. in Pyrrho. Valer. l. iv. c. 13. Livius, l. xxxiv, c. 4.

Iisdem ferme temporibus, ut refert Justinus, simile huic totius populi continentiae exemplum fuit, quorundam legatorum Romanorum. Nam missi à senatu in Ægyptum legati, cum ingentia sibi à Ptolemæo rege missa munera sprevisent; paucos post dies ad cœnam invitatis aureæ coronæ datæ sunt, quas illi receptas postero die status regis imposuerunt. *Justin. l. xviii. c. 2.*

CAPUT XXIV.

Etiam hosti fides servanda.

1. Si temporibus adductus aliquid hosti cum jurejurando promiseris, est fides servanda. Est enim jusjurandum affirmatio religiosa: et id tenendum est, quod affirmatè, quasi Deo teste, promiseris.

Primo Punico bello M. Attilius Regulus, cum consul iterum in Africâ captus esset à Pœnis: Romam ad senatum missus est, juratus se Carthaginem rediturum, nisi impetrasset ut Pœnis redderentur captivi nobiles quidam. In senatum venit, mandata exposuit, et primùm ne sententiam ferret recusavit, dicens, se, quoniam in hostium potestatem venerat, jam non esse senatorem. Deinde jussu expromere quæ patriæ conducere arbitrabatur, non modò non censuit captivos Pœnos esse remittendos, verùm etiam dissuasit, negavitque utile esse eos reddi; quia adolescentessent et boni duces, ipse verò jam confectus senectute. Cujus cum valisset auctoritas; captivi retenti sunt, ipse Carthaginem rediit, nec eum Romæ retinuit caritas patriæ et suorum.

Neque verò tum ignorabat Regulus, se ad crudelissimum hostem et ad exquisita supplicia proficisci: sed jusjurandum conservandum putabat. Itaque tum cum vigilando aliisque cruciatibus necabatur, erat in meliore causâ, quàm si domi remansisset senex captivus, perjurus consularis. Nisi senatui auctor fuisset retinendorum Romæ captivorum Pœnorum, essent profectò redditi, et ita incolumis in patriâ restitisset: sed quia id patriæ non

utile putavit, idcirco sibi honestum esse credidit et sentire illa et pati.

Ex totâ hâc laude Reguli, inquit Cicero, unum illud est admiratione dignum, quòd captivos Pœnos retinendos cœnsuerit. Nam quòd rediit, nobis nunc mirabile videtur: illis quidem temporibus aliter facere non poterat. Itaque ista laus non est hominis, sed temporum. Nullum enim vinculum ad astringendam fidem jurejurando arctius majores nostri esse voluerunt. *Cic. 1 Offic. n. 13. 3 Offic. 26, 27, 31.*

2. Octo Romanorum millia post Cannensem pugnam in Pœnorum manus venerant. Cum Annibal illis redimendi se copiam fecisset, decem elegerunt, qui Romam ad senatum irent. Nec Pœni pignus aliud fidei ab eis postulârunt, quam ut jurarent se in castra redituros, nisi à senatu impetrâssent captivos redimi. Quum egressi è castris essent, unus ex iis minimè Romani ingenii homo, in castra paulò post reversus, quasi aliquid esset oblitus, ante noctem comites assecutus est. Hâc arte se jurejurando solum putabat. Et erat verbis, re non erat. *Livius, l. xxii. c. 2. 58. Cic. 1. Offic. n. 40. 3 Offic. n. 32.*

Legatis captivorum in senatum introductis, eorum princeps M. Junius multa dixit cur captivi redimendi essent, et ad movendam patrum misericordiam nihil omisit. Ubi finem dicendi fecit, extemplo clamor flebilis est sublatus ab eâ virorum et mulierum turbâ quæ ad fores curiæ stabat; manusque ad curiam tendebant, orantes, ut sibi patres, liberi, conjuges, fratres, cognati, redderentur. Consulti ex ordine senatores decreverunt captivos non esse redimendos, cum id parvâ pecuniâ fieri posset: ut esset insitum militibus Romanis aut vincere aut mori. Quum triste responsum redditum esset, mista cujusvis generis hominum turba cum magnis fletibus questibusque legatos ad portam prosequuta est. Unus è legatis, qui proper fallacem reditum in castra se jurejurando exsolutum putabat, domum abiit. Quod ubi innotuit, relatam ad senatum est. Omnes decreverunt, ut ille veterator et callidus comprehenderetur, et custodibus publicè datis, ad Annibalem reduceretur.

3. Existunt sæpe injuriæ calumniâ quâdam, et malitiosâ pactionum interpretatione. Quo in genere multi peccantur. Ut ille peccavit, qui, cum triginta dierum *induciæ* essent pactæ cum hoste, nocte populabatur ejus

agros: quòd, inquiebat, dierum induciæ pactæ essent, non noctium. *Cic. 1 Offic. n. 33.*

Cùm Q. Labeo pactus esset cum rege Antiocho, quem bello superaverat, ut ab eo dimidiam classis partem acciperet: ferunt omnes ejus naves medias secuisse, ut regem totâ classe privaret. *Valer. l. vii. c. 3.*

Idem Labeo à senatu Romano datus arbiter Nolanis et Neapolitanis de finibus agrorum terminandis, cùm ad locum venisset, separatim cum utrisque est locutus, monuitque ne cupidè agerent, sed ut regredi, quàm progredi, mallent. Id cùm utrique fecissent, aliquantum agrî in medio relictum est, quod populo Romano adjudicavit. Decipere hoc quidem, non dijudicare est. Quocirca in omni re fugienda est talis solertia. *Cic. ibid.*

CAPUT XXV.

Jusjurandum colito.

1. Jusjurandum optimè coles, si eo nec frequenter utaris, nec temerè; sed in rebus tantùm necessariis aut gravissimis adhibeas. Invenient autem juramenta tua fidem apud eos qui audient, si ita vixeris, ut iis persuasum sit, nihil tibi sive jurato sive injurato videri veritate sanctius in rebus mortalium. *Hierocles in carm. Pythag.*

Jurandi consuetudine in perjurium facilè prolabimur. Contrâ cùm parcè juratur, sanctè juratur.

Jurare, nisi ubi necesse est, gravi viro parum convenit. *Quintil. l. ix. c. 2.*

Jusjurandum refuge, si possis, prorsùs: si minùs, cùm licet. Cùm enim jusjurandum Deum citet testem eorum quæ dicuntur; parum pium et religiosum videtur esse, divinum numen advocare ob res humanas, quarum plurimæ parvæ vilesque sunt. *Epict. c. 44. Simplic. in Epict.*

2. Jusjurandum si postulabitur, duabus de causis dabis: vel ut temetipsum turpi crimine liberares, vel ut amicos à periculis eripias. Pecuniæ verò causâ per nullum Deum jurabis, etiamsi id verè facere possis. *Isocrat. ad Dem.*

Pythagoras discipulis præcipiebat, ut ad jurandum rarè et tardè accederent; se verò dignos præberent, qui-

bus non jurantibus fides haberetur, propter vitæ integritatem. Itaque Clinias Pythagoricus, cum trium talentorum mulctam jurejurando effugere posset, maluit tantæ pecuniæ damnum facere, quàm jurare: cum tamen non esset falso juraturus. *Diodor. l. vi. Diog. Laërt. in Pythag. S. Basil. de legendis lib. Gentil.*

Quantum honoris ab Atheniensibus tributum est Xenocrati viro sapientiâ pariter ac sanctitate claro! Qui cum testimonium publicè dixisset, et, ut mos Græcorum erat, ad aras accederet, jurandi causâ se omnia verè retulisse; unâ voce omnes judices ne is juraret, reclamaverunt; et existimaverunt concedendum esse integritati illius viri, quod non erant sibi postmodum concessuri in dicenda sententiâ: juramentum enim præstiterunt. *Valer. l. ii. c. 10. Cic. pro Balbo, n. 12.*

3. Olim, quum hominibus Deorum cura et reverentia esset, jurejurando in singulis causis à litigantibus requisito res citò simul et tutò judicabantur; nunc verò, quoniam pessimi homines, quorum magna multitudo est, Deos res humanas curare non credunt, aut eos hostiis et blanditiis ita sibi conciliari posse putant, ut liceat impunè vel grandem pecuniam aliis eripere, vel impositam sibi gravem mulctam effugere, commutandæ leges sunt. Itaque prudens legum lator in judiciorum disceptatione prohibebit jusjurandum litigantium, ne si jurandi licentiâ cuique detur, plures perjuri fiant. *Plat. l. xii. de Rep.*

Phryges ab omni abstinebant juramento; ita ut nec ipsi jurarent, nec alios jusjurandum adigerent. *Nicol. Damasc.*

Rarus fuit priscis Romanis usus jurisjurandi, imò, et testium et signorum in privatis pactionibus: quia vix inveniebatur qui datam fidem falleret. *Grotius ex Polyb.*

4. Apud Ægyptios perjuri capite mulctabantur, ut qui pietatem in Deos violarent, et fidem inter homines tollerent, maximum vinculum societatis humanæ. *Diod. Sic. l. i.*

Si quis pejeret, à Diis pœnam, ab hominibus dedecus, expectet. Latere quidem homines potest: at Deos non potest. *Arest. Rhet. c. 18.*

Perjurii pœna divina, exitium: humana, dedecus. *Cic. 2 leg. n. 22.*

Qui juramento hostem circumvenit, fatetur se hominem timere, Deum verò contemnere. *Plutarch. in Lys.*

Si quis Deorum, ut fingunt Poëtæ, per Stygem jurando pejerasset; per annum totum nihil ambrosiæ et nectaris degustabat: jacebat lecto affixus, vocis et spiritûs expers, gravi veterno oppressus: novem quoque annos agebat procul à cæteris Diis; non eorum conciliis intererat, non epulis. *Hesiod. Theogon. ver. 793.*

CAPUT XXVI.

Servis imperare moderatè laus est.

1. Meminerimus et adversùs infimos justitiam esse servandam. Est autem infima conditio et fortuna servorum: quibus uti debemus, ut mercenariis, ita ut opera exigatur, justa solvantur. *Cic. 1 Offic. n. 41.*

Servis imperare moderatè laus est: et in mancipio tibi cogitandum est, non quantum illud impunè pati possit, sed quantum tibi permittat æquitas; quæ jubet parcere etiam captivis, et pretio paratis. Cùm omnia licere videantur in servum, quia eum emisti; est tamen aliquid, quod commune jus hominum vetet licere in illum. Nam ejusdem naturæ est, cujus tu. *Senec. 1 de Clem. c. 10.*

2. Quis non oderat Vedium Pollionem, quòd murænas sanguine humano saginaret; et servos, si quid deliquerant, in vivarium abjici juberet? O hominem mille mortibus dignum! Cùm aliquando apud eum cœnaret Augustus, fregit unus ex servis vas crystallinum. Rapi illum protinus Vedius jussit, et, ne vulgari morte periret, objici murænis quas ingens piscina continebat. Evasis è manibus puer, et confugit ad Cæsaris pedes, ne esca piscium fieret. Motus est novitate crudelitatis Cæsar, imperavitque servum dimitti: crystallina autem vasa omnia coram se frangi, et compleri piscinam. Fuit Cæsari sic castigandus amicus; bene usus est potestate suâ. *3 de Irâ, c. 40.*

3. Superbissima consuetudo circumdedit cœnanti domino stantium servorum turbam. Comedit ille plus quàm capit, et ingenti aviditate onerat distentum ventrem: at infelicibus servis non licet movere labra, ne ut loquantur quidem. Nocte totâ jejuni mutique perstant. Sic fit ut illi de domino loquantur, quibus coram domino loqui non licet. *Ep. 47.*

Proverbium jactatur: *Nobis totidem esse hostes, quot servos.* Ipsi eos hostes facimus, cùm, obliti homines esse, tanquam jumentis abutimur. Cogitemus illum, quem servum nostrum vocamus, eodem modo ortum esse ac nos, eodem frui cœlo, æquè spirare, æquè vivere, æquè mori.

4. Sic cùm inferiore vivas, quemadmodum tecum superiorem velles vivere. Vive cum servo clementer. Comiter quoque et in sermonem et in consilium admitte. Amicum in foro aut in curiâ tantùm ne quæras: si diligenter attenderis, et domi invenies. Virtus nulli præclusa est; omnes admittit, ingenuos, servos, reges, exules. Non census eligit: nudo homine contenta est. Potest servus justus esse, fortis, magnanimus. Dicitur Nicolæus Damascenus, scriptor celeberrimus, maximam in erudiendis famulis curam posuisse, et eos ad morum suorum similitudinem formâsse quotidianâ cum illis vivendi consuetudine. Itaque eos expertus est non deteriores amicis suis. *Nicol. Damasc.*

5. Ergo non ministeriis servos æstimabo, sed moribus. Quemadmodum stultus est, qui, equum empturus, non ipsam inspicit, sed stratum ejus ac frænos: sic stultissimus est, qui hominem æstimat aut ex veste, aut ex conditione. Servus est: sed fortasse liber animo. Servus est: vide, quis nostrum non sit? Alius libidini servit, alius avaritiæ, alius ambitioni, ferè omnes timori. Nulla servitus turpior est quàm voluntaria.

Ne te fastidiosi isti superbique domini deterreant, quo minus servis tuis hilarem te præbeas. Colant potiùs te, quàm timeant. Id non debet dominis parum esse, quod Deo satis est, qui colitur et amatur. Non potest amor cum timore misceri. Rectissimè ergo te facere judico, quòd timeri à servis tuis non vis, quòd verborum tantum castigatione uteris. Verberibus muta animalia admonenda sunt.

Lacedæmonio cuidam flagris sævienti in servum, *Desine*, inquit Demonax, *te servo tuo similem ostendere.* Lucian. in Dem.

Apud Ægyptios si quis servum sponte occiderat, eum morte damnari, æquè ac si liberum occidisset, jubebant leges, non respicientes hominis occisi fortunam, sed facinoris atrocitatem. *Diodor. Sic. l. i.*

6. Cùm Adrianus imperator stylo oculum servi cuiusdam sui vulnerasset, ac postea eum vidisset factum ex illo vulnere unoculum : vocavit ad se, fecitque ei potestatem petendi munus pro amisso oculo. Cum autem ille miser taceret ; rursus hortatus est Adrianus, ut quidquid vellet peteret. Tum ille negavit *se quidquam petere, desiderare autem atque optare oculum quem amisisset.* Enimverò quod tandem munus inveniri possit, quo oculus amissus rependatur ? *Galen. de affect.*

7. Româ redeunti mihi, inquit Galenus, itineris comes factus est quidam patriâ Cretensis, vir bonis moribus, in amicos benevolus, et liberalis, sed sic iracundus, ut suis ipsius manibus adversus servos uteretur. Is furore percitus, quòd servi duo, de suppellectili suâ interrogati, nihil respondissent, eos in caput ita percussit, ut sanguis multus efflueret. Cùm ipsum deinde facti pœnituisset ; me manu arreptum introducit in aedès quasdam : deinde lorum porrigens, ubi se ipsum exiit, jubet verberare pro iis, quæ furore nefario, ut ipse vocabat, correptus patraverat. Cùm autem ego, ut par erat, in risum prorumperem ; ille mihi ad genua procumbens, instabat, obsecrabatque ut ejus precibus annuerem. Ego contrâ eò majores risus edebam, quò diutiùs illum perseverantem videbam in proposito ut caderetur. Tantum promisi me facturum quod petebat, hoc est, ei verbera illaturum, si ipse quoque valde exiguum quiddam, quod ego eram petiturus, mihi vicissim præstaret. Ubi illi conditio placuit, rogavi hominem, ut me quædam dicentem audire vellet. Quod ille se facturum æquo animo dixit. Tum ego longiori sermone illum docui, quemadmodum ratione emendari et coërceri oporteat quidquid est in nobis iracundiæ ac furoris. Et multa attuli ut probarem, non verberibus, sed alio modo peccata esse corrigenda. Cùm ille interea ad seipsum rediisset, longè postea seipso melior effectus est. *Galen. ibid.*

CAPUT XXVII.

Dominorum benignitas in servos.

1. Antiquissimus Italiæ rex Saturnus tantæ justitiæ fuisse traditur, ut neque servierit sub illo quisquam, ne-

que aliquid privatæ rei habuerit; sed omnia communia et indivisa fuerint, veluti unum cunctis patrimonium esset. Hæc ætas aurea vocata est. Ad servandam tam felicitatis temporis memoriam instituta sunt apud Græcos et Romanos Saturnalia, in quibus dominorum ac servorum jus æquabatur. Imò per eos dies servi, habitum herilem sumentes, sedebant ad mensam, dominis ministrantibus, aut unà sedentibus: honores in ædibus gerebant: jus dicebant. Causidici Romæ non veniebant in forum. Clausæ erant scholæ. Gestabantur pilei. Nefas erat pœnas à nocentibus exigere, et bellum suscipere. *Justin. l. xiv. c. 1. Athen. l. xiv. c. 10. Dio. l. xlviii. Senec. Ep. 47. Martial passim. Macrobi. 1 Sat. c. 10.*

2. Nonnulli Romanorum servos, quorum fidei operâ usi erant, donabant libertate, numerabant inter amicos, hæredes scribebant. Patet ex Plinii epistolis, quæ fuerit ejus benignitas in manumittendis servis, et in concedendâ testamenti conficiendi licentiâ: qui dolor de eorum infirmitatibus aut mortibus: quæ cura et sollicitudo, ut ægris nihil deesset ad convalescendum ex morbo. *Plinius l. ii. ep. 16. l. v. ep. 19. l. vii. ep. 1. 16.*

3. Extant quoque plurimæ Ciceronis epistolæ, quæ declarant ejus sollicitudinem de valetudine Tironis servi, quem Patris in Achaiâ ægrum reliquerat; simulque quàm parum propterea sumptui pepercerit, et quàm studiosè eum amicis suis commendaverit. Hæc autem est summa illarum epistolarum:

Paulo faciliùs posse me ferre desiderium tui putavi: sed planè non fero. Et quanquam magni interest ad honorem meum, quamprimum ad urbem me venire; tamen peccâsse mihi videor, qui à te discesserim. Tum hoc tibi persuade, nihil me malle quàm te esse mecum: at si intelliges opus esse te Patris, convalescendi causâ, paulùm commorari, existima nihil me malle, quàm te valere. Quod maximè conducatur valetudini tuæ si feceris, maximè obtemperâris voluntati meæ. Hoc pro tuo ingenio considera. Innumerabilia sunt tua in me officia domestica, forensia, urbana, provincialia. Omnia viceris, si, ut spero, te validum videro. Illud, mi Tiro, te rogo, sumptui ne parcas ulla in re, quâ ad valetudinem opus sit. Scripsi ad Curium daret medico quod dixisses, ut sit studiosior. Ego omnem spem tui diligenter curandi in Curio habeo. *Nihil potest fieri illo humanius, nihil nostri amantius. Ei*

te totum trade. A. quoque Varroni, quem tum amatissimum mei cognovi, tum etiam valde tui studiosum, diligentissimè te commendavi, quem omnia facturum confido: recepit enim. Festinare te nolo. Nihil laboro, nisi ut salvus sis. Tuam prudentiam, tuum erga me animum, novi. Scio te omnia facturum, ut nobiscum quamprimum sis. Sed tamen ita velim, ut nihil properes. Quanquam te videre toto animo cupio, tamen te penitus rogo, ne te nisi bene firmum committas per hyemem tam longæ navigationi et viæ. Cura igitur te, et confirma; et cum comode, et per valetudinem, et per anni tempus navigare poteris, ad nos amatissimos tui veni. Nemo nos amat, qui te non diligit: carus omnibus expectatusque venies. Vale, mi Tiro, vale, vale et salve. *Cic. Ep. ad fam. l. xvi.*

Hunc Tironem, quem postea manumisit, verè amabat Cicero, ut ipse his verbis scribit ad Atticum: De Tirone video tibi curæ esse. Qui etsi mirabiles utilitates mihi præbet, cum valet, in omni genere negotiorum vel studiorum meorum; eum ego tamen propter humanitatem et modestiam malo salvum, quàm propter usum meum. *Ad. Attic. l. vii. 5.*

4. Quàm jucunda res est servis, bonos dominos nancisci; et dominis, servos benevolos! *Stobæus, Serm. lx. ex Eurip.*

Cum stipendia faceret Cato major, in agmine ferebat ipse arma sua. Servus eum unus sequebatur, qui cibaria portabat: cui quidem prandium aut cœnam quamlibet apponenti nunquam succensuisse dicitur, turpissimum esse existimans cum servis ventris causâ rixari: imò eum ipse, expletis militaribus muneribus, sæpius adjuvit ad coquendos et parandos cibos. In pace reversus ad villam, iisdem, quibus servi, operibus vacabat, eidem cum illis mensæ accumbebat, eodem vescebatur pane, atque idem bibebat vinum. In multis aliis rebus tam benignum in servos herum agebat, ut illi ubique prædicarent magnam ejus moderationem, assiduos labores, faceret aut graviter dicta.

Unum tamen fuit in quo Catonis desiderabatur humanitas. Nempe servos, ubi consenuissent, venundandos putabat, neque alendos inutiles. Quod quidem quid aliud erat, quàm servis, sicut jumentis, abuti? atque existimare, nullam hominì cum homine intercedere socie-

tatem, nisi quæstûs causâ? Ego verò, inquit Plutarchus, ne bovem quidem operarium velim domo abigere ob senium, et pecuniolâ aliquâ venundare, nedum hominem. Exercendâ enim mansuetudine erga bruta animantia assuefacere nos debemus benignitati in homines, quæ latius certè patet, quàm constituta legibus justitia? *Plut. in Cat. Maj.*

CAPUT XXVIII.

Servorum in dominos fides.

1. Servi, qui domino clementi et benigno usi fuerant, pro domino parati erant porrigere cervicem, et periculum ei imminens in seipsos avertere. Illi, quorum os non consuebatur, sed quibus sermo erat non solum coram dominis verum etiam cum ipsis, in tormentis tacebant. *Senec. Ep. 47.*

C. Plotius Plancus, à Triumviris Antonio, Lepido, et Octavio proscriptus, latebat. Ab iis, qui latentem quærebant, comprehensi servi ejus, multum ac diu torti negabant se scire ubi dominus esset. Non sustinuit Plancus tam fideles tamque boni exempli servos ulterius cruciari: sed processit in medium, jugulumque gladiis militum objecit. Hoc mutæ benevolentiae inter servos et dominum certamen facit, ut dignus videatur fuisse dominus, qui tam constantem servorum fidem experiretur; et digni servi, qui tam justis domini misericordiam à quæstionis sævitiâ liberarentur. *Valer. l. vi. c. 8.*

2. M. Antonius, orator clarissimus, turpis flagitii accusabatur ab inimicis, qui postulabant ad quæstionem ejus servum, quem testem et conscium flagitii fuisse contendebant. Dominum vehementer propterea sollicitum ultro hortatus est servus, ut se iudicibus torquendum traderet: affirmans nullum ore suo verbum exiturum, quo causa ejus læderetur. Ac promissi fidem mirâ patientiâ præstitit. Plurimis enim laceratus verberibus, equuleoque impositus, candentibus etiam laminis ustus, è domino periculum silentio suo avertit. *Ibid.*

3. Quàm admirabilis fidei servus Panopionis fuit! Qui cum cognovisset advolare milites, ad occidendum dominum suum, qui fuerat proscriptus; commutatâ cùm

ævo veste, illum postico clam emisit, se autem in cubiculum ac lectum domini recipit, et ut Panopionem occidi passus est. *Ibid.*

Servus barbarus dominum suum ab Asdrubale occisum fuisse graviter ferens, eum subito aggressus, interemit. Cùmque comprehensus omni modo cruciaretur; lætitiã tamen, quam ex vindictã ceperat, in ore constantissimè retinuit. *Valer. l. iii. c. 3.*

CAPUT XXIX.

Omnes omnium caritates patria complectitur.

1. Justitia, ut antè dictum est, versatur in communi societate tuendã, tribuendoque suum cuique. Quoniam verò varii sunt necessitudinem gradus in eã, quæ latissimè patet, omnium hominum inter se societate, suntque officia, quæ aliis magis, quàm aliis, debeantur; si ergo quaratur, quibus plurimum tribuendum sit officii: principes sint, patria, et parentes, quorum beneficiis maximis obligati sumus: proximi, liberi, totaque domus quæ spectat in nos solos, neque aliud ullum potest habere perfugium: deinceps, propinqui, amici. 1. *Offic. n. 58, 59.*

Omnium societatem nulla carior, quàm ea quæ cum republicã est unicuique nostrũm. Cari sunt parentes, cari liberi, propinqui, familiares: sed omnes omnium caritates patria una complexa est, pro quã quis bonus dubitet mortem oppetere, si ea sit profuturus? *n. 57.*

2. Vitæ brevis est cursus, gloriæ sempiternus. Cùm sit omnibus definita mors, optandum est, ut vita potiùs patriæ donata, quàm reservata naturæ, videatur. *Pro. Sext. n. 47.*

Ego ne immortalitatem quidem accipiendam putarem contra patriam: et eos qui pro republicã vitam reddiderunt, nunquam mortem potiùs, quam immortalitatem, assuecutos putavi. *Pro Planco, n. 90.*

Quò sis, Africane, alacrior ad tutandam rempublicam, sic habeto: omnibus, qui patriam conservaverint, adjuverint, auxerint, certum esse in celo et definitum locum, ubi beati ævo sempiterno fruuntur. *Somn. Scip.*

3. Sic nos patria nostra delectat, ut sapientissimus vir Ulysses immortalitati anteponeret Ithacã illam, in

asperrimis saxulis tanquam nidulum affixam. 1 de Or.
ii. 196.

Nescio quâ natale solum dulcedine cunctos

Ducit, et immemores non sinit esse sui.

Ovid. 1 de Ponto, Ep. 3.

CAPUT XXX.

Dulce et decorum est pro patriâ mori.

Horat. l. iii. Od. 2.

1. Cùm Attica regio ferro ignique vastaretur à Doriensium exercitu; rex Atheniensium Codrus, suis socio-
rumque viribus diffidens, ad Appollinis Delphici oraculum
confugit, perque legatos sciscitatus est, quonam modo
tam grave bellum averti posset. Respondisse Deus fer-
tur, ita finem ei fore, si rex ipse hostili manu caderet.
Quod cùm percubisset; edixere Dorienses, ne quis
Codri corpus vulneraret. At ille, depositis imperii in-
signibus, gregarii militis cultum induit: tum pabulan-
tium hostium globo sese objiciens, unum ex his, quem
falce percusserat, in cædem suam compulit. Cognito
regis corpore, Dorienses sine prælio discessere. Atque
ita Athenienses virtute ducis, pro salute patriæ se morti
offerentis, bello liberati sunt. Quis Codrum non miretur
qui iisdem artibus mortem quæsierit, quibus vita ab igna-
vis quæri solet? Valer. l. v. c. 6. Justin. l. ii. c. 6. Pe-
tercul l. i. c. 2.

2. Apud Romanos sanguinem liberorum ac suum
patriæ impendit L. Junius Brutus, cujus historia videtur
altiùs repetenda. Hic, cùm fratrem suum et primores
urbis à Tarquinio Superbo avunculo suo interfectos audis-
set, statuit nihil illi relinquere timendum ab ingenio suo,
et nihil in fortunâ suâ concupiscendum. Itaque stultitiam
simulans, et bona sua prædæ esse regi sinens, haud ab-
nuuit cognomen Bruti. Ab duobus Tarquinii filiiis profici-
scientibus Delphos ascitus, ut ludibrium potiùs esset, quàm
comes, fertur tulisse donum Deo Apollini baculum aure-
um ligneo cavato inclusum, quæ erat effigies ingenii sui.
Cùm regii juvenes peregissent mandata Tarquinii, consul-
to oraculo de prodigio quod in regiâ nuper acciderat, cu-
pido incessit eos sciscitandi Appollinem, ad quem regnum

Romanum esset venturum postea? Hanc ex imo specu redditam esse vocem ferunt: *Qui primus vestram ô juvenes, tulerit osculum matri, is imperium summum Romæ habebit.* Duo Tarquinii permisere sorti, uter eorum prior matri osculum daret, cum Romam redissent. Brutus ratus oraculi responsum aliò spectare, terram osculo contigit, quòd ea communis mater omnium mortalium esset. *Livius, l. i. c. 56.*

Tarquinio Superbo cum omni familiâ postea ejecto ex urbe, maximè operâ L. Junii Bruti, primi Romæ consules creati sunt ipse L. Junius Brutus et L. Tarquinius Collatinus. Cæterum ut Romanis auctor libertatis fuerat Brutus, ita custos fuit. Erant in Romanâ juventute adolescentibus aliquot, nec ii tenui loco orti, quorum libido solutior fuerat regnante Tarquinio, æquales et sodales adolescentium Tarquiniorum, assueti et ipsi regio more vivere. Hi pristinam vitæ licentiam quærentes, nefarium iniere consilium de accipiendis clam nocte in urbem Tarquiniiis: et assumpsere in societatem sceleris ipsos Bruti liberos Titum Tiberiumque. *l. ii. c. 3.*

Cum conjurati de initio consilio inter se agerent, remotis, ut putabant, arbitris, sermonem eorum unus ex servis excepit: et præterea literæ, quas ad Tarquinius scripserant, deprehensæ, rem coarguerunt. Proditores extemplo in vincula coniecti sunt, deinde damnati. Consules in sedem processere suam: missique lictores ad sumendum supplicium, nudatos juvenes virgis ceciderunt, securique percusserunt; cum interea omnium oculi coniecti essent in vultum Bruti patris, qui ejus supplicii exactor erat, cujus spectatorem esse eum ingenta liberorum caritas minimè pati videbatur. At ille patris personam exiit, ut consulis retineret; maluit orbis vivere, quàm publicæ vindictæ deesse: et

Vicit amor patriæ, laudumque immensa cupido.

Valer. l. v. c. 8. Virgil. l. vi. ver. 83.

Ubi Tarquinius viam dolo obseptam vidit ad regnum repetendum, bello aperto rem aggressus est. Obviâ hosti consules eunt; Valerius consul peditem ducit, Brutus cum equitatu antecedit. Præerat hostium equitibus filius regis Aruns Tarquinius. Qui ut Brutum agnovit, inflammatus irâ: *Ille est vir, inquit, qui nos expulit patriâ. Ipse en ille nostris decoratus insignibus magnificè in-*

cedit. Dii regum ultores adeste. Concitat calcaribus equum, atque in ipsum consulem dirigit. Sensit in se iri Brutus, et avidè se certamini obtulit. Aded infestis animis concurrerunt, ut uterque lanceâ transfixus ex equo lapsus sit. Valerius Bruto collegæ funus, quanto potuit apparatu, fecit. Sed majus morti Bruti decus fuit publica mœstitia, maximè matronarum, quæ eum, ut parentem, per annum integrum luxerunt, quòd tam acer ultor fuisset violatæ in Lucretiâ pudicitiz. *Livius, l. ii. c. 6.*

CAPUT XXXI.

Deciorum pro patriâ devotiones.

Consulibus Decio et Manlio Româ profectis ad bellum adversùs Latinos gerendum, dicitur visa esse utrique per noctem species, humanâ major augustiorque, viri dicentis: *Ex unâ acie imperatorem Dîs inferis deberi, ex aliâ exercitum: et victoriam fore ejus exercitûs et populi, cujus imperator devovisset legiones hostium, et se super eas.* Ubi consules contulerunt inter se hos visus nocturnos, placuit primùm victimas cædi, avertendæ Deorum iræ causâ: deinde statuerunt, ut ille consul se pro populo Romano devoveret, ab cujus cornu cedere Romanus exercitus cœpisset. Manlius dextro, Decius lævo, cornu præerat. Primò utrimque æquis viribus, et eodem ardore animorum res gerebatur. Deinde ab lævo cornu Romani non ferentes impressionem Latinorum, pedem referre cœperunt. In hâc trepidatione Decius consul solennia devotionis verba pronunciavit, præeunte M. Valerio Pontifice, armatus in equum insiluit, ac se in medios hostes immisit, patriæ salutem, sibi verò mortem, petens. Quàcumque equo invectus est, eò secum pavorem ac terrorem tulit. Postquam verò corruit obrutus telis, tum Latini latè fugam fecère. Sic ille voluntariâ morte magnam Romanis victoriam peperit. Manlius lacrymis et laudibus debitis prosecutus est tam memorabilem collegæ interitum. Decii corpus postero die inventum est inter maximam hostium stragem, coopertum telis: funusque *ei par morti est factum.* *Livius, l. viii. c. 6. 9. Valer. l. v. c. 6.*

Tam egregium exemplum æmulatus est bello adversus Gallos Decii filius. Nam in quarto consulatu, paternis vestigiis insistens, erexit ac restituit labantes ac propè perditas urbis Romanæ vires simili devotione et pari exitu. *Livius, l. x. c. 28. Valer. l. v. c. 6.*

Denique bello contra Pyrrhum regem, tertius P. Decius se tertiam victimam reipublicæ præbuit, à patrio avitoque in patriam amore non degener. *Cic. 2 de fin. n. 61.*

CAPUT XXXII.

Divitiæ in patriam impensæ.

Doçi quidem magnitudo facit ut gratum sit; gratius tamen est, licèt parvum, si opportunè detur. Hinc opportunitas liberalitatis Q. Fabii maximi fecit eum ad hoc usque tempus laudabilem, ob parvam pecuniæ summam tot ante sæcula erogatam patriæ causâ. Captivos Romanos ab Annibale Carthaginensium duce receperat, interpositâ pactione nummorum. Qui cùm à Senatu non solverentur, misso in urbem filio, fundum, quem unicum possidebat, vendidit; ejusque pretium Annibali protinus numeravit, parvum quidem, ut pote è septem agelli jugeribus redactum, sed omni pecuniâ majus, si æstimetur animo erogantis. Se enim carere patrimonio, quàm patriam fide, maluit.

Ejusdem temporis fœmina Apuliæ ditissima, Busa nomine, Romanos, qui è Cannensi claude supererant, benignissimè alimentis sustentavit. Salvo tamen statu fortunarum suarum, munificam se populo Romano præstitit: Fabius in honorem patriæ ex paupere inops factus est. *Valer. l. iv. c. 8.*

CAPUT XXXIII.

Inimicitie publicæ utilitatis causâ depositæ.

1. M. Æmilius Lepidus bis consul, pontifex maximus, gravitateque vitæ par splendori honorum, gessit diutinas ac vehementes inimicitias cum Fulvio Flacco

ejusdem amplitudinis viro : quas, statim atque censores simul renunciati sunt, deposuit : existimans non oportere eos, qui publicè juncti essent potestate, privatis odiis dissidere. Id judicium Lepidi et præsens ætas comprobavit, et veteres annalium scriptores nobis laudandum tradiderunt. *Valer. l. iv. c. 2.*

2. Noluerunt quoque ignotum esse posteritati Livii Salinatoris illustre consilium finiendarum, patriæ causâ, simultatum. Is namque, etsi Neronis odio ardebat, cujus præcipuè operâ in exilium ierat, tamen ubi ei collega in consulatu est datus, sibi imperavit oblivisci et ingenii sui, quod erat acerrimum, et injuriæ, quam gravissimam acceperat : ne, pertinacem se exhibendo inimicum, malum consulem ageret. Hæc mentis inclinatio ad tranquilliores habitum, plurimum profuit ad salutem urbis atque Italiæ in difficili temporum articulo : quia pari virtutis impetu connisi duo consules, terribiles Pænorum vires contuderunt.

3. Cùm P. Scipioni Africano duo Q. Petilii diem dixissent, tribunus plebis eo tempore Tib. Sempronius Gracchus erat, cui inimicitia cum P. Scipione intercedebant. Tristem omnes ab eo sententiam expectabant. At ille dixit : *Se non passurum P. Scipionem absentem accusari : et, cùm rediisset, auxilio ei futurum, ne causam diceret.* Multa deinde addidit de insignibus inimici sui meritis in patriam. Movit oratio Gracchi non cæteros modò tribunos, sed ipsos etiam accusatores : et, senatu habito, gratiæ ingentes ab universo ordine Tib. Graccho actæ sunt, quòd rempublicam privatis simultatibus potiores habuisset : Petilii verò vexati sunt probris, quòd splendere alienâ invidiâ voluissent. Silentium deinde de Africano fuit. *Livius, l. xxxviii. c. 52.*

CAPUT XXXIV.

Patriæ irasci nefas est.

Ut parentum, sic patriæ sævitia, patiendo ac ferendo lenienda est. *Livius, l. xxvii. c. 34.*

Suorum injurias civium patienter ferebat Epaminondas, quòd se patriæ irasci nefas esse duceret. Cùm aliquando eum propter invidiam Thebani noluisse præfi-

cere exercitui ; delectus erat dux alius imperitus belli, cuius errore res eò deducta fuerat, ut omnes de salute exercitûs pertimescerent, quòd locorum angustiis clausus, ab hostibus obsidebatur. Tum desiderari cœpta est Epaminondæ diligentia qui tunc miles sine ullo imperio erat. Cùm ab illo opem petissent sui, nullam retinuit memoriam acceptæ contumeliæ, et exercitum obsidione liberatum domum reduxit incolumem. Neque verò hoc semel fecit, sed sæpius. *Cor. Nep. in Epam. c. 7.*

Aristides Athenis, Camillus Româ ejecti in exilium, longè alio animo patriæ injuriam tulêre. Ille enim urbe egrediens, Deos oravit, ne unquam Athenienses operâ suâ indigerent. Hic contrâ dicitur à Diis precatus esse, ut, si sibi innoxio injuria fieret, desiderium sui facerent ingrata patriæ quamprimum. Idem tamen non multo antè tempore digniora bono cive vota fecerat. Nam captis Veïis, urbe opulentissimâ, manus ad cælum tollens, precatus erat, ut si cui Deorum nimia sua populique Romani fortuna videretur, liceret eam invidiam lenire suo privato incommodo potiùs, quàm publico populi Romani. Et cùm deinde, Româ à Gallis obsessâ, missus ad Camillum exulem Cædicium, eum dictatorem creatum esse nunciâsset, cohortarique cœpisset, ne injuriæ à patriâ illatæ reminisceretur ; ille, interrupto sermone Cædicium, *Nunquam, inquit, à Diis precatus essem, ut mei desiderium Romani facerent, si ejusmodi illorum desiderium futurum esse existimassem. At nunc æquiora à Diis postulo : meæ ut opera tantam patriæ utilitatem afferat, quanta est ea, quæ nunc premitur, calamitas.* *Plut. in Aristid. Livius, l. v. c. 33. et 21. Appian. l. iv. Celtic.*

Vide infrâ Coriolani iram in patriam, cap. xxxvii. et Q. Fabii Maximi patientiam, l. iv.

CAPUT XXXV.

Fundamentum est omnium virtutum pietas in parentes. Cic. pro Planc. n. 29.

1. Prima et optima pietatis in parentes magistra est natura. Hæc nullo vocis ministerio, nullo usu literarum :

indigens, propriis viribus caritatem parentum pectoribus liberorum tacite infundit. *Valer. l. v. c. 4.*

Parentes carissimos habere debemus, quod ab iis nobis vita, matrimonium, libertas, civitas tradita est. *Cicer. post red. in Sen. n. 2.*

Beneficiorum maxima sunt ea, quæ à parentibus accipimus, dum aut nescimus, aut nolumus. Parentes cogunt teneros infantes ad salubrium rerum patientiam. Flentium ac repugnantium corpora diligenti curâ fovent, et, ne membra in pravam detorqueantur, constringunt. Mox liberalia studia inculcant, adhibito timore nolentibus. Juventam frugalitati, pudori, moribus bonis applicant coactam, si non obsequatur libenter. Adolescentibus quoque vis adhibetur et servitus, si remedia per intemperantiam rejiciunt. *Senec. 6. Benef. c. 24.*

2. Quisquis in vitâ suâ parentes colit, hic et vivus et defunctus Diis carus est. Contrâ contemptus parentum ejus generis peccatum est, quod et ab hominibus odio habetur, et in viventibus ac mortuis à Diis damnatur ac punitur. *Stobæus, Serm. 77.*

Ea caritas, quæ est inter natos et parentes, dirimi, nisi detestabili scelere, non potest. *Cic. de Amic. n. 27.*

Facile intelligo liberos non modò reticere parentum injurias, sed etiam æquo animo ferre oportere. *Pro Cluen. n. 17.*

Adolescentulus quidam Zenonis scholam diu frequentasset. Reversum in paternas ædes interrogavit pater, quid tandem sapientiæ didicisset? Ille rebus ipsis se ostensurum respondit. Indignante autem patre et verbera ipsi ingerente, ille quietus permanens, et patienter ferens, *Hoc, inquit, didici, iram patris æquo animo ferre. Ælian. l. ix. c. 33.*

3. Quæri solitum est in philosophorum scholis, an semper atque in omnibus patri parendum sit. Certè in plurimis parendum est, in quibusdam non obsequendum. Omnia enim, quæ in rebus humanis fiunt, sicut docti censuerunt, aut honesta sunt, aut turpia. Quæ suâ vi recta honestaque sunt, ut fidem colere, patriam defendere, ea fieri oportet, sive imperet pater, sive non imperet. Sed quæ his contraria, quæque turpia, et omnino iniqua sunt: ea ne, si imperet quidem, facienda sunt. Illa tamen ipsa, in quibus obsequi patri imperanti non oportet, leniter et verecundè declinanda, sen-

simque relinquenda sunt, potiùs quàm respuenda. *A. Gell. l. ii. c. 7.*

Agesilaüs, patre jubente eum in quodam judicio sententiam legibus adversam ferre: *A te, inquit, mi pater, jam inde à pueritiâ edoctus sum legibus parere. Itaque etiam nunc tibi obtempero, nihil in leges peccando.* *Plut. de vit. pud.*

4. Talem erga parentes te præsta, qualis optares se tibi tuos liberos exhibere. *Isocr. ad. Dem.*

Si liberi parentibus nati sint humilibus, si propinquos habeant imbecilliores vel animo vel fortunâ: eorum, cùm poterunt augeant opes, eisque honori sint. Fructus enim ingenii, fortunæ, omnisque præstantiæ maximè tum capitur, cùm in proximum quemque confertur. *Cic. de Amic. n. 70.*

Omnes homines palam prædicant, primùm Diis, deinde parentibus, honorem deberi naturâ et legibus; neque liberos quicquam gratius Diis facere posse, quàm si benignè et alacriter cum fœnore gratias referant iis à quibus geniti educatique sunt. Contrâ verò nullum esse majus impietatis argumentum, quàm contemptum et neglecti-
onem parentum. Itaque interdictum est nobis, ne quid mali aliis faciamus; injustum autem et impium habetur, non semper patri ac matri ea dicere et facere quibus lætentur. *Plut. de Amor. frat.*

CAPUT XXXVI.

Patres à liberis periculo liberati.

1. Cùm captum atque incensum est Ilium, Græci Trojanorum fortunas miserati, hoc maximè dignum gentis suæ humanitate pronuciari per præconem jusserunt: *Ut singuli à liberis civibus secum auferrent in humeros sublatum id unum quod putarent inter res suas præcipuè servandum.* Statim Æneas Deos patrios humeris imposuit, cætera negligens. Hâc pietate capti Græci, permisere ipsi etiam alteram rem asportare. Tum ille Diis alterum onus addidit patrem suum Anchisem senio confectum. Quo facto mirum in modum obstupefacti Græci, Æneæ sua omnia restitui voluerunt; ita declarantes, illos etiam qui hostes sunt, et jure belli in victos uti possunt, mansuescere et misericordiâ moveri in eos, qui Deos et parentes reverenter colunt. *Ælian. l. iii. c. 22.*

2. Cræso Lydorum regi opulentissimo filius fuit, formâ quidem et ingenio præstans, sed naturâ mutus diu existimatus, quoniam cum jam multum adolevisset, nihil tamen fari poterat. Ad emendandum hoc linguæ vitium cuncta expertus est pater, dum secundæ ejus res erant: At nihil omnino medicorum artes profuere. Cum verò Sardes, urbem regiam, expugnasset Persarum exercitus, et in Cræsum districto gladio irruens quidam miles, eum sibi ignotum jamjam occisurus videretur; vitæ patris timens pius adolescens, et oblitus quid sibi nascenti natura denegasset, os diduxit, et clamare nitens, solvit linguæ vincula, atque in has voces erupit: *Ne occidas Cræsum miles.* Sic à patris capite depulsa mors fuit beneficio filii, qui et ipse suo in patrem amore consecutus est, ut per reliquum vitæ tempus vocalis esset, ac planè articulatè loqui posset. *Herodot. l. i. A. Gell. l. v. c. 9. Valerius, l. v. c. 4.*

3. Quum, seditione inter Macedonas milites et Græcos mercenarios ortâ, rex Philippus gravi vulnere percussus esset, et ex equo dejectus; prosiluit ante omnes Alexander, annum tunc septimum decimum agens, jacentem clypeo suo protexit, ruentesque in eum multos sua manu occidit. Cum graviter postea ferret Philippus, quòd propter vulnus, quo tum femur transfossum fuerat, claudicare cogere? verè et scitè dixit ei Alexander: *Non debere cum irasci vulnere, quo virtutis bellica memoria revocaretur, quoties pedem moveret.* Quint. Curt. l. viii. c. 1. Plut. l. fort. Alex.

4. Eadem pietas virili robore armavit P. Scipionem, qui deinde Africanus est dictus, ad opem patri in acie ferendam, cum vix puerilitatis annos egressus esset. Nam eum consulè pugnante cum Annibale apud Ticinum fluvium, et graviter saucium, servavit intercurso suo. Neque illum aut ætatis infirmitas aut militiæ tirocinium interpellavit, quòd minùs laudem consequeretur rapti ex ipsâ morte patris et imperatoris. *Valer. l. v. c. 4.*

5. L. Manlium plebi Romanæ invisum multa fecerant; acerbitas in habendo militum delictu ad bellum, ingenium atrox, cognomen Imperiosi ab ipso ascitum ad ostentationem sævitæ. Itaque ubi primùm dictaturâ abiit, diem ei dixit ad populum M. Pomponius tribunus plebis. Crimini inter cætera dabat, quòd ab hominibus relegasset, et ruri inter servos ac pecudes habitare, cogere Titum filium.

(cui postea Torquati cognomen fuit) adolescentem nullius probri compertum, sed tantum linguâ impromptum.

Ægrè passus Titus se causam esse hujus adversus parentem criminationis, capit consilium rudis quidem atque agrestis animi, sed pietate in patrem laudabile. Nescientibus cunctis, gladio succinctus, noctu Romam accurrit, et primâ luce Pomponii domum venit: janitori, opus sibi esse domino ejus extemplò convento, ait, eique nunciari jubet Titum Manlium Lucii filium adesse. Tribunus, cui spes erat juvenem irâ percitum in patrem aliquid novi criminis affere, eum statim, remotis arbitris, admittit. At ille, ut est ingressus, gladium dstringit, et super lectum jacentis Pomponii stans ferro intento, se eum transfixurum minatur, nisi jurejurando confirmet, se ab institutâ adversus L. Manlium accusatione recessurum. Tribunus gladium ante oculos micantem cernens, seque solum atque inermem cum juvene prævalido et feroce, juravit iis verbis, in quæ adactus est à Tito; rem ad populum detulit, docuit cur sibi ab incepto desistere necesse esset, Manlium patrem missum fecit. Tantùm temporibus illis jusjurandum valebat.

Maluisset quidem Romana plebs sibi potestatem fieri ferendi suffragii de tam crudeli et superbo reo, quem oderat: veruntamen non ægrè tulit filium id pro patre ausum esse: et ejus factum visum est eò laus dabilius, quòd adolescentis animum acerbitas patria nihil à pietate avertisset. Itaque ut suus virtuti honor, suum præmium, esset, eo anno secundum inter sex tribunos militares locum consecutus est T. Manlius, licet nullis præclarè factis cognitus, ut qui rure et procul à cœtu hominum juventam egisset. *Cicer. 3 Offic. n. 31. Livius, l. vii. c. 4, 5.*

CAPUT XXXVII.

Pietas liberorum in matres.

1. C. Marcius, cui capta urbs Corioli fecit cognomen Coriolani, patre orbatus adhuc puer, sub matris tutelâ adolevit. Sortitus erat à naturâ nobiles ad laudem impetus: sed quia doctrina non accessit, irâ impotens, obstinatæque perviciæ fuit, et exemplo suo confirmavit, ge-

nerosam indolem, si liberali institutione careat, edere multa simul cum virtutibus vitia, sicut fecundum naturâ agrum, qui excultus non sit. Quoniam invictum voluptate, pecuniâ, labore animum gerebat; ejus continentia, justitia, fortitudo prædicabantur: at præfervida ira, asperi mores, et parum civilis congressus, graviter ferebantur. Hunc autem mortales maximum fructum ferunt è Musarum disciplinâ ut molliatur mansuescatque eorum ingenium: et, si quid ferum natura indidit, exuat.

Scilicet ingenuas didicisse fideliter art.s

Emollit mores, nec sinit esse feros.

Ovid. 2. de Ponto. El. 9.

Nemo adeo ferus est, ut non mitescere possit,

Si modò culturæ patientem commodet aurem.

Horat. 1. Epist. 1.

Cùm prima stipendia facere cœpisset adolescens, è multis præliis, quibus interfuit, nunquam rediit, nisi donatus coronâ aliove militari præmio. Commilitonibus ejus bellicæ virtutis finis erat gloria, illi verò finis gloriæ gaudium matris. Nam ubi illa audivisset ipsum laudari, et donari vidisset coronâ, et præ lætitiâ lacrymans esset complexa; id sibi summo honori felicitatique ducebat esse. Sic Epaminondas dicebat nihil sibi unquam jucundius feliciusque contigisse, quàm quòd patram et matrem habuisset testes ac participes partæ Leucricâ pugnâ gloriæ. Coriolanus, ut uni matri rependeret gratiam, quam utrique parenti debebat, eâ oblectandâ et colendâ satiari non poterat. Illâ cupiente atque orante, uxorem duxit: illius in ædibus, natis jam liberis, cum uxore habitavit.

Post multa in patriam merita judicio populi damnatus Coriolanus, Volscos exulatum abiit, minitans patriæ, hostilesque jam tum spiritus gerens. Venientem Volsci benignè excepere, et usus est hospitio Attii Tullii, qui princeps Volscorum erat, Romanisque fuerat semper infestus. Itaque cùm alterum vetus odium, alterum recens ira stimularet, brevi effecerunt, ut legerentur imperatores ad bellum adversus Romanos gerendum.

Coriolanus, expugnatis non paucis Romanorum oppidis, castra posuit quinque millia passuum ab urbe, agrumque Romanorum est populatus. Missi Româ ad eum oratores de pace, atrox responsum retulerunt. Iterum deinde missi, ne in castra quidem admissi sunt. Sacerdotes quoque suis infulis velatos isse ad eum supplices

traditur, et nihil magis flexisse animum, quàm legati flexerunt. Tum matronæ coeuntes pervicerunt, ut Veturia Coriolani mater, exactâ ætate mulier, et Volumnia uxor, duos parvos ex Marcio filios ferens secum, in castra hostium irent cum frequenti mulierum comitatu, et eam urbem precibus lacrymisque defenderent, quam viri armis non poterant. Ubi ad castra ventum est, nunciatumque Coriolano, adesse ingens mulierum agmen; qui motus non fuerat nec publicâ majestate in legatis, nec religione in sacerdotibus, multo obstinatioer erat adversus muliebres lacrymas. At ut matrem aspexit: *Ex-fugnâsti*, inquit, *et vicisti iram meam, ô Patria, admotis matris meæ precibus, cui tuam in me injuriam condono!* Continuòque Romanum agrum hostilibus armis liberavit. *Plut. in Coriol. Livius, l. ii. c. 35, &c.*

2. Prætor tradidit triumviro necandam in carcere mulierem sanguinis ingenui, capitali crimine damnatam. Is qui custodiæ præerat, misericordiâ motus, non eam protinus strangulavit. Dedit quoque aditum ad eam filia, sed diligenter excussæ, ne quid cibi inferret. Existimabat enim futurum, ut inedia consumeretur. Cùm autem jam dies plures effluxissent, miratus quò tamdiu viveret, curiosiùs observatâ filiâ, animadvertit illam exerto ubere lenire famem matris lactis sui subsidio. Quæ res tam admirabilis, ad iudices perlata, impetravit matri remissionem pænæ. Nec tantum matris salus donata est filia pietati, sed ambæ perpetuis alimentis sustentatæ sunt, publico sumptu, et carcer ille consecratus est, extracto ibi Pietatis templo. Quò non penetrat, aut quid non cogitat pietas, quæ novam rationem invenit genetricis servandæ in carcere? Quid tam inusitatum atque inauditum, quàm matrem natæ uberibus alitam fuisse? Putaret aliquis hoc contra naturam factum esse, nisi prima naturæ lex esset diligere parentes. *Valer. l. v. c. 4. Plin. l. vii. c. 36.*

Filia alia, cui nomen Pero, admovit velut infantem pectori suo, atque aluit patrem suum, grandi ætate senem, qui in custodiam traditus fuerat. *Valer. ibid.*

CAPUT XXXVIII.

Parricidium scelerum omnium maximum est.

1. Parricidium nefarium facinus est, atque ejusmodi, ut eo uno maleficio scelera omnia comprehensa esse videantur. Etenim si (id quod præclare à sapientibus dicitur) vultu sæpe læditur pietas; quod supplicium satis acre reperietur in eum, qui mortem attulerit parenti, pro quo mori ipsum jura divina atque humana cogebant, si res postularet? *Cicer. pro Rosc. Amer. n. 37.*

Portentum atque monstrum est, esse aliquem humanâ specie et figurâ, qui tantum vicerit bestias immanitate, ut eos indignissimè luce privaret, per quos hanc suavissimam lucem aspexerat: cum partus atque educatio etiam feras inter sese conciliet. *n. 63.*

2. Aiunt Cœlium quemdam Terracinensem, cum cœnatus isset cubitum in idem conclave cum duobus adolescentibus filiis, inventum esse manè jugulatum. Quoniam nec servus quisquam nec liber reperiebatur, in quem facinoris suspicio caderet; eâ autem ætate filii quem patrem cubantes ne sensisse quidem se dicebant; nomina filiorum de parricidio delata sunt. Parum enim verisimile videbatur, quemquam ausum esse committere se in id conclave, eo potissimum tempore, cum ibidem essent duo adolescentes filii, qui facilè possent et sentire et defendere. Tamen cum iudicibus planum esset factum, aperto ostio repertos esse eos dormientes: iudicio absoluti sunt, et omni suspitione liberati. Nemo enim putabat, quemquam esse, qui somnum statim capere posset post perpetratum parricidium; propterea quòd qui tantum facinus commiserunt, non modò non possunt quiescere sine curâ, sed ne spirare quidem sine metu. *n. 64.*

3. Civitas Atheniensium prudentissima fuisse traditur. Ejus porrò civitatis sapientissimum Solonem ferant fuisse, qui leges illis scripsit. Is cum interrogaretur, cur nullum supplicium constituisset in eum, qui parentem necasset; respondit: *Se id neminem facturum fuisse. Sapienter fecisse dicitur, cum nihil sanxerit de illo scelerè, quod antea commissum non erat: ne non tam pro-*

hibere videretur, quam ostendere committi posse. Quanto sapientiùs majores nostri fecêre! Qui cùm intelligerent nihil esse tam sanctum, quod non aliquando violaret audacia; supplicium in parridas singulare excogitaverunt, ut ii, quos natura ipsa non potuisset in officio retinere, magnitudine pœnæ summoventur à maleficio. In sui voluerunt in culeum vivos, atque ita in flumen dejici. O singularem sapientiam! Nonne videntur hunc hominem ex rerum naturâ sustulisse et eripuisse, cui repenti cælum, solem, aquam, terramque ademerunt? ut, qui eum necâsset, unde ipse natus esset, careret iis omnibus rebus, ex quibus omnia nata esse dicuntur. *n. 70.*

Persæ, si quis patrem necâsset, eum non genuinum filium existimabant, sed subdititium. Quia alienum à naturâ videbatur, et parum credibile, ut certus parens à justis liberis interimeretur. *Nicol. Damasc. Herodot. l. 1.*

CAPUT XXXIX.

Nihil dulcius hominum generi, quàm liberi.

1. Perspicuum est à naturâ impelli nos, ut eos, quos genuerimus, amemus. *Cicer. 3 de fin. n. 62.*

Nonne bestię pro suo partu ita propugnant. ut vulnere excipiant, et nullos hominum impetus, nullos ictus reformident? Si feræ partus suos diligunt, quâ nos in liberos nostros indulgentiâ esse debemus? *5 Tusc. n. 79. 2 de Orat. n. 168.*

Quid dulcius hominum generi à naturâ datum est quàm sui cuique liberi? Incertum est quàm longa cujusque nostrâ vita futura sit. Consulere itaque et prospicere vivi debemus, ut illorum solitudo et pueritia quàm firmissimo præsidio munita sit. *Post red. Quir. n. 2. In Verrem, l. ii. n. 153.*

2. Pater nullum clarius potest relinquere monumentum sui, quàm si filium relinquat effigiem morum suorum, virtutis, constantiæ, pietatis, ingenij. *Phil. 9. n. 12.*

Ad filium hæreditas paternæ gloriæ et factorum imitatio pertinet. *1 Offic. n. 78.*

Optima hæreditas omnique patrimonio præstantior à patribus traditur liberis, gloria virtutis rerumque gestarum: cui dedecori esse, nefas et impium judicandum est. *1 Offic. n. 33.*

3. Nemo liberorum gratiâ pecuniis cumulandis incumbat, ut ditissimos eos relinquat. Id enim nec ipsis nec patriæ conducit. Census juvenum optimus is est, qui eos non reddit obnoxios adulationibus et sufficit rebus necessariis. Liberis ergo non multum auri, sed pudoris oportet relinquere. *Plato de Leg. l. v.*

Parentes liberis plerumque bono animo mala precantur. Si vis esse felix, Deos ora, ne quid tibi eveniat ex his quæ optantur tibi. Ea non sunt bona quæ isti in te volunt congeri; divitiæ, honores, imperia. Unum bonum est, quod beatæ vitæ causa et firmamentum est, virtus. Fac ipse te felicem. Facies autem, si virtutem colueris. *Senec. Epist. 31.*

CAPUT XL.

Liberi patriæ causâ bene instituendi.

Verrem graviter objurgat Cicero, quòd prætor in Sicilia filium flagitiis suis interesse passus erat. Tunc, cum te ac tuam vitam nôsses, in Siciliam tecum grandem filium ducebas? ut etiamsi natura puerum à paternis vitiis abduceret, consuetudo tamen et disciplina dissimilem tui esse non sineret. Fac enim fuisse in isto C. Lælii et M. Catonis indolem, quid ex eò boni sperari atque effici potest, qui nullum unquam patris pudicum neque sobrium convivium viderit. Qui adultâ ætate per triennium inter impudicas mulieres et intemperantes viros in epulis quotidianis versatus sit: nihil unquam à patre audiri, quo pudentior aut melior esset? Quibus in rebus non solùm filio, sed etiam reipublicæ fecisti injuriam. Susceperas enim filios non solùm tibi, sed etiam patriæ: qui non modò tibi voluptati, sed etiam qui aliquando usui reipublicæ esse possent. Eos instituere atque erudire debuisti ad majorum instituta, et ad civitatis nostræ disciplinam, non ad tua flagitia, atque ad tuas turpitudines. *Esset ex inertî atque impuro et improbo parente natus et*

puđens et probus filius. Nunc pro te Verrem alterum substituisti civitati. *Cicer. l. iii. in Verr. n. 159.*

2. Pelopidas, qui filium habebat infamem, Epaminondam reprehendebat, quod uxorem non duxisset; illumque malè reipublicæ consulere dicebat, qui liberos non relinqueret: *Vide, inquit Epaminondas, ne tu patriæ pejus consulas, qui talem ex te natum relicturus sis. Mihi verò stirps deesse non potest: namque ex me natam relinquo pugnam Leucricam, qua non modò mihi superstes, sed etiam immortalis, futura est. Cornel. Nep. in Epam.*

Gratum est, quod patriæ civem populoque dedisti,

Si facis ut patriæ sit idoneus, utilis agris,

Utilis et bellorum et pacis rebus agendis.

Plurimum enim intererit quibus artibus et quibus hunc tu

Moribus instituas. *Juven. Sat. xiv. 70.*

CAPUT XLI.

Maxima debetur puero reverentia.

Plurima sunt.....famâ digna sinistra,
Quæ monstrant ipsi pueris traduntque parentes.

Sic natura jubet: velocius et citius nos

Corrumpunt vitiorum exempla domestica.

Nil dictu fœdum visuque hæc limina tangat,

Intra quæ puer est.....

Maxima debetur puero reverentia. Si quid

Turpe paras, ne tu pueri contempseris annos:

Sed peccaturo obsistat tibi filius infans.

Juven. Sat. xiv.

Utinam liberorum nostrorum mores non ipsi perderemus. Infantiam statim deliciis solvimus. Mollis illa educatio, quam indulgentiam vocamus, nervos omnes et mentis et corporis frangit. Quid non concupiscet cum adoleverit, qui in cunis pupureis vagierit? In lecticis crescunt: si terram pedibus attigerint, è manibus utriusque sustinentium pendent. Gaudemus, si quid licentiùs dixerint, risu et osculo excipimus verba ingenuis indigna. Nec mirum videri debet: nos docuimus, ex nobis audièrunt. Omne convivium obscenis canticis strepit: pudenda spectantur. Fit ex his consuetudo, deinde natura.

Discunt hæc miseri, antequam sciant esse vitia. *Quintil. l. i. c. 3.*

Adolescentium indolem non tam juvant quæ bene dicta sunt, quàm inficiunt quæ pessimè; multoque magis si plura sint, quæ deteriora sunt. *A. Gell. l. xii. c. 2.*

CAPUT XLII.

Salubriter institui plurimùm prodest in reliquam vitam.

1. Philippus, cujus virtutē atque industriā Macedones locupletissimo imperio aucti sunt, nunquam inter negotia bellica alienus fuit à Musis et literis. Erat ei plena acuminis et solertix oratio, quā non minores res, quàm præliis, consecit: ipseque pluris æstimabat victorias verbis partas, quàm armis. Extant libri epistolarum ejus plenarum et venustatis et prudentix, è quibus unā brevis è Græco in Latinum convertenda visa est, inquit A. Gellius, quæ possit esse parentibus hortamentum curæ diligentixque in liberorum institutione. *Philippus Aristotelī salutem. Filium mihi genitum scito. Nec Dīs gratiam ferinde habeo, quia natus est, quàm quòd illum nasci temporibus vitæ tuæ contigit. Spero enim fore, ut educatus eruditusque abs te, dignus nobis existat, et non sit impar tanto imperio.* *A. Gell. l. v. c. 3. Justin. l. ix. c. 8 Polyæn. l. iv.*

Non fefellit Philippum sua de Aristotele opinio. Quippe Alexander eo doctore diu usus, accepit ab illo tam utilia agendi et loquendi præcepta, ut non dubitaverit prædicare. *Non minus Aristotelī debere se, quàm Philippo: hujus enim munus esse quod viveret; illius, quòd honestè viveret.* Voluit verò Philippus prima literarum elementa filio suo tradi ab Aristotele, summo ejus ætatis philosopho, et ille suscepit hoc officium: quia magni momenti est ad studia, eorum initia à perfectissimo præceptorī tradi. *Cicer. 3 de Orat. n. 141. Plut. in Alex. Quintil. l. i. c. 2.*

2. Plurimùm in reliquam vitam proderit, pueros statim salubriter institui. Facile est enim animos adhuc teneros componere; difficulter reciduntur vitia, quæ no-

biscum creverunt. Altius descendunt praecepta, quæ primis imprimuntur ætatibus: et naturam tenacissimi sumus eorum, quæ pueri percipimus: ut sapor, quæ nova vasa imbuuntur, durat. *Senec. 2 de Ira, c. 18. Ad Helv. c. 16. Quintil. l. i. c. 1.*

Quo semel est imbuta recens, servabit odorem

Testa diu.

Horat. 1. Ep. 2. ver. 69.

Nulla ætas videatur tam infirma, quæ non protinus discat quid rectum pravumque sit: est enim maximè tum formanda, cum facillimè cedit præcipientibus. Monendus ergo puer, ne quid cupidè, ne quid improbè, ne quid impotenter faciat. *Quint. l. i. c. 4.*

Habendumque est in animo semper illud virgilianum:

....Adeò in teneris consuescere multum est.

Virgil. 2 Geor. ver. 272.

3. In pueris modò frenis utamur, modò stimulis: est enim in illis aliquid quod coercendum sit, est quod excitandum. Hinc Isocrates, doctor singularis, dicebat se calcari in Ephoro, contrà autem in Theopompo, frenis uti solere: alter enim reprimendus erat alter incitandus. Et Themistocles, qui in adolescentiâ fuerat feroci admodum ingenio, respondebat mirantibus mutatos ipsius mores: *Asheros et ferociæ pullos fieri equos optimos, si domitoribus feritis tradantur.* *Senec. de Ira, l. ii. c. 21. Cic. 3 de Or. n. 25. Plut. in Them.*

4. Dabimus aliquod laxamentum: desides verò esse non sinemus, et procul à contactu deliciarum retinebimus. Nihil enim magis voluptuarios et iracundos facit, quàm educatio mollis et blanda. Ideò quò plus indulgetur filiis unicus, et quò plus licet pupillis, eò corruptior illis animus est. Offensas patienter ille non feret, cui nihil unquam negatum est, cui lacrymas sollicita semper mater abstersit, cui satisfactum est de pædagogo. *Senec. ibid.*

5. Longè quoque ab assentatione pueritia removenda est. Audiatur verum, exprobrentur illi perperam facta, timeat aliquando parentes, et magistros vereatur semper. Nihil per iracundiam et lacrymas exoret: quod irato et flenti negatum fuerit, offeratur quieto.

6. Omnibus hominibus prodest animum subinde relaxare. Excitatur enim otio vigor: omnis et tristitia,

quæ continuatione pertinacis studii addueitur, feriarum hilaritate discutitur. *Senec. l. Contr.*

Lusus pueris proderunt: quia pueri post lusus, plûs virium et acriorem animum afferunt ad discendum. Modus tamen sit remissionibus: ne aut negatæ odium studiorum faciant, aut nimia otii consuetudinem afferant. *Quint. l. i. c. 2.*

7. Omnes ferè legum latores, neglectâ puerorum et adolescentum educatione, parentum arbitrio liberorum institutionem reliquerunt: idque unum videntur studuisse, ut iis, qui adversus legum præcepta peccâssent, pœnæ constituerentur et irrogarentur. At Persæ et Lacedæmonii aliâ ratione caverunt, ne admitterentur quæ leges vetabant: et civium peccatis obviâ ierunt, formandis publicâ severâque institutione puerorum et adolescentum moribus. Sic enim fiebat, ut à teneris annis virtutem colere, vitia verò adversari, assuefierent. Quæ verò fuerit illa pauperum et divitum consimilis sub publicis magistris educatio, non inutile erit legere apud Plutarchum et Xenophontem. *Plut. in Lycurg. et Lacon. Xenophon, i. Cyrop. et in Lacon.*

CAPUT XLIII.

Veterum Romanorum in educandis pueris disciplina.

1. Non assuescat infans ei sermoni qui dediscendus deinde sit. Magni interest quos quisque audiat quotidie domi, quibuscum loquatur à pueritiâ, quemadmodum patres, pædagogî, matres etiam loquantur. Legimus epistolas Corneliae matris Gracchorum: apparet ejus filios, qui eloquentiâ floruerunt non solum in gremio matris educatos fuisse, sed etiam ab eâ sermonis elegantiam hausisse. Maximum autem matronis ornamentum esse liberos bene institutos meritò putabat sapientissima illa mulier. Cùm Campana matrôna apud illam hospita, ormenta sua, quæ erant illo seculo pretiosissima, ostentaret ei muliebrier; traxit eam sermone, quousque à scholâ redirent liberi. Quos reversos hospita exhibens: *Et hæc, inquit, ornamenta mea sunt.* *Quint. l. i. c. 1. Cic. in Bruto, n. 210. Valer. l. iv. c. 4.*

2. Operæ pretium est cognoscere veterum Romanorum severitatem ac disciplinam circa educandos formandosque liberos. Jamprimum filius ex castâ parente natus, non in cellâ emptæ nutricis educabatur, sed in gremio ac sinu matris, cujus præcipua laus erat tueri domum, et inservire liberis. Eligebatur autem aliqua major natu propinqua, cui propter probatos mores soboles omnis cujuspiam familiæ committeretur: coram quâ neque dicere fas erat, quod turpe dictu videretur, neque facere, quod inhonestum factu. Hæc non studia modò, sed remissiones etiam lususque puerorum, quâdam verecundiâ temperabat. Sic Corneliam Gracchorum, sic Aureliam Julii Cæsaris, sic Attiam Augusti matrem, præfuisse educationibus liberorum accepimus.

Hæc disciplina ac severitas id præstabat, ut pueri toto pectore arriperent artes honestas. At nunc natus infans delegatur Græculæ alicui ancillæ, cui adjungitur unus alter servus nulli serio ministerio accommodatus. Horum fabulis et erroribus teneri et ludes animi statim imbuuntur; nec quisquam in totâ domo curat, quid coram infante domino aut dicat aut faciat; quoniam etiam ipsi parentes nec prohibiti nec modestiæ parvulos assuefaciunt, sed lasciviæ et audaciæ. Perquæ paulatim irrepit impudentia et sui alienique contemptus. *Diolog. de corr. Elog. c. 18.*

3. Nunciatum quondam est Phavorino philosopho, nobis præsentibus, uxorem auditoris sectatorisque sui paululum antè peperisse, eumque esse auctum Filio. *Eamus*, inquit tum Phavorinus, *et visum puerperam et granulatum patri*. Is enim erat loci senatorii, ex familiâ nobiliore. Ivimus unâ qui tunc aderamus, et cum eo simul domum introgressi sumus, Phavorinus complexus hominem, congratulatusque ei, assedit: atque ubi percontatus est, quàm diutinum puerperium fuisset; et cognovit puellam defessam labore et vigilliâ somnum capere, fabulari instituit prolixius: et *Nihil*, inquit, *dubito, quin filium lacte suo nutritura sit*. Sed cùm mater puellæ parcendum ei esse diceret, adhibendasque puero nutrices, ne ad dolores, quos in pariendo tulisset, munus quoque nutritionis grave ac difficile accederet: *Oro te*, inquit, *mulier, sine eam totam ac integram esse matrem filii sui. Hoc enim est contra naturam imperfectum et dimidiatum matris genus, parere, et statim abs sese abjicere partum: alere in utero sanguine suo nescio quid, quod non videat; non alere suo lacte quod vide-*

at, jam hominem, jam viventem, jam matris officia implorantem. A Gell. l. xii. c. 1.

4. Cum Catoni majori natus esset ex uxore filius, nullis negotiis, nisi publicis, impediabatur, quominus adesset matri infantem abluenti et fasciis involventi. Illa proprio lacte filium alebat, sæpèque etiam liberos servorum suis uberibus admovebat, ut nutrimenti consortium eos puero domino magis benevolos redderet. Ubi aliquid intelligere potuit puer, eum pater ipse in literis instituit, licèt idoneum et eruditum domi servum haberet Chilonem, à quo pueri multi erudiebantur. Sed nolebat, ut ipse scriptum reliquit, servum filio suo vel maledicere vel aurem vellicare, si tardior in discendo esset: neque etiam filium tanti muneris, hoc est, doctrinæ, debitorem esse servo. Ipse itaque ejus ludimagister, ipse legum doctor, ipse lanista fuit. Neque modò docuit jaculari, armis depugnare, equitare, sed etiam pugillatu decertare, calorem et frigus tolerare, fluminum vortices nando superare. Conscriptis illi manu suâ, grandibus literis, historias, ut etiam in paternâ domo nota haberet veterum instituta atque exempla. Quidquam turpe loqui cavit non minùs filio præse, quàm sacris virginibus Vestalibus: et nunquam se ei in balneo videndum dedit. *Plut. in Cat. maj.*

5. L. Æmilio Paulo multi anni fuère vacui à rerum publicarum curâ inter primum et alterum consulatum. Eos totos impendit rebus sacris, et maximè liberorum institutioni, quos erudiri voluit non tantùm Romanâ veteri disciplinâ, sed etiam Græcis literis. Illis cùm grammaticæ, rhetoricæ, dialecticæque artis magistros dedit, tum pingendi quoque, equitandi, venandi. Et, ut erat liberorum amantissimus inter Romanos, eorum exercitiis omnibus intererat, nisi respublica aliò vocaret. *Plut. in Æmil.*

6. Augustus etiam puer animum optimis artibus excolebat, corpus laboriosis militaribusque exercitationibus durabat. Eum sollicitè observabant mater Attia et Philippus vitricus; quotidie à magistris et custodibus, cui puero apposuerant, inquirentes studiosè, quid rei egisset, quò esset profectus, quâ ratione diem transegisset, quibuscum denique esset versatus. Hâc Attiæ matris sollicitudine factum est, ut Augustus evaserit è multis ipsius pudori oblati periculis. *Nicol, Damasc.*

Augustus summum imperium Romæ adeptus, nepotes suos literas aliaque rudimenta per se plerumque docuit. *Sueton. in Aug. c. 64.*

CAPUT XLIV.

Publicæ utilitati plurimùm prosunt qui juventutem erudiunt.

1. Quia utile est juventuti regi, imposuimus illi quasi domesticos magistratus, sub quorum custodia contineretur. *Senec. 4. Benef. c. 11.*

Non is solus reipublicæ prodest qui tuetur reos, et de pace belloque censet, sed qui juventutem exhortatur, qui in tantâ bonorum præceptorum inopiâ, virtute instruit animos, qui ad pecuniam luxuriamque ruentes prensat ac retrahit, et, si nihil aliud potest, certè moratur. An ille plus præstat, qui inter cives jus dicit; quàm qui docet juventutem quid sit justitia, quid pietas, quid patientia, quid fortitudo, quàm pretiosum bonum sit bona conscientia! *De. Tranq. c. 3.*

2. Quærenti mihi quânam re possem prodesse quamplurimis, nulla major visa est, quàm si traderem civibus meis vias optimarum artium. Quod enim munus reipublicæ majus meliusve afferre possumus, quàm si docemus atque erudimus juventutem? his presertim temporibus, quibus ita prolapsa est, ut omnium operâ refrenanda atque coercenda sit. *Cic. 2 de Div. n. 2. 4.*

Si senibus satis virium sit, ut adolecentulos doceant, instituunt, ad omne officium instruunt, hoc opere quid potest esse præclarior? *De Senec. n. 29.*

CAPUT XLV.

Et præceptores et studia amet adolescens.

1. Discipuli, si modò sunt bene instituti, præceptorem amant et verentur. *Quintil. l. ii. c. 2.*

Id præcipuè monendi sunt adolescentes, ut ament præceptores suos non minùs quàm ipsa studia; et existi-

ment eos parentes esse, non quidem corporum, sed mentium. Multum hæc pietas conferet ad felicem exitum studiorum. Ita enim et libenter audient, et dictis credent, et esse magistrorum similes concupiscent, in ipsos denique cœtus scholarum læti et alacres convenient; emendati non irascentur, laudati gaudebunt: ut sint carissimi, mereri conabuntur. Nam ut præceptorum officium est docere, sic discipulorum, præbere se dociles: alioqui neutrum sine altero sufficiet. *Ibid. c. 10.*

2. Ea maximè cura habenda est, ut præceptor omnino fiat nobis familiariter amicus; nec sequatur officium tantum in docendo, sed etiam affectum. *Ibid. c. 3.*

Epaminondas philosophiæ præceptorem habuit Lydim Tarentinum, Pythagoræum: cui quidem sic fuit deditus, ut adolescens tristem et severum senem anteposuerit in familiaritate omnibus suis æqualibus. Neque eum à se dimisit, priusquam ita doctrinam antecessit condiscipulos, ut facilè intelligi posset pari modo superaturum omnes in cæteris artibus. *Corn. Nep. in Epam. c. 2.*

Ciceronis filius declaravit ipse hæc epistolam ad Tironem, quo amore Cratippum præceptorem dilexerit. Scito me Cratippo esse conjunctissimum, non ut discipulum, sed uti filium. Nam cum audio illum libenter publicè, tum etiam privatim ejus suaviter vehementer amo. Sum totos dies cum eo, noctisque sæpenumero partem: exoro enim ut mecum quàm sæpissimè cœnet. Hæc introducta consuetudine, sæpe inscientibus nobis et cœnantibus obrepit, sublatamque severitate philosophiæ, humanissimè nobiscum jocatur. Quare da operam, ut hunc talem, tam jucundum, tam excellentem virum videas quamprimum. *Cic. Epist. ad fam. l. xvi. Ep. 21.*

3. Patet autem ex Trebonii epistolam ad Ciceronem patrem, quâ curam, quâque modestiæ famam filius ejus literis operam dedit. Athenas veni, atque ibi, quod maximè optabam, vidi filium tuum deditum optimis studiis, cum summam modestiæ famam. Quam ex re quantam voluptatem ceperim, scire potes, etiam me tacente. Non enim nescis quanti te faciam, et quàm omnibus tuis bonis gaudeam, pro nostro veterrimo verissimoque amore. Noli putare, mi Cicero, me hoc auribus tuis dare: nihil adulescente, tuo, aut potius nostro, amabilius est, ex omnibus iis qui Athenis sunt, aut studiosus earum artium, quas

tu maximè amas, hoc est, optimarum. Itaque tibi, quod verè facere possum, libenter gratulor. Eum, licèt ingressum pleno gradu in castudia, atque tuâ cohortatione incitatum, cohortari non intermitteremus, ut discendo exercendoque se in dies longiùs procedat. *L. xxi. Ep. 46.*

CAPUT XLVI.

Sit gratus erga magistrum discipulus.

1. Præceptores suos adolescens veneretur ac suspiciat, quorum beneficio se vitiis exiit, et sub quorum tutelâ positus exercet artes bonas. *Senec. Ep. 83.*

Quis est nostrum liberaliter educatus, cui non educator, cui non magister suus atque doctor, cui non locus ille mutus, ubi ipse altus aut doctus est, cum gratiâ recordatione in mente versatur. *Cic. pro Planc. n. 81.*

Vespasianus natus est in vico modico Sabinorum, et educatus sub paternâ aviâ in prædiis. Quare princeps quoque locum incunabulorum assiduè frequentavit, manente villâ qualis fuerat olim, ne quid scilicet mutaretur ex iis quibus oculi assueverant. Avix quoque memoriam tantopere dilexit, ut solemnibus ac festis diebus pocillo ejus argenteo bibere perseveraverit. *Sueton. in Vesp. c. 2.*

2. Cùm Cicero, natus vivente avo in parvâ villâ, dixisset Attico, se eo loco maximè delectari; his verbis respondit ei Atticus: Ego verò tibi istam justam causam puto, cur huc lubentiùs venias, atque hunc locum diligas. Quin ipse, verè dicam, sum ipsi villæ amicior factus, atque huic omni solo, in quo tu ortus procreatusque es. Movemur enim nescio quo pacto locis ipsis, in quibus eorum, quos diligimus aut admiramur, adsunt vestigia. Me quidem ipsæ illæ nostræ Athenæ non tam delectant operibus magnificis, quàm recordatione summorum virorum, ubi quisque habitare, ubi sedere, ubi disputare sit solitus: studiosèque eorum etiam sepulchra contemplor. Quare istum, ubi tu es natus, plus amabo posthac locum. *Cic. 2. de Leg. n. 4.*

3. Præceptorum et medicorum magna caritas, magna reverentia sit. Ne dicas nihil quidquam his debere te, nisi mercedulam. Nam primò quædam pluris sunt.

quàm emuntur. Emis à medico rem inæstimabilem, vitam ac valetudinem bonam : et bonarum artium præceptore, studia liberalia et animi cultum. Itaque his non rei pretium solvitur ; sed laboris, quòd deserviunt, quòd à rebus suis avocati nobis vacant. Deinde et medicus et præceptor sæpe in amicum transeunt, et nos non tam arte, quam vendunt, obligant, quàm benignâ et familiari voluntate. Hoc cùm factum est, medico præceptori pretium operæ solvitur, at animi semper debetur.

In optimis artibus quæ vitam conservant aut excolunt, qui nihil se plus existimat debere, quàm pepigit, ingratus est. *Senec. 6. Benef. c. 15, 16, 17.*

4. Cùm Pythagoras accepisset Pherecydem, qui ejus præceptor fuerat, in insulâ Delo gravissimè ægrotare, confestim ex Italiâ in insulam navigavit: ubi cùm aliquandiu seni fomenta adhibuisset studiosè, nihilque omisisset, quod ad pristinam valetudinem eum revocaret: tandem senectute et morbi vi superatum sedulo sepeliit: et postquam ei, tanquam patri silius, justa persolvit, rursus in Italiam reversus est. *Diod. Sic. l. vi.*

5. Alexander magnus eloquentiæ magistro usus erat Anaximene Lampsaco. Quæ res postmodum Lampsaco saluti fuit. Eam urbem diruere statuerat Alexander, quòd à partibus Darii adversum se stetisset. Itaque conspicatus Anaximenem è muris prodeuntem obviam sibi, nec dubitans quin veniret deprecatum pro patriâ, per Deos juravit se non factorum quod ille petisset. Quo audito, callidus orator regem rogavit, ut Lampsacum dirueret. Jurisjurandi religione tactus Alexander, et captus piâ præceptoris quondam sui solertiâ ad servandam patriam, Lampsacenis delicti gratiam fecit. *Pausan. l. vi. Valer. l. vii. c. 3.*

Stagiram quoque urbem, à Philippo patre dirutam, restituisse dicitur, exoratus precibus Aristotelis ejus urbis, civis, quem ferè semper secum habuit, donec post mortem patris rerum potitus in Asiam trajiceret. Postea quoque inter belli curas non omisit, magistrum venerari, crebroque per literas compellavit, ut ab eo et disciplinarum sublimium arcana et morum præcepta acciperet. *Ælian. l. xii. c. 54. Freinsh. 1. lib. sup. Curt.*

Cùm Tyri obsidio non pro spe Alexandri procederet; ne segniter adsidere uni urbi videretur, operi Perdicam Craterumque præfecit: ipse cum expeditâ manu

Arabiam petiit. Ibi magnum in periculum venit propter pedogogum suum Lysimachum, qui comitari eum voluerat, jactans se neque animo inferiorem esse, neque etate graviolem Phœnice, olim Achillis primùm educatore, deinde ad bella comite. Nam ubi ad montana ventum est, et, relictis equis, iter pedibus faciendum fuit; Alexander, nocte ingruente et hostibus circa vagantibus, fatiscentem ac defessum senem deserere haud sustinuit; sed et verbis excitavit, et adminiculo corporis sui adjuvit; ita ut ab exercitu suo, qui longius processerat, distractus, noctem egerit in tenebris, et acri gelu, locisque asperis. *Q. Curt. l. iv. c. Plut. in Alex.*

6. Anaxagoras Clazomenius non modò generis nobilitate et opibus, verùm etiam animi magnitudine, clarus fuit. Is ut rerum naturalium, maximè verò celestium, contemplationi totum se traderet, universum patrimonium suis sponte concessit, et tam publicæ quàm privatæ rei negligens, Athenas omnium doctrinarum inventrices ac cultrices petiit. Cuidam autem querenti quòd nulla esset ei cura patriæ, quam relinquebat: *Mihi verò, inquit, digitum in cælum intendens, patriæ cura, et quidam summa, est.* Imbutus ab eo Atheniensium dux Pericles rerum celestium scientiâ magno animo elatoque fuit, sublîmi usus est dicendî genere, et divitiis pauperes multos juvit. Contigit tamen ut multis districtus negotiis Anaxagoram negligere videretur: unde senex jacebat in lecto capite obvoluto, vitamque inediâ finire statuerat. Eâ re ad se delatâ percussus Pericles, advolavit confestim; et jacentem enixè oravit cum lacrymis, ut vivere vellet, et sibi conservare fidelem sapientemque in reipublicâ gerendâ consiliarium. Ibi Anaxagoram, rejecto ab ore velamento, ferunt respondisse: *O Pericle, lucernæ infundunt oleum tî, quibus lucernâ est opus.* Anaxagoram deinde semper coluit magnâ curâ Pericles: et cum impietatis accusatus esset, atque in judicium vocatus, quòd unum tantum Deum videretur agnoscere; Periclis operâ iudicibus ereptus, et incolumis ex urbe est dimissus. *Laërt. in Anax. Plut. in Pericle.*

Cùm M. Aurelius, qui postea imperavit, mortuum educatorem suum fleret, eumque aulici ministri revocarent ab illâ pietatis declaratione: *Pernittite illi, inquit imperator Antoninus Pius, ut homo sit: neque enim vel*

philosophia vel imperium tollit affectus. Jul. Capitol. in Anton. Pio. c. 10.

Diis acceptum refero, inquit M. Aurelius Imperator, quod bonos præceptores habuerim; quòd illos maturè evexerim ad honores, quos exfeteo videbantur: quòd mihi quoque copia fuerit magistrorum, qui ad educandos liberos meos essent idonei. Imò tantum honoris magistris suis detulit, ut imagines eorum aureas domi inter Lares Deos haberet, ac sepulchra eorum hostiis et floribus semper honoraret. *M. Aurel. l. i. c. 17. Capitol. in M. Anton. c. 3.*

CAPUT XLVII.

Præceptor nec habeat vitia, nec ferat.

1. Optimum erit pueris dari præceptores pædagogosque vitiorum expertes: eorum enim, sicut et nutricum, mores pueri plerumque referunt. Apud Platonem educatus puer, cum ad parentes reversus vociferantem videret patrem: *Nunquam, inquit, hoc apud Platonem audivi.* Leonidas Alexandri pædagogus imbuat alumnum quibusdam vitiis, quæ illum ab institutione puerili persecuta sunt usque in regale solium. *Seneca 2 de irâ c. 22. Quintil. l. i. c. 2.*

2. Cùm puer publicis magistris erit tradendus eorum in primis inspicere mores oportebit. Hoc enim in omnibus cùm domesticis tum publicis doctoribus examinandum quàm diligentissimè puto. Itaque parentes si non cæca et sopita eorum socordia est, magistrum eligent sanctissimum quemque (sanctitatis enim præcipua prudentibus viris cura est) et disciplinam quæ optima fuerit. *Quintil. l. ii. c. 2. l. i. c. 3.*

3. Corelliam Hispullam admonet Plinius, qualem filio rhetorem quærere debeat. Cùm dubitem utrum patrem tuum, virum sanctissimum, suspexerim magis an amaverim, et te unicè diligam; cupiam necesse est, atque etiam enitar, ut filius tuus et avo et majoribus similis existat. Iis autem ita demum similis adolescet, si imbutus bonis artibus fuerit, quas plurimum refert à quo potissimum accipiat. Adhuc illum pueritia intra contubernium tuum tenuit, et domi præceptores habuit. Jam

studia ejus extra limen proferenda sunt: jam circumspiciendus rhetor Latinus, cujus scholæ severitas, pudor in primis, castitas constet. Videor ego demonstrare tibi posse Julium Genitorem. Vir est emendatus et gravis: paulò etiam horridior et durior ut in hâc licentiâ temporum. Nihil ex hoc viro filius tuus audiet, nisi profuturum: nihil discet, quod nescisse rectius fuerit. Nec minùs sæpe illo quàm à te meque admonebitur, quàm majorum gloriam, ac famam sustinendam habeat. Proinde, faventibus Diis, trade eum præceptori; à quo mores primùm, mox eloquentiam discat: quæ malè sine moribus discitur. *Plinius, l. iii. Ep. 3.*

Sumat præceptor parentis erga discipulos suos animum; atque existimet succedere se in locum eorum, à quibus sibi liberi traduntur. Ipse nec habeat vitia, nec ferat. Non austeritas ejus tristis sit, non dissoluta comitas: ne inde odium, hinc contemptus oriatur. Plurimus ei de honesto et bono sit sermo: nam quò sæpius monuerit, hòc cariùs castigabit. Minimè iracundus sit, nec tamen eorum, quæ emendanda erunt, dissimulator. *Quint. l. ii. c. 2.*

Orbilius Pupillus Beneventanus literas diu professus in patriâ, quinquagesimo demum anno Romam, consulè Cicerone, transit; docuitque majore famâ, quàm emolumento: nam senex et pauper habitabat sub tegulis. Fuit naturæ acerbæ in discipulos; unde Horatius qui puer eo magistro usus erat illum plagosum appellat. *Sueton. de Gram. c. 9. Horat. l. ii. Epist. 1.*

2. Pessimus pater videbitur, qui assiduus plagis liberos etiam ex levissimis causis compescet. Uter autem præceptor liberalibus artibus, quas docet, dignior est, qui excarnificat discipulos, si memoria illis non constiterit, aut si parum agilis in legendo oculus hæreat; an qui monitionibus et verecundiâ mavult emendare? Nunquid æquum est, gravius et durius homini imperari, quàm imperatur animalibus mutis? Atqui dominandì peritus artifex non equum crebris verberibus exterret: fiet enim formidolosus et contumax, nisi eum tactu blandiente permulserit.

Nullum animal morosius est, nullum majore arte tractandum, quàm homo: nulli magis parcendum. Quid enim stultius, quàm adversus jumenta et canes erubescere, iram exercere, hominem autem pessimâ conditione esse sub homine? Morbis corporis medemur, nec irasci-

mur: sui animo morbi sunt, qui desiderant medentem minimè infestum ægro. Ille cui aliorum credita salus et cura est, cùm eorum vitiis luctetur, et resistat. Quibusdam morbum suum exprobrat, quosdam molliùs curet, ad graviora remedia, ubi tantùm necesse fuerit, confugiat. *Senec. 2. de Clem. c. 16, 17.*

Pudore et liberalitatè liberos retinere satius esse credo, quàm metu: dicit pater quidam apud Terentium. *Terent. Adelph. Act. 1. Sc. 1.*

4. Docendi peritus, tradito sibi puero, ingenium ejus naturamque perspiciat, ut, quomodo tractandus sit discantis animus, intelligat. Sunt enim quidam, nisi institeris, remissà: quidam imperia indignantur: quosdam continet metus, quosdam debilitat: ab aliis continuus labor aliquid extundit; in aliis plus animi impetus facit. Mihi ille detur puer, quem laus excitet, quem gloria juvet, qui victus fleat: hunc mordebit objurgatio, in hoc desidia nunquam verebor. *Quintil. l. i. c. 4.*

Diligentissimè videndum est iis qui instituunt aliquos atque erudiunt, quò sua quemque natura maximè ferre videatur. Est enim ad cujusque naturam accommodandà; quantùm licet, doctoris institutio. *Cic. 1. de Orat. n. 5.*

CAPUT XLVIII.

Parentum adversus filios severitas.

1. Titus Manlius Torquatus, qui perindulgens in patrem fuerat, idem acerbè severus in filium fuit. *Cic. 3. Offic. n. 112.*

Quum Romanis adversus Latinos Tusculanosque pugnandum esset, placuit consulibus T. Manlio Torquato, et P. Decio, ut bellum severo administraretur imperio, et disciplina militaris ad priscos redigeretur mores: edixeruntque ne quis extra ordinem in hostes pugnaret. Fortè inter ceteros turmarum Præfectos, qui in diversas partes missi erant exploratùm, T. Manlius consulis filius cum suis turmalibus accessit prope stationem Tusculanorum equitum, quibus præerat Geminus Metius, vir tum genere tum factis clarus. Is ubi Romanos equites cognovit, insignemque inter eos præcedentem consulis filium,

paululùm ab suis equo provectus : *Viene, inquit, dum illa dies venit, quã consulares exercitus cum Latinis decertabunt, interea tu ipse congredi mecum, ut utriusque nostrũ eventu cernatur, quantum eques Latinus Romano præstet?* Movit ferocem animum juvenis seu ira, seu detrectandi certaminis pudor, seu inexcuperabilis vis fati. Oblitus itaque imperii patrii, consulumque edicti, ruit in id certamen, in quo haud multum intererat vinceretne, an vinceretur.

Equitibus cæteris velut ad spectaculam, utrimque summotis, Metius ut Manlius adversos concitârunt equos, et cùm infestis cuspidibus concurrerunt. Romanus Tusculanum ex equo excussum transfixit, spoliisque lectis ad turmam suam revectus in castra ad patrem venit. Tum : *Ut me, inquit, omnes tuo sanguine verè ortum prædicarent, provocatus ab hoste, hæc arma ex eo caso capta attuli.* Quod ubi audivit consul, extemplò filium aversatus, et patrio amori præferens rempublicam, cujus intererat exercitum in gravissimo bello animadversionis metu contineri, milites classico advocari jussit. Qui postquam frequentes convenère : *Quandoquidem, inquit, tu, Tite Manli, neque imperium consulare, neque magistratam patriam veritus, in hostem fugisti; et solvisti, quantum in te fuit, disciplinam militarem, quã Romana res stetit ad hanc diem: nos potius pro nostro delicto flecti oportet, quam rempublicam luere peccata nostra magno suo damno.* I, lictor, deliga ad patrem.

Exanimati omnes tam atroci imperio, et quasi districtam in se cernentes securim, metu magis, quàm modestiã, quievère. Postquam cervice cæsã fusus est cruor, cum libero conquestu coortæ voces sunt, ita ut neque execrationibus parceretur. Deinde spoliis contactum juvenis corpus, à militibus crematum est, structo extra vallum rogo.

Fecit atrocitas pœnæ de Manlio sumptæ obedientiorum duci militem, et ea severitas ad felicem belli exitum profuit. Cùm T. Manlius consul Romam victor rediit, ei venienti seniores tantum obviã exierunt : juvenis et tunc et omni deinde vitã aversata cum execratione est. *Livius, l. viii. c. 6. 12. Cic. 1 de Fin. 23. 62.*

Viguit quoque plurimum apud Lacedæmonios disciplina militaris. Itaque cum in acie quidam Lacon strictum ensẽ jam esset in hostem infixurus, audito signo

quod canebat receptui, non infixit. Interrogatus deinde, cur hostem quem in potestate habebat, non occidisset: *Quoniam, inquit, melius est parere imperatori, quam hostem occidere.* Plut. Apoph.

2. Quum Macedonum legati Romam venissent conquestum de Silano Manlii Torquati filio, quod prætor provinciam expilasset; pater, avitæ severitatis hæres, petiit à patribus conscriptis, ne quid de eâ re statuerent, antequam ipse inspexisset Macedonum et filii sui causam. Id à senatu libenter concessum est viro summæ dignitatis, utpote consulari, et juris civilis peritissimo. Itaque institutâ domi cognitione causæ, solus per totum biduum vacavit utrique parti audiendæ, ac tertio die pronuntiavit: *Filium suum videri non talem fuisse in provinciâ, quales ejus majores fuissent.* Et in conspectum suum deinceps venire vetuit. Tam tristi patris judicio perculsus Silanus, lucem ulterius intueri non sustinuit, et proximâ nocte vitam suspendio finivit. Peregerat Torquatus severi et religiosi judicis partes, satisfactum erat reipublicæ, habebat ultionem Macedonia; at nondum erat inflexus patris rigor. Igitur neque filii exequiis interfuit, ut patribus mos erat apud Romanos: et eo ipso die, quo funus ejus dicebatur, aures, ut solebat, volentibus consulere se de jure, accommodavit. *Valer. l. v. c. 8. Cicero 1 de Fin. 24. Livius, Ep. 54.*

3. Ut Torquatus fuerat severus in coërcendâ filii avaritiâ, sic fuit Scaurus in puniendâ filii sui ignaviâ. Nam cum apud Athesim fluvium à Cimbris Romani equites pulsi, Romam pavidi repeterent, deserto proconsule Q. Catulo; misit Scaurus qui filio illius consternationis participi dicerent: *Se libentius occurrurum ejus in acie interfecti visibus, quam visurum reducem reum tam deformis fugæ; itaque conspectum irati patris degeneri filio vitandum esse, si quid verecundiæ superesset.* Quo nuncio accepto, juvenis adversus semetipsum convertit gladium, quò in hostes usus non fuerat, et sibi mortem conscivit. *Valer. ibid.*

4. Non intra verborum castigationem hæsit A. Fulvius vir senatorii ordinis. Nam cum filius ejus pravo consilio in castra Catilinæ rueret; illum è medio itinere retractum supplicio mortis affecit; præfatus: *Non se genuisse cum Catilinâ adversus patriam, sed patriæ adversus Catilinam.* *Valer. ibid.*

5. Rhacoces quidam genere Mardus septem habebat filios, quorum minimus, nomine Cartomes, adolescens supra ætatem audax, multis suis fratribus mala quotidie inferebat. Cùm eum pater non destitisset clementer admonere et verbis castigare, neque ille auscultaret utilia suadenti, venere fortè in eam regionem iudices illi, qui jussu regis Persarum singulas provincias peragrarè soliti erant, ad jus dicendum, et propterea aliquando Oculi Regis vocabantur. Tum verò Rhacoces filium comprehendit, et manibus post tergum ligatis, ad iudices traxit, quibus cùm enumerasset quæ fuerant ab illo audacter et improbè perpetrata, postulavit ut contumaciæ et improbitatis poenas morte lueret. Tam inusitatâ parentis adversus filium postulatione obstupefacti iudices, à sententiâ ferendâ abstinuere, et utrumque ad regem Persarum Artaxerxem deduxerunt.

Ut stetit in conspectu Artaxerxis Rhacoces, et eadem, quæ priùs adversus filium conquestus est, ac postulavit: *Ergone, inquit rex, tu oculis tuis videre morientum filium sustinebis pater? Maximè, respondit ille, quoniam in horto quoque cùm lactucarum amaros surculos defringo et amputo, nihil omnino mali ex eo mater ipsorum, ipsa lactuca sentit: sed efflorescit magis, majorque et dulcior evadit. Pariter et ego, ó rex, cùm videro frohüberi ab injuriâ faciendâ et herire eum, qui et domui meæ et fratribus suis plurimum nocet, meæ res melius se habebunt, et cum reliquis filiis unâ prosperè agentibus vivam.* Quibus auditis, Artaxerxes collaudatum quidem Rhacocem inter regios iudices, sedere jussit, ita allocutus eos qui præsentés aderant: *Qui tam justè de suis ipsius liberis sententiam pronunciat, omnino etiam adversus alios diligens erit et incorruptus iudex.* Adolescentem verò præsentì penâ liberavit, gravissimum mortis genus interminatus ei, si deinceps deprehensus esset patrare similia præteritis. *Ælian. l. i. c. 34. Xenoph. Cyrop. l. i.*

6. Pausanias Lacedæmoniorum dux, elatus victoriâ partâ de Mardonio apud Platæas, nefaria adversus patriam consilia inierat. Eum propterea comprehendì cùm jussissent Ephori, in ædem Minervæ confugit: unde ne exire posset, statim Ephori, valvas ejus ædis obstruxerunt, tectumque sunt demoliti, ut faciliùs sub dio interiret. Dicitur eo tempore matrem Pausaniæ vixisse, eamque, postquam cognovit scelus filii, lapidem ad introitum

ædis attulisse, ad claudendum filium. Cùm deinde Pausanias semianimis è templo elatus esset, confestim animam efflavit. Sic magnam belli gloriam turpi morti maculavit. *Corn. Nep. in Pausan.*

CAPUT XLIX.

Parentum amor in liberos.

1. Erat Mulgentii, quod est oppidum Siciliae, vir opibus et gloria princeps civitatis suae, cui cognomen Cambalus. Hic venatum egressus, cum in latronum manus penè incidisset, pedibus in oppidum cœpit contendere. Ei tum fortè Gorgus pater equo vectus occurrens, statim equo desiliit, filiumque hortatus est ut, equo inscenso, protinus se in urbem reciperet. At filius salutem suam patris incolumitati præferri non est passus: neque pater vicissim voluit periculum effugere, projecto ad certam mortem filio. Itaque cum alter alterum flens oraret, et ambo inter se certarent, paterno amore in filium contentente cum filii pietate in patrem, interim latrones utrumque assecuti confoderunt. *Diod. Sic. l. xxxiv.*

2. Zaleucus apud Locrenses legem tulerat, ut adultero oculi effoderentur. Cujus flagitii cum paulò post convictus fuisset ipsius filius; pœnam ex paternâ lege daturus erat. Tota civitas necessitatem pœnæ remitti adolescenti volebat in gratiam et honorem patris à quo saluberrimis legibus fuerat munita, postulabatque à Zaleuco, ut filio suo indulgeri pateretur. Ille tandem precibus populi victus, se inter misericordem patrem et justum legislatorem est partitus: et, ne, quod semel sancitum fuerat, irritum fieret per impunitatem admissi flagitii, unum sibi, alterum filio, oculum eruit. *Ælian. l. xiii. Valer. l. v. c. 5.*

3. Diagoras Rhodius tres filios adolescentes habuit, unum pugilem, alterum pancratiastem, tertium luctatorem: eosque omnes vidit vincere coronarique Olympiæ eodem die. Et cum ibi eum tres adolescentes amplexi, coronis suis in caput patris impositis, suaviarentur, populusque gratulabundus jaceret undique in eum flores, ibidem in stadio, inspectante populo, in oculis atque in manibus filiorum animam efflavit. *A. Gell. l. iii. c. 14.*

4. Ubi accepta ad Thrasimenum lacum clades Romæ audita est, varias in curas despecti eorum animi fuere, quorum propinqui pugna interfuerunt: quia ignorabant quæ cujusque suorum fortuna esset, et quid sperare aut timere deberent. Postero die, ac deinceps aliquot sequentibus, ad portas major mulierum, quam virorum, multitudo stetit, opperiens aut suorum aliquem, aut nuncium de his: circumfundebanturque obis multa sciscitantes, neque avelli ab illis poterant priusquam ordine omnia inquisivissent. Inde varios vultus cernentes, ut cuique aut læta aut tristia nunciabantur. Fœminarum præcipuè gaudia insignia erant, et luctus. Ferunt unam, sospite filio, repente in ipsâ urbis portâ oblato præter spem, in conspectu ejus expirasse: alteram, cui mors filii falso nunciata fuerat, mœstam sedentem domi, nimio gaudio exanimatam fuisse ad primum conspectum redeuntis filii. Sic quas dolor non extinxerat, lætitia consumpsit. *Livius*, c. xxii. c. 7. *Valer. l. ix. c. 12.*

CAPUT L.

Sua sunt conjugibus munia assignata à naturâ.

Gradus plures sunt societatis humanæ. Prima societas est in ipso conjugio. *Cic. Offic. n. 53, 54.* Maritale conjugium à naturâ comparatum est, ut non solum jucundissima, sed etiam utilissima vitæ societas iniretur. Ex eâ plurima mortalibus adjutoria et propugnacula præparata sunt. Cùm victus et cultus humanus accurandus esset, non in sylvestribus locis et in propatulo, sicut feris, sed domi sub tecto: necessarium fuit, alterum è conjugibus esse foris et sub dio, qui labore et industriâ comparata quæ necessaria essent: alteram intus, quæ comparata custodiret, et cætera conficeret, quæ domi deberent administrari. Natura distribuit viro calores pacis ac belli, id est, rusticationis et militarium exercitationum: mulieri verò, quam omnibus his rebus fecerat inhabilem, domestica negotia curanda tradidit. Et quoniam hunc sexum assignaverat custodiæ rei familiaris, idcirco timidiores reddidit, quam virilem: nam metu plurimum confert ad diligentiam custodiendi. Quod in

tem necesse erat quærenti victum foris et in aperto nonnunquam injuriam propulsare, ideò virum audaciorē facit quàm mulierem. Memoriam non minorem feminae, quàm viro, tribuit; quia utrique æquè opus fuit. *Cic. Frag.*

CAPUT LI.

Maritorum amor in uxores.

1. Tiberius Gracchus, Romæ censor, et bis consul, geminos reportavit triumphos: majorem tamen ex virtute et sapientiâ gloriam invenit. Itaque dignus est habitus qui in matrimonium acciperet Corneliam, filiam P. Scipionis, à quo devictus fuerat Annibal. Hic, quemadmodum C. Gracchus filius ejus scriptum reliquit, duobus anguibus diversi sexûs in thalamo comprehensis, rem prodigii loco habuit, qui augur erat, et convocatos haruspices consulit. Qui cùm respondissent: *Non esse occidendos ambos angues, non esse etiam dimittendos, sed, occiso uno, alterum dimittendum: si marem emisisset, uxori celerem mortem instare: si feminam, ipsi;* æquius esse censuit se jam ætate provectum maturam mortem oppetere, quàm Corneliam, quæ juvenis esset, et adhuc patriæ dare eives posset ex alio marito. Itaque et uxori parcens, et reipublicæ consulens, fœminam serpentem emisit: ipse paucis post diebus est mortuus. Marito superstes conjux, sic rei familiaris curam gessit, sic liberos instituit, tantam vitæ sanctitatem et animi magnitudinem ostendit, ut non malè visus sit consuluisse Tiberius, qui pro tali muliere voluisset emori. *Cic. l. de Div. n. 36. Plinius, l. viii. 36. Valer. l. iv. c. 6.*

Ab hoc mariti in uxorem amore longè abfuit Admetus Pheræorum rex, si poëtis fides habeatur. Nam cùm à Diis monitus esset, fore ut præsentem mortem effugeret, si quis reperiretur, qui ejus vice mori vellet; passus est conjugem suam Alcestim, adhuc integrâ ætate florentem, voluntario obitu pro se de fungi. *Valer. ibid. Euripid. in Alcest.*

2. C. Plautius, morte uxoris auditâ, doloris impotens, cùm pectus suum gladio percussisset, inceptum perficere est prohibitus interventu suorum, qui et vulnus

obligarunt. At ubi primum occasio data est, scissis fasciis et vulnere divulso, ex imis visceribus animum dolore oppressum extraxit.

Ejusdem ut nominis, ita amoris quoque (seu potius furoris M. Plautius, quum Tarentum classe appulisset, atque ubi uxor ejus, quæ maritum illuc prosecuta fuerat, morbo decessisset: funerata eam atque in rogam imposita, stricto ferro incubuit. *Valer. ibid.*

3. Dicebat Cato Major, majorem laudem esse boni mariti, quam magni senatoris: et Socratem illum contemtem sibi propterea maximè admirationi esse, quod fieri petuò placidè comiterque vixisset cum uxore moro-
Plut. in Caton.

CAPUT LII.

Uxorum constans amor in maritos.

1. Porcia M. Catonis Uticensis filia, cum apud Philippos victum et interemptum maritum cognosceret; qui ferrum, quod poscebat ad mortem sibi inferendam, non dabatur, ardentem ore carbones haurire non dubitavit, virilem patris exitum mulier imitata novo mortis genere.
Valer. l. iv. c. 6.

Conjugis audisset fatum cum Porcia Bruti,
Et subtracta sibi quæreret arma dolor,
Nondum scitis, ait, mortem non posse negari?
Credideram satis hoc vos docuisse patrem.
Dixit, et ardentem avido bibit ore favillas.
I nunc, et ferrum, turba molesta, nega.

Martial. lib. 1. Epigr. 43.

Ad mortem fortiter ferendam sese antea erudierat Porcia. Prædie quam Cæsar à Bruto cæterisque consociis est occisus, cultellum tonsorium, quasi unguium resuscandorum causam, poposcit, eoque velut fortè de manibus elapso se ipsa vulneravit. Clamore ancillarum in cubiculum uxoris vocatus Brutus, objurgare eam cepit, quod tonsoris officium præripere voluisset. At Porcia ei secretò dixit: *Non casu, sed de industria, hoc mihi vulnus feci, certissimum amoris erga te mei indicium. Experiri enim volui, an satis mihi animi futurum esset ad mortem ferro quaerendam, si tibi generosum propositum ex sententiâ parum*

cessisset. Dicitur Brutus, his auditis, manus et oculos ad cælum sustulisse, Deosque orâsse, ut dignus conjuge Porciâ maritus posset videri. *Valer. l. iii c. 2. Plut. in Bruto.*

2. Egrotabat Cæcina Pætus maritus Arriæ, egrotabat et filius, uterque mortiferè ut videbatur. Filius decessit, eximiâ pulchritudine, pari verecundiâ, et parentibus non minùs ob aliâ carus, quàm quòd filius erat. Huic illa ita funus paravit, ita duxit exequias, ut ignoraritus. Quinimò quoties cubiculum ejus intraret, re filium atque etiam meliùs habere se simulabat. persæpe interroganti quid ageret puer, respondebat: *Bene quievit, libenter cibum sumpsit.* Deinde cum diu prohibita lacrymæ vincerent prorumperentque, egrediebatur. Tunc si dolori dabat. Satiata flendo, siccis oculis, composito vultu, redibat, quasi oblita orbitatis. *Plinius, l. iii. 16.*

Scribonianus in Illyrico bellum moverat contra Claudium: fuerat Pætus in partibus ejus, et, occiso Scriboniano, ipse Romam trahebatur. Cùm esset navem ascensurus, oravit Arria milites, ut simul imponeretur. *Nempe,* inquebat, *daturi estis consulari viro servulos aliquos, quorum è manu cibum capiat, à quibus vestiatur, à quibus calcetur: omnia vel sola præstabo.* Non impetravit. Conduxit piscatoriam naviculam, ingensque navigium minimo secuta est. Postquam Romam venit, et, desperatâ mariti salute, ipsa mori statuisse visa est, attentius custodiebatur à suis. Sensit, et *Nihil agitis,* inquit, *potestis enim efficere ut malè moriar: ne moriar, non potestis.* Simulque è cathedrâ exiliens, adverso parieti caput ingenti impetu impedit, et corruit. Resocillata, *Dixeram,* inquit, *vobis, inventuram me duram ad mortem viam, si vos facilem negassetis.* Poterat sanè marito perempto vivere, atque etiam in aliquo honore esse, quia Messalinæ Claudii uxori erat conjunctissima; at ei mortis comes esse voluit. Quinetiam ut illum excitaret ad mortem virili animo oppetendam, ipsa prior pectus suum perfodit, et extractum è vulnere pugionem marito porrigens, immortalem hanc vocem edidit: *Pæte, non dolet.* Dio. l. ix.

Casto suo gladium cùm traderet Arria Pæto,
Quem de visceribus traxerat ipsa suis:

*Si qua fides, vulnus quod feci non dolet, inquit,
Sed quod tu facies, hoc mihi, Pate, dolet.*

Martial. lib. i. Ep. 14.

3. Gentis Cariæ regina Artemisia virum suum Mausolum maximè dilexit virum: quantopere verò desideravit mortuum. judicare facile est ex habitis ejus funeris honoribus, et exstructo illi sepulchro magnifico, ut inter septem mundi miracula numeraretur. Præmiis quoque excitavit præstantissima ætatis suæ ingenia ad laudes mortui celebrandas. Sed his magni amoris indicium non contenta ipsa, Mausoli vivum ac spirans sepulchrum fieri concupivit, et cum ejus cinerem atque ossa mixta odoribus contusaque indidisset aquæ, ebibit. Aut saltem, ut Ciceroni placet, quamdiu vixit, vixit in luctu, eodemque etiam confecta contabuit. *Valer. l. iv. c. 6. A Gell. l. x. c. 18. Cic. l. iii. Tusc. n. 75.*

4. Marcia Catonis Uticensis filia cum diutius lugeret maritum, interrogata quem diem luctus ultimum esset habitura? respondit, sibi futurum eundem luctus finem, et vitæ. Et Valeria, Messalarum soror, rogata cur, amisso Servio viro, nulli vellet nubere? *Quoniam, inquit, mihi semper vivit maritus Servius.* Erasmi Apoph.

Phocionis uxor, mulieri cuidem aureas et gemmas distinctas vestes ostentanti, dixit: *At mihi satis splendidum ornamentum est Phocion meus, pauper quidem, sed vicissim jam anno Atheniensium dux.* Stobæus, Serm. v.

CAPUT LIII.

Conjugis delectus ex moribus fiat.

1. Lycurgum quodam percontante cur virgines indotatas nubere lege præcepisset: *Ut, inquit, neque propter egestatem aliquæ relinquantur innuptæ, neque aliæ propter divitias exspectantur: Sed juvenum quisque mores puellæ spectans, ex virtute eligat.* Plut. Apoph.

Virgo dummodo morata rectè veniat, dotata est satis. *Plut. Aulul. Act. ii. sc. 2.*

Dos est magna parentium virtus. *Hor. l. iii. Od. 24.*

Dicebat Cleobulus, filias nuptum dari oportere ætate virgines, ac prudentiâ mulieres. *Diog. Laërt. in Cleob.*

Unicæ filiæ pater Themistoclem consulebat, utrâ eam pauperi, sed bono viro, collocaret: an locupletum parum probato. Cui is, *Malo*, inquit, *virum qui pecuniâ egeat, quàm pecuniam quæ viro*. Quo dicto stultum patrem monuit, ut generum potius, quàm divitias generi, legeret. *Valer. l. vii. c. 2. Cic. 2. Offic. n. 74.*

2. Adulescens Pittacum rogavit, ut doceret, utra sibi è duabus puellis ducenda esset uxor: duas enim offerri dixit, alteram genere atque opibus parem sibi, alteram utraq̃ue re sibi præstantem. Ille, sublato baculo, quo propter ætatem adminiculo utebatur, trivium ostendit, quò ludendi causâ pueri solerent convenire, eòque jussit illum pergere, ut audiret à pueris, quid ipsi facere optimum esset. Paruit adolescens, et pueros in trivio audivit invicem dicentes: *Tu tibi sume parem*. *Diog. Laërt. in Pittac.*

3. Thales à ducendâ uxore alieno animo erat. Urgenti aliquando matri ut se matrimonii vinculis astringeret, *Nondum tempestivum esse*, respondit. Multos post annos cum eadem acrius instaret, *Non amptiàs tempestivum esse*, dixit. *Diog. Laërt. in Thal.*

Cum Solon Miletum venisset ad Thaletem, mirum sibi videri dixit, quòd nuptiarum et sobolis omnino negligens esset. Nihil tum Thales respondit: Sed paulo post peregrinum quendam subornavit, qui se nupèr Athenis advenisse simularet. Quærente Solone, num quid in eâ urbe novi? Homo quæ diceret edoctus à Thalete, nihil aliud contigisse respondit, nisi quòd adolescentem quendam efferri vidisset, cujus funus tota civitas prosequeretur. *Erat quippe*, inquit, *ut ferebant, filius viri inter civis virtute præcellentis, et jamdudum ab urbe absentis. O infortunatum parentem!* exclamabat Solon. *Cæterum dic*, inquit, *quodnam ejus nomen ferebant!* *Audivi equidem*, respondit ille, *sed excidit mihi. Hoc tantam memini, multum habitum esse sermonem de illius viri sapientiâ ac justitiâ*. Solon, cujus metus ad singulas peregrini responsiones magis ac magis crescebat, turbatus animo atque anxius, quæsivit, *Nunquid ille fato functus adolescens, Solonis esse filius diceretur?* Quod ita esse respondente illo, cœpit Solon caput cædere, aliaque et facere et dicere quæ solent magno mœrore oppressi. Tum ridens Thales, qui aderat: *Hæc me*, inquit, *ô Solon, à ducendâ uxore et tollendis liberis absterruerunt, quæ te etiam fortissimi animi*

virum nunc frangunt. Te verò nihil hic nuncius moveat ; hæc enim omnia ficta sunt. Plut. in Sol.

CAPUT LIV.

Magna sit inter fratres concordia et benevolentia.

1. Amicitia eorum hominum, quos familiaritas conjunxit, nihil aliud sunt, quam umbrae et imagines illius primae, quam natura fratribus erga fratres indidit, caritatis. Hanc qui non colit studiosè ac veneratur, an fidem facere cuiquam potest, se aliis esse benevolum? *Plut. de Amore fratern.*

Sanguinis conjunctio devincit caritate homines. Magnum est enim eadem habere monumenta majorum, iisdem uti sacris, sepulchra habere communia. *Cicer. 1 Offic. 54.*

Quis amior est, quam frater fratri? aut quem alienum fidum invenies, si tuis hostis fueris? *Sallust. Jug. c. 10.*

Silurus Scytharum rex morti proximus afferri fasciculum hastilium jussit, cumque, ut erat colligatus, dedit confringendum filiis suis octoginta. Cum id quisque se posse facere negasset; ipse, soluto fasciculo, singula hastilia facilè confregit; ita docens illos, si concordessent, insuperabiles fore: si dissiderent, infirmos futuros. *Plut. de Garrul.*

2. Ego nostram aetate non minus raram fratrum amicitiam video esse, quam fuere quondam fratrum inimicitiae: quae quia naturae legi adversabantur, in tragædiis et theatris publicè exagitatae. *Plutar. de Am. fratern.*

L. Paulus Aemilium filiarum alteram Catonis filio in matrimonium dedit, alteram Aelio Tuberoni, viro optimo, et qui fortissimè paupertatem tulit. Sexdecim erant Aelii, qui omnes cum numerosa sobole et uxoribus in aedibus perangustis concordiam animo habitabant. At hujus nostrae aetatis fratres et cognati, inquit Plutarchus, nisi multum inter se spatium interjecerint, nisi muris, fluminibus, regionibus distinxerint patrimonia et rem familiarem, non cessant à mutuis contentionibus. *Plut. in Aemil.*

3. Cum mortuus est pater, rectum est fratres magis etiam quam prius studiosos esse retinendam mutuae bene-

volentia, neque ad paternam hereditatem accedere, quasi ad spolia ex hoste diripienda, imitantes pessimum exemplum Chariclis et Antiochi, qui relictum à patre poculum argenteum ac vestimentum in duas partes discissum abstulerunt. Diligenter ergo observent illum heriscenda hereditatis diem, qui aut discordia inimicitiaque implacabilis, aut concordia amicitiaque principium esse solet. *Plut. de Amore fratern.*

Mortuo L. Paulo Emilio, P. Scipio Emilianus cum fratre Fabio haeres relictus, animum verè fraternum in eum ostendit. Nam cum illum videret re familiari minus, quam se, instructum esse; universam hereditatem, quae sexaginta talentis et pluris aestimabatur, ei concessit. Sic enim demum Fabius opibus aequalis ipsi erat futurus. Quod factum cum ab omnibus celebraretur, aliud quoque clarius animi sui specimen dedit. Nam cum Fabius in funere patris gladiatores dare constituisset, neque eum sumptum facile posset sustinere; Scipio dimidiam impensae partem de suo est largitus. Hujusmodi verò impensa non minor triginta talentis tum solebat esse, si quis magnificè munus gladiatorum edere vellet. Cum Scipionis quoque mater Papiria paulò post de vita decessisset; universam hereditatem concessit sororibus, tametsi nulla pars bonorum legibus ad eas rediret. *Diod. Sic. l. xxxi.*

Eternam sibi apud posteros famam paravit Procleius paterno in fratres animo. Eques Romanus fuit, Augusti amicus. Patre mortuo, patrimonium cum fratribus Murenà et Scipione aequis partibus diviserat: at illi bello civili bonis omnibus spoliati sunt. Quam calamitatem ut leniret Procleius, facultates omnes suas cum fratribus iterum est partitus. Unde Horatius dixit:

Vivet extento Procleius ævo,

Notus in fratres animi paterni. *Od. l. ii. 2.*

4. Operæ pretium est disceptationem audire fratrum barbarorum, non de agelli particulâ, non de mancipiis, non de pecore, sed de ipso Persidis regno. Cum Darius Persarum rex obiisset; certamen de regno ejus ortum est inter Artemenem maximum natu filiorum ejus, et Xerxem: quod quidem concordia animo detulerunt ad patrum suum Artaphernem, velut ad domesticum iudicem. Ille, domi cognita causâ, Xerxem præposuit. Porrò ad eò fracta contentio fuit, ut nec victor insultaverit, nec victus doluerit, ipsaque litis tempore invicem dona miserint.

Jucunda quoque inter se et sibi convivia habuerunt: et iudicium sine ullo convicio fuit. Adeò tum fratres moderatiùs inter se maxima imperia dividebant, quàm nunc exigua patrimonia partiuntur. *Plutar. de Amore fraterno. Justinus, l. ii. c. 10.*

5. Antiochus, cognomento Accipiter, adversus Seleucum fratrem de regno bellum gerebat. Cùm tamen Seleucus, à Galatis victus, nusquam appareret, et interfectus putaretur; Antiochus purpuram deposuit, pullâque veste sumptâ, et clausâ regia, fratrem luxit. Paulò post cùm audivisset illum vivere, et alium exercitum colligere; in publicum progressus, Diis sacra propter salutem fratris fecit, et subditas sibi gentes in signum lætitiæ coronas gestare jussit. *Plut. ibid.*

6. Darius Hydaspis filius, Persarum rex, in custodiam tradi jusserat Intaphernem unum è purpuratis, cum liberis atque omni familiâ necandum. Exanimata Intaphernis uxor ad regias fores statim advolavit: et cùm nec lacrymis nec precibus modum faceret, hoc illi rex concedere se dixit, ut, si quem ex omnibus morti addictis salvum præ cæteris cuperet, is ei condonaretur. Quos quia omnes ex æquo amabat mulier, diu inops consilii permansit. Tandem fratrem sibi postulavit condonari. Quod miratus rex, quæsit cur maritum uxor, filios mater negligens, fratrem elegisset, qui videbatur minùs jucundus ac carus futurus esse. Tum illa: *Rex, inquit, maritus mihi alius atque alii liberi possunt contingere, his amissis, si Dii voluerint: alius verò frater minimè, utpote extinctis jam parentibus meis.* Hoc responso delectatus rex, fratrem, quem optaverat, dimisit, et filium natu maximum: cæteros jubet ad mortem rapi. *Herodot. l. iii.*

7. Bello Antiochi magno et gravi, cùm Lucio Scipioni obvenisset Asia provincia; quia parum in eo putabatur esse animi, parum roboris, senatus belligerendi curam mandari volebat collegæ ejus Caio Lælio, Lælii sapientis patri. Surrexit tunc P. Africanus, frater major L. Scipionis, et illam ignominiam familiæ deprecatus est: dixit in fratre suo summam virtutem esse, summumque consilium: seque eâ ætate, iis rebus gestis, ei legatum futurum promisit. Quod cùm ab eo esset dictum; nihil est de L. Scipionis provinciâ commutatum. Itaque frater natu major, minori legatus in Asiam profectus, tamdiu

eum consilio operaque adjuvit, donec ei triumphum et cognomen Asiatici peperisset. *Cicer. Philif. xi. n. 7.*

8. Cùm admodum puer esset Cato Uticensis, quærentibus ex eo quibusdam, quem omnium maximè diligeret, respondit fratrem. Iisdem rursus quærentibus, quem secundum maximè diligeret, fratrem quoque respondit. Interrogatus de tertio, idem responsum dedit: donec illi à percontatione desisterent. Crevit cum ætate illa in fratrem benevolentia et reverentia; ab ejus latere non discedebat, ei se in cunctis obedientem præbebat, et annos natus viginti sine fratre Cæpione nunquam cœnaverat, non in forum progressus, non peregrè profectus fuerat. Utriusque probi erant mores: at Catonis vita severior. Itaque Cæpio, cùm ipsius frugalitas et temperantiâ laudabatur, fatebatur se virum frugi videri posse, si cum multis Romanorum compararetur: *At ubi, inquit, cum Catonis vitâ comparo meam, nihil mihi videor à Siphio differre.* Erat autem ille Sippius vir nequam, et luxu perditus.

Bello adversus Spartacum voluntaria stipendia fecit Cato fratris causâ, qui tum tribunus militum erat. Cùm deinde accepisset eum Asiam petentem incidisse in morbum Æni in Thraciâ, licèt tum gravis tempestas sæviret neque ad mañum esset magna navis, solvit è portu Thesalonice exiguâ navi onerariâ cum duobus tantùm amicis et tribus servis: et penè haustus fluctibus, tandem præter spem incolumis evasit. At fratrem modò defunctum reperit. Tum verò et questibus, et lacrymis, et iis omnibus quæ dolor suadet, totum se tradidit, tam pius et lenis in suos, quàm asper et invictus adversus voluptates, minas, et iniquas postulationes. Mortui corpus quàm magnificentissimo potuit funere extulit, et conspicuum è precioso marmore tumulum ei in Æni foro extrui curavit suis impensis. Vela postea facturus, cùm suaderent amici ut Cæpionis reliquias in alio navigio poneret, animam se prius quàm illas relicturum respondit, atque ita solvit. *Plut. in Catone.*

9. Apollinis mater Eumenis regis, ac trium præterea filiorum, nempe Attali, Philetæri, et Athenæi, sæpissimè se beatam prædicabat, et Diis gratias agebat, non propter divitias atque imperium, sed quòd tres è filiis suis videret esse fratris natu maximi quasi satellites, ita ut ille *sine ullo metu* versaretur in medio ipsorum gladios et

hastas ferentium. Contra Xerxes, Oebum filium insidias fratribus struxisse cùm comperisset, mœrore est extinctus. *Plut. de Amore fratern.*

10. Si qua fortè inter fratres controversia exorta est, ea statim aut ab ipsis aut arbitrorum judicio dirimatur, imitandique sunt Pythagorei, qui non cognatione, sed doctrinæ duntaxat societate conjuncti, si quando per iram ad maledicta prorupissent, ante solis occasum dextris mutuo datis, et factâ invicem salutatione, in gratiam redibant. *Ibid.*

Frustrâ et nullius rei causâ nobis natura largita est mansuetudinem, et patientiam moderationis animi filiam: aut his utendum est maximè erga cognatos et affines. *Ibid.*

Est hominis, suos, ut jubet natura, ex animo amanti, petere gratiam delicti sui, ubi adversum eos peccavit; et ubi ipse ab iis læsus est, veniam illis ultro dare, antequam petant. Verùm nescio an nemo ad dandam veniam difficilior sit, quàm qui illam postulare sæpius meruit. *Senec. de Clem. i. c. 6.*

Celebris est in scholis fama Euclidis Socratici, quòd, auditâ iniquâ et belluinâ voce fratris, qui dixerat: *Peream, nisi te ulcissar*: respondit: *Ego verò peream, nisi tibi persuasero, ut, positâ irâ, nos ames sicut olim.* *Plut. ibid.*

CAPUT LV.

Nisi in bonis amicitia esse non potest.

Est amicitia nihil aliud nisi summa consensio rerum divinarum atque humanarum inter aliquos cum benevolentia et caritate. Quâ quidem haud scio an quicquam, exceptâ sapientiâ, melius homini sit à Diis immortalibus datum. *Cicer. de Amic. n. 20.*

Omniùm societatum nulla præstantior est, nulla firmitior, quàm cùm viri boni, moribus similes, sunt familiaritate conjuncti. Hoc enim sentio, nisi in bonis amicitiam esse non posse. Ipsa virtus amicitiam gignit et continet, nec sine virtute esse amicitia ullo pacto potest. Virtus, virtus inquam, conciliat amicitias et conservat. Homines malos aliquandò videmus eadem cupere, eadem

oluisse, eadem metuere: sed quæ inter bonos amicitia dicitur, hæc inter malos factio est. 1 *Offic.* 52. *de Amic.* n. 18. 26. 100. *Exhust. Bell. Jug.* c. 31.

CAPUT LVI.

Amicitia sublata, omnis est à vitâ sublata jucunditas.

1. Ego vos hortor, ut omicitiam omnibus humanis rebus anteponatis. Nihil quippe est tam naturæ aptum, tam conveniens ad res vel secundas vel adversas. Nam ut secundas res facit amicitia splendidiore, jucundioresque, sic adversas facit leviores. Quis esset tantus fructus in prosperis, nisi haberes, qui illis æquè ac tu ipse gauderet? Adversas verò ferre difficile esset sine eo, qui gravius etiam illas, quàm tu, ferret. *Cic. de Amic.* n. 17. 22.

Quid dulcius, quàm habere aliquem, quicum omnia audeas sic loqui, ut tecum?

Quoniam res humanæ fragiles caducæque sunt, semper aliqui acquirendi sunt quos diligamus et à quibus diligamur. Caritate enim benevolentiaque sublata, omnis est à vitâ sublata jucunditas. n. 102.

2. Una est amicitia in rebus humanis, de cujus utilitate omnes uno ore consentiunt. Divitias despiciunt ii, quos tenuis victus cultusque delectat: honores, quorum cupiditate multi inflammantur, quidam ita contemnuunt, ut nihil inanius, nihil levius esse existiment: itemque cætera, quæ aliis admirabilia videntur, alii sunt, qui pro nihilo putent. De amicitia omnes ad unum sentiunt, *sine amicitia vitam esse nullam.* Quinetiam si quis est eâ asperitate et immanitate naturæ, ut congressus hominum fugiat atque oderit, qualem fuisse Athenis Timonem nescio quem accepimus; tamen is pati non possit, ut non anquirat aliquem, apud quem evomat virus acerbitalis suæ. n. 86.

3. Timon, de quo hic Cicero, licet *μισοειρηνης*, id est, humani generis osor, appellaretur: amico utebatur uno, cui nomen Apemantus, quem ob morum similitudinem admittebat. Is tamen cum fortè apud Timonem cœnasset, exclamassetque, *Quàm dulce est, ô Timon, hoc con-*

vium! Ita sanè, inquit ille, si tu non adesses. Eidera Pemanto interroganti, cur Alcibiadem juvenem ferocem atque audacem diligere videretur, respondit Timon, ideò sibi carum esse adolescentem, quòd illum prævideret fore populo Atheniensi magnorum malorum causam.

Prodiit aliquando Athenis in concionem. Quod cùm præter consuetudinem faceret, magna omnium expectatio fuit, quidnam afferret. Tunc ille è suggestu, in quem ascenderat: *Athenienses, inquit, est mihi arca quadam in quâ crevit ficus, unde multi voluntario suspendio vitam finire. Quoniam autem in arca illâ edes exstruere mihi in animo est; antequam ficum excindam, vos monitos volo, ut, si qui de suspendio cogitant, maturent quàm maxime.* Plut. in Alcib.

CAPUT LVII.

In eligendis amicis cautio est adhibenda.

1. In amicis eligendis negligentes ne simus. *Cicer. de Amic. n. 62.*

Augustus amicitias non facillè admisit, et constantissimè retinuit. *Sunt. in Aug.*

Ne nimis citò diligere incipiamus, neve non dignos. Digni autem amicitia sunt ii, in quibus ob virtutem inest causa, cur diligantur. Rarum eorum genus; et quidem omnia præclara, rara; nec quicquam est difficilius quàm reperire quod sit omni ex parte in suo genere perfectum. Sed plerique in rebus humanis nihil bonum nôrint, nisi quod fructuosum sit: et amicos, tanquam pecudes, eos potissimùm eligunt, ex quibus sperant se maximum fructum esse capturos. Ita carent pulcherrimâ illâ et maximè naturali amicitia per se et propter se expetendâ. *Cicer. Ibid. n. 73.*

2. Nihil æquè oblectare potest animum, quàm amicitia fidelis ac dulcis. Quantum bonum est, ubi nactus es ejusmodi amicos, in quorum pectora tutò secretum omne descendat, quorum sermo sollicitudinem tuam leniat, hilaritas tristitiam dissipet, prudentia bona consilia afferat, conspectus ipse delectet?

Amicos, quantum fieri poterit, vacuos à cupiditatibus eligamus. Serpunt enim vitia, et in proximum quæram

que transiliunt, et contactu nocent. Itaque ut in pestilentia curandum est, ne assideamus corporibus jam corruptis et morbo flagrantibus, quia in afflatu ipso periculum est; ita in legendis amicis dabimus operam, ut quam minimè vitii inquinatos assumamus. Neque hoc præcipio tibi, ut neminem nisi omnino sapientem velis admittere. Ubi enim istum inuenies, quem tot seculis quaerimus? Pro optimo est minimè malus. In tantâ bonorum egestate, minimè fastidiosa fiat electio. *Senec. de Tranquil. 7.*

CAPUT LVIII.

Amicus amicum non minùs diligit, quàm seipsum.

Si quis sapiens amicitiam tueri velit, eodem modo erit affectus erga amicum, quo in seipsum; et eisdem labores ejus causâ suscipiet, quos propter se susceperit. Lætabitur amici lætitiâ æquè ac suâ, et pariter dolebit, ejus angoribus. Est enim, ut dicunt, fœdus quoddam sapientum, ut non minùs amicos quàm se ipsos diligant. Quod fieri posse intelligimus, et aliquando videmus: perspicuumque est nihil ad jucundè vivendum reperiri posse tali conjunctione aptius. *Cicer. 1. de Fin. n. 67.*

Damon et Pythias Pythagorei tam fidelem inter se amicitiam junxerant, ut mori parati essent alter pro altero. Cùm eorum alter à Dionysio tyranno necè damnatus impetrasset tempus, quo, profectus domum, res suas ordinaret: alter vadem se dare tyranno pro reditu ejus non dubitavit, ita ut, si ille, non revertisset ad diem, moriendum esset sibi ipsi. Igitur omnes, et in primis Dionysius, cupidè expectabant novæ atque ancipitis rei exitum. Appropinquante deinde definitâ die, nec illo redeunte, unusquisque stultitiæ damnabat tam temerarium sponsorem. At is nihil se de amici fide metuere prædicabat. Et verò ille ad diem dictam supervenit. Admiratus eorum fidem tyrannus, petivit ut se in amicitiam tertium reciperent, et supplicio liberavit cum qui morte erat plectendus. *Valer. l. iv. c. 7. Cicer. 3. Offic. n. 45. Diodor. l. vi.*

CAPUT LIX.

Amicitia unus fit ex pluribus.

1. Quisque eorum, in quibus eadem studia sunt, eademque voluntates, æquè altero delectatur ac se ipso : efficiturque id quod Pythagoras vult in amicitia, ut unus fiat ex pluribus. *Cic. 1 Offic. n. 56.*

Homo se ipse naturâ diligit, et alterum anquirit, cuius animum ita cum suo misceat, ut efficiat penè unum ex duobus. Estque verus amicus tanquam alter idem. *De Amic. n. 21.*

2. Alexander, victo apud Issum Dario, ad captivâ matrem conjugemque ejus præmisit quosdam è suis, qui nunciarent ipsum venire ad eas invisendas : moxque, inhibita comitantium turbâ, earum tabernaculum intravit cum Hephæstione. Is longè omnium amicorum carissimus erat regi, cum ipso pariter educatus, secretorum omnium arbiter : liberèque admonendi eum jus non alius habebat, quod tamen admodum prudenter usurpabat. Etate erat par regi : sed corporis habitu præstabat. Ergo reginæ, illum regem esse ratæ, Persarum more veneratæ sunt. Inde erroris admonita Sysigambis Darii mater, advoluta est pedibus Alexandri, ignorationem nunquam antea visi regis excusans. Quam ille manu allevans : *Non errasti*, inquit, *mater ; nam et hic Alexander est.* Utri priùs gratulemur ? Alexandro, qui hoc dicere voluit ; an Hephæstioni, cui audire contigit ? *Q. Curt. l. iii. 12. Valer. l. iv. c. 7.*

Erat Alexandro præter Hephæstionem amicus alter Craterus, diversum utrique ingenium, diversi mores. Hephæstion ad Alexandri voluntatem sese accommodans, plaudebat ei peregrina instituta æmulanti et amplectenti. Craterus, morum patriorum retinens, consuebat Alexandri gloriæ, et quæ essent maximè utilia suadebat. Alexander Hephæstionem diligebat magis : at Craterum pluris faciebat. Per illum barbaris responsa dabat : per hunc Macedonibus et Græcis. *Plutar. in Alex.*

CAPUT LX.

Amico omnia credenda.

Diu cogita an tibi in amicitiam aliquis recipiendus sit. Cùm placuit recipi, toto illum pectore admitte: tam audacter cum illo loquere, quàm tecum. Tu quidem ita vive, ut nihil dicas aut facias, nisi quod committere etiam inimico possis: sed quia quædam sunt quæ arcana dici solent, hæc cum amico communica. Fidelem si putaveris facies. *Senec. Ep. 3.*

Quidam narrant obviis quæ tantum amicis committenda sunt, et in quaslibet aures exonerant quidquid illos urit. Quidam contra etiam carissimis diffidunt, et interius premunt omne secretum. Neutrum faciendum est: utrumque enim vitium est, et omnibus credere, et nulli. Sed alterum honestius dico vitium, alterum tutius.

CAPUT LXI.

Res turpes amicum non rogemus, nec faciamus rogati.

1. Quæ videntur utilia, honores, divitiæ, voluptates, et cætera generis ejusdem, hæc nunquam amicitia anteponenda sunt. At vir bonus neque contra rempublicam, neque contra jusjurandum ad fidem quidquam faciet, amici causâ. Nam si omnia facienda sint quæ amici velint, ejusmodi amicitia conjurationes putandæ sunt. *Cicer. 3. Offic. n. 43, 44.*

Nulla est excusatio peccati, si amici causâ peccaveris. Nam æquè nefas est, malum aliquod et facere rogatum, et rogare. *De Amic. n. 39.*

Hæc prima lex in amicitia sanciat, ut neque rogemus res turpes, nec faciamus rogati: sed ab amicis honesta petamus, amicorum causâ honesta faciamus: nec expectemus quidem dum rogemur. Studium semper *adsit, cunctatio absit. n. 40. 44.*

2. Pericles ille Atheniensis, egregius vir ingenio, bonisque omnibus disciplinis ornatus, profectus est quatenus amici causâ progredi fas esse existimaret. Nam cum amicus eum rogaret, ut pro re causâque ejus falsum dederet; his ad eum verbis est usus. *Me amicis opitulari oportet, sed usque ad Deos.* A. Gell. l. i. c. 3.

Simonides poëta, fretus eâ, quæ ipsi cum Themistocle erat, familiaritate, petiit ab eo aliquid injustæ: quod negans Themistocles, dixit ei: *Neque tu, ß Simonide, bonus poëta fueris, si carmina contra poëtica artis leges condideris; neque ego bonus magistratus, si quid contra patriæ leges tua causâ fecerim.* Plut. in Them.

Cum Pub. Rutilius Rufus amici cujusdam injustæ rogationi resisteret, atque is per summam indignationem dixisset: *Quid ergo mihi opus est amicitia tuâ, si, quod rogo, non facis? Imò, respondit Rutilius, quid mihi tuâ, si propter te aliquid inhonestè facere me oporteat?* Sciebat quippe vir sanctus, tam contra officium esse tribuere amico quod non sit æquum, quàm non tribuere id quod rectè possumus: atque si fortè amici à nobis postulent quæ honesta non sunt, religionem et fidem esse amicitia anteponendam sciamus. *Val. l. vi. c. 4. Cicer. 3 Offic. n. 43.*

CAPUT LXII.

Veritas et fides in amicitia retineantur.

1. Vetus est illa lex justæ veræque amicitia. ut idem amici semper velint: neque est ullum certius amicitia vinculum, quàm consensus et societas consiliorum et voluntatum. Nam idem velle, atque idem nolle, ea demum firma amicitia est. Itaque inter amicos, quorum emendati mores fuerint, sit omnium rerum, consiliorum, voluntatum, sine ullâ exceptione, communitas. *Cicer. pro Planc. n. 5. Sallust. Cat. 20. Cicer. de Amic. n. 62.*

2. Monendi tamen amici sæpe sunt et objurgandi; et hæc accipienda amicè, cum benevolè fiunt. Adhibenda autem diligentia est, ut monitio asperitate, objurgatio contumeliâ, careat. Verum quidem est Terentianum illud: *Obsequium amicos, veritas odium parit.* At in obsequio comitas tantum adsit; assentatio victorum adju-

trix procul removeatur, quæ non modò amico, sed ne libero quidem, digna est. Aliter enim cum tyranno, aliter cum amico, vivitur. Hujus autem salus desperanda est, cujus aures veritati clausæ sunt, ita ut ab amico verum audire nequeat. Ut igitur proprium est veræ amicitia et monere et moneri : et qui monet, debet liberè facere, non asperè ; qui monetur, debet patienter ferre, non repugnanter ; sic habendum est, nullam in amicitia pestem esse majorem, quàm adulationem, blanditiam, assentationem. Scitum est illud Catonis, ut multa : *Acerbos inimicos melius de quibusdam mereri, quàm eos amicos, qui dulces videantur : illos verum sæpe dicere, hos nunquam.* Nulla porrò amicitia est, cùm alter verum audire non vult, alter ad mentiendum paratus est. n. 88. 21.

Secretò amicos admone, lauda palàm. *P. Syrus.*

3. Quemcumque potuero, peccare prohibebo, multò magis amicum. Aliquando utar verbis durioribus, si hac ratione emendari illum speravero posse. An patiemur amicos sanabiles, et qui fieri boni possunt, si quid illos momorderit, perire, sublatà admonitione, quâ et pater filium aliquando correxit, et uxor maritum aberrantem ad se reduxit ? *Senec. 5. Benef. c. 22.*

Qui non vetat peccare, cùm possit, jubet.

Amici vitia si feras, facis tua.

Bis peccas, cùm peccanti obsequium accommodas.

Bonus animus nunquam erranti obsequium accommodat. *Senec. Troas, ver. 289. P. Syrus.*

Consilium verum dare gaudeamus liberè. Plurimum in amicitia valet amicorum bene suadentium auctoritas : eaque adhibeatur ad monendum non modò apertè, sed etiam acriter, si res postulabit : et adhibitæ pareatur. *Cicer. de Amic. n. 44.*

Cum Mæcenas Augusto Cæsari perquam familiaris esset, et magnâ apud eum gratiâ valeret ; eo animo fuit, ut prodesset quibus posset, noceret verò nemini. Amicorum suorum nonnullos ad magistratus et imperia curavit promoveri, in equestri ordine ipse permanens. Mira quoque ejus et ars et libertas fuit in Augusti animo flectendo ad mitiora, cum irâ incitatus esset. Exemplum hoc unum erit instar omnium. Jus aliquando dicebât Augustus, et multos morte damnaturus videbatur. Aderat tum Mæcenas, qui per circumstantium turbam perrumpere et ad tribunal propiùs accedere conatus est. Quod

cùm frustrà tentasset; hæc verba in tabellâ scripsit; *Surge tandem, carnifex.* Eamque tabellam ad Augustum projecit. Quâ lectâ, is statim surrexit, et nemo est morte multatus. *Dio. l. iv.*

4. In Socrate iræ signum erat, vocem submittere, loqui parcius. Deprehendebatur itaque à familiaribus et coarguebatur. Nec erat illi exprobratio latitantis iræ ingrata. Sic iram ejus multi intelligebant, nemo sentiebat. Sensissent autem, nisi amicis objurgandi se jus idem dedisset, quod ipse sibi in amicos sumpserat. Quantò magis hoc nobis faciendum est! Rogemus ergo amicissimum quemque, ut adversus nos libertate utatur tunc maximè, cum minimè pati illum videbimur posse, nec assentiatur iræ nostræ aut cupiditati. Optimum est prospicere impedimenta notis vitiis. *Senec. 3 de Irâ, c. 13, 14.*

5. Admoneri bonus gaudet: pessimus quisque correptorem asperrimè patitur. *Senec. 3 de Irâ, n. 37.*

Xenocratem Chalcedonium Plato, magister et amicus, rusticitatis arguebat, eique sæpius dicebat: *Xenocrates, Gratiis sacra facito.* Quam reprehensionem admonitionemque ille semper æquo et grato animo accepit: et aliquando cuidam ipsum incitanti ad repellendam Platonis objurgationem, sapienter prorsus respondit: *At illud mihi utile est.* *Ælian. l. xiv. c. 19. Diog. Laërt. in Xenoc.*

CAPUT LXIII.

Omnia possidentibus sæpe amicus deest.

1. Neminem tam altè supra cæteros fortuna extulit, ut non illi aliquid desit. Si cætera adsint, abest plerumque res omnium præstantissima, amicus, qui verum dicat, et ab errore vindicet hominem deceptum consuetudine audiendi blanda pro rectis. Regibus ac potentibus viris vix quisquam ex animi sui sententiâ suadet dissuadetque: sed adulandi certamen est, et una contentio, quis blandissimè fallat. Ignorant itaque vires suas, et se tam magnos rati, quam audiunt, iræ obsequuntur, quam nemo revocat; bella temerè suscipiunt, et in summum rerum omnium suarum discrimen veniunt. *Senec. 6 Benef. 29. 31.*

2. Quum bellum Græcis indiceret Xerxes, nemo non impulit animum ejus tumentem, oblitumque quam caduca essent ea quibus confideret. Alius aiebat Græcos non laturos nuncium belli, et ad primam adventantis exercitûs famam terga versuros. Alius, nihil dubii esse, quin Græcia non vinci solùm, sed etiam obrui posset illâ, quam secum trahebat, innumerabili militum multitudine. Cùm in hunc modum multa jactarentur, quæ concitarent regem nimiâ æstimatione sui furentem; Demaratus Lacedæmonius solus dixit: *Ipsam illam, quâ placeret sibi, militum turbam indigestam et gravem, non facile regi posse: et periculum esse, ne fauci Lacones, obstruentes corporibus suis commissas sibi Græciæ angustias atque aditus, morarentur tot illa gentium millia.* Accidêrunt quæ Demaratus prædixerat. Victus Xerxes, et regnum suum rapidâ fugâ repetere coactus, Demarato gratias egit, *quod solus sibi dixisset verum.*

3. Antiochus, quum in venatione, feram persequendi studio, ab amicis et servis aberrasset, in casam pauperum hominum intravit ignotus. Cum iis cœnans sermonem de rege injecit, ut sciret quæ esset hospitem de se opinio; audivitque: *Regem in cæteris quidem bonum et laude dignum esse; sed amicis utentem malis, plurima negligere, et sæpe quæ necessaria essent nihil curare: quod venationi plus æquo indulgeret.* Tacuit tum quidem Antiochus. Sed postquam orto sole ad casam illam venere regii satellites, et purpuream vestem cum diademate attulere; converso sermone ad regia illa insignia. *Certè, inquit, ex quo die vos sumpsi, heri primam veros de me sermones audivi.* Plut. Apoph.

4. Perfectus haud dubiè princeps enituisset Valentinianus, si ei contigisset, aut carere infidis hominibus, quibus sese quasi fidissimis prudentissimisque dederat, aut uti probatis eruditisque monitoribus. *Aur. Vict. Ep. c. 69.*

CAPUT LXIV.

Veros amicos reparare difficile est.

1. Cùm Augustus¹ audivisset tandem Juliæ filiz suæ *flagitia*, quæ tamdiu nescierat, parum potens iræ, ista pa-

tefecerat, eam relegando. Deinde ubi, interposito tempore, in locum iræ subiit verecundia; gemens quòd non illa silentio pressisset (quia quarumdam rerum turpitudine aliquando etiam ad eum redit qui eas vindicat) sæpe exclamavit: *Horum mihi nihil accidisset, si aut Agrippa aut Mæcenas vixisset.* Intelligebat scilicet quàm utile sit regi aut principi viro fidum amicum habere, quàm damnosum carere. Imperante Augusto, cæsæ sunt legiones Romanæ, et aliæ protinus scriptæ, Fracta classis; et intra paucos dies natavit nova. Sæviturum est in opera publica ignibus; surrexerunt meliora consumptis. Totâ reliquâ Augusti vitâ Agrippæ et Mæcenas vacavit locus. Adeò imperatori, tot millia hominum habenti, duos reparare difficile fuit. *Senec. 6 Benef. c. 32.*

Amicum perdere est damnorum maximum.

P. Syrus.

2. Cùm Darius Xerxis pater malum granatum aperuisset, et quidam ab eo sciscitaretur, quarum rerum tantum numerum habere optaret, quantus illic inesset granorum numerus? respondit: *Zopyrorum.* Fuerat enim Zopyrus Dario amicissimus, sicque illi deditus, ut ultro se verberibus toto corpore lacerari, nasum, aures, et labia sibi præcidi voluerit, ad revocandam in ejus potestatem Babyloniam. *Plutar. Aphoh. Justin. l. i. c. 10.*

CAPUT LXV.

Amici thesauri regum sunt.

1. Non exercitus, neque thesauri, præsidia regni sunt: verùm amici, quos neque armis cogere, neque auro parate queas; officio et fide pariuntur. Interrogatus Alexander ubi thesauros haberet: *Apud amicos,* respondit. Idem cùm ad Achillis tumulum venisset, *felicem eum sibi videri, dixit, quòd dum viveret, fidum amicum (Patroclum) nactus esset, et post fata magnum præconem (Homerum).* *Sallust. Jug. c. 10. Amm. l. xxv. Plut. in Alc.*

Cùm plurimis amicitis fortuna principum indigeat, præcipuum est principis opus amicos parare. *Plinii. Paneg. Traj.*

Nullum majus boni imperii instrumentum est, quàm boni amici. *Tacit. Hist. iv. c. 7.*

2. Cùm à Pisistrato, qui principatum Athenis invaserat, amici quidam descivissent, atque in arcem Phylam secessissent; accessit ad eos, vestem stragulam colligatam ferens secum, ac mirantibus illis quærentibusque quid vellet? *Aut, inquit, persuadere ut mecum redeatis; aut si minus persuasero, manere vobiscum: ideoque instructus veni.* *Plut. Apoph.*

3. Trajanum imperatorem laudat Plinius, quòd et amicos diligit, et ipse diligatur. In animis hominum exoleverat priscum mortalium bonum, amicitia: cujus in locum migraverant assentationes, blanditiæ, et peior odio, amoris simulatio. In principum domo nomen tantùm amicitia inane manebat. Nam quæ poterat esse inter eos amicitia, quorum alii sibi domini, alii servi, videbantur? Tu hanc pulsam et errantem reduxisti. Habes amicos, quia amicus ipse es. Neque enim amor, ut alia, subjectis imperatur: neque est ullus affectus tam erectus et liber et dominationis impatiens, nec qui magis vices exigat. Diligis ergo, et diligeris: atque in eo tota gloria tua est, qui superior factus, descendis in omnia familiaritatis officia, et in amicum ex imperatore submitteris: inò tunc maximè imperator es, cùm amicum ex imperatore agis. Jucundissimum est in rebus humanis amari, sed non minùs amare. Quorum utroque ita frueris, ut cùm ipse ardentissime diligas, ardentius tamen diligaris. *Plinii. Paneg. Traj.*

CAPUT LXVI.

Amicus certus in re incertâ cernitur. *Ennius.*

1. Ipsæ amicos res optimæ pariunt, adversæ probant. *P. Syrus.*

Poscunt fidem secunda, at adversa exigunt.

Senec. Agam ver. 934.

Cùm Catoni Uticensi obvenisset morte patruelis sui *Catonis hæreditas centum talentorum, omnia in pecuniam*

redegit, quam amicis, uti cuiquam opus erat, commodabat. Quinetiam et prædia sua et servitia eorum causâ aliquando oppignerabat. *Plut. in Cat.*

Sincera fidei amici præcipuè in rebus adversis cognoscuntur: quidquid enim tunc præstatur, totum à constanti benevolentia proficiscitur. At qui fortunatum amicum colit, ille magis causâ suâ adulari, quàm verè diligere, potest videri. Libentiùs igitur et diutiùs servavit posteritas nomina eorum, qui amicos in adversis casibus non deseruerunt, quàm illorum, qui amicos opibus florentes coluerunt. Nemo de Sardanapali familiaribus loquitur: Orestes penè notior est propter Pyladem amicum, quàm propter Agamemnonem patrem. Illorum amicitia, si qua tamen fuit, in deliciis et luxuriâ turpiter extincta est: horum verò enituit communi calamitate, et immortalē apud posteros famam est adeptā. Quid enim celebratum magis, quàm illa Pyladis atque Orestis coram rege Thoante plena amoris contentio, uter moretur? Dum alter nititur ab altero depellere crimen et criminis pœnam, atque in se transferre: dum, ignorante rege uter eorum sit Orestes, Pylades Orestem se esse dicit, ut pro illo necetur; Orestes autem, ita ut est, Orestem se esse asseverat. Quiclamores Romæ totâ cavêâ excitati sunt in M. Pacuvij de Oreste et Pylade fabulâ? Spectantes plaudebant in re fictâ: quid arbitramur in verâ fuisse facturos? Facile indicabat ipsa natura vim suam, cùm homines, id quod facere ipsi non possent, rectè fieri in altero judicarent. *Valer. l. iv. c. 7. Cicer. de Amic. n. 24. 5. de Fin. n. 63.*

2- Mutinâ fugiens D. Brutus, ut cognovit missos ab Antonio equites ad se interficiendum advenisse, in loco quodam cum paucis suorum delituit, morti se subtracturus. Eò factâ ab equitibus irruptione, Servius Terentius fidei mendacio Brutum se esse simulavit, obscuritate ipsâ loci suffragante, et corpus suum objecit trucidandum. Verùm cognitus à Furio, cui Brutiana cædes mandata fuerat, non potuit nece suâ amici supplicium avertere: sic invitus, fortunâ cogente, vixit. Incepto egregio, non autem irritō eventu, æstimari debet Servij Terentij fides in amicum. Quanquam enim ei, sicut cupierat, pro amico suo perire non contigit; ipse extinctus est, quantum in illo fuit, et D. Brutus periculum mortis evasit. *Valer. l. iv. c. 7.*

3. Laudatur alterius Romani in amicum extinctum constans caritas. T. Volumnius, equestri loco natus, M. Lucullum familiariter coluerat. Eum à M. Antonio interemptum cum vidisset, et liceret fugâ vitæ consulere; exanimi amico adhæsit, sic in lacrymas et gemitus profusus ut nimiam pietate causam sibi mortis accerseret. Namque propter præcipuam et perseverantem lamentationem ad Antonium pertractus est. Cujus postquam in conspectu stetit: *Jube me, inquit, protinus ad Luculli corpus perducere et occidi. Neque enim absumpto illo superesse debeo, cum ei infelicis adversum te militiæ auctor fuerim.* Facile impetravit ab Antonio: ductusque quò voluerat, Luculli dextram avidè osculatus est, caputque ejus, quod abscissum jacebat, pectori suo applicuit; ac deinde cervicem suam interfectoris gladio præbuit. *Valer. ibid.*

CAPUT LXVII.

Vulgare amici nomen, sed rara est fides.

Phædr.

Quum parvas ædes sibi fundasset Socrates,
E populo sic nescio quis, ut fieri solet;
Quæso, tam augustam talis vir fionis domum?
Utinam, inquit, veris hanc amicis impleam!

Phædr. l. iii. f. 9.

Amicus res rara, quæ non alibi magis deest, quàm ubi creditur abundare. Non sunt isti amici, qui agmine magno pulsant januam regum, aut reges simulantium. Atria hominibus plena sunt, amicis vacua. *Senec. 5 Benef. c. 33, 34.*

Illud amicitiae sanctum ac venerabile nomen

Re jam pro vili sub pedibusque jacet.

Ovid. 1 Trist. Eleg. vii.

Turpe quidem dictu, sed, si modò vera fatemur,
Vulgus amicitias utilitate probat.

2 De Pont. Eleg. iii.

Cura quid expediat prior est, quàm quid sit honestum:

Et cum fortunâ statque caditque fides.

Cùm fortuna manet, vultum servatis, amici:

Cùm cecidit, turpi vertitis ora fugâ. *Petron.*

Donec eris felix, multos numerabis amicos :
Tempora si fuerint nubila, solus eris.

Ovid. 1 Trist. Eleg. viii.

Hirundines æstivo tempore præstò sunt, frigore pulsæ recedunt. Ita falsi amici sereno vitæ tempore præstò sunt : simul atque adversam fortunam viderint, omnes avolant. *Auctor. ad Heren. l. iv, n. 62.*

CAPUT LXVIII.

Nihil est naturæ hominis accommodatius beneficentiâ.

1. Justitiæ pars est beneficentia, quam eandem vel benignitatem vel liberalitatem appellare licet. Eâ nihil est naturæ hominis accommodatius, et in hominum genere nulla melior est natura, quàm eorum, qui se natos ad homines juvandos, tutandos, conservandos arbitrantur. *Cicero 1. Offic. n. 20. n. 42. 1 Tusc. n. 32.*

Gratissima est liberalitas : eamque eò studiosiùs plerique laudant, quòd potentium ac divitum hominum bonitas commune perfugium est omnium. Itaque nihil est tam populare quàm bonitas. *2 Offic. n. 63. Pro Ligur. n. 37.*

2. Cimon Atheniensis et pietate in patrem, et in cives benevolentiam insignis fuit. Cùm nihil haberet quod dare, præter seipsum, posset, ad redimendum sepulturæ jus parenti suo Miltiadi, qui in carcerem conjectus ibique mortuus fuerat ; ejus vincula in se transtulit. Aliquot post annos è eustodiâ emissus, magnâ juris civilis et rei militaris prudentiam celeriter ad principatum pervenit. In quo tantâ fuit liberalitate, ut, quum pluribus locis hortos prædiaque haberet, nunquam in eis custodem imposuerit fructûs servandi gratiâ : ne quis impediretur quò minus rebus ejus frueretur. Semper eum pedissequi cum nummis sunt secuti, ut, si quis opis ejus indigeret, haberet quod statim daret, ne differendo videretur negare. Sæpe, cùm aliquem videret minus bene vestitum, suum amiculum dedit. Nulli opera ejus, nulli res familiaris defuit. Multos locupletavit. Complures pauperes mortuos, qui

non reliquerant unde efferrentur, suo sumptu extulit. Minimè itaque mirandum est vitam ejus, qui se sic ges-
sit, ab insidiis tutam fuisse, et mortem civibus acerbam.
C. Nepos et Plut. in Cimon. Justin. l. ii. c. 15.

3. Pisistratus summâ æquitate gessit Athenis princi-
patum, quem iniquè invaserat: et, præter dominandi
studium, nullus eo melior civis fuit. Si quos otiosos cer-
neret in foro obambulantes, ad se vocatos interrogabat,
cur sic otiosi essent? Si verò illi se aut frumenta aut ju-
menta non habere respondissent: jubebat, his à se accep-
tis, abire et laborare. Quando in publicum prodibat,
comitabantur eum pueri duo tresve, qui minutos nummos
ferrent erogandos egenis, maximè in mortuorum sepul-
turam. Præterea liberum in hortos ac prædia sua introi-
tum omnibus permittebat, et ea capiendi, quibus opus
esset, facultatem. . *Plut. in Solon. Ælian. l. ix. c. 25.*
Eustath. in Iliad. 24. Athen. l. xii.

4. Gillias Agrigentinus, vir opibus excelens, sed
animo, quàm divitiis, locupletior, semper in erogandâ
potius, quàm in contrahendâ pecuniâ fuit occupatus: adeo
ut domus ejus quasi quædam munificentix officina crederet-
tur. Illinc enim apta publicis usibus ædificia extruebantur,
illinc gratâ populi oculis spectacula edebantur, illinc
deficienti annonæ subsidia oriebantur: privatim verò ali-
menta inopiâ laborantibus, dotes virginibus paupertate
pressis erogabantur; hospites quoque tum urbanis tum
rusticis tectis benignissimè excepti, variis muneribus
ornati dimittebantur. Quodam verò tempore compulsos
vi tempestatis in prædia sua quingentos equites Galensium
aluit ac vestivit. Quid multa? Eum propemodum ipsius
liberalitatis præcordia habuisse constat. Ergo quod
Gillias possidebat, omnium quasi commune patrimonium
erat. Colloca ex contrariâ parte arcas clausas seris, ad
nullas preces et miseras aperiendas; nonne longè præ-
stantiorem existimabis nobilem illam Gilliæ impensam,
quàm tristem et duram hanc custodiam? *Valer. l. iv. c. 8.*

5. Multitudinis benevolentia beneficiis capitur ma-
ximè: secundo autem loco beneficâ voluntate, etiamsi
res fortè non suppetit. Ipsa quippe fama et opinio libe-
ralitatis, beneficentix, justitix, fidei, nos eis amicos facit,
in quibus illas inesse remur. Hinc Titus, quia naturâ
erat benevolentissimus, *amor ac delicia generis humani ap-
pellatus est.* Hoc illi propositum et solenne fuit, ne quem

accidentium ad se sine spe dimitteret. Admonentibus verò amicis quasi plura polliceretur, quàm præstare posset: *Non oportere*, ait, *quenquam à sermone principis tristem discedere*. Atque etiam recordatus quondam super cœnam, quod nihil cuiquam toto die præstitisset, memorabilem illam meritòque laudatam vocem edidit: *Amici, diem perdidisti*. Quædam sub eo fortuita ac tristia accidèrunt, ut incendium Romæ per triduum, et pestilentia quanta rarò alias. In his ac talibus adversis non modò principis sollicitudinem, sed et parentis affectum singularem præstitit, nunc consolando, nunc opitulando, quatenus suppetere facultas. Extincto tam benigno imperatore, majore civium damno, quàm suo omnes tanquam in propriâ orbitate doluerunt, et senatus tantas mortuo gratias egit, laudesque congegit, quantas ne vivo quidem unquam et præsentis. *Cicer. 2 Offic. n. 32. Sueton. in Tito, c. 8. 10. 11. Eutrop. l. vii.*

Alexander Severus memoriâ complectebatur et descriptum habebat quid cuique præstitisset. Et, si quos sciret vel nihil petisse, vel non multum, vocabat eos, et dicebat singulis: *Quid est cur nihil petis? An me tibi vis fieri debitorem!* Lamprid. in Alex. Sever. n. 46.

His et horum similibus exemplis beneficentia generis humani nutritur atque augetur: Hæ sunt ejus faces, hi stimuli. *Valer. l. v. c. 2.*

5. Versabatur in regiâ Ptolemæi regis adolescens nomine Galetes, facie quidem pulcherrimus, at morum suavitate et animi in omnes benignitate magis insignis: ita ut rex, cui erat carissimus, sæpe exclamaret: *O benignum caput! nulli tu unquam ullius mali causa fuisti; sed contra multis multa bona præstitisti*. Cùm aliquando hic adolescens, regi comes in equo sedens, vidisset procul aliquos ad supplicium trahi; oblatam bene faciendi occasionem non prætermisit; sed statim: *O rex, inquit, quandoquidem prosperâ quâdam horumce hominum, qui morti damnati sunt, fortunâ, equis nunc vehimur; age, si tibi videtur, cursum intendamus, ut illis in tali, temporis articulo quasi Servatores Dii appareamus*. Plurimum voluptatis ex Galetis consilio cepit rex, et animum ejus ad misericordiam propensum deamans, cum morti addictos servavit, tum amori in illum suo multum addidit. *Ælian. l. 1. c. 30.*

CAPUT LXIX.

Multas cautiones habeat beneficentia.

1. In exercendâ beneficentiâ multæ sunt cautiones adhibendæ. Videndum est primùm ne obsit benignitas et iis ipsis quibus prodesse volumus, et cæteris. Deinde ne major sit, quàm facultates. Denique ut cuique pro dignitate tribuatur. Nam ad justitiam referenda sunt omnia, et nihil est liberale, nisi quod idem sit justum. Utamur igitur eâ liberalitate quæ prosit amicis, noceat nemini: quæ fontem ipsum benignitatis non exhauriat: quæ delectum faciat eorum, in quos beneficium conferetur. Verùm multi beneficia conferunt sine iudicio vel modo, in omnes, impetu animi, repentino quasi vento incitati. Quæ beneficia æquè magna non sunt habenda, atque ea, quæ iudicio consideratèque delata sunt. *Cicer. 1 Offic. n. 42. Sc. n. 49.*

2. Si vir bonus divitias habeat sine cujusquam injuriâ partas; nec sordidè custodiet, nec prodigè sparget: partim ipse utetur, partim donabit. Donabit autem aut bonis, aut iis quos facere poterit bonos. Donabit cum summo consilio, dignissimos eligens: nam inter turpes jacturas inconsultum munus ponitur. Errat, si quis existimat facilem rem esse donare. Plurimum habet hæc res difficultatis, si modò consilio tribuitur, non casu spargitur. Aliis succurram, dignis quos non premat paupertas. Aliis non dabo, quamvis desit: quia etiamsi dederò, est defuturum. Quibusdam offeram, quibusdam etiam inculcabo. Quid refert, servi liberine sint qui indigeant? Ubicumque homo est, ibi beneficio locus est. Pauperi viro bono donabo. Non lucrum ex beneficio captabo, non voluptatem, non gloriam. Ideò dabo, ut quod oportet faciam. Licet fortuna ei, qui à me beneficium accepit, nihil tribuat quo referre mihi gratiam possit, ex sententiâ meâ res gesta est. *Senec. de beat. Vit. c. 20. 23, 24. 4 Benef. c. 10. 11.*

In deligendis idoneis in quos beneficia conferamus, iudicium et diligentiam adhibere debemus. Nam præclarè Ennius: *Benefacta malè locata, malefacta arbitror.* *Cicer. 2 Offic. n. 63.*

Beneficium dignis ubi des, omnes obligas.

P. Syrus.

3. Laudas mihi et præsens et per epistolas Nonium tuum, quòd sit liberalis in quosdam. Et ipse laudo, si tamen non in nos solos. Volo enim eum qui sit verè liberalis, tribuere patriæ, propinquis, affinibus, amicis: sed amicis dico pauperibus. Quod non isti faciunt, qui iis potissimum donant, qui donare maximè possunt. Hos ego non sua donare puto, sed viscatis hamatisque muneribus aliena corripere. Alii sunt, qui, quod huic donant, auferunt illi, famamque liberalitatis avaritiâ petunt. Primum autem hominis officium est suo esse contentum: deinde quos præcipuè sciat indigere, sustentare ac fovere. *Plinius, l. ix. Ep. 30.*

CAPUT LXX.

Beneficia alia alios decent.

1. Urbem cuidam Alexander donabat. Cùm ille, cui donabatur, se ipsum mensus, tantum munus recusaret, diceretque non convenire fortunæ suæ: *Non quero, inquit, quid te accipere deceat, sed quid me dare.* Senec. 2 Benef. c. 16.

2. Ab Antigono Cynicus quidam petiit talentum. Respondit, *plus esse quàm quod Cynicus petere deberet.* Repulsus, petiit denarium. Respondit rex, *minus esse quàm quod regem deceret dare.* Turpissima est ejusmodi cavillatio. Invenit Antigonus quomodo neutrum daret. n. 17.

3. Alexandro Orientis victori Corinthii per legatos gratulati sunt, ut civitate illum suâ donarent. Cùm risset Alexander hoc munus: unus ex legatis: *Nulli, inquit, civitatem unquam dedimus alii, quàm Herculi.* Tum verò Alexander lubens accepit honorem non vulgatum: neque tam eos respexit, qui sibi civitatem donarent, quàm illum, cui uni, antequam sibi, dedissent. 1 Benef. c. 13.

CAPUT LXXI.

Beneficia quædam palam danda, quædam clam.

1. Præcipiunt omnes sapientiæ magistri, quædam beneficia palam danda esse, quædam secretò: palam, quæ consequi gloriosum est, ut militaria dona, honores, et quidquid notitiâ pulchrius fit: contra quæ succurrunt infirmitati, egestati, ignominia, tacitè danda sunt, ut nota sint solis quibus prosunt. Interdum et ipse, qui juvatur, fallendus est; ut habeat, nec à quo acceperat, sciat. *Senec. 2 Benef. n. 9. 11.*

Arcesilaüs, ut aiunt, Ctesibio amico ægro, pauperi, et paupertatem suam dissimulanti, cum clam succurrendum esse judicasset; pulvino ejus ignorantis sacculum nummis plenum subjecit, ut homo inutiliter verecundus id, quo carebat, inveniret potius quàm acciperet. Invento sacculo Ctesibius: *Hic*, inquit, *Arcesilai ludus est.* Diog. Laërt. in Arcesil.

2. Nihil æquè in beneficio dando vitandum est, quàm superbia, quæ quidquid dat corrumpit. Non tantum ingratum, sed invisum est, beneficium superbè datum. Jucunda sunt quæ humanâ, leni, placidâque fronte tribuntur: quæ cum daret mihi superior, detraxit muneris suo pompam, et observavit idoneum tempus succurrendi, se uno teste contentus. Alioquin non benefacere delectat, sed videri benefecisse: *Ibid.*

Idem Arcesilaüs, de quo supra, cum viro probò pauperi opitulari vellet, ei vasa aurea ad amicos convivio excipiendos commodavit de industriâ: quæ cum ille redderet, recipere noluit. *Ibid.*

3. Aliquando viro bonò non petenti dandum est, quod improbo postulanti negaveris. Archelaüs Macedonum rex, in cænâ aureum poculum poscente quodam, cui nihil pulchrum videbatur, nisi accipere: puerum id Euripidi dare jussit: et in alterum illum intuens: *Tu quidem*, inquit, *dignus eras qui heteres nec acciperes; at hic dignus erat qui acciperet vel non petens.* Plut. de vitios. Pudor.

Attende cur negare cupidis debeas :
 Modestis etiam offerre quod non petferint.
 Super juvenicum stabat dejectum leo.
 Prædator intervenit, partem postulans.
Darem, inquit, nisi voleres per te sumere :
 Et improbum rejecit. Fortè innoxius
 Viator est deductus in eundem locum,
 Feroque viso rettulit retro pedem.
 Cui placidus ille : *Non est, quod timeas, ait,*
Et quæ debetur fars tua modestia,
Audacter tolle. Tunc diviso tergo,
 Silvas petivit, homini ut accessum daret :
 Exemplum egregium prorsus, et laudabile.
 Verùm est aviditas dives, et pauper pudor.
Phædr. l. ii. f. 1.

CAPUT LXXII.

Tardè benefacere nolle est.

Omnis benignitas properat, et proprium est libenter
 facientis, citò facere. Qui tardè profecit, non ex animo
 fecit. Tardè velle, nolentis est. *Senec. 2. Benef. c. 5.*

Bis est gratum, quod opus est, ultro si offeras. *P.
 Syrus.*

Sex sestertia si statim dedisses,
 Cùm dixi mihi: Sume, tolle, dono:
 Deberem tibi, Pæte, pro ducentis.
 At nunc cùm dederis diu moratus,
 Post septem, puto, vel novem Kalendas:
 Vis dicam tibi veriora, veris;
 Sex sestertia, Pæte, perdidisti.

Martial. l. iv. Ep. 30.

Inopi beneficium bis dat, qui dat celeriter. *P. Syrus.*

CAPUT LXXIII.

Quas dederis, solas semper habebis, opes.

1. Cùm M. Antonius fortunam suam aliò translatam
 videret, et sibi nihil relictum, egrgè mihi videtur exiit.

mâsse : *Hoc habeo quodcunque dedi.* Hæ enim sunt divitiæ certæ, in quâcunque sortis humanæ levitate permansuræ, et quæ, quò majores fuerint, hõc minorem habebunt invidiæ. Quid tanquam tuo parcis? Procurator es. Omnia ista quæ te tam tumidum faciunt, quæ ferreis claustris custodis, propter quæ omnia affinitatis, et amicitiaæ fœdera rumpis, non sunt tua. Depositi loco sunt, jamjamque ad alium dominum spectantia. Quæris quomodo illa tu facias? Dando. Hac ratione certam tibi et inèxpugnabilem eorum possessionem parabis. *Senec. 6. Benef. 3.*

2. Callidus effractâ nummos fur auferet arcâ :

Prosternet patrios impia flamma lares.

Debitor usuram pariter sortemque negabit :

Non reddet sterilis semina jacta seges.

Depascentur oves diri contagia morbi :

Mercibus extractas obruet unda rates.

Extra fortunam est quidquid donatur amicis.

Quas dederis, solas semper habebis, opes.

Marzial. l. v. Ep. 45.

CAPUT LXXIV.

Non quid detur referet, sed quâ mente.

1. Beneficium non in eo, quid fit aut datur, consistit; sed in ipso facientis aut dantis animo. Animus est enim, qui beneficiis dat pretium. Itaque nonnunquam magis non obligat qui dedit parva magnificè, et exiguum tribuit, sed libenter. Socrati cùm multa multi, pro suis quisque facultatibus, offerrent; Æschines pauper auditor: *Nihil, inquit, dignum te, quod dare tibi possim, invenio: et hõc tantùm me fuisse esse sentio. Itaque dono tibi quod unum habeo, me ipsum. Hoc munus, rogo, qualecunque est, non dedigneris; cogitesque alios, cùm multùm tibi dederint, filius sibi reliquisse.* Cui Socrates: *Istud quidem, inquit, magnum mihi munus videtur; nisi fortè parvi te astimas. Habebo itaque curæ, ut te meliorem tibi reddam, quàm accipio.* Vicit Æschines hoc munere omnem juvenum opulentorum munificentiam. *Senec. 1 Benef. c. 6, 7, 8.*

2. Regi Persarum intra regni sui fines iter facienti *munera ab omnibus Persis offerri mos et lex erat.* Qui in

terrâ colendâ operam pōnebant, alii boves aut oves, alii frumentum aut vinum dabant: qui verò pauperiores, lac, caseum, palmas, aliosque arborum fructus, qui in cuiusque agro nascerentur. Quæ omnia, non tributî, sed doni nomine, à singulis afferebantur regi prætereunti ac præterequenti. Cùm Persa quidam, cui nomen Sinætas, procul à tugurio suo in Artaxerxem, qui Mnemon cognominabatur, incidisset, ac nihil præ manibus haberet, quod regi posset offerre; noluit tamen eum à se indonatum videri. Itaque ad proximè præterfluentem fluvium cursu contendit, et aquam utrâque manu haustam regi obtulit, munus exornans, quantum potuit, faustis bonisque verbis. Et dono et dantis animo atque oratione mirè delectatus Artaxerxes, neque minùs regium esse existimans parva grato animo accipere, quàm magna tribuere, dixit: *Se aquam illam libenter accipere, et fretiosissimi muneris loco habere.* Deinde homini misit non parvam pecuniæ summam cum veste Persicâ, et phialâ aureâ, quâ iussit eum deinceps haustam è fluvio aquam bibere. *Ælian. l. i. c. 31, 32. Plutarch. in Artax. Plin. ad Traj.*

3. Eidem Artaxerxi per Persidem equitanti ingens malum Punicum à quodam Omaso oblatum ferunt. Quod ille benignè comiterque accipiens, purpuratis comitibus dixit: *Qui curâ et labore agellum suum talium pomorum feracem effecit, nâ ille parvam civitatem sibi creditam poterit ex parvâ magnam reddere.* Et hominem ingenti præmio est remuneratus. *Ælian. l. i. c. 33. Plut. in Artax. et Apophh.*

Fuit hic Artaxerxes regni sub initio aditu facilis, in largiendis honoribus et beneficiis effusus. Omnem supplicii detrahebat contumeliam, læto hilarique animo beneficia et accipiebat et dabat. Nullum donum erat ad eò exiguum, quod non libentissimè acciperet: et majorem in dando beneficio voluptatem percipere videbatur quàm alii in accipiendo solent. *Plut. in Artax.*

CAPUT LXXV.

Sint gratuita Deorum exemplo beneficia.

1. Beneficium per se expetendum est, et una in eo spectanda accipientis utilitas, sepositis commodis nostris. Si enim ipse tacitus dicas : *Hoc dabo, hoc recipiam* ; sortida negotiatio est. Qui beneficium, ut reciperet, dedit, non dedit. Humile est prodesse, quia expedit. *Senec. 4. Benef. c. 3, 14.*

Si utilitas et turpis computatio me liberalem faciat ; si nulli prosum, nisi ut invicem ille mihi prosit ; non dabo beneficium proficiscenti in adversas longinquasque regiones ; non dabo abfuturo semper : non dabo sic ægro-tanti, ut spes ei nulla sit convalescendi. Atque ut scias rem esse per se expetendam benefacere, adventæ in nostrum modò delato portum, et statim abituro, succurrimus. Discedit ille, vix satis notæ salutis auctore, et nunquam ampliùs in conspectum nostrum reversurus ; debi-tores nobis delegat Deos, precaturque ut illi pro se gra-tiam referant. Interim nos juvat sterilis beneficii con-scientia. c. 11.

2. Magna fuit apud veteres Græcos ac Romanos cura et reverentia hospitalitatis, eique Jovem, Deorum atque hominum parentem, quasi præsidem præferant, Jovem Hospitalem eum appellantes et invocantes. Peregrinos et pauperes hospitio non excipere nefas esse existimabant, cum sub tutelâ Jovis essent et ab eo mitterentur. Imò Dii ipsi putabantur aliquando sub peregrinorum habitu terras lustrare, et ad mortalium tecta accedere, explorandæ eorum humanitatis causâ. Hinc omnibus hospitio indigentibus ultro offerebantur privatim aut publicè quæ opus essent. Lucanorum hæc lex fuit : si occidente jam sole venerit peregrinus, volueritque sub tectum alicujus civis divertere, is verò hominem non receperit ; qui hospitium præbere recusaverit, pœnas luat inhospitalitatis, et injuriæ tum peregrino, cum Jovi Hospitali factæ. Nulla gens, Tacito teste, magis indulgebat hospitibus, quàm Germanica. Notum ignotumque, quan-tum ad jus hospitij, nemo discernebat, et quemcunque

mortalium arcere recto nefas habebatur. Pro fortunâ quisque advenam apparatus epulis excipiebat. Cùm illæ defecerant, advena et ejus hospes proximam domum non invitati adibant, ubi uterque pari humanitate excipiebatur. *Homer. Virgil. Hesiod. Ovid. Met. lib. i. et viii. Ælian. l. iv. c. 1. Tacitus de Germ. c. 21.*

3. Propositum nobis esse debet Deorum exemplum sequi. Vide quanta illi quotidie nostri causâ faciant, quanta distribuunt, quantis imbribus repenti dejectis solum molliant, quantis terras fructibus impleant. Omnia hæc sine mercede, sine ullo ab ipsos proveniente commodo faciunt. Nisi fortè existimes illos fructum operum suorum percipere ex fumo extorum et odore Auris. Hæc quoque homo, si ab exemplari suo aberrare nolit, servet; nec ad res honestas privato commodo ductus veniat. Pudeat ullum esse venale beneficium, cùm gratuitos habeamus Deos. *Senec. Benef. c. 25.*

4. Pythagorici, si quis sodalium facultatibus exciderat, bona sua cum eo, veluti cum fratre, dividebant. Neque verò id erga eos solum præstabant, quorum in convictu quotidie versabantur, sed erga omnes qui eandem disciplinam sectabantur. Itaque Clinias quidam Tarentinus Pythagoricus, cùm accepisset Prorum Cyrenæum, facultatibus suis spoliatum, in summâ rerum omnium penuriâ esse, ex Italiâ Cyrenas profectus est cum grandi pecuniâ, et patrimonii jacturam resarcivit ei homini, quem tamen nunquam antea viderat. Plures quoque alii idem fecisse memorantur. *Diod. Sic. l. vi.*

CAPUT LXXVI.

Nullum officium referenda gratiâ magis necessarium est. Cic. 1 Offic. n. 47.

1. Si Hesiodus jubet ea reddere majore mensurâ, si possis. quæ acceperis utenda; quidnam beneficio provocati facere debemus? An non imitari agros fertiles, qui multo plus afferunt quam acceperunt? Etenim si non dubitemus beneficia conferre in eos, à quibus nihil expectamus, aut quos tantum speramus nobis aliquando profuturos; quales in eos esse debemus, qui jam profuerunt? *Cic. 1 Offic. n. 48.*

Cùm duo genera liberalitatis sint, unum dandi beneficii, alterum reddendi, demus, necne, in nostrâ potestate est; non reddere, viro bono non licet, modò id facere possit sine cujusquam injuriâ.

2. In referendâ gratâ hoc maximè officii est, ei potissimum opitulari, qui maximè opis indigeat. *n. 49.*

Cùm referri gratia tanta non potest, quanta debetur; habenda tanta est, quantam maximam animi nostri capere possunt. *5. Philist. n. 3.*

Cùm omnibus virtutibus me affectum esse cupiam, tamen nihil est quod malim, quàm et gratum esse et videri. Hæc est enim virtus non solum maxima, sed etiam mater virtutum omnium reliquarum. Quid est liberorum pietas, nisi voluntas grata in parentes? Qui sunt boni cives, qui de patriâ bene merentes, nisi qui patriæ beneficia meminerunt? Qui sancti, qui religionem colentes, nisi qui meritam Diis immortalibus gratiam justis honoribus memori mente persolvunt? Quæ potest esse jucunditas vitæ, sublatis amicitiiis? Quæ porro amicitia potest esse inter ingratos? *Pro Planc. n. 80.*

3. Quo tempore Thebis obses fuerat Philippus, eum Philo Thebanus hospitio exceperat, et multis beneficiis affecerat. Is cùm postea à Philippo rerum potito nihil vicissim muneris vellet accipere: *Oro, inquit Philippus, ne me hac gloriâ privari velis. quam maximè quero, ut à nemine beneficiis et gratiâ victus sim.* Idem Hipparchi Eubœensis mortem graviter tulit: ac cuidam ad consolandum ejus dolorem dicenti, Hipparchum maturâ morte decessisse: *Sibi quidem, inquit, fortassè: sed mihi præmaturâ. Num autem mori prosperavit. quæ dignam nostrâ amicitia gratiam à me reciperet.* *Plut. Apoph.*

Bocchus Maurorum rex pacem cum Romanis facturus operâ L. Syllæ, sic eum est allocutus: Nunquam ego ratus sum fore, ut rex maximus in hæc terrâ, et omnium, quos novî, opulentissimus, privato homini gratiam deberem. Et hercuîdè, Syllæ, antequam mihi cognitus esses, multis orantibus, aliis ultro, egomet opem tuli, nullius indigni. Id mutatum esse ego lætor, et eguisse me amicitia tuâ, quâ mihi nunc nihil carius est. Id te experiri licet. Arma, viros, pecuniam, postremò quidquid animo lubet, sume, utere: et, quoad vives, nunquam tibi redditam gratiam puta: semper apud me integra erit. Denique nihil à me frustra voles. *Nam, ut ego*

existimo, regem armis, quàm munificentiâ, vinci, minùs flagitiosum est. Sallust. Jug. c. 10.

4. Hoc maximè optabat Cæsar Augustus, ut gratus in omnes videretur. Eum aliquando adiit veteranus miles, qui, vocatus in jus, periclitabatur; rogavitque ut sibi adesset. Statim Cæsar ei è comitatu suo unum elegit advocatum, cui commendavit litigatorem. Exclamavit ingenti voce veteranus: *At non ego, Cæsar, periclitante te Actiaco bello, vicarium quæsi; sed pro te ipse fugnavi.* Simulque detexit cicatrices. Erubuit Cæsar, atque ipse venit in advocationem. *Macrob. 2 Sat. c. 5.*

5. Tiberii jussu prætoriani milites Agrippam Judæum vinctum trahebant in custodiam; et, quia ætas erat vehementior, eum urebat sitis. Conspicatus tunc quendam è Caii Caligulæ servis, nomine Thaumastum, aquam in hydriâ ferentem, potum poposcit, quem ille dedit humaniter. Regnum postea adeptus Agrippa, amplo munere leve acceptæ aquæ beneficium remuneratus est. Nam Thaumastum libertate donavit, suorumque bonorum dispensatorem constituit: quin et moriens providit, ut apud liberos suos eodem ministerio fungeretur: inter quos consenuit, in pretio usque ad extremum diem habitus. *Joseph. l. xviii.*

6. Erant Ægyptii præter alias gentes grati erga bene meritos de ipsis, existimabantque magnum esse omnibus hominibus subsidium ad vitam, gratam acceptorum beneficiorum memoriam. Et meritò quidem: Nam movetur quisque ad beneficia eis impendenda, apud quos senserit ea optimè collocari. *Diod. Sic. l. i.*

CAPUT LXXVII.

Officia etiam feræ sentiunt.

1. Officia ipsæ feræ sentiunt: nec ullum tam immansuetum animal est, quod non curâ mitiges, et in amorem tui vertas. Leonum ora à magistris impunè tractantur: elephantorum feritas cibò mitescit usque ad præstandum homini servile obsequium. Aded etiam quæ intelligere beneficia non possunt, perfinaci merito eviauntur. *Senec. 1 Benef. c. 3.*

Apion, literis homo multis præditus, hoc libro quinto refert, quod neque audisse neque legisse, sed ipsum sese in urbe Romanâ oculis suis vidisse, confirmat. In Circo maximo amplissimum spectaculum bestiarum cum hominibus decertantium populo dabatur. Multæ ibi feræ, quarum inusitata forma erat et ferocia: Sed leonum immanitas præcipuè admirationi fuit, et præter cæteros unius, qui vastâ corporis mole, terrifico rugitu, jubis fluctuantibus, animos oculosque omnium in se convertebat. Introductus erat inter complures alios ad pugnandum cum belluis servus, cui nomen Androclus fuit. Hunc ille leo ubi vidit procul, repentè quasi admirans stetit; ac deinde sensim atque placidè tanquam noscicans ad hominem accedit: tum caudam more adulantium canum blandè movet, cruraque et manus propè jam exanimati metu leniter linguâ demulcet. Inter illa tam atrocis feræ blandimenta animum colligit Androclus, et oculos, quos præ timore averterat, paulatim ad contuendum leonem refert. Tum verò quasi mutâ recognitione factâ gratulabundos videres hominem et leonem. Re tam admirabili maximi clamores populi excitantur, arcessitur à Cæsare Androclus, et interrogatus cur ipsi uni ille atrocissimus leonum pepercisset, rem mirificam narrat, his verbis:

Quum provinciam Africam dominus meus proconsulari imperio obtineret, ego iniquis ejus et quotidianis verberibus ad fugam sum coactus; et, ut mihi à domino tutiores latebræ forent, in arenarum solitudines concessi. Consilium autem erat mortem aliquo pacto quærere, si defuisset cibus. Sole medio specum quandam nactus remotam latebrosamque, in eam penetro, ac me recondo. Neque multò post ad eandem speluncam venit hic leo, debili et cruento uno pede, gemitus edens dolorem cruciatumque vulneris significantes. Primo advenientis feræ conspectu territus et pavepactus hæsi: sed postquam introgressus leo in habitaculum illud, ut reipsâ patuit, suum, vidit me procul delitescentem: mitis et mansuetus accessit, ac sublatam pedem ostendere ac porrigere, quasi opis petendæ gratiâ, visus est. Ibi ego spinam ingentem vestigio pedis ejus hærentem revulsi, conceptamque saniem vulnere intimo expressi. Ille meâ operâ ac medellâ levatus, pede in manibus meis posito recubuit ac quievit. Ex eo die triennium totum ego et leo in illâ specu eodem *victu vivimus*. Nam mihi suggererat earum, quas ve-

nando ceperat, ferarum membra opimiora; quæ ego, quia ignis copia non erat, sole meridiano torrens, edebam. Sed ubi me vitæ illius ferinæ pertæsum est, leone venatum profecto, reliqui specum; et viam ferme tridui permen- sus, à militibus visus apprehensusque sum, et ad domi- num ex Africa Romam deductus. Is me statim curavit rei capitalis damnandum, dandumque ad bestias. Intel- ligo autem hunc quoque leonem, postquam ab eo discessi, captum, et huc adductum, gratiam nunc mihi beneficii et medicinæ referre.

Hæc ubi dixit Androclus; cunctis petentibus, pœnâ solutus ac dimissus est; leo quoque ei suffragiis populi est donatus. Postea Androclus, et leo tenui loro revinctus, urbe totâ circum tabernas ibant. Donabatur ære Androclus: floribus spargebatur leo: omnes ferè obvii dicebant: *Hic est leo hostes hominis, hic est homo medicus leonis.* A. Gell. l. v. 14.

2. Cæsare Augusto imperante, cùm pauperis cujus- dam filius puer delphinum sæpiùs fragmentis panis alle- xisset, eum delphinus miro amore dilexit. Quocun- que diei tempore inelamatus à puero quamvis occultus atque abditus, ex imo adnatabat, pastusque è manu, præbebat dorsum ascensuro, pinnæ aculeos cohibens, ne dilectum corpus laceraret: receptumque ferebat per stadia ducenta è Baiano littore Puteolos ad ludum literarium, et simili modò revehebat. Quod officium per annos plures præsti- tit: donec puero mortuo ex morbo, delphinus subinde ad locum consuetum ventitans, tristi et mærenti similis, desi- derio pueri extinctus est, et in ejus sepulchro humatus. Quæ omnia se ipsum multosque alios vidisse refert Apion. *Plin. l. ix. c. 8. A. Gell. l. vii. c. 8.*

3. Puer nomine Thoas parvulum draconem magnâ curâ aluit, loquens cum eo quasi cum intelligente, ludens- que unâ et dormiens: donec draconis, qui ad miram mag- nitudinem excreverat, conspectu territi urbis cives cum in solitudinem emitti, invito et fiente puero, voluerunt. Postea cùm puer ille, jam adolescens factus, à spectaculo quodam rediens, aut, ut alii tradunt, ad venationem egres- sus, in latrones incidisset, opemque inelamasset; ad notam ejus vocem draco statim adfuit, et latronibus aut occisis aut fugatis, adolescentem, educatorem quondam suum, periculo ereptum servavit. *Ælian. l. xiii. c. 46. Plin. l. viii. 17. Photius.*

CAPUT LXXVIII.

Ingratus animus omnium odio damnatus.

1. Ego ingrati animi crimen horreo : in quo vitio nihil mali non inest. *Cic. l. ix. ad Af. Ep. 2 et 8.*

Omne dixeris maledictum, cum ingratum hominem dixeris. *Epist. 4.*

Omnes immemorem beneficii oderunt, et eum communem omnium, maximè verò tenuiorum, hostem putant, qui ipsam liberalitatem deterret. *P. Syrus. 2 Offic. 65.*

Ingratus unus miseris omnibus nocet.

Malignos fieri maximè ingrati docent. *P. Syrus.*

Quæritur, utrum hoc tam invisum vitium, impunitum esse debeat ; an contrà lex in civitatibus ponenda sit, quâ ingratæ pœna constituatur? Nostri majores, maximi scilicet viri, beneficia magno animo dabant, magno perdebant. Non est in ullâ gente data adversus ingratum actio. Hoc frequentissimum crimen nusquam punitur, ubique improbat. Neque illud absolvimus : sed cum difficile esset incertæ rei iudicium, tantùm odio damnavimus, et inter ea reliquimus, quæ ad iudices Deos mittimus. *Senec. 3 Benef. c. 6.*

2. Apud Persas tamen, ut refert Xenophon, iudicium instituebatur de eo crimine, unde gravissima inter homines odia solent existere, quum nemo propterea in jus vocari soleat : nimirum de ingrato animo. Itaque si quem intellexerant gratiam non retulisse cum posset ; in eum graviter animadvertabant. Ingratos enim nullâ Deorum reverentiâ ; nullâ parentum, patriæ, amicorum curâ, tangi putabant. *1 Cyrop.*

CAPUT LXXIX.

Quos experimur ingratos, ipsi facimus.

1. Non referre beneficiis gratiam, et est turpe, et aptè omnes habetur : nullum tamen inter plurima maximaque hominum vitia frequentius, quàm ingrati animi. Id

evenire ex pluribus causis video. Primò quòd in collocandis beneficiis non eligimus dignos quibus tribuamus. Secundò, si quos experimur ingratos, ipsi facimus : quia aliàs diu et enixè rogati beneficia conferimus, aliàs collocatorum graves exprobatos exactoresque sumus. Quis enim nostrùm contentus fuit ut leviter rogari, aut semel ? Nemo autem libenter debet, quod non tam accepit, quàm expressit. Gratus esse quis potest erga eum, qui beneficium aut iratus, aut precibus fatigatus, dedit, cùm in omni officio magni aestimetur voluntas ? *Senec. Benef. iii. l. Ib. i. c. i.*

Eodem animo beneficium debetur, quo datur. *P. Syrus.*

2. Generosi et magnifici animi est juvare et prodesse. Qui dat beneficia, Deos imitatur ; qui repetit, scenerator est. *Senec. 3 Benef. c. 15.*

Cùm Sylla in Africam atque in castra Marii venisset ; aliis rogantibus, aliis ultro beneficia dabat : invitus accipiebat et properantiùs quàm æs mutuuum reddebat, ipse à nullo repetebat : magis id laborabat ut illi quamplurimi deberent. *Sallust. Jug. c. 96.*

Odiusum sanè genus hominum officia exprobrantium : quæ meminisse debet is, in quem collata sunt : non commemorare, qui contulit. *Cic. de Amic. n. 71.*

Extat in hanc sententiam elegantissimum Martialis Epigramma. *Martial. l. v. Epig. 53.*

Quæ mihi præstiteris memini, semperque tenebo.

Cur igitur taceo, Postume ? tu loqueris.

Incipio quoties alicui tua dona referre,

Protinus exclamat, Dixerat ipse mihi.

Non bellè quædam faciunt duo. Sufficit unus

Huic operi : si vis ut loquar, ipse tace.

Crede mihi, quamvis ingentia, Postume, dona

Auctoris pereunt garrulitate sui.

Beneficium qui dedisse se dicit, petit. *P. Syrus.*

CAPUT LXXX.

Ingrati ingratos equo animo feramus.

1. Grave est ingrati animi vitium, intolerabile, et concordiam, quâ humana imbecillitas fulcitur, scindit ac dissipat. Sed usque eò vulgare est, ut illud, nec qui queritur quidem, effugerit. Cogita tecum, an, quibuscumque debuisti, gratiam retuleris, an omnium te beneficiorum memoria comitetur. Videbis quæ tibi puero data sunt, ante adolescentiam ex animo elapsa esse; quæ in juventutem collata sunt, non perdurâsse in senectutem. Si te diligenter excusseris, vitium, de quo quereris, in sinu inuenies. Iniquè publico irasceris crimini: ut absolvaris, ignosce. *Senec. 6. Benef. c. 27, 28.*

2. Ferendi ingrati placido animo, mansueto, magno. Nunquam te beneficii immemor tam offendant, ut non tamen ei dedisse delectet. Nunquam te in has voces ejus injuria impellat: Vellem non dedisse. *Ibid.*

Ingratum meliorem facies ferendo, pejorem exprobrando. Quid opus est querelis? quid insectatione? Ut corporum, ita animorum, vitia molliter tractanda sunt. Vincit malos pertinax bonitas: nec quisquam tam duri animi est, ut tandem bonos non amet.

Si nobis non est relata gratia, quid faciemus? demus, etiam si multa in irritum data sint. Demus nihilominus aliis, demus ipsis apud quos jactura facta est. In hoc homine videor beneficium perdidisse: huic ipsi beneficium dabo iterum, et, tanquam bonus agricola, curâ cultuque sterilitatem soli vinçam. *Senec. 7. Benef. c. 30, 31.*

Beneficium sæpe dare, docere est reddere.

P. Syrus.

Non est quòd turba ingratorum nos faciat ad bene merendum tardiores: cum ne Deos quidem immortales sacrilegi negligentesque eorum ab effusâ benignitate deterreant. Hos sequamur duces, quantum humana imbecillitas patitur. In dandis beneficiis permaneamus, etiamsi spes præcidatur gratos reperiendi. Ne cessaveris: opus tuum perage, et partes boni viri exsequere. Alium re, alium fide, alium gratiâ, alium consilio, alium præceptis salubribus adjuva. *Senec. 1. Benef. c. 12.*

LIBER QUARTUS.

DE FORTITUDINE.

CAPUT I.

Animi fortitudo duplex.

DUPLEX est animi fortitudo. Una in rerum externarum despicientiâ ponitur : cùm persuasum nobis est, hominem nihil, nisi quod honestum decorumque sit, aut admirari aut expetere oportere ; nullique que perturbationi animi, neque fortunæ, succumbere. Altera animi fortitudo est, ut res geras magnas illas quidem et maximè utiles, sed vehementer arduas, plenasque laborum ac periculorum. *Cic. 2 Offic. n. 66.*

Ea animi elatio, quæ cernitur in adeundis periculis, et laboribus sustinendis, si iustitiâ vacat, pugnatque non pro salute communi, sed pro suis commodis, in vitio est. Itaque probè definitur à Stoicis Fortitudo, cùm eam virtutem esse dicunt pugnantem pro æquitate. *n. 62.*

Dicitur Augustus aded similitates, turbas, bella execratus esse, ut, nisi justis de causis, nunquam genti cuiquam bellum intulerit. *Aur. Victor. Ep. c. 2.*

CAPUT II.

Bellicæ fortitudinis exempla.

1. Nunquam periculi fugâ committendum est, ut imbelles timidique videamur. Sed fugiendum etiam illud, ne offeramus nos periculis sine causâ : quo nihil potest esse stultius. In tranquillo tempestatem adversam optare,

dementis est : subvenire autem tempestati quâvis ratione, sapientis. *Cicer. 1. Offic. n. 77.*

Temerè in acie versari, et manu cum hoste confingere, immane quoddam et belluarum simile est. Sed cum tempus necessitasque postulat, decertandum manu est, et mors servituti turpitudinique anteponenda. *Cic. 1. Offic. n. 75.*

2. Tarquinii Româ pulsi perfugerunt ad Porsenam Etruscorum regem : qui, eorum precibus motus, bellum Romanis intulit, ut ejectos in urbem reduceret. Cum Etruscorum exercitus adesset, duce Porsenâ, Romani ex agris in urbem demigrant, eamque sepiunt præsiidiis. Aliâ urbis partes muris, aliâ Tiberi amne objecto, videbantur tutæ. Sed pons Sublicius iter hosti dedisset, nisi illo die Roma virum unum, Horatium Coclitem, munimentum habuisset. Hic ubi hostem è capto Janiculo decurrere in urbem vidit, socios autem suos, deserto pontis præsidio, fugere ; eos obtestans monuit, ut pontem ferro ignique interrumperent, dum ipse impetum Etruscorum exciperet. Vadit inde in primum aditum pontis, armis in hostem adversis ad prælium ineundum.

Cum Horatio Romanos duos pudor ténuit, Lartium et Tolumnium, ambos claros genere factisque. Cum his primam periculi et pugnæ procellam parumper sustinuit. Deinde eos cedere in tutum coegit. Circumferens inde truces minaciter oculos ad proceres Etruscorum, nunc singulos provocabat, nunc increpabat omnes, *servos regum superborum, vocans, qui, suæ libertatis immemores, alienam offiugnatum venirent.* Cunctati aliquandiu illi sunt : deinde pudor commovit eorum aciem, et clamore sublato undique in unum Horatium tela coniecere. Quæ cum in objecto scuto hæsisset, neque ille minùs obstinatus pontis aditum obstrueret ; virum impetu facto parabant destrudere, cum simul fragor rupti pontis, simul clamor Romanorum sublatus, eorum impetum sustinuit. Tum Cocles : *Tiberine pater, inquit, te, sancte, precor, hac arma et hunc militem profuio flumine accipias.* Inde armatus in Tiberim desiluit : multisque superincidentibus telis, incolumis ad suos tranavit, rem ausus plus famæ habituram ad posteros, quàm fidei.

Grata erga tantam virtutem civitas fuit ; statua in comitio posita : tantum agri, quantum uno die arare potuit, datum. Privata quoque inter publicos honores stu-

dia eminebant: nam in magnâ annonæ inopiâ quisque pro domesticis copiis aliquid ei contulit, fraudans se ipsum victu suo. *Livius, l. ii. c. 9, 10.*

3. Bello primo Punico, cum imperator Pœnorum colles quosdam opportunos in Siciliâ prior occupasset, exercitus verò Romanus se temerè demisisset in subjectos collibus illis saltus; accessit ad consulem tribunus militum, de cujus nomine non convenit inter antiquos scriptores; nam alii Q. Cædicium, alii Laberium, plures Calpurnium Flammam vocant. Is, ubi ostendit quantum periculi ex loci iniquitate instaret: *Censeo, inquit, si rem Romanam servare vis, id faciendum, ut milites quadringentos ire jubeas ad hanc, quam cernis, petram, inter medios hostes asperam atque editam, eamque ut capiant imperes hosterisque. Futurum enim profectò est, ut hostium fortissimus quisque et promptissimus proferet ad occurrandum illis, et fugnandum; atque ita circa eam petram atrox pugna fiat, in quâ omnes illi, quos dico, quadringenti milites nostri obtruncabuntur. At tu interea, alligatis illo uno negotio hostibus, et in ea cæde occupatis, tempus habebis exercitûs ex loco infesto educendi. Alia, nisi hæc, salutis via nulla est. Fidum quidem et providum hoc consilium videtur, respondit consul; sed quisnam erit, qui ducat quadringentos illos milites ad eum locum inter cuneos hostium? Si alium, inquit tribunus, neminem reperis, me licet ad hoc periculum utare. Ego hanc tibi et reipublicæ animam do. Consul tribuno gratias egit, et meritas laudes tribuit.*

Ille traditos sibi quadringentos milites admonens quem in locum deduceret, et quo consilio: *Ire, inquit, commilitones, illò necesse est, unde redire non est necesse. Moriamur, et morte nostrâ eripiamus obsidione circumventas legiones.* Tum omnes nullâ spe evadendi, sed amore laudis et servandi exercitûs cupiditate accensi proficiscuntur. Hostes eam hominum manum venire ad se demirati, in incerto primùm sunt, quò ire pergant. Sed ubi apparuit eos ad illam petram occupandam iter intendere, mittit adversùm illos Carthaginiensium imperator strenuissimum quemque ex peditatu et equitatu suo militem. Romani circumveniuntur, circumventi repugnant. Fit prælium diu anceps. Tandem superat multitudo. Quadringenti omnes perfossi gladiis, aut missilibus aperti cadunt. Consul interim, dum ea pugna fit, se in loca

edita et tuta subducit. Dii immortales tribuno militum fortunam ex virtute ejus dedere. Nam ita evenit, ut, cum multifariam saucius factus esset, nullum in capite vulnus acciperet. Inter mortuos, multis confossus vulneribus, sed adhuc spirans, inventus, convaluit: sæpeque postea operam reipublicæ strenuam perhibuit. *A. Gell. l. iii. c. 7. Liv. l. xxii. c. 60. Senec. ep. lxxxvii. A. Vict. c. 39.*

4. Leonidas quoque Lacedæmonius, cum trecentis civibus apud Thermopylas, objectus Xerxi in Græciam irrumpenti cum innumerabili militum copiâ, maluit occumbere dimicando, quàm assignatam sibi à patriâ stationem deserere. Ideoque tam alacri animo cohortatus est suos ad id prælium, quo perituri erant, ut diceret: *Sic frondeſe, commilitones, tanquam apud inferos coenaturi. Mors erat denunciata trecentis illis Lacedæmoniis: nec victoriam sperabant, nec reditum: ille locus iis sepulchrum futurus erat. Perinde tamen ac si victoria esset promissa, ductori intrepidè paruerunt. A. Gell. loco cit. Valer. l. iii. c. 2. Senec. Ep. lxxxii. 6 Benef. c. 31.*

Lacedæmonii Leonidam et socios ejus pro patriâ casus decoravere sepulchris, statuis, elogiis. Tribuno militum Romano egregii facinoris merces data est corona graminea, quâ nulla nobilior corona fuit in præmium virtutis bellicæ apud populum terrarum principem, et quæ ab universo exercitu servato decerni solebat. *Plinius, l. xxii. c. 3, 4.*

Populi Romani honores quondam fuerunt rari et tennes, ob eamque causam gloriosi: postea verò effusi fuerunt, et ideò viles. Sic olim apud Athenienses fuisse reperimus. Thrasybulo enim, pro magnis in patriam meritis, honoris ergò corona à populo data est, facta è duabus virgulis oleaginis: quæ magnæ ei gloriæ fuit, quaque ille contentus nihil ampliùs requisivit. *Corn. Nep. in Militiade, c. 6. Thrasyb. c. 4.*

5. Epaminondas non Thebanorum modò, sed omnium ætatis suæ Græcorum sine controversiâ princeps extitit. Antequam eo duce uterentur Thebani, nullum memorabile bellum gesserunt, et, eo extincto, suis tantum cladibus insignes fuere; ut manifestum sit, patriæ gloriam et natam et extinctam cum eo fuisse. Quàm fortiter verò et libenter vitam pro patriâ profuderit, hæc declarant quæ de ejus morte narrantur. Cum Thebanorum

imperator adversus Lacedæmonios acie instructâ constitisset prope urbem Mantineam; Lacedæmonii, qui in ejus unius pernicie sitam putabant salutem suam, universi impetum fecerunt in eum, neque prius abcesserunt, quàm hastili eminus percussum, dum fortissimè pugnaret, concidere conspexerunt. Epaminondam expiranti similem cùm in castra detulissent sui, paulatim redeunte animo circumstantes àmicos agnovit, et animadvertit mortiferum se vulnus accepisse, simulque animam statim amissuram, si extraheretur ferrum quod in corpore remanserat. Tunc quæsitivè *salvusne esset clypeus?* Cùm salvum esse fientes sui respondissent, et allatùm osculatus esset, velut laborum gloriæque socium, rogavit, *essentne fusi hostes?* Cumque id quoque, ut cupiebat, audivisset: *Bene se res habet, inquit, et satis vixi.* Tum evelli jussit eam, quâ transfixus erat, hastam, et multo sanguine profuso, in lætitiâ et in victoriâ est mortuus. *Diog. frag. Justinus, l. vi. c. 8. Corn. Nep. in Epam. Cic. 1 de Fin. n. 97.*

Quòd verò de clypeo suo sollicitus fuerit Epaminondas, mirum non debet videri. Nihil enim apud Græcos, atque in primis Lacedæmonios, magis dedecori erat militi, quàm è pugnâ reverti amisso clypeo: quemadmodum summæ laudî ducebatur, militem vulnerebus adverso corpore acceptis occisum, et clypeo impositum, in patriam reportari. Unde mulier Lacæna filio ad bellum proficiscenti scutum tradens, dixisse fertur: *Aut hoc, aut in hoc.* Id est, aut hoc scutum domum refer è pugnâ, aut ipse in hoc scuto jacens domum reporteris. *Plut. Apoph.*

6. Magnis veterum scriptorum laudibus celebrata est Cynegiri militis Atheniensis gloria: qui cùm in campis Marathoniis, duce Miltiade, magnam Persarum cædem fecisset, hostesque fugientes in navem egisset: onustam navem dextrâ manu tenuit, nec prius dimisit quàm manum amitteret. Amputatâ dextrâ, navem sinistrâ comprehendit. Quam et ipsam cùm amisisset; ad postremum morsu navem detinuit. Mirum est tantam in Cynegiro virtutem fuisse, ut non cæde hostium fatigatus, non duabus manibus amissis victus, ad postremum, veluti fera, dentibus dimicaverit. *Justin. l. ii. c. 9.*

CAPUT III.

Fortitudo domestica non est inferior militari.

1. Sunt domesticæ fortitudines non inferiores militari-
bus: nec plus Scipio Æmilianus, singularis et vir^o et
imperator, in excindendâ Numantiâ reipublicæ Romanæ
profuit, quàm eodem tempore P. Scipio Nasica, cùm
Tiberium Gracchum interemit. *Cic. 1 Offic. n. 76.*

Cùm Tiberius Gracchus tribunus plebis, occupato
profusis largitionibus favore populi, rempublicam oppres-
sam teneret, palamque dictitaret omnia per plebem agi
debere, senatu interempto: in ædem Fidei convocati pa-
tres conscripti à consule Mucio Sævola, deliberabant,
quidnam faciendum esset in tali tempestate: cunctisque
consentibus, ut consul armis rempublicam tueretur:
Sævola negavit se quidquam vi acturum. Tum Scipio
Nasica, qui consobrinus Tiberii Gracchi erat, patriam
cognitioni præferens: *Quoniam, inquit, consul, dum con-
ductum juris ordinem servat, res nostras in hoc periculum ad-
ducit, ut cum omnibus legibus imperium Romanum corrumpat:
egomet privatus voluntati vestra, patres conscripti, me du-
cem offero.* Ac deinde sublatâ dextrâ, quasi signum ex-
tolleret, proclamavit: *Qui rempublicam salvam esse volunt,
me sequantur.* Hisque verbis cunctatione bonorum om-
nium discussâ, Gracchum cum sceleratâ factione, quas
merebatur, pœnas persolvere cœgit, eumque manu suâ
interfecit. Quod factum cùm plebs graviter ferret, tri-
bunique singulos senatores in concionem productos inter-
rogarent, quis auctor cædis fuisset; cæteri quidem omnes
veriti concitatæ multitudinis furorem, à se id factum ne-
gabant, variisque et obliquis responsionibus utebantur.
Solutus Scipio Nasica suâ manu cædem esse factum profes-
sus est. Tum verò constantiâ et auctoritate viri mota
plebs conticuit. *Valer. l. iii. c. 2. Patercul. l. ii. c. 2.
Diod. Sic. l. xxxiv.*

2. Q. Metelli, cognomento Numidici, præclarum
imperium in re militari fuit, egregia censura, omnis vita
plena gravitatis. Cùm ab inimicis accusatus causam de
pecuniis repetundis diceret, et ipsius tabulæ circumfer-
rentur iudicibus inspiciendæ; nemo ex illis fuit, quin re-

moveret oculos, et se totum averteret, ne quisquam dubitasse videretur verum an falsum esset quod ille retulerat in tabulas. Hujus viri laudem magnitudo animi et calamitas propagavit ad memoriam sempiternam. De civitate decedere, quàm de sententiâ maluit; eique salus patriæ dulcior, quàm conspectus, fuit. *Cic. pro domo, pro Balbo, pro Planco.*

Legem tulerat Saturninus tribunus plebis, ut senatus in concione juraret, se quidquid populus jussisset comprobaturum neque ullo modo impugnaturum. Hanc legem quia Metellus censebat et senatûs majestati adversam, et reipublicæ perniciosam, palam dixit se nunquam in eam juraturum; et tanti viri auctoritate motus senatus, è foro domum discessit. Post paucos dies cum Saturninus vocatus ad Rostra, patres minando compelleret ad præstandum jusjurandum; Marius sextum consul juravit primus, eumque populus plausu et lætis acclamationibus excepit. Senatores deinde omnes, suo quisque ordine, populi metu jurârunt; donec ad Metellum ventum est; qui, orantibus licet et obsecrantibus amicis ut juraret, ne gravissimas pœnas subiret, quæ erant à Saturnino propositæ, nihil ex animi fortitudine remisit: sed moribus suis serviens, et acerbissima quæque potius perpeti paratus, quàm quidquam turpe facere, discessit è concione: tumque deducentibus eum domum, amicis dixit: *Aliquid sceleris admittere improbum esse; bene agere, ubi nullum periculum esset, vulgare: proprium verò viri boni, etiam cum periculo sequi quod rectum esset.* Plut. in Mario.

Metello aqua et igni interdictum est, et lata rogatio à Saturnino, ne quis eum tecto reciperet: videbatur quoque plebecula etiam ad cædem ejus parata. Quidquid virorum honorum Romæ fuit, ad illius ades confluit, ejus vicem dolens, et operam pollicens. At ille eos suâ causâ seditionem in urbe movere vetuit, cum contentione et armis superior posset esse, et urbe discessit, hæc secum reputans: *Si rerum melior status fiat, et populo sana mens redeat; magnâ cum laude in patriam revocabor. Si contrâ, nulla rebus et animis mutatio accedat, optimum erit abesse.* Honestum Rhodi secessum invenit, ibique litteris ac philosophiæ operam dedit, donec senatûs auctoritate populique jussu revocatus est in patriam, tanto quidem omnium gaudio, ut dies totus non suffecerit gratulationibus illum ad portam urbis excipientium. Sic Q. Metel-

lus nec triumphis, nec honoribus clarior fuit, quam causâ exilii, aut exilio, aut reditu. *Appian. l. i. bell. civ. Paterc. l. ii. c. 15.*

Opprimi in bonâ causâ melius est, quam malè cedere. *Cic. 3 de Leg. n. 34.*

3. Cùm tribuni plebis, auctore Cæsare consule, legem Agrariam tulissent, addidissentque ut senatus in eam juraret, multâ gravi sancitâ in eum qui non jurasset; juraverunt senatores omnes, non Metelli fortitudinem imitati, sed exilium metuentes. Catonem nec muliebres lacrymæ, nec propinquorum atque amicorum verba infringere potuerant. Tandem ejus constantiam expugnavit Cicero, inter cætera admonens: *Si Cato Româ opus non haberet, et Romam Catone opus habere.* Accessit ergo ad jurandum novissimus, si unum amicum ejus Favonium excipias.

Hac victoriâ elatus Cæsar aliam legem ferendam curavit. Cui cùm nemo præter Catonem obstitisset, hunc à rostris in vincula rapi jussit, nihil de libertate linguæ remittentem, sed in ipsâ ad carcerem viâ de lege disserentem, atque commonentem cives, ut talia molientibus adversarentur. Sequebatur Catonem mæstus senatus, et optimus quisque è populo, tacitè indignantes. Id non latebat Cæsarem: sed expectabat dum aut ad humiles preces Cato sese demitteret, aut ad populum provocaret. Quod ubi frustrâ à se sperari animadvertit, pudore victus, è tribuni unum summisit, qui Catonem dimitteret. *Plut. in Caton. Utic.*

4. C. Piso mirificè et constanter consulem egit, turbulento reipublicæ statu; ut narratione insequenti patebit. M. Palicani seditiosissimi hominis pestiferis blanditiis captus populus Romanus, summum dedecus admittere parabat, mandando amplissimo imperio homini ei, cujus factis supplicium potius, quam honos, debebatur: et tribuni satis per se concitatæ multitudinis temeritatem suis concionibus inflammabant. In hoc miserando pariter et erubescendo statu civitatis, cùm rostra conscendisset Piso, et interrogaretur an Palicanum renunciaturus esset consulem, si populi suffragia in eo creando consensissent; primò respondit: *Non existimare se tantis tenebris offusam esse rempublicam, ut eò indignitatis veniretur.* Deinde cùm perseveranter instarent, ac dicerent;

Age, si ventum fuerit, quid facies? Non renuntiabo, inquit. Quo quidem tam brevi et forti responso Piso consulatum Palicano, priusquam illum adipisceretur, eripuit. Valer. l. iii. c. 8.

5. Cùm Eurybiades baculum sustulisset in Themistoclem, sententiæ suæ adversantem; *Percute, inquit Themistocles, sed audi.* Eam animi moderationem simul et magnitudinem miratus Eurybiades, Themistoclem loqui, quantum vellet, jussit, et ab eo ad meliora consilia revocatus est. *Plut. in Themist.*

CAPUT IV.

Imperare sibi maximum imperium est.

1. Vera et sapiens animi magnitudo in duobus cernitur, si et id solum, quod honestum sit, bonum judices, et omni animi perturbatione liber sis. Nam fortis animi magnique est, et ea, quæ plerisque eximia et præclara videntur, parvi ducere ac contemnere; et ea, quæ videntur acerba, ita ferre, ut nihil discedat à dignitate sapientis. Non est autem consentaneum, qui metu non frangatur, eum frangi cupiditate: nec qui invictum se à labore præstiterit, vinci à voluptate. *Cic. 1 Offic. n. 67.*

O quàm magnis homines erroribus tenentur, qui jus dominandi trans maria cupiunt extendere, felicissimosque se judicant, si multas armis provincias obtinent, et novas veteribus adjungunt! ignari imperare sibi, maximum imperium esse: sicut servire cupiditatibus, gravissima servitus est. *Senec. Ep. 113.*

Quid præcipuum in rebus humanis est? Vitia domuisse. Hæc nulla est major victoria. Multi sunt, qui urbes, qui populos habuere in potestate: paucissimi, qui se. *Quest. l. iii. in præf.*

Stultum est imperare cæteris, qui nescit, sibi.

P. Syrus.

2. Gentes barbaras et alieni imperii impatientes regere facilius est, quàm animum suum continere. Satis instructi contra hostes, sæpe contra fortunam et cupiditates inermes sunt. Alexander quidem Persas, Hyrcanos, Indos, et cæteras usque ad oceanum gentes vastavit fugavitque; at tot regum et populorum victor, iræ, tristitiæ

voluptati, succubuit: id enim studuerat, ut omnia potius haberet in potestate, quam affectus. Quem arma Persarum non fregerant, vitia vicerunt. Victo ad Arbela Dario, palam cupiditates suas solvit, et pristinam moderationem ac continentiam in superbiam ac lasciviam vertit. Purpureum diadema, quale Darius habuerat, capiti circumdedit, vestemque Persicam sumpsit. Et ille quidem se Persarum spolia gestare dicebat: sed cum illis quoque eorum mores induerat, et superbiam habitus animi insolentia sequebatur. *Senec. 5. Benef. c. 7. Epist. 113. Quint. Curt. l. vi. c. 2. 6.*

3. Hanc Cæsari laudem eximiam tribuit Cicero, quod iram suam non minus fortiter vicisset, quam hostes vicerat. Domuisti, Cæsar, gentes immanitate barbaras, multitudine innumerabiles, locis infinitas, omni copiarum genere abundantes. Sed tamen ea vicisti, quæ et naturam et conditionem, ut vinci possent, habebant. Nulla est enim tanta vis tantaque copia, quæ non ferro ac viribus debilitari frangique possit. Verum animum vincere, iracundiam cohibere, victoriam temperare, si quis sciat; non ego eum summis viris comparo, sed simillimum Deo iudico. *Cicer. pro Mar. n. 8.*

Bis vincit, qui se vincit in victoria.

Iracundiam qui vincit, hostem superat maximum.

P. Syrus.

Cum Scipio, post partam de Syphace rege victoriam, vidisset Masinissam intempestivo Sophonisbæ captivæ amore captum; ei abducto in secretum dixit: *Non est, mihi crede, tantum ab hostibus armatis etati nostra periculum, quantum ab circumfuis undique voluptatibus. Qui eas sua temperantia frangit ac domuit, ne ille multo majus decus majoremque victoriam sibi peperit, quam nos Syphace victo habemus.* *Liv. l. xxx. c. 14.*

CAPUT V.

Vitiorum irritamenta sunt fugienda.

1. Capua, Campaniæ urbs, prona semper in luxuriam fuit, non modò ingeniorum vitio, sed etiam affluentium copia voluptatum, quas longa indulgentia fortunæ et loci amenitas subministrabant, Cum illuc iter flexisset An-

nibal, victis ad Cannas Romanis, ibi majorem partem hiemis sub tectis habuit exercitum, duratum prius adversus mala, et nondum expertum bona. Itaque quos nulla vis mali vicerat, perdidere nimia bona et voluptates immodicæ. Somnus enim, et vinum, et epulæ, et otium consuetudine indies blandius, ita enervaverunt corpora animosque, ut vires ad deinceps vincendum ademerint; et Marcellus verè dixisse videatur: *Capuam Annibali Cannas fuisse*. Livius l. xxiii. c. 2. 4. 18. Ibid. l. xxiii. c. 45.

2. Non tantum corpori, sed etiam moribus, salubrem locum eligere debemus. Inter popinas habitare nolim, videre ebrios per litora errantes, et symphoniarum cantibus perstreptentes lacus. Id agere debemus, ut irritamenta vitiorum quam longissimè profugiamus. Indurandus est animus, et à blandimentis voluptatum procul abstrahendus. Una Annibalem hiberna solverunt: et Campania enervavit virum illum nivibus atque Alpibus indomitum. Armis vicit, vitiis victus est. Persequenda sunt vitia sine modo, sine fine. Debellandæ, sunt in primis voluptates, quas sæva etiam ingenia ad se rapuerunt. Nihil delicatè, nihil molliter est faciendum: non emolliendus animus. Itaque loca seria sanctaque ad habitandum eligere oportet. Effeminat animos amœnitas nimia: nec dubiè ad corrumpendum vigorem aliquid potest regio. Severior loci disciplina firmat ingenium, aptumque magnis conatibus reddit. *Senec. Epist. 51.*

3. Diutius Babylone, quam usquam, constitit Alexander: nec ullus locus disciplinæ militari magis nocuit. Nihil urbis ejus moribus corruptius, nihil ad irritandas illiciendasque voluptates aptius fuit, Babylonii quippe maximè in vinum, et quæ ebrietatem sequuntur, effusi erant. Inter has delicias et flagitia exercitus ille dormitor Asiæ per triginta quatuor dies saginatus, haud dubiè debiliior fuisset ad ea quæ sequebantur bella, si cum forti hoste decertasset. *Quint. Curt. l. v. c. 1.*

CAPUT VI.

*Angusti animi est amare divitias, magni
contemnere.*

1. Pecuniæ fugienda cupiditas. Nihil enim est tam angusti animi tamque parvi, quàm amare divitias. *Cicer.* 1 *Offic. n.* 68.

Nihil honestius magnificentiusque, quàm pecuniam contemnere, si non habeas; si habeas, ad beneficentiam liberalitatemque conferre.

Homines maximè admirantur eum qui pecuniâ non movetur, et illum quasi igni probatam arbitrantur. 2 *Offic. n.* 38.

2. Cùm est concupita pecunia, nec adhibita continuò ratio, quasi quædam mædicina, quæ sanaret eam cupiditatem; permanat in venas, et inhæret in visceribus illud malum, existitque ægrotatio, cui nomen est avaritia; quæ evelli inveterata non potest. 4 *Tusc. n.* 24. Itaque,

Principiis obsta. Serò medicina paratur,

Cùm mala per longas invaluère moras.

Ovid. de Remed. ver. 91.

Avaritia pecuniæ studium habet, quam nemo sapiens concupivit. Ea semper infinita, et insatiabilis est: neque copiâ neque inopiâ minuitur. *Sallust. Catil. c.* 11. Etenim,

Avarum irritat, non satiat, pecunia.

Avarus animus nullo satiatur lucro.

Tam deest avaro quod habet, quàm quòd non habet.
Is minimo eget mortalis, qui minimum cupit.

P. Syrus.

3. Provideas oportet, ut juvenus probitati et industriæ, non sumptibus neque divitiis, studeat. Id ita eveniet, si pecuniæ, quæ maxima omnium perniciës est, decus dempseris. *Sallust. 1 ad Cæs.*

Ex quo pecunia in honore esse cæpit, non quærter quale sit aliquid, sed quanti pretii. Hæc ipsa, quæ magistratus et iudicës facit, tot magistratus, tot iudicës detinet, pecunia. *Senec. Epist.* 115.

Curia pauperibus clausa est: dat census honores.

Ovidius 3 Amor. Eleg. 7.

Admirationem nobis parentes auri argentique fecerunt: et teneris animis infusa cupiditas, altius insedit, crevitque nobiscum. Deinde totus populus in cæteris discors, in hoc convenit. Hoc suspiciunt, hoc suis operant, hoc Diis consecrant velut rerum humanarum maximum, cum grati videri volunt. Denique eò mores sunt redacti, ut paupertas probro sit, contempta divitibus, invisita pauperibus, et loca cuncta his vocibus personare videantur: *Senec. ibid.*

O cives, cives, quærenda pecunia primum est,

Virtus post nummos..... *Hor. 1. Epist. 1.*

Aurea nunc verè sunt sæcula: plurimus auro

Venit honos.....*Propert. 3. Epist. 12.*

Tempore crevit amor, qui nunc est summus, habendi:

Vix ultra quò jam progrediatur, habet.

Creverunt et opes, et opum furiosa cupido:

Et cum possideant plurima, plura volunt.

Sic quibus intumuit suffusâ venter ab undâ,

Quo plus sunt potæ, plus sitiuntur aquæ.

In pretio pretium nunc est. Dat census honores,

Census amicitias; pauper ubique jacet.

Ovidius l. i. Fast. ver. 95. et 211.

Tam rarum est liberalitatis exemplar, ea invasit homines habendi cupido, ut possideri magis à divitiis, quam eas possidere, videantur. *Plinius l. ix. Ep. 30.*

CAPUT VII.

Quod satis est. cui contingit, nihil amplius optet.

Horat. l. i. Ep. 2.

1. Non possidentem multa vocaveris

Rectè beatum. Rectiùs occupat

Nomen beati, qui Deorum

Muneribus sapienter uti,

Duramque callet pauperiem pati,

Pejúsque letho flagitium timet:

Non ille pro caris amicis,

Aut patriâ timidus perire.

L. iv. Od. 9. - 7

Contemplatus Cato major Manii Curii villam, quæ non longè aberat à suâ, admirari satis non poterat vel hominis ipsius continentiam, vel temporum disciplinam. Huic Curio ad focum sedenti in agresti scamno, et ligneo catillo cœnanti, cùm magnum auri pondus Samnites attulissent; repudiati ab eo suat, dixitque: *Non aurum habere, sibi præclarum videri, sed iis, qui haberent aurum, imperare.* Quo responso Curius Samnitibus ostendit, se, ut non acie vinci, sic non pecuniâ corrumpi, posse. *Valer. l. iv. c. 3. Cicer. de Senect. n. 55.*

Idem cùm ex Italiâ Pyrrhum expulisset, nihil omninò ex prædâ regiâ, quæ exercitum urbemque ditaverat, attigit, præter guttum ligneum, quo deinde ad sacrificia usus est. Cùmque senatus civibus septena jugera agri ex hostibus capti assignâset, ipsi autem quinquaginta; plus accipere, quàm singulis è plebe datum fuerat, noluit: parum idoneum, imò etiam perniciosum reipublicæ civem eum existimans, cui septem jugera non essent satis. *Valer. ibid. Auctor. de Vir. ill. c. 33. Plin. l. xviii. c. 3.*

2. Non ditior Curio Atilius Regulus fuit. Cùm in Africâ Carthaginis opes crebris præliis contunderet, ac prorogatum sibi ob res bene gestas imperium cognovisset, scripsit consulibus, villicum agelli, quem septem jugerum habebat, mortuum esse; et servum, quem ille conduxerat, occasionem nactum, aufugisse ablato rustico instrumento; ideoque petere se, ut sibi successor in Africam mitteretur, ne, deserto agro, non esset unde uxor et liberi alerentur. Quæ postquam senatus à consulibus accepit; res, quas Regulus amiserat, publicâ impensâ redimi jussit, agellum dari colendum, et alimenta conjugum ac liberis præberi. *Valer. l. iv. c. 4.*

3. Legati à Samnitibus ad C. Fabricium imperatorem Romanorum venerunt: et commemoratis quæ ille benevolè in Samnites post redditam illis pacem fecerat; dono ei obtulerunt cùm servos multos, tum grandem pecuniam, atque orârunt ut acciperet utereturque. Id verò se facere dixerunt, quòd viderent multa ei ad splendorem domûs et victûs deesse: *neque pro magnitudine ejus ac dignitate lautum illi apparatus esse.* Cœnabat quippe ad focum illas ipsas radices, herbas, quas in agro repurgando triumphalis senex vulserat: totaque ejus supellex argentea salino constabat, et patellâ ad usum sacrorum, quæ tamen ipsa corneo pediculo sustinebatur. Tum Fabricium ferunt res-

pondisse: *Quamdiu cupiditatibus obsistere atque imperare posset, nunquam sibi quidquam defuturum: propterea se pecuniam, quã nihil sibi opus esset, non accipere ab iis, quibus sciret eam usui esse.* Erat certè Fabricius, continentia suã beneficio, sine pecuniã prædives: quia locupletem illum faciebat non multarum rerum possessio sed paucarum desiderium. Ergo domus ejus; quemadmodum argento et mancipiis Samnitum vacua fuit, ita gloriã ex his contemptis partã, referta fuisse dici potest. *Aul. Gell. i. c. 12. Senec. de Prov. c. 3. Valer. l. iv. c. 4. Ibid. l. iv. c. 3.*

Vivitur parvo bene, cui paternum
Splendet in mensã tenui salinum;
Nec leves somnos timor aut cupido
Sordidus aufert.

Horat. l. ii. Od. 16.

Qui domum intraverit, nos potiùs miretur, quã suppellectilem nostram. Magnus ille est, qui fictilibus sic utitur, quemadmodum argento; nec ille minor est, qui sic argento utitur, quemadmodum fictilibus. Infirmi enim animi est pati non posse divitias. *Senec. Ep. 5.*

4. Cùm Caius Cæsar, cui cognomen Caligula, Demetrio philosopho ducenta sestertia donaret; ridens hic rejecit, ne dignam quidem summam judicans, quã non acceptã gloriari posset: miratusque Caii dementiam, quòd se putasset hãc pecuniã posse mutari: *Si tentare, inquit, me constituerat, toto illi fui experiendus imperio.* *Senec. 7 Benef. c. 8. 12.*

Sunt quidem exempla hæc præclara: sed mores nostri corrupti depravatique sunt amore divitiarum: quarum magnitudo illum fortassè adjuvat, qui habet: quamquam ne id quidem semper: sed fac juvare: an propterea honestior est? *Cicer. 2 Offic. n. 71.*

Delectant multos magnifici apparatus, vitæque cultus cum elegantia et copia: quibus rebus effectum est, ut infinita pecuniæ cupiditas esset. *Cicer. 1 Offic. n. 25.*

CAPUT VIII.

Optimus quisque Græcorum pauperrimus.

1. Viri inter Græcos præstantissimi, per vitam omnem in summâ paupertate versati sunt, nec eorum virtus pecuniâ potuit expugnari. *Ælian. l. ii. c. 43. xi. c. 9.*

Ephialtes Sophonidæ filius pauperrimus fuit. Cùm verò amici ducenta talenta ei dono darent; ipse non accepit, dixitque: *Hæc non accipio, propter quæ, si gratus videri velim, cogar fortassè aliquid præter jus concedere: si verò nihil gratificer, habeat ingratus.* Aded autem eum inopiæ non puduit, ut, homine nescio quo eam illi exprobrante, responderit: *Cur non etiam alterum exprobras, quòd justitiam colam?* *Ibid. l. xiii. c. 39.*

2. Epaminondas dux clarissimus Thebanorum, unam solùm habebat vestem. Itaque quoties eam mittebat ad fullonem, ipse interea cogebatur se continere domi, quòd vestis altera deesset. In hoc statu rerum cùm, ei Persarum rex magnam auri copiam misisset, noluit accipere. Si rectè judico, celsiore animo fuit is, qui aurum recusavit, quàm qui obtulit. *Ibid. l. v. c. 5.*

Diomedon Cyzicenus rogatu Artaxerxis Epaminondam pecuniâ corrumpendum susceperat. Venit ergo Thebas cum magno auri pondere, et per Micythum adolescentulum Epaminondæ carissimum, quem quinque talentis corruerat, causam adventûs sui ostendit. At ille Diomedonti: *Nihil, inquit, opus pecuniâ est. Nam si ea rex vult, quæ Thebanis sunt utilia, gratis facere sum paratus; sin autem contraria, non habet auri neque argenti satîs: Namque orbis terrarum divitias accipere nolim pro abjiciendâ patriæ caritate. Te, qui me incognitum tentâsti, tuique similem existimasti, non miror: tibi que ignosco. Sed egredere propherè, ne alios corrumpas, cùm me non potueris. Tu, Micythe, argentum huic redde. Quod nisi confestim facis, ego te tradam magistratui.* *Corn. Nep. in Epam. c. 4.*

Paupertatem verò aded facibè perpessus est Epaminondas, ut de republicâ nihil præter gloriam ceperit; et amicorum facultatibus non ad suam, sed ad aliorum paupertatem sublevandam, usus sit. Nam cùm aut civium suorum aliquis ab hostibus esset captus, aut viri probi

virgo nubilis propter paupertatem collocari non posset; amicorum consilium habebat, ab iisque postulabat atque impetrabat, ut pro suis quisque facultatibus conferret ad conficiendam pecuniæ summam, quâ opus esset. c. 3.

3. Etsi sæpe exercitibus præfuit, summosque magistratus gessit Phocion Atheniensis, fuit tamen perpetuò pauper, nec ditior fieri voluit, cum facile posset. Attulerant ei legati Philippi Macedonum regis magnam pecuniæ vim. Quam quia magno animo repudiabat, eum admonuerunt, ut, si ipse pecuniâ facile careret, liberis tamen suis prospiceret, quibus difficile futurum esset in summâ paupertate paternam gloriam tueri. His ille: *Si mei similes, inquit, erunt filii, idem hic agellus eos alet, qui me ad hanc dignitatem perduxit: Sin dissimiles sint futuri, nolo meis impensis illorum alicuius augerique luxuriam.* Corn. Nep. in Phoc. c. 1.

Eidem Phocioni Alexander Philippi filius centum alenta dono misit. Oblati muneris magnitudine nihil motus Phocion, eos, qui pecuniam attulerant, percontatus est, *cur sibi uni inter tot Athenienses dona mitteret Alexander?* Quibus respondentibus, *eum unum Alexandro videri virum honestum et bonum.* Ergo sinat, inquit ille, *me talem et haberi et esse.* Institerunt tamen legati, ut allatum auri pondus acciperet, maximè ubi domum ejus ingressi, vilem ubique suppellectilem et uxorem ejus pinsentem viderunt: ipseque, haustâ in eorum conspectu aquâ è puteo, pedes lavit. At ille non mutatâ sententiâ: *Si eam, inquit, quam offertis obtruditisque mihi, pecuniam accepero, neque eâ utar, frustra tantus thesaurus in manus meas venerit: si vero utar, et mihi et Alexandro malam apud Athenienses famam comparabo.* Sic in Asiam ad Alexandrum reportata fuit illa pecunia; et ditior est visus, qui eâ æquo animo carere potuit, quàm qui obtulit.

Munera sua fuisse à Phocione repudiata molestè ferens Alexander, scripsit ad eum: *Non habere se pro amicis eos, qui nihil à se vellent accipere.* Eandem pecuniâ denuo offerri jussit, et quatuor Asiæ urbes nominari, quarum unam pro arbitrio eligeret, cujus redditibus fruere-tur. Phocion ne sic quidem quicquam accepit. Ne tamen planè Alexandrum contemnere videretur, hoc regiæ majestati dedit, ut liberos dimitti rogaret viros quatuor, qui in arce Sardiæ vinciti tenebantur: quòd extemplo præstitit Alexander.

Antipater dicebat duos se Athenis habere amicos, Phocionem et Demadem: quorum alteri persuadere non posset ut quicquam acciperet; alterum, multa dando, explere nequiret. *Plut in Phocione. Ælian, l. xi. c. 25. l. xi. c. 9.*

CAPUT IX.

Parvo contentus sapiens, paupertatem non timet.

1. Quàm parvo contentus est sapiens! quàm parum paupertatem timet! Etenim quæ res pecuniæ cupiditatem afferunt, gula, ambitio, libido, cùm procul ab iis omnibus rebus absit; cur pecuniam magnoperè desideret, vel potius curet omnino? Ducebat certè pro nihilo pecuniam Anacharsis Scythes, cujus extat epistola, his verbis: *Anacharsis Hannoni salutem. Miki amictus est, ut Scythis, fera pellis: calceamentum, pedum callum: cubile, terra: obsonium, fames; lacte, caseo, carne, vescor: Quare ut ad quietum me licet venias. Munera autem ista tua, vel civibus tuis, vel Diis immortalibus dona.* Cicer. 5. Tusc. n. 89.

Socrates, qui eum Diis proximum dicebat, cui quàm paucissima satis essent, cùm aliquando in pompâ magnam vim auri atque argenti ferri videret: *Quàm multa non desidero!* inquit. *Diag. Laërt. in Socrat. Cicer. 5 Tusc. n. 90.*

2. Xenocrates, cùm legati ab Alexandro quinquaginta ei talenta attulissent, quæ erat pecunia temporibus illis, Athenis præsertim, maxima; abduxit legatos ad cœnam in academiam, iisque apposuit tantum quod satis esset, nullo apparatu. Cum postridie rogarent eum, cui numerari pecuniam juberet? *Quid? vos hesternâ, inquit, coenulâ non intellexistis, me pecuniâ non egere?* Quo responso factos illos tristiores ut vidit: triginta minas accepit: ne aspernari regis liberalitatem videretur. *Cicer. ibid.*

3. Diogenes Alexandro roganti, ut diceret, si quid sibi opus esset, liberè, ut Cynicus, respondit: *Nunc quidem paulum à sole absis.* Offecerat videlicet apricanti. His auditis Alexandrum dixisse ferunt: *Nisi Alexander essem, libenter essem Diogenes.* Multò potentior multòque

focupletior tunc erat Diogenes omnia possidente Alexandro. Etenim aliquid majus erat, illum nolle accipere quod offerretur, quàm hunc posse dare. Et qui gloriari solebat, à nullo se beneficiis victum, eo die victus est, quo vidit aliquem, cui nec dare quicquam posset nec eripere. *Ibid. Senec. 5 Benef. c. 4. et 6.*

Diogenes quidem prædicare solebat, quantò ipsum regem Persarum felicitate superaret: *Sibi nihil deesse, illi nihil satís unquam fore: se ejus voluptates non deeedere, quibus nunquam satiari ille posset: suas cum consequi nullo modo posse.* Hæc verè Diogenes: Nam Xerxes refertus omnibus præmiis bonisque fortunæ, non peditatu, non equestribus copiis, non navium multitudine, non infinito pondere auri contentus, præmium proposuit ei quæ invenisset novam voluptatem. Quæ inventâ ipse non fuit contentus. Neque enim unquam finem invenit libido. *Cicer. 5 Tusc. n. 92. Ibid. n. 20.*

CAPUT X.

Divitiæ atque otium pestes virtutis.

1. Ut Lacedæmoniis nihil superesset quod magno- perè quærerent, præter laudem virtutis, auri argenti- usum, velut omnium scelerum materiam, sustulit Lycurgus. Hocque aded severe ab illo interdictum scribunt, ut inquireretur de auri possessione, tanquam de gravi scelere: et qui hæc in re contra leges peccasse deprehensus esset, morte pœnas daret. Solo ferreo nummo uti permisit, qui ita gravis pondere et mole amplius erat, ut ad transferendum non ita magnum ejusmodi nummorum numerum plaustro opus esset. Emi autem pleraque non pecuniâ, sed mutatione mercium jussit. Fundos æqualiter inter omnes divisit, ut æquata patrimonia neminem altero potentio- rem redderent. *Justinus, l. iii. c. 2 Plutar. in Lycurg. Xenoph. in Lacon.*

Cùm Lacedæmoniis solitum esset non solùm in acie adversus hostem, sed etiam domi adversus divitias, invictum animum gerere; Lacedæmonius adolescens, qui vilissimo pretio fundum emerat, in judicium vocatus est apud magistratus, et damnatus. Mali quippe exempli visum est, juvenem lucri studio teneri. *Ælian. l. xiv. c. 41.*

Alter Lacedæmonius, nomine Timandridas, peregrè abiens, domus suæ ac rei familiaris curam filio reliquit. Reversus postea, ab eo rem suam multò ampliorem factam cùm comperisset; dixit: *Magnam ab illo Diis, profinguis, amicis, hospitibus, ac pauperibus factam esse injuriam; quæ enim in facultatibus frater necessaria ad vitam abundarent, ea in illos esse eroganda.* Ibid. c. 32.

2. Tamdiu gloriâ et potentiâ floruit Lacedæmoniorum respublica, quamdiu apud eam paupertatis amor viguit. Invictam per quingentos annos præstiterat severa Lycurgi disciplina: intra annos haud multos divitiæ pessumdedere. Primus Lysander iis, quibus carebat ipse, vitiis patriam infecit; et pecuniæ abstinens, ejus cupiditatem injecit civibus. Quidquid auri et argenti ex prædâ hostili redegerat, non sibi vindicavit, sed Lacedæmonem defendendum curavit, quæ antea ferreis tantum nummis utebatur. Tum verò exortum est inter privatos studium habendi, et sic interiit pristina eorum virtus: suoque ipsi damno intellexere, quàm verum esset quod olim Lycurgo interroganti Pythia responderat: *Auro et argento inaccessam esse Spartam oportere.* *Ælian.* l. xiv. c. 29. *Plut.* in Lycurgo et Syllâ.

3. Quomodo priscorum quoque Romanorum virtus labefactata fuerat, narrant his verbis Sallustius et Paternus. Ubi labore atque justitiâ respublica crevit, reges magni bello domiti, populi ingentes vi subacti, et Carthago æmula imperii Romani interiit; tum iis qui labores, pericula, dubias atque asperas res facile toleraverant, otium et divitiæ oneri miseriaque fuere. Non lento gradu, sed præcipiti cursu à virtute descitum est, et ad vitia transcursum: vetus disciplina deserta, nova inducta: à vigiliis ad somnum, ab armis ad voluptates, à negotiis in otium conversa civitas. Primò pecuniæ, dein imperii cupiditas crevit. Ea quasi materies omnium malorum fuere. Postquam divitiæ honori esse cœperunt, et eas magistratus atque imperia sequebantur, habescere virtus, paupertas probo haberi cœpit: juventutem luxuria atque avaritiâ cum superbiâ invasere. *Sallust. Cat.* c. 10. 12. *Paternus.* l. iv. c. 1.

Vidit P. Scipio posterior, quantum periculi patriæ immineret, ab nimis opibus. Nam cùm censor lustrum conderet, et in solito fieri sacrificio scriba solenne precationis carmen ei præiret, quo Dii rogabantur, ut populi

Romani res meliores amplioresque facerent: *Satis*, inquit, *bonæ ac magnæ sunt: Itaque precor ut eas perpetuò incolumes servant.* Ac protinus ad hunc modum carmen emendari jussit. Quà votorum verecundiâ deinceps censores in condendis lustris usi sunt. *Valer. l. iv. c. 1.*

CAPUT XI.

Vera bona virtus et doctrina.

1. Urbem Megaram ceperat Demetrius, cui cognomen Poliorcestes fuit. Ab hoc Stilpon philosophus interrogatus, num quid perdidisset? *Nihil*, inquit, *omnia namque mea mecum sunt:* Atqui et patrimonium ejus in prædam cesserat, et filios rapuerat hostis, et patriam expugnaverat. Ille tamen nihil se damni passum fuisse testatus est. Habebat enim secum vera bona, doctrinam scilicet, et virtutem. in quæ hostis manum injicere non poterat, et ea, quæ à militibus diripiebantur, non judicabat sua. Omnium scilicet bonorum, quæ extrinsecus adveniunt, incerta possessio est. Ita inter micantes ubique gladios et ruentium tectorum fragorem uni homini pax fuit. *Senec. de Const. c. 5.*

2. Nunquam vir sapiens existimavit in bonis rebus ponenda esse, atque expetenda imperia, tecta magnifica, pecunias, et eas, quibus plerique hominum maximè adstricti sunt, voluptates: quoniam ea qui habent, non solum augendi libidine cruciantur, sed etiam amittendi metu: et illa omnia esse talia videmus, ut etiam improbi habeant, et obsint probis. Plus apud sapientem vera ratio valet, quàm vulgi opinio; neque unquam quis illum bona perdidisse dicet, qui pecus aut supellectilem amiserit. Hæc erat, sententia Biantis, qui inter septem illos Græciæ sapientes numeratur. Cum patriam ejus Prienem cepisset hostis, cæterique cives multa è suis rebus secum asportarent; admonitus à quodam ut idem ipse faceret: *Ego verò*, inquit, *facio, nam omnia mea porto mecum.* Ille hæc munera, vel potius ludibria fortunæ, non putavit sua. Ea verò tantum esse sua existimavit quæ pectore gestabat, virtutem scilicet et doctrinam. *Cicer. 1 Parad. Valer. l. vii. c. 2.*

3. Quidquid auri supra et infra terram est, nullius pretii est, si cum virtute comparetur, inquit Plato. Et viris probis illud Solonis in mente semper habendum, et verbis usurpandum: *Alii sibi divitias habeant, nos virtutem.* Plat. de util. ex inim.

CAPUT XII.

Cavenda est gloriæ cupiditas, neque imperia expetenda.

1. Cavenda est gloriæ cupiditas: eripit enim libertatem, pro quâ magnanimis viris omnis debet esse contentio. Nec verò imperia expetenda: ac potius aut non excipienda interdum, aut deponenda nonnunquam. *Cicer. 1 Offic. n. 63.*

Timoleon Corinthius magnus omnium iudicio vir exstitit. Namque huic contigit quod nescio an ulli, ut patriam oppressam à tyrannis liberaret, et depulsâ à Syracusis, quibus auxilio erat missus, inveteratâ servitute, totam Siciliam in pristinum statum restituerit. Cùm frater ejus Timophantes tyrannidem Corinthi occupasset, ipseque particeps regni cum illo posset esse: tantum abfuit à societate sceleris ut antetulerit civium suorum libertatem saluti fratris: et patriæ legibus obtemperare satius duxerit quàm imperare. Itaque fratrem tyrannum, sæpiùs frustra oratum ut civibus libertatem restitueret, interficiendum curavit. Quæ cædes aliis præclarissimum facinus visa est, alii læsam à Timoleonte pietatem fraternam putavère. *Corn. Nep. et Plut. in Timok.*

Missus à Corinthiis ad ferendam opem Syracusanis. Dionysium tyrannum totâ Siciliâ depulit; civitatibus leges libertatemque reddidit: et ex maximo bello tantum otium toti insulæ conciliavit, ut urbium conditor videretur. Cùm jam tantis esset opibus, ut Siculis etiam invitis imperare posset; tantum autem haberet amorum omnium, ut, nullo recusante, summam potentiam obtineret: cùm primum potuit, imperium deposuit, et privatus Syracusis, quod reliquum vitæ fuit, vixit. Nullus tamen illi honos, qui haberi virtuti solet, defuit: neque postea res ulla gesta est publica, de qua priùs sit decretum, quàm Timoleonis sententia cognita fuisset. Acceptius præstantiusque nihil

est tyrannorum depulsoribus, maximè si modesti ipsi abstinentesque sint. *Aur. Vict. c. 40.*

2. Cùm Romæ fama exorta esset Etruscos Samnitesque conscribere ingentes exercitus, et illustres viri consulatum peterent; omnium animi atque oculi conversi sunt in Q. Fabium Maximum, primò non petentem, deinde etiam recusantem. Acuebat hæc moderatione tam justa civium studia: quæ verecundiâ legum restinguenda ratus, legum recitari jussit, quâ intra decem annos eundem consulem refici non liceret; tot verò anni non effluerant ab ultimo ejus consulatu. Vix præ strepitu audita lex est. Tribunique plebis nihil id impedimenti futurum aiebant: se enim laturos ad populum, ut legibus solveretur. Ille in recusando præstabat, rogans: *Quid ergo attineret leges ferri, quibus per eosdem, qui tulissent, frans fieret?* et querens, *jam regi leges, non regerè.* Populus nihilominus suffragia inibat, et singulæ centuria consulem haud dubiè Fabium jubebant. Tum demum, consensu civitatis victus, consulatum accepit, eique is collega est datus, quem petierat. *Livius, l. x. c. 13.*

Idem Fabius, cùm à se quinquies, et à patre, avo, proavo, majoribusque suis consulatum gestum animadverteret, in comitiis, quibus filius ejus summo consensu consul creabatur, flagitavit à populo, sed frustra, ut vacationem hujus honoris Fabiæ genti daret. Non quòd filii virtutibus diffideret; sed ne maximum imperium in unâ familiâ continuaretur. Quid hæc moderatione valentius et mirabilius inveniri potest; quæ etiam patrios affectus, qui potentissimi habentur, superavit? *Valer. l. iv. c. 1.*

3. Comitia consulibus creandis habente Fulvio, centuria juniorum, quæ prima sententiam rogata fuerat, declaravit consules T. Manlium Torquatum et T. Otacilium. Cùm dubius non esset consensus totius populi; Manlius, qui præsens erat, ad tribunal Fulvii venit, magnâ circumfusa turbâ, quæ gratulandi causâ venerat, petiitque ab eo, ut pauca verba audiret. Erectis omnibus expectatione quidnam postulaturus esset, oculorum valetudinem excusavit. Dixit: *Impudentem et gubernatorem et imperatorem futurum esse, qui cùm alienis oculis ei omnia agenda essent, aut postularet aut pateretur sibi aliorum capita et fortunas committi.* Oravitque et centuria juniorum in suffragium rediret, et in consulibus creandis næ-

minisset belli, quod in Italiâ esset, gravissimi. Succlama-
vit centuria frequens nihil se mutare sententiæ, seque
eosdem consules dicturum esse. Tum Torquatus: *Neque
ego vestros, inquit, mores consul ferre poterò, neque vos
imperium meum. Redite in suffragium, et cogitate bellum
Punicum in Italiâ, et ducem Annibalem, esse.* Tandem
centuria autoritate viri mota, post petitum atque habitum
cum senioribus colloquium, ex eorum consilio alios con-
sules dixit jam præclarè gestis cognitos: ejusque senten-
tiam omnes centuriæ secutæ sunt. *Livius, l. xxvi. c. 22.*

4. Maxima superioris Africani merita in patriam
paribus ornamentis decorare conati sunt Romani. Volu-
erunt illi statuas in comitio, in rostris, in curiâ in ipsâ
denique Jovis æde ponere. Voluerunt imaginem ejus
triumphali ornatu indutam inter Deorum simulacra collo-
care. Voluerunt ei continuum per omnes vitæ annos con-
sulatum, perpetuamque dictaturam tribuere. Quorum
sibi nullum neque plebiscito dari, neque senatusconsulto
decerni patiens, penè tantum in recusandis honori-
bus se gessit, quantum gesserat in emerendis. *Valer.
l. vi. c. 1.*

5. Diocletianus, sponte depositis imperialibus fasci-
bus, in propriis agris consenuit. Quum aliquando ab
Herculio, et Galerio ad recipiendum imperium exci-
taretur: illud tanquam pestem detestans, hoc quoque
respondit: *Utinam Salona posses visore olera nostris mani-
bus consita et dimensa, profectò nunquam istud tentandum
judicaretis.* *Aur. Vict. Ep. c. 54.*

6. Fuit incertum vir melior, an dux, esset Epami-
nondas. Nam et imperium non sibi, sed patriæ, semper
quæsit; et pecuniæ adeò negligens fuit, ut sumptus funeri
defuerit. Gloriæ quoque non cupidior, quàm pecuniæ:
quippe recusanti omnia imperia ingesta sunt: honores-
que ita gessit, ut ornamentum non accipere, sed dare
ipsi dignitati, videretur. *Justin. l. vi. c. 8.*

CAPUT XIII.

Hoc est regnare, nolle regnare, cùm possis.

Senec. 6 Benef. c. 37.

1. Cùm P. Cornelius Scipio prælio victor, se erga Hispanos gessisset perhumaniter, circumfusa multitudo regem eum ingenti consensu appellavit. Tum Scipio, silentio per præconem facto, dixit: *Nomen Imperatoris, quo se milites sui appellassent, sibi maximum esse: Regium nomen, alibi magnum, Romæ intolerabile esse: Si id amplissimum ducerent quod regale esset; regalem animum in se esse tacitè judicare eos posse: ut autem à regis appellacione absterent, se orare.* Sensère etiam barbari magnitudinem animi id nomen aspernantis, cujus admiratione alii mortales stuperent. *Livius, l. xxvii. c. 19.*

2. Inter Romanorum legatos, qui ad Pyrrhum de captivis redimendis aut commutandis venerent, C. Fabricius fuit. Cujus postquam audivit Pyrrhus magnum esse apud Romanos nomen, ut viri boni et bello insignis, sed admodùm pauperis; eum præ cæteris benignè habuit, contenditque ut munera atque aurum abs se acciperet, in hospitii tantum et amicitie pignus. Cuncta oblata respuit Fabricius. Postero die cùm illum exterrere cuperet Pyrrhus subito conspectu elephantis, cujus specimen nunquam viderat; imperavit suis ut bellua, quæ cæteras magnitudine præstaret, Fabricio secum colloquenti admo-veretur à tergo post aulæum. Quod ubi factum est, signo dato, remotoque aulæo, repentè bellua stridorem horridum emisit, et proboscidem super Fabricii caput suspendit minaciter. At ille placidè ad belluam conversus, subrisit, dixitque Pyrrho: *Non me hodie magis commovet tua bellua, quam heri aurum tuum movit.* Admiratus Pyrrhus Fabricii fortitudinem animi et gravitatem, illum privatim invitavit, ut, post factam cum Romanis pacem, secum vellet vivere, primumque ei inter amicos locum atque etiam imperii partem obtulit. Cui commissâ voce fertur Fabricius respondisse: *Hoc tibi, ô rex, non expedit. Nam illi ipsi, qui te nunc tantopere colunt ac mirantur, si me cognoverint ac probaverint, magis à me regi, quam à te volent.* *Plut. in Pyrrho. Florus, l. i. c. 18.*

3. Cùm Strato Sidonis rex urbis deditioem Alexandro fecisset magis civium voluntate, quàm suâ sponte ; ei visus est indignus regno, Hephæstionique est permissum, ut regem è Sidoniis constitueret eum, quem illo fastigio dignissimum arbitraretur. Erant Hephæstioni hospites, juvenes inter suos clari : qui factâ ipsis ab Hephæstione potestate regnandi, negaverunt quemquam patrio more ad hanc dignitatem evehi posse, nisi regiâ stirpe ortum. Admiratus Hephæstion magnitudinem animi spernentis quod alii per ignes ferrumque peterent : *O fortes ! ô felices, inquit, juvenes ! qui primi intellexistis quanto majus esset regnum fastidire, quàm accipere. Cæterùm date aliquem regiâ stirpis qui meminerit à vobis acceptum habere se regnum.* At illi, cùm viderent multos avidâ regnandi cupiditate teneri, judicârunt neminem esse tanto honore digniorem, quàm Abdalonimum quendam, sterpi quidem regiæ annexum, sed qui ob inopiam suburbanum hortum exiguâ mercede coleret. Causa ei paupertatis, sicut plerisque, probitas erat : intentusque operi diurno, strepitum armorum, qui totam Asiam concusserat, non exaudiebat. Q. Curt. l. iv. c. 1.

Juvenes, de quibus, antè dictum est, cum regiâ veste hortum intrant, quem tum fortè, steriles herbas evellens, Abdalonimus repurgabat : et rege eo salutato, alter ex his : *Vestis hæc, inquit, quam cernis in meis manibus, cum squalidis istis stannis sternulanda tibi est. Cave regis animum, et in eam fortunam, quâ dignus es, istam continentiam profer. Atque cùm in regali solio residebis, vitæ necisque omnium civium dominus, cave obliviscaris hujus stantis in quo accipis regnum, imo herculè propter quem.*

Somnio similis res Abdalonimo videbatur : et à juvenibus quærebat, an sanæ mentis essent qui tam protervè sibi illuderent. Sed ut ei cunctanti squalor ablutus est, et injecta vestis purpurâ auroque distincta, et jurantibus seriam rem esse credidit : iisdem comitantibus in regiam pervenit. Admitti eum Alexander protinus jussit, diuque contemplatus : *Corporis, inquit, tui habitus famæ generis non repugnat. Sed velim scire, inopiam quâ patientiâ tuleris.* Tum ille ; *Utinam, inquit, eodem animo regnum pati possim. Hæc manus suffecere desiderio meo. Nihil habenti nihil defuit.* Hoc responsum magnæ indolis specimen Alexandro est visum. Itaque non Stratonis modò regiam supellectilem tribui Abdalonimo jussit, sed pleraque etiam ex

Persicâ prædâ. Regionem, quoque Sidoni vicinam, ditioni ejus adjecit. Nec sanè quidquam ingenium Alexandri solidius et constantius habuit quàm admirationem veræ laudis et gloriæ. *Quint. Curt. l. viii. c. 14.*

CAPUT XIV.

Gloriæ et famæ jactura faciendâ est publicæ utilitatis causâ.

1. Inventi sunt multi, qui non modò pecuniam, sed etiam vitam, pro patriâ profundere parati essent; iidem gloriæ jacturam ne minimam quidem facere vellent, etiam republicâ postulante. Ut Callicratidas, qui, cùm Lacedæmoniorum dux fuisset Peloponnesiaco bello, multaquæ fecisset egregiè: vertit ad extremum omnia, cùm consilio non paruit eorum, qui classe cum Atheniensibus ne dimicaret, suadebant: Quibus ille respondit: *Lacedæmonios, classe illâ amissâ, aliam parare posse; se fugere sine suo dedecore, non posse*: Quantò meliùs fecit Q. Fabius Maximus! de quo Ennius:

Unus homo nobis cunctando restituit rem:

Non ponebat enim rumores ante salutem.

Ergo pòstque magisque viri nunc gloria claret.

Cic. 1 Offic. n. 84.

Etenim adversus Annibalem callidum imperatorem toties victorem, dux à Romanis electus Q. Fabius, novem vincendi artem commentus est, non pugnare, et hostem morâ frangere. Unde Cunctator est dictus. *Florus, l. ii. c. 6. Livius, l. xxii.*

Non ignorabat suam cunctationem Romæ infamem esse, seque timidum pro cautò, imbellem pro perito belli haberi. At maluit ut se hostis metueret, quàm stulti cives laudarent. Obstinatus in id quòd videbat patriæ saluti futurum esse, eodem consiliorum tenore semper bellum gessit. Q. Minucium magistrum æquitum jure imperii æquari Fabi dictatori jussit populus, veræ virtutis malus æstimator. Quam legem omnes qui Romæ aut in castris erant, æqui atque iniqui, præter ipsum dictatorem, in contumeliam ejus latam esse judicaverunt. Ipse quâ gravitate criminantes se ad multitudinem inimicorum tolerat

câdem et populi in se sævientis injuriam tulit. Invictum tam à civibus quàm ab hoste animum retinuit, et patriæ consulere etiam famæ suæ dispendio non destitit.

Ea caritas patriæ esse debet, ut tam ignominiâ eam, quàm morte nostrâ, si opus sit, servemus. *Livius, l. ix. c. 4.*

2. Et honores et contumeliæ vulgi in promiscuo habendi sunt; nec his dolendum, nec illis gaudendum. Alioquin multa timore aut tædio contumeliarum necessaria omitemus; et publicis privatisque officiis deerimus, dum muliebris nos cura anget aliquid contra animum audiendi. *Senec. de Const. c. xix.*

Vera et sapiens animi magnitudo honestum in factis positum esse, non in gloriâ, judicat. Qui ex imperitiæ multitudinis judicio pendeat, hic in magnis viris non est habendus. *Cicer. 1 Offic. n. 65.*

Gloriam qui spreverit, veram habebit. *Livius, l. xxii. c. 39.*

3. Sunt qui, quod sentiunt, etiamsi optimum sit, tamen invidiæ metu non audent dicere. Quod genus peccandi vitandum est in rebus urbanis; et T. Quintius Capitolinus vitavit. Cùm Romæ patrum ac plebis certamina civitatem distraherent, Æqui Volsциque papulabundi accessere. Unde postquam prædas inulti egere, tribunis delectum militum impediens; T. Quintius Capitolinus quartum consul, populum ad concionem vocavit; eumque graviter objurgatum cùm liberè monuisset quæ agenda essent, hæc subjunxit: *His ego gratiora alia dictu esse scio: sed me vera pro gratis loqui, etsi meum ingenium non moneat, necessitas cogit. Vellem equidem vobis placere, Quirites: sed malo vos salvos esse, qualicumque erga me animo futuri estis.* *Cicer. 1 Offic. n. 84. Livius, l. iii. c. 68.*

CAPUT XV.

Mortem ac dolorem contemnere fortis animi est.

1. Fortitudinis munus duplex; maximum mortis dolorisque contemptio. Fungendum est utroque, si virtutis *compotes*, vel potiùs, si viri esse volumus. *Cicer. 2. Tusc. n. 43.*

Hoc meditatam ad adolescentiã debet esse, mortem ut negligamus. Moriendum enim certè est: et id incertum, an eo ipso die. Qui autem id, quod vitari non potest, metuit, is vivere animo quieto nullo modo potest. *De Senec. n. 20. 2 Tusc. n. 2.*

Stultum est timere quod vitare non potes.

A morte semper homines tantundem absumus.

Homo vitæ commodatus, non donatus est.

P. Syrus.

Non terret sapientem mors, quæ propter incertos casus quotidie imminet, propter brevitatem vitæ nunquam longè potest abesse. Dedit nobis natura usuram vitæ tanquam pecuniæ, nullâ præstitutâ die. Quid est igitur quod querare, si repetit cum vult? eã enim conditione acceperas. Quæ verò ætas longa est? aut quid omnino homini longum? Apud Hypanim fluvium, qui in Pontum influit, Aristoteles ait bestiolas quasdam nasci, quæ unum diem vivant. Ex his igitur quæ horâ diei octavâ mortua est provecctâ ætatè mortua est? quæ verò occidente sole, decrepita. Confer nostram longissimam ætatem cum æternitate, in majore brevitare, quàm illæ bestiolæ, reperiemur. *1 Tusc. n. 91. &c.*

2. Contemnamus omnes ineptias, beatamque vitam in animi robore ac magnitudine, et in omnium rerum humanarum despicientiã, ac mortis contempitione ponamus. Nunc quidem cogitationibus mollissimis sic effeminamur, ut si mors celerius opinione nostrâ adventet, spoliari magnis quibusdam bonis nobis videamur. Quòd si, dum vivimus, expectando, desiderando, metuendo, pendemus animis, cruciamur, angimur: pro Dii immortales! quàm inter illud jucundum esse debet, quo confecto, nulla reliqua cura, nulla sollicitudo futura sit. *Ibid. n. 95.*

Quàm me delectat Theramenes! quàm elato est animo! Etsi enim flemus, cum ejus exitum legimus, tamen non miserabiliter vir clarus emoritur. Qui cum conjectus in carcerem jussu triginta tyrannorum Atheniensium, venenum, ut sitiens, bibisset; reliquum sic è poculo eiecit, ut id resonaret: quo sonitu reddito, ridens, *Prophino*, inquit, *hoc pulchro Critiæ*: qui in eum fuerat è tyrannis terribissimus. Græci enim in conviviis solebant nominare cui poculum tradituri essent. Tum servo publico, qui venenum præbuerat, poculum dedit præferendum. *Critiæ*

Lusit vir egregius extremo spiritu, cùm jam præcordiis conceptam mortem contineret, verèque Critiæ mortem est eam auguratus, quæ brevè consecuta est. *Valer. l. iii. c. 2.*

CAPUT XVI.

Non quàm diu, sed quàm benè, vixeris, refert.

1. Nemo tam imperitus est, ut nesciat sibi aliquando moriendum. Tamen cùm ad mortem propè accesserit, tergiversatur, timet, plorat. Nonne tibi videretur stultissimus omnium, qui flet quòd antè annos mille non vixisset? Æquè stultus est, qui flet quòd post annos mille non vivet. Utrumque tempus alienum nobis est. Non eris, nec fuisti. Quid fles? Eò ibis, quòd omnia eunt. *Senec. Epist. 77.*

Omnia debentur morti : paulùmque morati,
Seriùs aut citiùs sedem properamus ad unam :
Tendimus huc omnes, hæc est domus ultima.

Ovid. Metam. l. x. c. 32.

Fata manent omnes, omnes expectat avarus
Portitor, et turbæ vix satis una ratis.

Tendimus huc omnes ; metam properamus ad
unam :

Omnia sub leges mors vocat atra suas.

Ad. Liviam, ver. 357.

Lex universa est, quæ jubet nasci et mori. *P. Syrus.*

Ad hanc legem natus es : hoc patri tuo accidit, hoc matri, hoc majoribus, hoc omnibus ante te : hoc omnibus post te accidit. Quantus te populus moriturorum sequetur ! quantus comitabitur ! multa millia hominum et animalium hoc ipso momento, quo tu mori dubitas, animam vario mortis genere emittunt. Quomodo fabula, sic vita : non quàm diu, sed quàm benè, acta sit, refert. *Senec. ibid.*

Quod cuique tempus ad vivendum datur, eo debet esse contentus. Breve tempus ætatis satè est longum ad benè honesteque vivendum. *Cicer. de Senect. n. 69, 70.*

Stat sua cuique dies ; breve et irreparabile tempus
Omnibus est vitæ : sed famam extendere factis,

Hoc virtutis opus. *Virg. Æn. x. ver. 497.*

2. Major pars mortalium de naturâ conqueritur, quòd homini tam breve ad vivendum tempus datur. Verùm

non inopes vitæ, sed prodigi sumus: eam nulli bonæ rei impendimus, et per luxum, et negligentiam defluere finimus. Sicut amplæ cæpes, ubi ad malum dominum pervenerunt, momento dissipantur; at quamvis modicæ, si bono custodi traditæ sunt, sufficiunt, atque etiam usu crescut: ita vita, si scias uti, longa est. Ii verò soli uti sciunt, qui sapientiæ vacant. Vivere bonum non est, sed bene vivere. Itaque non, ut diu vivamus, curandum est, sed ut bene. Longa est vita, si plena est. Quid hominem juvant octoginta anni per inertiam exacti? Sapienter et fortiter factis metiamur cujusque vitam, non tempore. Laudemus et in numero felicitum reponamus eum, cui quantumcunque temporis contigit, bene collocatum est. *Senec. de Brev. c. 1. 2. Epist. 70. 97.*

Eo tempore, quod ad vivendum datur, si bene uti velis, etiam parvum amplissimum efficias, numerum annorum multitudine operum superando. *Valer. l. ix. c. 10.*

Excutienda tibi vitæ cupido est, discendumque, quàm bene vivas, referre, non quàm diu. *Senec. Ep. 101.*

CAPUT XVII.

Mortem æquo animo oppetit, qui bene vixit.

1. Profectò mors tum æquissimo animo oppetit, cùm suis se rectè factis vita occidens consolari potest. Nemo parum diu vixit, qui virtutis functus est munere. Quare si ipsa ratio minùs perficiet ut mortem negligamus; at vita acta perficiat, ut satùs superque nobis vixisse videamur. *Cicer. 1 Tusc. n. 109.*

Cùm sapientissimus esset Socrates, sanctissimèque vixisset; ita in iudicio capitis pro se dixit, ut non supplex aut reus, sed magister aut dominus iudicium, esse videretur. Quinetiam cùm ei scriptam orationem attulisset disertissimus orator Lysias, demissam et supplicem, et præsentì procellæ accommodatam, quam edisceret, si ei videretur. et quâ pro se apud iudices uteretur, non invitatus legit, et bene scriptam iudicavit. *Sed, inquit, quemadmodum si mihi calceos Sycionios (qui tum erant omnium elegantissimi) attulisses, non uterer, quamvis essent habiles et apti ad pedem, quia non essent viriles: sic illa oratio tua, diserta mihi et oratoria videtur, fortis et virilis non videtur.*

Causam ipse suam sic egit, ut, iudicibus quid pœnæ se commeruisse existimaret interrogantibus, responderit: *Id se meruisse, ut sibi victus quotidianus in Prytaneo publicè fraberetur*: qui honos apud Græcos maximus habebatur, quo responso sic iudices exarserunt, ut capitis hominem innocentissimum condemnarent. Nuncianti quòd eum iudices morte damnassent: *Et illos, inquit, natura. Uxorique cum lacrymis exclamanti: Ergone injustè morieris? An tu, respondit, justè malles?* Cicero I de Orat. n. 231. Quintil. l. ii. c. 1. Valer. l. vi. c. 4. Diog. Laërt. in Socr.

Non patronum ergo quæsit ad iudicium capitis Socrates, nec iudicibus supplex fuit: adhibuitque liberam contumaciam, à magnitudine animi ductam, non à superbia. Cùm facilè posset educi è custodiâ, et essent qui promitterent fugam, noluit: remansitque dies triginta in carcere et in expectatione mortis, ut duarum rerum gratissimarum hominibus metum demeret, mortis et carceris. Supremo vitæ die, cùm penè in manu jam mortiferum teneret poculum, locutus ita est, ut non ad mortem tradi, verùm in cælum videretur ascendere. Sic enim censebat, dicebatque: *Duas esse vias animorum è corpore excedentium. Num eos, qui se vitis contaminavissent, devium quòdam iter ingredi, seclusum à concilio Deorum: contra verò, facilem ad Deos aditum patere illis, qui se integros justosque servavissent, essentque in corporibus humanis vitam imitati Deorum.* Cicero 3 Tusc. n. 71. Senec. Epist. xxiv. et lxx.

Interrogatus Aristippus quomodo Socrates diem obiisset? *Ut ego, inquit, optârim.* Diog. Laërt. in Aristipp.

Nunquam magnis viris cara in corpore mora est: exire atque erumpere gestiunt, ægrè has angustias ferunt. Senec. ad Marc. c. 23.

2. Cùm Athenienses in concione et Phocionem, et nonnullos alios morte damnassent: hi quidem inter amicorum et propinquorum complexus lamentantes ejulantesque trahebantur in carcerem: ille verò eodem animo vultuque ibat, quo quondam publicè, accepto exercitûs imperio, domum deducebatur: ita ut gravitatem viri et constantiam mirari nemo satîs posset. Emphyletus, quo familiariter fuerat usus, cùm ei obviis dixisset lacrymans, *O quam indigna perferetis, Phocion!* Huic ille, *At non inopinata, inquit, hunc enim exitum plerique clari habu-*

erunt Athenienses. Inimici prætercurrentes incessebant eum conviciis. Unus etiam inspuit in faciem ejus. Ibi fama est Phocionem conversum ad Archontas, id unum dixisse: *An nemo hujus hominis confesceat petulantiam?* Rogante quodam ex amicis, nunquid filio suo Phoco mandari velit! *Maximè,* inquit, *jubeo enim eum populi Atheniensis injuriarum in me oblivisci.* Quod mandatum qui non admiratur, is mihi nihil egregium sapere videtur, inquit *Ælianus.* *Corn. Nep. in Phoc. Ælian. l. xii. c. 49.*

Postquam in carcerem ventum est, et cicuta teri cæpta, Phocionem Nicocle amico fidissimo rogante, sibi ut permitteret priori venenum haurire: *Ista quidem,* inquit, *ô Nicocle, molesta mihi valde et gravis est postulatio tua: verum quia nihil tibi unquam denegavi, hoc quoque largiar.* Ubi cæteri venenum biberunt, defecit: negavitque carnifex se aliam cicutam triturum, nisi duodecim drachmæ sibi essent numeratæ. Tum Phocion, accersito quodam amico, petiit ut carnifici illud pecuniæ daret: *quoniam ne gratis quidem mori Athenis licebat.*

3. Quum Canius Iulus, vir in primis magnus, cum Caio Cæsare Caligulâ fuisset altercatus; abeunti crudelia ille imperator dixit: *Ne fortè ineptâ spe tibi blandiaris, ad mortem te duci jussi.* Tum Canius magno animo: *Gratius,* inquit, *ago, optime princeps.* Decem medios usque ad supplicium dies sine ullâ sollicitudine exegit. Vix credi potest, quæ interea dixerit, quæ fecerit, quàm in tranquillo fuerit. Ludebat latrunculis, cum centurio trahens ad supplicium agmen hominum morte damnatorum, illum quoquæ accersi jussit. Vocatus, numeravit calculos, et ei quicûm ludebat, *Vide,* inquit, *ne post mortem meam mentiaris te viciisse.* Tum centurionem compellans, *Festis,* inquit, *eris, me uno calculo antecedere.* O miram in mediâ tempestate tranquillitatem! *Senec. de Tranq. c. 14.*

4. Eorum qui mortem fortiter oppetiêrunt, exemplis incitati, mortem tandem vel optare incipiamus, vel certè timere desistamus. Nam cum supremus ille dies non animi extinctionem sed commutationem tantùm afferat loci: quid optabilius? Itaque si quid tale acciderit, ut à Deo nobis denunciatum videatur exire à vitâ; læti et agentes gratias pareamus, emittique nos à custodiâ, et levari vinculis arbitremur, ut in æternam, et planè in nostram domum remigremus. Mortem portum nobis et per fugium putemus. *Cic. l. Tusç. n. 116, &c.*

Vir sapiens mortem, morbos, at alia, quæ in vitam humanam incurrunt, feret, non solum patienter, sed etiam libenter, ut pareat legi naturæ: quemadmodum bonus miles fert vulnera, et transverberatus telis, moriens amat eum, pro quo cadit, imperatorem. Habebit in animo illud vetus præceptum: *Deum sequere*. Senec. de Beat. c. 15.

CAPUT XVIII.

Humatio contemnenda in nobis, non negligenda in nostris.

1. Cùm Socrates jam jam moriturus esset, rogatus à Critone quemadmodum sepeliri vellet, hæc respondit, ut se ostenderet hæc de re nihil laborare. Diogenes durior, ut Cynicus, projici se jussit inhumatum. Tum amici: *Volucribusne et feris? Menimè verò*, inquit: *Sed bacillum prope me, quo abigam, ponitote. Quid poteris? illi: non enim senties. Quid igitur mihi ferarum laniatus oberit nihil sentienti?* Cic. 1 Tusc. n. 103, 109.

2. Minabatur Theodoro philosopho tyrannus mortem, et quidem sine sepulturâ. Cui Theodorus: *O te ineptum, si putas interesse supra terram an infra, stutrescam!* Magnus animus egressurus corpore nihil ad se judicat pertinere, quò illud conferatur, an ignis exurat, an feræ distrahant, an terra contegat. Senec. de Tranq. c. 14. Senec. Epist. c. 92.

Præclarè Anaxagoras: qui cùm Lampsaci moreretur, quærentibus amicis, velletne Clazomenas in patriam, si quid ei accidisset, referri? *Nihil necesse est*, inquit, *undique enim ad inferos tantundem viæ est*. Rogantibus quoque civitatis principibus, num quid fieri post mortem mandaret? jussisse ferunt, ut pueri quotannis eo, quo è vivis abiisset, die, ludendi copiam haberent. Quod deinde Lampsaci observatum. Cic. 1 Tusc. n. 104. Diog. Laert. in Anax.

3. De humatione unum tenendum est; contemnendam in nobis, non negligendam in nostris: ita tamen mortuorum corpora nihil sentire intelligamus. Quantum autem consuetudini famæque dandum sit, id curent vivi. Cic. 1 Tusc. n. 108.

CAPUT XIX.

Tollatur fortunæ discrimen in morte.

1. Maximè è naturâ est tolli fortunæ discrimen in morte : et ut cæterorum sumptuum, sic etiam sepulchrorum, modus rectè requiritur. Credo minimam olim hujus rei fuisse cupiditatem : alioquin multa extarent exempla majorum. Nec hoc à sapientissimis legum scriptoribus neglectum. Athenis ille mos, jam à Cecrope ductus, diu permansit, corpora humandi terrâ, quam proximi injiciebant. Sequebantur epulæ, quas inibant coronati : et apud quas de mortui laude, cùm quid veri erat, prædicari solitum : Nam mentiri nefas habetur. Cùm deinde sumptuosa fieri funera et lamentabilia cœpissent, Solonis lege sublata sunt. *Cic. 2 de Leg. n. 62.*

2. Cyrus morti proximus filiis mandavit, ut postquam obiisset, corpus suum neque auro neque argento, neque ullâ aliâ re pretiosâ conderent, sed terræ quam primum redderent. *Xenoph. Cyrop. l. viii.*

Alexander Asiæ fines ultimos victor peragrans, Cyri regis sepulchrum jussit aperiri, in quo erat conditum ejus corpus, cui dare volebat inferias. Auro argentoque repletum esse crediderat? quippe Persæ ita vulgaverant. Sed præter clypeum ejus putrem, et arcus duos Scythicos, et acinacem, nihil reperit. Cæterùm amiculo suo loculum, in quo jacebat corpus, velavit, coronamque auream imposuit : miratus tanti nominis regem, tantis præditum opibus, haud pretiosius sepultum esse, quàm si fuisset è plebe. *Q. Curt. l. x. c. 1.*

3. Babyloniorum regina Nitocris, supra portam urbis celeberrimam, loco edito et conspicuo, sepulchrum sibi extrui jussit, atqui his verbis inscribi : *Si cui regum, qui post me apud Babylonios imperium obtinebunt, pecunia inopia fuerit ; aperto sepulchro, sumito quantum libuerit, Ne tamen aperito, nisi indigerit ; non enim proderet aperuisse.* Hoc sepulchrum intactum permansit, donec regnum pervenit ad Darium Hydaspis filium : qui, reserato monumento, non quidem pecunias quas speraverat in

venit: sed cadaver, et hæc verba exarata: *Nisi turpis
lucris studiosus esses, et te inexplebilis pecunia cupiditas
teneret, mortuorum sepulchro non violâsses.* Herodot. l. i.

4. Refert Diodorus Siculus hunc apud veteres Ægyptios morem fuisse, ut mortui regis corpus non antè sepulchro conderetur, quàm cuncta ejus facta expensa essent. Volenti cuique facultas dabatur defunctum accusandi. Instituebatur iudicium: et si plura malè fecisset rex coargueretur, carebat sepulchro: Cujus dedecoris timore factum est ut multi piè justèque imperaverint. *Diod. Sic. l. 1.*

CAPUT XX.

Viro forti fortiter ferendus est dolor.

1. Inter omnes hoc constat, non doctos homines solum, sed etiam indoctos, virorum esse fortium toleranter dolorem pati. Nec verò quisquam fuit, qui cum non laudandum putaret, qui ita pateretur. Itaque dolorem aut extimescere venientem, aut non ferre præsentem, nonne turpe est? *Cic. 3 Tusc. n. 43.*

In dolore cogitandum nobis est, quid fortitudine, quid magnitudine animi dignum sit: et maximè providendum, ne quid abjectè, ne quid timidè, ne quid ignavè, ne quid serviliter muliebriterve faciamus. Ingemiscere viro concessum est, idque rarè: ejulari, ne mulieri quidem. *2 Tusc. n. 53. 58.*

2. Dolorem placidè et sedatè feres, si cogites quàm id honestum sit. Sumus enim naturâ studiosissimi appetentissimique honestatis, pro quâ nihil est quod non parati simus et facere et perpeti. Hinc pericula adeuntur in præliis. Non sentiunt viri fortes in acie vulnera; vel sentiunt, sed mori malunt quàm tantillum modò ab eo, quod eos decet, dimoveri. Fulgentes gladios hostium videbant Decii, cum in aciem eorum irruerant: his levabat omnem vulnerum metum ac dolorem nobilitas mortis et gloria. Num tum ingemuisse Epaminondam putas, cum unâ cum sanguine vitam effluere sentiret? Minimè sanè patriam enim suam Lacedæmonis imperantem relinquibat. Hæ sunt solatia, hæc fomenta summorum dolorum. *2 Tusc. ibid.*

3. Acerrimus virtuti adversarius esse videtur dolor: is ardentis facies intentat, is fortitudinem animi se debilitatum minatur. Huic igitur succumbet virtus? Quam turpe, ô Dii boni, futurum esset. Pueri Spartiatæ non ingemiscunt verberibus laniati. Adolescentium greges Lacedæmone vidimus ipsi, inquit Cicero, incredibile contentione certantes pugnis, calcibus, unguibus, morsu denique, ita ut exanimarentur prius, quam se victos faterentur. In Indiâ ii, qui sapientes habentur, nudi ætatem agunt, et Caucasi nives perferunt, cumque ad flammam se applicuerint, sine gemitu adurunt. Mulieres verò, cum est cujusque earum vir mortuus, in certamen iudiciumque veniunt, quamplurimum ille dilexerit: plures enim uno marito solent esse nuptæ. Quæ est victrix, ea læta, prosequentibus suis, unà cum viro in rogum imponitur: victæ mæstæ discedunt. Quam magis dolorem non formidabit sapientis et constantis viri virtus? *Cic. 5 Tusc. n. 76. Vide infra lib. v.*

CAPUT XXI.

Dolorem ferri fortiter posse, multorum exempla docent.

1. Ut lubentius dolori obsistere possimus, obversentur animo fortium virorum exempla. Zeno proponatur Eleates, qui perpeusus est omnia potius, quam conscios delendæ Nearchi tyrannidis indicaret. De Anaxarcho Democritio cogitetur, qui cum Cyprî in manus Nicocreontis regis incidisset, nullum genus supplicii deprecatus est. Coniectus in mortarium saxeum, ibique ferreis malleis contusus, *Tunde*, inquebat, *Anaxarchi culeum* (sic corpus vocabat) *tunde: Anaxarchum verò ipsum non tundes*. Ad ultimum amputationem linguæ tyranno minitante, protinus eam dentibus abscissam et comminutam in os illius irâ tumidum conspuisse dicitur. *Cic. 2 Tusc. n. 52. Valer. l. iii. c. 3. Diog. Laërt. in Anax.*

2. Romam obsidebat rex Persena, seque urbem propter frumenti inopiam expugnaturum spem habebat, cum C. Mucius adolescens nobilis audaci aliquo facinore patriam esse à periculo liberandam ratus est. Itaque penetrare in hostium castra constituit. Sed metuens ne,

consulum injussu et omnibus ignaris iret, pro transfugâ haberetur: senatum adiit. *Transire Tiberim, inquit, patres, et intrare, si possim, castra hostium volo, non futurus firedo, neque postulationum hostilium ultor. Majus, si Dii juvant, in animo est fucinus.* Approbant patres. Abdito intra vestem ferro proficiscitur. Ubi in hostium castra venit, in confertissimâ turbâ prope regium tribunal constitit. Tum fortè stipendium militibus dabatur, qui propterea adibant scribam cum rege parè ferè ornatu sedentem, et multa agentem. Timens Mucius sciscitari uter eorum, qui sedebant, Porsena esset, ne talia interrogando se Romanum esse aperiret: re fortunæ permissâ, scribam prò rege obtruncavit.

Inde cùm viam sibi cruento mucrone per trepidam turbam faceret, comprehensus à regiis satellitibus, ad tribunal adductus est. Tum ille nihil metuens: *Romanus sum, inquit, civis: C. Mucium vocant. Hostis hostem occidere volui; nec ad mortem ferendam minas animi est, quàm ad coedem patranda fuit. Et facere et pati fortia, Romanus est.* Addidit deinde, *non se unum occidendi Porsenæ gloriam fetere: idem periculum, eademque insidias, et imminere à juventute Romanâ.* Cùm rex irâ percitus, periculoque conterritus, circumdari ignes juberet, nisi properè et clarè expromeret eas, quas minabatur, Romanæ juventutis insidias: *Vide, inquit Mucius, quàm vile corpus iis, qui magnam gloriam spectant.* Dextramque accenso ad sacrificium igni injecit. Quam cùm velut sine ullo doloris sensu torreret, attonitus rei miraculo rex ab sede suâ prosiluit, amotumque ab igne juvenem dimisit inviolatum: simulque Romanam missi legati ad pacis conditiones offerendas. *Livius, l. ii. c. 12.*

Cùm peteret regem decepta satellite dextra,

Injecit sacris se peritura focis.

Sed tam sæva pius miracula non tulit hostis,

Et raptum flammis jussit abire virum.

Urere quàm potuit contempto Mucius igne,

Hanc spectare manum Porsena non potuit.

Major deceptæ fama est, quàm gloriæ dextræ:

Si non peccasset, fecerat illa minus.

Martial. l. i. Epig. 22.

Vetusto Macedonum more, regi Alexandro sacrificanti præstò erant nobilissimi pueri. E quibus unus, cùm *thuribulum* tenens ante regem astitisset, in ipsius bra-

chium carbo ardens delapsus est: quo etsi ita adurebatur, ut adustæ carnis odor ad circumstantium nares perveniret; tamen et dolorem silentio pressit, et brachium immobile tenuit, ne sacrificium ullo gemitu impediret. *Valer. l. iii. c. 3.*

C. Marius rusticanus vir, sed planè vir, cùm ei varices in crura secarentur non sine acri doloris morsu, vetuit se alligari. Nos, si pes, si dens condoluit, ferre non possumus. *Cic. 2 Tuscul. n. 35. 52.*

3. Ex Syriâ decedens, confecto Mithridatico bello cùm Rhodum venisset Pompeius, nobilissimum Stoicæ disciplinæ philosophum Posidonium cupiit audire. Sed cùm diceretur graviter tunc æger esse, quòd doloribus podagræ cruciabatur maximis; voluit saltem visere, quem audire de rebus philosophicis disserentem non licebat. Quem ut vidit, et salutavit, honorificisque verbis est prosecutus; molestè se ferre dixit, quòd eum non posset audire. At ille, *Tu verò, inquit, potes; nec committam, ut dolor corporis efficiat, ut frustrâ tantus vir ad me venerit.* Itaque cubans, graviter et copiosè disputavit de hoc Stoicorum dogmate: *Nihil esse bonum, nisi quod honestum esset.* Cùmque quasi faces doloris ei admoverentur, sæpe dixit: *Nihil agis, dolor: quamvis sis molestus, nunquam te esse confitebor malum.* Illud enim Stoici negabant malum dici posse, quod turpe non esset. *Ibid. n. 61.*

Etsi Peripatetici dolorem dicebant malum esse, de eo tamen fortiter ferendo eadem præcipiebant quæ Stoici. Et quidam Arcesilas Peripateticus, cùm arderet podagræ doloribus, visitassetque hominem Carneades, et tristis exiret: *Mane, quæso, inquit, Carneade noster: nihil illinc huc pervenit.* Ostenditque pedes et pectus. *5 de Fin. n. 64.*

4. Consuetudo laborum perpressionem dolorum efficit faciliorem. Fere laborem, contempnere vulnus et dolorem, consuetudo docet. Est enim consuetudinis magna vis. Fernocant venatores in montibus et in nivibus. Pugiles cæstibus contusi, ne ingemiscunt quidem. Gladiatores, perditii homines aut barbari, quas plagas perferunt? Tantum exercitatio et consuetudo valet. Ergone hoc poterit homo vilissimus? Vir natus ad gloriam et honestatum animum tam mollem habebit, ut eum non meditatione et ratione corroboret adversus dolorem? *2 Tusc. n. 35, &c.*

5. Dolorum patientia in omni genere se æquabilem præbeat. Sæpe multi, qui aut propter gloriæ cupiditatem, aut ut jus suum et libertatem tuerentur, vulnera exceperunt fortiter et tulerunt, iidem dolorem morbi ferre non possunt: Neque enim ratione et sapientiâ vulnerum dolorem tulerant, sed gloriæ et proprii commodi studio. Nihil autem potest esse æquabile, quod non à ratione profiscitur. Itaque barbari ferro decertare acerrimè possunt; ægrotare viriliter non queunt. Sic Cimbri et Celtiberi in prælio exsultant, lamentantur in morbo. *Ibid. n. 66.*

CAPUT XXII.

Que dura sunt, fiunt leviora patientiâ.

1. Cuius dolori remedium est patientia.

Miseriarum portus est patientia. *P. Syria.*

Nihil tam infestum tranquillitatis animi, quàm nihil pati posse. Itaque id summoperè studendum, ut damnâ, quàm minimè fieri poterit, sentiamus: etiam adversa benignè interpretemur. Nunciato naufragio, Zeno cum omnia sua audiret submersa: *Jubet, inquit, me fortuna expeditiâ philosophari.* Senec. de Tranq. c. 14.

Lacæna quædam, cum filium, quem in prælium miserat, interfectum audisset; *Idcirco, inquit, genueram, ut pro patriâ non dubitaret occumbere.* Cic. 1 Tusc. n. 102.

Anaxagoram quoque ferunt, auditâ morte filii, id unum dixisse; *Sciebam me genuisse mortalem.* Quotidie præter oculos nostros transeunt notorum ignotorumque funera, multi tamen homines, ut rerum aliarum, sic vitæ insatiabiles, indignantur se suosque inde exire, quò ad tempus tantùm admissi sunt. Quantò ille justior, qui nunciatam filii mortem non tanquam novum nuncium accepit! Quid est enim novi hominem mori, cujus tota vita nihil aliud quàm ad mortem iter est? Itaque id quod necesse est, nunquam timeamus: quod incertum est, semper expectemus. 3 Tusc. n. 30. *Senec. ad Polyb. n. 29, 30.*

2. Xenophon Socratus discipulus, eique facundiâ proximus, cum solemne sacrum faceret, è duobus filiis majorem natu, nomine Gryllum, cognovit cecidisse in prælio apud Mantineam; nec ideò inceptum Deorum cul-

tum omittendum putavit, sed tantummodò coronam deponere contentus fuit. Percontatus deinde quonam modo occubisset filius; ut audivit fortissimè pugnantem interiisse: coronam capiti reposuit numina, quibus sacrificabat, testatus, majorem se ex virtute filii voluptatem, quàm ex morte dolorem, sentire. Alius removisset hostiam, abjecisset altaria, lacrymis thura respersisset. Xenophon et corpore et animo immobilis permansit. Dolori succumbere, ipsà clade, quæ nunciata erat, tristius duxit. *Valer. l. v. c. 10.*

3. *Emilius Paulus, nunc felicissimi, nunc miserrimi patris clarissimum exemplum, ex quatuor filiis insignis formæ et egregiæ indolis, duos in Corneliâ Fabiamque gentem adoptiope transtulit, duos ei fortuna abstulit: quorum alter, quarto die antequàm pater triumpharet, funere est elatus: alter in triumphali curru conspectus, post diem tertium expiravit. Itaque qui liberis sic abundaverat, ut duos in alienas familias transmisisset, ad orbitatem subito est redactus. Quem casum quo robore animi sustinuerit, nemini dubium esse potest. Nam orationi, quam ad populum de rebus à se gestis habuit, hanc clausulam adjecit: *Cùm in tam prospero bellorum successu timerem, Quirites, ne quid mali contra nos fortuna moliretur: Deos precatus sum, ut si quid adversi populo Romano immineret, id totum in meam domum converteretur. Quapropter bene res habet: annuendo enim votis meis, id egerunt, ut vos potius meum casum doleatis, quàm ego vestro ingemiscam.* *Valer. l. v. c. 10. Livius, l. xiv. c. 41.**

CAPUT XXIII.

Aliorum respice incommoda, ut mitius feras tua.

1. *Cùm ex amicis quemdam graviter moerentem videret Solon, in arcem Athenarum perduxit, hortatusque est, ut per omnia subjecta ædificiâ oculos circumferret. Quod ut factum animadvertit: Cogita nunc tecum, inquit, quàm multi luctus sub his tectis et olim fuerint, hodieque versentur, insequentibusque secutis sint habitaturi.*

ac desine ea incommoda tanquam propria deslere, quæ sunt communia mortalium.

Idem Solon aiebat: *Si in unum locum cuncti mala sua contulissent; futurum, ut quisque propria domum reportare mallet, quam ex communi miseriarum acervo portionem suam accipere.* Unde colligebat non oportere nos, quæ fortuitò patimur, ea magis intolerabilia iudicare, quàm quæ alii patiuntur. *Valer. l. vii. c. 2.*

2. Ciceroni mortem Tullix filix insolabiter lugenti, cum multa alia, tum hæc scripsit Servius Sulpicius. Quæ res mihi non mediocrem consolationem attulit, volo tibi commemorare, si fortè eadem res tibi minuere dolorem possit. Ex Asia rediens cum ab Ægina Megaram versùs navigarem, cæpi regiones circumcirca prospicere. Post me erat Ægina, antè Megara, dextrâ Piræus, sinistrâ Corinthus. Quæ oppida quodam tempore florentissima fuerunt, nunc prostrata et diruta ante oculos jacent. Cæpi egomet mecum sic cogitare: *Hem, nos homunculi indignamur, ei quis nostrum inierit, aut occisus est, quorum vita brevior esse debet; cum uno loco tot oppidorum cadavera projecta jaceant? Visne tunc, Servi, cohibere, et meminisse hominem te esse natum? Crede mihi: cogitatione eâ non mediocriter sum confirmatus.* Hoc idem, si tibi videtur, fac ante oculos tibi proponas. Modò uno tempore tot clarissimi viri interierunt: de imperio Romano præterea tanta diminutio facta est: omnes provinciæ conquassatæ sunt. In unius mulierculæ animâ si jactura facta est, tantoperè commoveris? Quæ si hoc tempore non diem suum obisset, paucis post annis tamen ei moriendum fuit: quoniam homo nata fuerat.

Noli te oblivisci Ciceronem esse: et eum, qui aliis consueveris præcipere, et dare consilium. Neque imitare malos medicos, qui in alienis morbis profitentur tenere se medicinæ scientiam, ipsi se curare non possunt: sed potiùs quæ aliis præcipere soles, ea tute tibi subijce, atque apud animum propone.

Nullus dolor est, quem non longinquitas temporis minuat ac molliat. Hoc te expectare tempus, tibi turpe est, ac non ei rei sapientiâ tuâ te occurrere. Vidimus aliquoties secundam pulcherrimè te ferre fortunam, magnamque ex eâ re te laudem adipisci. Fac aliquando intelligamus, adversam quoque te æquè ferre posse, neque id majus, quàm debeat, tibi onus videri: ne

ex omnibus virtutibus hæc una tibi videatur deesse. *Cic. l. iv. ad Fam. Ep. 5.*

CAPUT XXIV.

Ira furor brevis est.

Horat. l. i. Ep. 2.

1. Vacandum est omni perturbatione animi, tum cupiditate et metu, tum etiam ægritudine et iracundiâ: ut tranquillitas et securitas adsit, quæ afferat cum constantiam, tum etiam dignitatem. *Cic. l. Offic. n. 69.*

Quidam è sapientibus viris dixerunt iram brevem insaniam. Æquè enim impotens sui est, decoris oblita, necessitudinum immemor, in id, quod cœpit, pertinax, rationi consiliisque præclusa. Ut autem scias non esse sanos, quos ira possedit, ipsum illorum habitum intueri. Nam ut furentium certa indicia sunt, ita et irascentium. Flagrant oculi, et multus ore rubor. Labia quatiuntur, dentes comprimuntur, horrent ac subriguntur capilli, tumescunt venæ, concutitur crebro spiritu pectus, parum explanatæ voces sunt, comploduntur sæpius manus, pulsatur humus pedibus, totum concutitur corpus: ita ut nescias utrum magis detestabile vitium sit, an deforme. Cætera vitia sæpe licet abscondere: ira se profert, et in faciem exit, quantoque major est, hoc effervescit manifestius, *Senec. de Ira, l. i. c. 1. l. ii. c. 36. l. iii. c. 4.*

Si iræ effectus malaque intueri velis, nulla pestis humano generi pluris stetit. Videbis cædes ac venena, et subjectas tectis faces et urbium clades et totarum exitia gentium. Aspice nobilissimarum civitatum fundamenta vix notabilia: has ira dejecit. Aspice regiones per multa millia sine habitatione desertas: has ira exhaustit. Aspice tot duces ac reges, mali exempla fati: ira alium in cubili suo confodit, alium inter sacra aut epulas percussit, alium sub oculis multitudinis lancinavit. *Senec. l. ii. c. 2.*

2. Plutarchus, vir doctissimus et prudentissimus, fero suo homini nequam et contumaci, sed disputationibus philosophicis aures imbutas habenti, tunicam detrahi jussit ob aliquod delictum, cumque loro cædi. Ille primum vociferari: *Non meruisse se ut vapulareret; nihil ma nihil sceleris admisisse.* Deinde inter vapulandum quæ

monias jactare; fletus fundere, ejulatus facere. Postremò ad verba objurgatoria conversus, dixit: *Non esse eo animo Plutarchum, quo illum deceret: Philosophum irasci, turpe esse: sapere eum, presente atque audiente se, de iracundia malis disseruisse, librum quoque de cohibendâ irâ pulcherrimum conscripsisse: iis omnibus, quæ in illo libro scripta et præcepta essent, nequaquam convenire, quòd effusus in iram servum plurimis flagis multaret.* Tum Plutarchus placidè, et leniter: *Quid, inquit, verbero, nunc ego tibi irasci videor? Ex vultu meo, an ex colore, an ex voce, an etiam ex verbis, correptum esse me irâ intelligis? Mihi quidem neque oculi, opinor, truces eunt, neque in ruborem spumamve effervesco, neque fundenda dico aut poenitenda. Hæc enim omnia, si ignoras, signa esse irarum solent.* Et simul ad eum qui cædebat converso sermone, *Interim, inquit, dum ego atque hic disputamus, hoc, quod præcepti, perage.* A. Gell. l. i. c. 26.

CAPUT XXV.

Nihil minùs quàm irasci punientem decet.

Senec. l. i. de Irâ, c. 15.

1. Prohibenda maximè est ira in puniendo: nunquam enim iratus, qui accedet ad pœnam de aliquo sumendam, mediocritatem illam tenebit, quæ est inter nimium et parum. *Cic. 1 Offic. n. 89.*

Ad coërcitionem errantium sceleratorumque irato castigatore non est opus. Nam cum ira delictum animi sit, non oportet peccata corrigere peccando. Ad emendationem pœna proficit, si judicio lata est. Inde est quod Socrates servo ait: *Cederem te, nisi irascerer.* Pœnam servi in aliud tempus distulit: illo tempore se ipse admonuit. Cujus erit temperatus in irâ affectus, cum Socrates non sit ausus se iræ committere? Sic Archytas, cum villicò factus esset iratior quòd rura sua ejus negligentia corrupta animadvertisset: *Quo te, inquit, modo accepissem, nisi iratus essem?* Maluit impunitum dimittere, quàm propter iram gravius justo punire. *Senec. l. i. de Irâ, c. 15. Cic. 4. Tusc. n. 78. Valer. l. iv. c. 1.*

2. Maximum remedium iræ dilatio est: ut primùm ejus fervor relanguescat; et caligo, quæ premit mentem,

aut residat, aut minùs densa sit. Non tantùm dies, sed etiam hora quædam ex his, quæ te præcipitem ferebant, molliet: quædam evanescent. Iratus aliquando servo suo Plato, ponere illum statim tunicam, et præbere scapulas verberibus jussit, suâ manu ipse cæsurus. Postquam intellexit irasci se, manum, sicut sustulerat suspensam detinebat, et stabat percussuro similis: oblitus jam servi, quia alium, quem potiùs castigaret, invenerat. Interrogatus deinde ab amico, qui intervenerat, quid ageret? *Exigo*, inquit, *poenas ab homine iracundo. Tu, Speusippe, servulum istum verberibus objurga: nam ego irascor.* Ob hoc non cecidit, propter quod alius cecidisset. Irascor, inquit, plùs faciam, quàm oportet: libentiùs faciam. Non sit iste servus in ejus hominis potestate, qui sui compos non est. *Senec. l. iii. de Irâ, c. 12.*

3. Theodosii ira citò flecti solebat; unde modicâ dilatione emollebantur aliquando severa ejus jussa: habuitque à naturâ quod Augustus à philosophiæ doctore Athenodoro: qui cum vidisset eum facilè commoveri; ne asperum aliquid statueret, monuit ut, ubi irasci cœpisset, quatuor atque viginti Græcas litteras memoria recenseret: ut iræ impetus parvi temporis interjectu languesceret, mente aliò traductâ. *A. Vict. in Theo.*

CAPUT XXVI.

Ne inimicis quidem irascendum.

1. Non audiendi, qui graviter irascendum inimicis putant, idque magnanimi et fortis viri esse censent. Nihil enim laudabilius, nihil magno et præclaro viro dignius placabilitate, atque clementiâ. *Cic. l. Offic. n. 88.*

Zaleuci legibus interdictum erat, ne quis civis diurnam adversus civem iram et inimicitiam gereret. Si qui essent iræ pervicacioris, eos pro indomitis, et feris, et agrestis inhumanique ingenii viris habendos sanxerat. *Diodor. Sic. l. xii.*

2. Titus imperator, nec auctor cujusquam necis, nec conscius fuit, quamvis interdum graviter ulciscendi causa non deesset: sed *perituram se potiùs, quàm alios perditurum*, affirmabat. Cùm amplissimi ordinis duo adversus eum conjurassent, neque abnuere cogitatum scelus pos-

sent, monuit ut desisterent ab incepto: si quid desiderarent, promisit se tributurum: cursores suos confestim misit ad matrem alterius, ut ei anxie de vita filii nunciarent illum salvum; utrumque epulis secum accumbere voluit, et in eadem familiaritate, quâ antè, habere non destitit. *Sucton. in Tito, c. 9. Aur. Victor. Eph. c. 21. Eutrop. l. vii.*

Cùm Constantini imperatoris statuam lapidibus impetere ausi essent nonnulli ex ejus inimicis: ipsum amici hortabantur ad supplicium sumendum de contumelia auctoribus, à quibus faciem ejus deturpatam et convulseratam dicebant. Verùm ille cùm et vultum et caput suum contrectasset; *At ego, inquit, leniter ridens, nulum in ore ac fronte vulnus invenio, sed omnia illæsa et sana.* S. Chrysost. 20 Hom. ad Ant.

CAPUT XXVII.

Ira sui impotens est et pertinax.

1. Ira sibi indulget, ex libidine judicat, audire non vult. Frustra oculis ingeritur veritas: amat et tuetur errorem, coargui non vult, et in malè cæptis honestior illi pertinacia videtur, quàm pœnitentia. Cn. Piso fuit vir à multis vitiis integer; sed pravus, et cui placebat pro constantiâ rigor. Is cùm iratus ad mortem duci jussisset militem quasi interfecisset commilitonem cum quo egressus erat è castris, et sine quo redierat; roganti tempus aliquod ad conquirendum non dedit. Damnatus miles extra vallum castrorum ductus est, et jam cervicem porrigebat, cùm subito apparuit ille commilito, qui occisus dicebatur. Tunc centurio supplicio præpositus, condere gladium carnificem jubet. Ambo commilitones alter alterum complexi, ingenti concursu et magno gaudio exercitûs deducuntur ad Pisonem. Ille conscendit tribunal furens, utrumque ad mortem duci jubet; adjicit et centurionem, qui damnatum militem reduxerat; hæc præfatus: *Te morte flecti jubeo, quia jam damnatus es: te, quia causa damnationis commilitoni fuisti: te, quia jussus occidere militem, imperatori non paruisti.* O quàm solers est iracundia ad fingendas causas furoris. *Senec. l. i. de Irâ, c. 16.*

Fulmen est, ubi cum potestate habitat, iracundia.

P. Syrus.

CAPUT XXVIII.

Circumscribenda multis modis ira est.

1. Non expedit omnia videre, omnia audire. Injuriarum plerasque non accipit qui nescit. Non vis esse iracundus? ne sis curiosus. Qui inquit quid in se dictum sit, se ipse inquietat. Alia negligenda, alia deridenda, alia donanda. Circumscribenda multis modis ira est. Pleraque in lusum jocumque vertantur. Socratem aiunt colapho percussum nihil amplius dixisse, quàm molestum esse, quòd nescirent homines quando cum galea prodire deberent. Alià vice mirantibus amicis, quòd à protervo quodam homine calce impetitus, patienter tulisset: *Quid enim, inquit, si me asinus calce impetisset, num illi diem dixissem?* Denique cum ipsum maledictis incescere quidam diceretur, hoc unum respondit: *Bene dicere enim non didicit.* Senec. l. iii. de Irà, 12. Diog. Laërt. in Socr.

2. Cato major proscissus conviciis ab homine flagitioso et improbo: *Iniqua, inquit, tecum mihi pugna est. Tu enim probra faciliè audis, et dicis libenter; mihi verò et dicere insuave, et audire insolitum.* Plut. in Caton.

Arcesilaum Academicum Antagoras poeta probris incessebat, malo suo philosophum aggressus in foro. Nam ille magno animo contumeliam ferens, ubi quamplurimos cives stare videbat, eò ibat ut ita conviciator plures protervitatibus testes haberet. Sic alter vir gravis, alter insanus omnibus est visus. *Ælian. l. xiv. c. 26.*

Clazomenii quidam Spartam cum venissent, sedes Ephorum, unde jus dicere consueverant, nigro colore inunxerunt insolentiùs. Ephori, re cognitâ, non in iram exarserunt: sed tantum vocato præcone publico, hoc ei mandaverunt ut publicè proclamaret: *Liceat Clazomeniis indecorè se gerere.* *Ælian. l. ii. c. 35.*

Quò rarior in regibus et principibus viris moderatio, hoc laudanda magis est. C. Julius Cæsar, qui victoriâ civili clementissimè usus est, cum scriinia deprehendisset

epistolarum ad Pompeium missarum ab iis, qui videbantur aut in diversis aut in neutris fuisse partibus; legere noluit, sed combussit: ne fortè in multos gravius consulendi locum darent. Quamvis moderatè soleret irasci, maluit tamen non posse. Gratissimum putavit genus veniæ, nescire quod quisque peccasset. *Senec. l. ii. de Irâ, c. 23. Diod. l. xii. Plin. l. i. 7.*

Fuit Cotys Thracum rex naturâ iracundior, et asper eorum, qui in ministeriis deliquissent, castigator. Cùm ei aliquando hospes vasa multa fictilia, arte quidem exquisitâ elaborata, sed tenuia admodum et fragilia domum attulisset; ipse vicissim hospiti dedit munera. At vasa omnia statim confregit, *ne, ut tum dixit, in eos, qui illa fregissent, asperius animadverteret.* *Plut. Apoph.*

3. Non video quare sit difficilis iræ moderatio, cùm sciam tyrannos quoquè familiarem sibi sævitiam represisse. Certè memoriæ proditur Pisistratum Atheniensium tyrannum, cùm multa in eum ebrius conviva dixisset, nec desset qui ei faces ad iram et vindictam subderent, placido animo tulisse, et respondisse: *Non magis illi ebrius se succensere, quàm si quis obligatis oculis in se incurrisset.* *Sen. l. iii. de Irâ. c. 11.*

Tarentini, qui regis Pyrrhi auxilium adversus Romanos imploraverant, se pro socio dominum accepisse ferò intelligentes, sortem suam liberis questibus miserabantur, maximè ubi vino incaluerant. Itaque accersiti ad Pyrrhum nonnulli sunt, qui de eo inter convivium parum honorificè locuti fuisse arguebantur. Sed horum quidem periculum simplex et ingeniosa cujusdam ex illis confessio discussit. Nam cùm percontaretur rex, an quæ ad aures suas pervenerant dixissent? *Et hæc diximus, inquit, Rex; et, nisi vinum defecisset, illa, quæ tibi relata sunt, lusus ac jocus fuissent, siæ iis quæ de te locuturi eramus.* Ibi Pyrrhus, qui vini, quàm hominum, culpam hanc esse videri malebat; arridens, dimisit eos. *Valer. l. v. 1. Livii supp. l. xii.*

4. Homini iracundo cùm placidissimis facillimis et minimè morosis vivendum est, si iræ mederi velit: sumimus enim eorum, quibuscum vivimus, mores. Ut corpus quosdam morbos proximis tradit, sic animus vitia sua. Ebriosus convictores in amorem vini sæpius traxit: impudicorum cætus fortem quoquè virum emolliit: avaritia virus suum in vicinos transtulit. Eadem ratio virtutum

est : quidquid ad eas accedit, mutatur in melius. Re-
tunditur paulatimque dediscitur in placidos viros as-
peritas. Accedit huc, quòd non tantum exemplo melior
fit, qui cum quietis hominibus vivit, sed etiam causas
irascendi non invenit, nec vitium suum exercet. Fugere
itaque debet iracundus omnes quos irritaturos iram suam
sciet. Eliget simplices, faciles, moderatos. *Senec. l.*
iii. c. 8.

CAPUT XXIX.

Imitanda multorum in summa potentia le- nitas.

I. Iracundis hominibus ob oculos ponere inutile non
erit exempla moderata et lenia eorum, quibus nec ad ira-
scendum causa defuit, nec ad ulciscendum potestas. Quid
facilius fuit regi Antigono, quàm duos milites ad suppli-
cium duci jubere, qui proximi regio tabernaculo, de rege
suo multa temerè effutiebant? Audierat omnia Antigonus,
utpote cum inter dicentes et audientem velum tantum in-
teresset: quod ille leviter commovit, et *Longius*, inquit, *dis-*
cedite, ne vos rex audiat. Idem quãdam nocte, cum aliquos
è militibus suis audisset omnia mala imprecantes regi, quòd
ipsos in iter difficile et inextricabile lutum deduxisset: ac-
cessit ad eos qui maximè laborabant, et ignorantes à quo
adjuvantur, ex illo luto eduxit: illorum verò maledicta
miti animo tulit. *Senec. l. iii. de Ira, c. 22.*

Narrant hunc Antigonum filio suo violentius adver-
sus cives agenti dixisse: *An non novisti, fili, nostrum reg-*
num nobilem esse servitutem? Quæ verba maximè humani-
tatis sunt et mansuetudinis. Alterum regem ferunt tra-
ditum sibi diadema, priusquam capiti imponeret, diu con-
siderasse, ac deinde dixisse: *Onobilem magis quàm felicem*
pannum! quem ne humi quidem jacentem tollere quis velit,
si cognoscat quàm multis sollicitudinibus, et periculis, et mi-
seris sit refertus. *Ælian. l. ii. c. 20. Valer. vii. c. 2.*
Hinc *P. Syrus*:

Fortuna magna, magna domino est servitus.

2. Si qua in Philippo Macedonum rege virtus fuit, maximè contumeliarum patientia, ingens instrumentum ad tutelam regni. Demochares, Parrhesiastes ob nimiam et procacem linguam à Græcis appellatus, ad eum inter alios Atheniensium legatos venerat. Audita benignè legatione, Philippus: *Dicite, inquit, mihi, facere quid possim, quod sit Atheniensibus gratum.* Excepit Demochares, *Te suspendere.* Indignatio circumstantium ad tam inhumanum responsum exorta est: quos Philippus conticere jussit, et proptervum hominem salvum et incolumem dimittere. *At vos, inquit, ceteri legati, nunciate Atheniensibus, multò superbiores esse qui ista dicunt, quàm qui impudè dicta audiunt.* Senec. lib. iiii. de Ira, c. 23.

Cùm Methonem urbem oppugnaret, in prætereuntem sagitta jacta de muris dextrum ejus oculum effodit. Quo vulnere nec segnior in bellum nec iracundior adversus hostes factus est; adèd ut pacem deprecantibus dederit, et mitis adversus victos fuerit. *Justin. l. vii. c. 6.*

3. Multa et Cæsar Augustus digna memoriâ fecit dixitque, quibus appareat iram illi non imperâsse. Tiberius, hæc historiæ scriptor, quædam in ipsum, quædam in uxorem ejus, in totam domum dixerat; nec perdidit dicta; avidè enim excipitur, et per ora hominum circumfertur mordax dictum. Sæpè illum monuit Cæsar, ut moderatiùs linguâ uteretur: peseveranti domo suâ tantùm interdixit. *Senec. ibid.*

4. Dicat quisque sibi, quoties lacessitur: Numquid potentior sum Philippo? Illi tamen impunè maledictum est. Numquid in domo meâ plus possum, quàm toto orbe terrarum Divus Augustus potuit? Ille tamen contentus fuit conviciatorem à se dimittere. Quid est quare ego flagellis et compedibus puniam servi mei elatius responsum, et contumaciorem vultum, et non pervenientem usque ad me murmurationem! Quis sum, cujus aures lædi nefas sit: Ignoverunt multi hostibus: ego non ignoscam pigris, negligentibus, garrulis! Puerum ætas excuset, fœminam sexus, extraneum libertas, domesticum familiaritas. Aliquis nos nunc primùm offendit; Cogitemus quàm diu placuerit. Sæpè et aliàs offendit? feramus quod diu tulimus. *Senec. ibid. c. 24.*

CAPUT XXX.

Minimis rebus exasperari insania est.

1. Diligenter cavendum est ne minimis rebus exasperemur. Parum agilis est puer, aut mensa negligentius posita? ad ista irâ concitari insania est. Æger et infelicis valetudinis est, quem levis aura lædit: imbecilli oculi sunt, quos candida aut rubra vestis obturbat. Ubi animus simul et corpus voluptates corrupere, multa intolerabilia videntur: non quia dura illa sunt, sed quia nos molles. Nulla res magis iracundiam alit, quàm luxuria intemperans et impatiens. Durè tractandus est animus, ut ictum non sentiat, nisi gravem. *Senec. l. ii. de Irâ, c. 25, 26.*

2. Insania quoquè est adversus inanima et non separa irasci. *Senec. l. iii. de Irâ, c. 21.*

Cùm Babylonem oppugnaturus festinaret Cyrus, Gnydum latè fusum amnem vado transire tentavit: quod vix tutum est etiam cùm æstatis calorem sensit, et ad minimum deductus est amnis. Ibi unus ex equis albis, qui trahere regium currum solebant, aquis abreptus, vehementer commovit regem. Juravit itaque eò se redacturum amnem illum, ut transiri calcarique etiam à fœminis posset: et tamdiu assedit operi, donec alveum in trecentos et sexaginta rivos dispergeret, et sic cum reliqueret. At hinc rebus magnis jactura evenit: et militum ardor, quem inutilis labor fregit: et occasio aggrediendi imparatos; dum ille bellum indictum hosti gerit cum flumine.

Xerxes, ut ex Asiâ in Europam trajiceret, pontem in Hellesponto fecit. Qui cùm tempestate et fluctibus esset quassatus ac disjectus, jussit trecentos flagellorum ictus ponto infligi, stigmata inuri, compedes dari. *Herodot. l. vii.*

CAPUT XXXI.

Lingua diligentissimè continenda.

1. Rectum est, etiam in illis contentionibus, quæ cum inimicissimis fiunt, licet nobis indigna audiamus, tamen gravitatem retinere, iracundiam repellere. Quæ enim cum aliquâ perturbatione fiunt, ea constantiæ adversantur, nec ab iis, qui adsunt, possunt probari. *Cic. l. Offic. n. 137.*

Periclem in foro publica negotia tractantem improbus et petulans homo maledictis insectabatur. Quæ cum ille patienter ferret, nec ullum ad ea verbum reponeret; diem totum perseveravit insectatio. Vespero vultu gressuque placido domum reversus est Pericles, insequente eodem nebulone, et omnibus contumeliis eum impetente. Ades ingressurus, cum jam nox esset, uni de servis suis mandavit, at accenso lumine hominem comitaretur ac reduceret domum. *Plut. in Pericle.*

Dionem Academicum de convivio redeuntem maledicus quidam insectabatur, nulla non convicia in eum fundens. Tacebat interea Dion; cui jam domum ingresso cum conviciator dixisset: *Nihilne ad hæc respondes? Nihil prorsus,* inquit Dion. *Stob. serm. xix.*

Cum Lacedæmoniorum legatus Geloni Syracusanorum regi quædam dixisset, quibus offendi posse videbatur: *Spartane hospes,* inquit Gelon, *contumeliæ homini factæ solent ejus iram accendere. Verùm tu, contumeliosis licet in me verbis sic investus, non tamen induces me ad vicem tibi contra decus reddendam.* *Herod. l. vii.*

2. Magni animi mansuetique est moderatè ferre objecta crimina, et contemptum: non celeriter rapi in ultionem, nec facilè moveri ad iram: sed moribus comem esse mitemque, ingenio quieto et constanti. *Stob. serm. xix.*

Illud te admoneo, dicebat olim Cicero fratri suo, viro iracundiori, ut quotidie meditare resistendum esse iracundiæ; cumque ea maximè animum movet, tum tibi esse diligentissimè linguam continendam. Quæ quidem mihi virtus non interdum minor videtur, quàm omnino non irasci. Etenim non irasci, non semper gravitatis est,

sed aliquando latitudinis. Moderari verò et animo et rationi, cum sumus irati, aut etiam tacere, etsi non est perfectæ sapientiæ, tamen est non mediocris ingenii. *Cic. 2. Epist. ad frat.*

Cum apud Philippum regem præ vino dormitantem dixisset causam mulier, fuissetque immeritò damnata; se ab ejus judicio provocare exclamavit. *Ad quem ergo provocas?* inquit rex iratus. *A. Philippo*, respondit illa, *bene poto et dormitante, ad Philippum sobrium et vigilantem.* Excussit regi crapulam et somnolentiam tam liberum mulierculæ responsum: et non modò in eam non est acerbis invectus, sed etiam, causâ ejus diligentius inspectâ, justiorem sententiam tulit. *Faler. l. vi. c. 2.*

CAPUT XXXII.

Quantò superiores sumus, tantò nos submissius geramus. Cic. 1. Offic. n. 90.

1. In rebus prosperis, et ad voluptatem nostram fluentibus, superbiam, fastidium, arrogantiam magnoperè fugiamus. Nam ut adversas res, sic secundas immoderatè ferre, levitatis est. Philippum quidem Macedonum regem rerum gestarum gloriâ video superatum à filio; at facilitate et humanitate video superiorem fuisse. Ingonti clade apud Chæronæam Athenienses ac Thebanos affecerat Philippus, et magnos propter tam claram victoriam animos gerere posse videbatur. Verùm ille quo die parta est victoria, non in convivio risit, non ludos inter epulas adhibuit, non coronas aut unguenta sumpsit: et quantum in illo fuit, ita vicit, ut victorem nemo sentiret. Atheniensibus, quos passus infestissimos fuerat, captivos gratis remisit, et bello consumptorum corpora sepulturæ reddidit. Denique adeò nihil superbè, nihil insolenter egit, ut voluerit sibi deinceps ab uno è servis suis singulis diebus in memoriam revocari, se hominem esse. Itaque nec foràs ipse prodibat, nec ad eum quisquam manè priùs intrabat, quàm famulus ei ter acclamasset: *Philippe, homo es.* *Ibid. Justinus, l. ix. c. 4. Elian. viii. c. 15.*

2. Quàm dispar Philippo patri Alexander fuit! Superato Dario Persarum rege, Jovis filium non dici tantùm se, sed etiam credi, voluit: tanquam perinde animis imperare posset ac linguis. Itaque Macedones ipsum salutare, prosternentes humi corpora, jussit. Scripsit quoque Græciæ populis, ut se Deum esse publicis edictis confiterentur. Alii alia in ejus honorem decernentibus Lacedæmonii hujusmodi decretum fecerunt: *Quoniam Alexander Deus esse vult, esto Deus*: Laconicâ libertate et brevitate redarguentes vecordiam Alexandri. *Q. Curt. l. vii. c. 5. Ælian. l. ii. c. 19.*

3. Cùm solitus esset Epaminondas, uncto corpore hilarique vultu prodire in publicum, postridie ejus diei, quo feliciter pugnatum erat in Leuctris, processit squalidus, et tristis. Sciscitantibus igitur amicis, ecquid illi molesti accidisset: *Nihil*, inquit, *sed heri sensi me animo fuisse, quàm par sit, elatiore.* Quocirca *hesterna lætitiæ intemperantiam hodiernâ tristitiâ castigo.* *Plin. Apoph.*

4. Postquam victum, et ad pedes suos summittentem se, regem Perseum consolatus est victor Paulus Æmilius, sermone ad circumstantes Romanos converso, dixit: *Exemplum insigne cernitis mutationis rerum humanarum. Vobis hoc præcipuè dico, juvenes. Idè in secundis rebus nihil in quemquam superbè ac violenter consulere decet, nec præsentem credere fortunæ: quum quid vesper ferat, incertum sit. Is demum vir erit, cujus animum fortuna nec prospera statu suo efferet, nec adversa infringet.* *Livius, l. xlv. c. 8.*

Modum imponere secundis rebus, nec nimis credere serenitati præsentis fortunæ, prudentis hominis et meritò felicitis est. *Idem, l. xlii. c. 62.*

Mos erat Romanis in adversis vultum secundæ fortunæ gerere, moderari animos in secundis. *Ibid.*

5. Agathocles, qui in Siciliâ regnavit, ad regiam majestatem ex humili et sordido genere pervenerat. Nam in Siciliâ patre figulo natus, ipse figulinam artem primùm exercuit; postquam rerum potitus est, solebat in mensâ pocula fictilia inter aurea ponere, et palam fateri se quondam ejusmodi poculorum fuisse artificem. *Justin. l. xxii. c. 1.*

Longè alio animo fuit Tiberius. Nam inter initia principatûs dicenti cuidam, *Meministine?* antequam ille plures nota familiaritatis veteris proferret, *Non meminî*, inquit, *quid fuerim.* Aversabatur nempe omnium veterum amicorum et æqualium notitiam: et illam solam præsentem

fortunam suam aspici, illam solam cogitari et narrari volebat. Contrà Vespasianus mediocritatem pristinam neque dissimulavit, et sæpè declaravit: quin et conantes quosdam originem ipsius ad comitem quemdam Herculis referre irrisit. *Senec. l. v. Benef. c. 25. Sueton. in Vesp. c. 12.*

CAPUT XXXIII.

Ne assentatoribus patefaciamus aures.

1. In secundissimis rebus maximè est utendum consilio amicorum, hisque etiam major, quàm antè, tribuenda est, auctoritas, lisdemque temporibus cavendum est, ne assentatoribus patefaciamus aures nec adulari nos sinamus. In quo falli facile est; tales enim nos esse putamus, ut jure laudemur. Hinc nascuntur innumerabilia peccata. *Cic. 1. Offic. n. 91.*

Citò nobis placemus. Quidquid in nos adulatio sine pudore congressit, tanquam debitum prendimus: adeoque indulgemus nobis, ut laudari velimus de iis, quibus contraria maximè facimus. *Senec. Ep. 59.*

Adulatoribus ne aures præbeas. Habent hoc in se naturale blanditiæ, etiam cum rejiciuntur, placent; sæpè exclusæ, novissimè recipiuntur. *Ibid. 4. Quæst. præcæm.*

Quemadmodum qui audierunt symphoniam, ferunt secum in auribus modulationem illam ac dulcedinem cantûs, quæ mentem ad seria non patitur intendi; sic adulatorum et prava laudantium sermo, diu postquam auditus est, hæret, nec facile est illum animo excutere. Ideò claudendæ sunt aures blandis vocibus. *Ibid. Ep. 125.*

2. Alexandro cælestes honores concupiscenti non deerat adulatio, perpetuum malum regum, quorum quæpius assentatio, quàm hostis, evertit. Græci quidam, non ingenii solùm, sed etiam nationis vitio, adultores, veris amicis et maximis exercituum ducibus à rege præferebantur. Hi tum cælum illi aperiebant; Herculemque et Liberum et cum Castore Pollucem novo numini cessuros esse jactabant. Quæ adulationes Alexandro mirè placebant. *Q. Curt. L. viij. c. 5 et 8. Etenim:*

—Nihil est quod credere de se

Non possit, cūm laudatur Diis æqua potestas.

Juvenal, Sat. iv.

Admonebat contrā Calisthenes, vir haudquaquam aulæ et assentantium accommodatus ingenio, ne rebus felicissimè gestis invidiam contraheret ascitā Dei appellatione. At gravitas viri, et loquendi libertas invisā erat regi, quasi solus Macedones paratos ad tale obsequium moraretur: fuitque propterea in eum iræ pervicacis. Cujus explendæ occasionem ubi invenit, virum præditum optimis moribus, indictā causa, excruciatum necavit. Quam crudelitatem sera pœnitentia secuta est. Certè nullius cædes majorem apud philosophos invidiam Alexandro excitavit. Hinc illa Senecæ: Fuit Callistheni ingenium nobile et furibundi regis impatiens. Ejus mors crimen Alexandri æternum est, quod nulla virtus, nulla bellorum felicitas redimet. Nam quoties quis dixerit, Occidit Persarum multa millia: opponetur, Et Callisthenem. Quoties dictum erit, Occidit Darium, penès quem tunc magnum regnum erat: opponetur, Et Callisthenem. Quoties dictum erit, Omnia oceano tenus vicit, ipsum quoque tentavit novis classibus, et imperium è Macedoniā usque ad orientis terminos protulit: dicetur, Sed Callisthenem occidit. Denique ex his quæ fortiter feliciterque fecit, nihil tantam ei gloriam afferet, quantum dedecus cædes Callisthenis. *Senec. l. vi. Quæst. c. 3.*

2. Darius adversus Alexandrum in Ciliciā pugnaturus, cœgerat undique penè innumerabilem militum multitudinem. Cujus aspectu cūm admodum lætus esset, spem quoquè ejus inflabat adulatorum turba, certam de Alexandro victoriam pollicitantium. Conversus tum ad Charidemum, virum belli peritum, qui Athenis, jubente Alexandro, expulsus, ad Darium confugerat, percontari cœpit: *Satisne ei videretur instructus ad obtinendum hostem? At ille, et suæ sortis, et regiæ superbiæ, oblitus, libere admonuit: Illam ex omnibus orientis partibus excitam hominum multitudinem, purpurâ, argento, auroque fulgentem, futuram esse imparē Macedonibus, qui paupertate magistrâ usi, militarem disciplinam didicissent; et non decora arma, sed fortitudinem animi ad prælium afferrent. Itaque suscitavit, ut argentum atque aurum illud, quo ejus exercitus frustrâ fulgeret, in conducendis è gente bellicosâ militibus insumeretur.*

Erat Dario naturâ mite ac tractabile ingenium : sed naturam plerumquè fortuna corrumpit. Itaque veritatis impatiens, hospitem tunc maximè utilia suadentem abstrahi jussit ad capitale supplicium. Ille ne tum quidem libertatis oblitus: *Habeo, inquit, paratum mortis meæ ultorem. Expetat à te poenas mei consilii speret ipse, contra quem tibi suasi. Tu quidem licentia regni subito mutatus, documentum eris posteris, homines, cum se permisere fortunæ, etiam naturam dediscere.* Hæc vociferantem ei, quibus erat imperatum, jugulant. Sera deinde pœnitentia subiit regem; et Charidemum vera dixisse confessus, eum sepeliri jussit. *Q. Curt. J. iii. c. 2.*

4. Non defuit Caio Cæsari Caligulæ familiaritas hominum, vitia ejus assentatione alentium. Etenim magnæ fortunæ semper comes est adulatio. *Patercul. l. ii. c. 102.*

Ptolemæus rex Ægypti aliquandiu cum laude imperavit. Postea verò adulatoribus corruptus, Aristomenem, qui tutor ipsius fuerat, qui cuncta negotia prudenter administraverat, quem instar patris diu coluerat, tandem odio prosequi cœpit, ob illius in loquendo libertatem, ac postremò epoto cicutæ poculo mori coëgit. Exinde magis ac magis elferatus, et tyrannicâ sævitia, non regiâ utens potestate, in odium Ægyptiorum venit, parumque abfuit quin regno excideret. *Diod. Sic. l. xxvi.*

5. Duplex exemplum ex ingenti turbâ profertur, unde dicere licet quò prorumpat aliquando præpotentium hominum ira; et quàm turpiter iis assententur adultores. *Senec. l. iii. de Irâ, c. 14, 15.*

Somnio quodam et deinde hariolorum responso terribus Medorum rex Astyages, natum è filiâ suâ filium (quî postea Cyrus est dictus) Harpago amico necandum tradiderat. Quod cum ille facere neglexisset, et infans inter pastores adolevisset; Astyages filium Harpagi, in ultionem servati nepotis, interfecit: et cum ignaro patri edendum apposuisset in mensâ, identidem quærebat. *An placeret conditura?* Deinde ubi illum scelestis epulis saturatum vidit, caput aliasque occisi reliquias misero patri jussit afferri: quas agnoscentem interrogavit, *Quo modo esset acceptus?* Harpagus, dissimulato dolore, crudeli regi turpiter adulari non dubitavit, et, *Ahud regem, inquit, omnia coena jucunda est.* *Herodot. l. i. Justin. l. i. c. 4, 5. Senec. ibid.*

Cambysem regem Persarum nimis deditum vino Præxaspes unus ex amicis monebat, ut parcius biberet, *Turpem esse maximè regi ebrietatem*, dicens: *in quem omnium oculi conjicerentur, et cujus nec factu, nec dicta obscura essent*. Ad hoc ille: *Scies, inquit, quemadmodum semper mentis compos sim: et probabo jam oculos et manus post vinum etiam solitum officium præstare*. Bibit deinde largius, quàm aliàs, capacioribus scyphis: et jam vino gravis, objurgatoris sui filium procedere ultra limen jubet, allevatâque super caput sinistrâ manu stare. Tunc intendit arcum, et ipsum cor adolescentis, quod petere se dixerat, figit, recisosque pectore, hærens in ipso corde spiculum ostendit. Tum respiciens patrem, an satis certam habeat manum, interrogat. Ille, ejus rei laudator, cujus nimis erat spectatorem fuisse, negavit *Apollinem potuisse certius sagittam mittere*. O regem cruentum, et dignum in quem omnium suorum arcus tenderentur! ô patrem animo magis quàm conditione, servum! *Herodot. l. ii. Senec. ibid.*

6. Ad Trajani aures omnis adulatoribus obstructus erat aditus: filebant ergo, et quiescebant. Cùm non est, cui suadeatur, et qui suadant, non sunt. *Plin. Paneg.*

Cùm Pescennio Nigro imperatori recens factæ quidam panegyricum recitare vellet: dixit ei Niger: *Scribe laudes alicujus ducis optimi vitæ functi, et dic quid ille fecerit, ut eum nos imitemur*. Nam *viventes laudari irritatio est; maximè imperatores, à quibus aliquid sperari aut timeri potest*. Ego verò *vivus placere volo, mortuus etiam laudari*. Spart. in Nigr. c. 11.

Quo tempore Solon ad Cræsum vocatus venit Sardes, erat in regiâ Æsopus nobilis fabularum scriptor: qui dolens vicem Solonis parùm benignè accepti, quòd Cræso interroganti liberè respondisset, his verbis eum admonuit: *O Solon, cum regibus aut quàm minimè, aut quàm blandissimè, agendum est*. Imò *mehercule*, inquit Solon, *vel quàm minimè vel quàm optimè*. Plut. in Solon.

CAPUT XXXIV.

Fortis et constantis animi est non perturbari in rebus asperis. Cicer. 1 Offic. n. 80.

1 Sapiéntem nec secunda evehunt, nec adversa demittunt. *Senec. ad Helv. c. 5.*

Rebus angustis animosus, atque

Fortis apparet—— *Horat. l. ii. Od. 10.*

Quem res plùs nimio delectavere secundæ,

Mutatæ quatient.——*l. i. Ep. 10.*

Dicebat Bias cum verè infelicem esse, qui infelicitatem ferre non posset. Interrogatusque, *quidnam esset difficile? Ferre*, inquit, *fortiter mutationem rerum in deterris.* *Diog. Laërtes in Bian.*

Qui ea mala, quibus alii opprimuntur, magno animo fert, ipsas miseras in gloriam vertit. Quoniam ita affecti sumus. ut nihil æquè apud nos admirationem occupet, quàm homo fortiter miser. *Senec. ad Helv. c. 13.*

2. Pulsus in exilium Seneca, refert ipse quo animo calamitatem exceperit. Viri sapientes, quibus me ab adolescentiâ dedi, me jusserunt omnes fortunæ impetus prospicere, antequam incurrant. Illis gravis est adversa fortuna, quibus est inexpectata: facilè eam sustinet, qui semper expectat. Quemadmodum repentinus hostium impetus imparatos prosternit, à paratis verò facilè excipitur.

Nunquam ego fortunæ credidi, etiamsi videretur pacem agere. Dedi operam, ut quæ in me indulgentissimè conferebat, pecuniam et honores, ea posset à me repetere. Ita ut nihil propterea mens meâ moveretur. *Ibid. c. 5.*

Fortuna jus in homines, mores non habet.

Nihil eripit fortuna, nisi quod et dedit. *P. Syrus.*

Qui munera fortunæ amaverunt, seque propter illa suscipi voluerunt; illi jacent et incertè, cum eos mobilia ista oblectamenta destituunt. At ille, qui se lætis rebus non inflavit, non est abjecto animo mutatis: sicque adversus utramque fortunam invictum animum tenet.

Ego in illis, quæ plerique mortalium optant, existimavi semper nihil verè boni inesse, atque ita inveni. In illis quoque, quæ mala vocantur, nihil tam terribile ac purum invenio, quàm vulgus opinatur. *Senec. ubi supra*

CAPUT XXXV.

Viri boni nati sunt in exemplar, et eos sibi præparat Deus.

1. Quæ verè mala dici possunt, à viris bonis removet Deus, scelera nempe et flagitia. Quare verò quædam dura patiuntur, paupertatem, exilium, et alia ejusmodi? Ut etiam alios pati doceant. Nati sunt in exemplar. Puta itaque Deum dicere: *Quid habetis quod de me queri possitis vos, quibus recta placuerunt? Aliis bona falsa circumdedi: auro illo et argento et gemmis ornavi: intus boni nihil est. Non est ista solida et sincera felicitas. Vobis dedi bona certa mansura. Concessi vobis, quæ vulgò videntur metuenda, contemnere; quæ custodienda, fastidire. Non fulgetis extrinsecus: bona vestra intus sunt. Quæ incidunt tristitia, horrenda, dura toleratu, istis vos non subduxi: animos vestros adversus omnia armavi.* Senec. de Prov. c. 6.

Quemcunque fortem videris, miserum ne ges.

Senec. Hercul. ver. 464.

2. Vir bonus non tantùm Dei discipulus, et æmulator est, sed etiam vera progenies. Eum parens ille magnificus, sicut severi patres, durius educat, disciplinâ tristi continet, experitur, indurat, sibi præparat. Non vides quantò aliter patres, aliter matres liberos educunt? Illi excitari eos maturè jubent ad studia obeunda, feriatis quoque diebus non patiuntur esse otiosos, et sudorem illis et interdum lacrymas excutiunt. At matres fovere in sinu, continere in umbrâ volunt; nunquam flere, nunquam tristari, nunquam laborare. Patrium habet Deus adversus bonos viros animum, et illos fortiter amat. *Senec. de Prov. c. 1. 2.*

CAPUT XXXVI.

Præclara est universæ vitæ æquabilitas.

1. Si quidquam est decorum, nihil est profectò magis quàm æquabilitas in omni vitâ, et idem semper vultus, eademque frons. Ut de Socrate accepimus, quem prædicare solita erat uxor ejus Xantippe se vidisse semper eodem vultu exeuntem domo et revertentem. Nec verò ea frons erat, quæ M. Crassi illius veteris, quem semel ait in omni vitâ rescisse Lucilius, Plinius nunquam; sed tranquilla et serena. Jure autem erat semper idem vultus, cum mentis à quâ is fingitur, nulla fieret mutatio. *Cicer. 1 Offic. n. 99. et 112. 3. Tusc. 31. Plinius, l. viii. c. 19.*

Ut omnia æquo animo feras, exemplum accipe Socratem per omnia aspera jactatum, invictum tamen et paupertate, et laboribus, tum quos militiæ pertulit, tum quibus domi est exercitus: cum uxorem haberet moribus feram, linguâ petulantem: et liberos indociles, matri quàm patri similiore. Novissimè objecta illi est et religionum violatio, et juventutis corruptela, quam immittere in Deos, in parentes, in rempublicam dictus est. Post hæc carcer et venenum. Hæc adeò Socratis animum non moverunt, ut ne vultum quidem moverint. Illam mirabilem et singulariorem laudem usque ad extremum servavit. Non hilarioris quisquam, non tristioris Socratem vidit: æqualis fuit in magnâ inæqualitate fortunæ. *Senec. Ep. 104.*

2. Q. Metellus Numidicus Româ pulsus, ut suprâ dictum est, in Asiam fecessit. In quâ, cum ei fortè ludos Tralibus spectanti litteræ redditæ essent, quibus scriptum erat, maximo senatûs et populi consensu reditum illi in patriam esse datum; nihil moveri visus est: non lætitiâ proximè sedentibus ullâ ex parte ostendit; eumque constat pari vultu in exilium abiisse, et fuisse restitutum. Adeò moderationis beneficio et animi firmitate immotus inter secundas et adversas res permansit. *Valer. l. iv. c. 1.*

3. Brutus, in eo libro quem de virtute composuit, ait se vidisse M. Marcellum Mitylenis exulantem, et quantum natura homines pateretur, beatissimè viventem.

neque unquam bonarum artium cupidiorē, quā illo tempore. Bene ergo exilium tulit: necquicquam in animo ejus mutavit loci commutatio, quamvis eam et paupertas sequeretur. *Senec. ad Helv. c. 9.*

4. P. Rutilii Rusi verbis et factis admirabile inerat robur, quod nullā unquam re inflecti ac debilitari potuit. Cū esset ille vir exemplum innocentiae, et illo nemo neque integrior Romae esset, neque sanctior; reus factus, nullā suā culpā, apud equites Romanos, penēs quos tum judicia erant, nihil splendore actae vitae indignum fecit aut dixit: non insignia senatoris deposuit, non obsoletam vestem induit: et non modō supplex iudicibus esse noluit, sed ne ornatiūs quidem aut liberiūs causam dici suam, quā simplex veritas ferebat. Damnatus itaque est repetundarum vir inter optimos numerandus, et missus in exilium. *Valer. l. ii. c. 10. vi. c. 4. Cicero. i. Orat. 229. Livius, l. xxx.*

Ex Italiā in Asiam venienti legatos obviā miserunt certatim omnes civitates, tutum honoratumque apud se secessum pollicentes, ita ut non tam exulare, quā triumphare videretur, essetque unde ille fortunae suae gratia ageret. Cū ei inter Smyrnaeos, à quibus fuerat civitate donatus, agenti quidam consolandi causā dixisset, instare bella civilia Romanorum, brevique futurum ut propterea omnes exules reverterentur. *Quid tibi, inquit Rutilius, mali feci, ut mihi pejorem reditum, quā exitum, optares? Malo ut patria exilio meo erubescat, quā reditu moereat.* Quod dixerat praestitit: nam cū ei reditum in patriam postea Syllana victoria facilem faceret; in exilio, ne quid adversus leges peccaret, remansit. *Senec. Benef. l. vi. c. 37.*

Multos illustrat fortuna, dum vexat. Rutilii innocentia ac virtus lateret, nisi accepisset injuriam. Cū violata est, effulsit. *Senec. Ep. 79.*

LIBER QUINTUS.

DE TEMPERANTIA.

CAPUT I.

Ratione duce per totam vitam eundum est.

1. TEMPERANTIA moderatrix omnium commotionum animi est, à libidine avocatur, inani lætitiâ gestire non sinit: hæc pacem animis affert: in rebus expetendis aut fugiendis rationem ut sequamur, monet: in eâ verecundia, modestia, omnis sedatio perturbationum animi, et rerum modus cernitur. *Cicer. 5 Tusc. n. 42. 1 de Fin. n. 47. 1 Offic. n. 93.*

2. Est animus in partes distributus duas, quarum una in appetitu posita est, qui hominem huc et illuc rapit: altera in ratione, quæ docet et explanat quid faciendum fugiendumve sit. Efficiendum autem est ut ratio præsit, appetitus verò obtemperet. Quod temperantiæ munus est. *2 Tusc. n. 47.*

Ipse animus omnium est naturâ molle quiddam, demissum, humile. Si nihil esset aliud, quid esset homine deformius? Sed præstò est domina et regina ratio, cujus magna vis. Hæc ut semper imperet illi parti quæ obedire debet, curandum est: imperet autem velut servo dominus, imperator militi, parens filio.

Ratione duce per totam vitam eundum est: minima maximaque ex hujus consilio gerenda sunt. *Senec. 2 Benef. c. 18.*

CAPUT II.

*In sedatione perturbationum animi vita
beata.*

1. Omnes animi perturbationes rationem repellentes, nullum beatæ vitæ locum relinquunt, hique soli beati dicendi sunt, quos nulli metus terrent, nullæ ægritudines exedunt, nullæ libidines incitant, nullæ futiles lætitiæ eferunt, nullæ voluptates molliunt. Ut autem maris tranquillitas intelligitur, nullâ ne minimâ quidem aurâ fluctus commovente; sic animus quietus et placatus statim cernitur, cum perturbatio nulla est, quâ moveri queat. *Cicer. 5 Tusc. n. 15.*

2. Quemadmodum civitas in seditione beata esse non potest, nec in discordiâ dominorum, domus: sic animus secum ipse discordans, pugnantibus et contrariis studiis consiliisque, nullam gustare partem potest veræ voluptatis. *Cic. 1 de Fin. n. 58.*

3. Quòd si corporis gravioribus morbis vitæ iucunditas impeditur, quantò magis animi morbis impediri necesse est? Animi autem morbi sunt cupiditates divitiarum, gloriæ, dominationis, libidinosarum etiam voluptatum ægritudines, molestiæ, mœrores, qui animos exedunt et curis conficiunt. *n. 59.*

4. Beatum dicamus hominem eum, cui unum bonum honestas, unum malum turpitude videatur. Cui vera voluptas erit voluptatum contemptio. Quem honesti cultorem et virtute contentum nec extollant fortuita, nec frangant. Qui fortunæ muneribus utatur, non serviat. Hunc necesse est sequantur gaudium inconcussum et æquabile, perpetua tranquillitas et libertas, pax animi et magnitudo. *Senec. de Beat. c. 3, 4.*

5. Cum ex Socrate quæsitum esset à Polo, nonne beatum putaret Archelaum Perdiccæ filium, qui tum fortunatissimus haberetur? *Haud scio, inquit Socrates, nunquam enim cum eo locutus sum. Pol. An tu aliter id scire non potes? Soc. Nullo modo. Pol. Tu igitur ne de Persarum quidem rege magno potes dicere beatissime sit? Soc. An ego possim, cum ignorem quàm sit bonus? Pol. Quid? tu in eo sitam vitam beatam putas? Soc. Ita prorsus existi-*

no bonos beatos, improbos miseros. Pol. *Miser ergo Archelaus? Soc. Certè, si injustus.*

Nonne hic videtur Socrates omnem beatam vitam in unâ virtute ponere? *Cicer. 5 Tusc. n. 34. Plato in Gorgiâ.*

CAPUT III.

Malus beatæ vitæ judex populus.

Vivere omnes beatè volunt: sed quid sit, quod beatam vitam efficiat, non pervident. Statuendum itaque primùm quid appetendum nobis sit, tum circumspiciendum, quâ pervenire illò celerrimè possimus. Nihil magis est cavendum quàm ne pecorum ritu sequamur gregem nos antecedentium, pergentes non quâ eundem est, sed quâ itur. Id nobis maximè nocet, quòd non ad rationis lumen, sed ad similitudinem aliorum vivimus: eadem laudamus, eadem probamus, quæ multitudo, et alienis perimus exemplis. Id optimum nobis videtur, quod petitores laudatoresque multos habet.

Una salutis via est, si separemur à cœtu. Hæc quidem pars major est: at ideò peior. Meliora pluribus placere non solent, et argumentum pessimi turba est. Quæramus quid optimum factu sit, non quid usitatissimum: quid nos in possessione felicitatis æternæ constituat, non quid vulgo, veritatis pessimo judici, probatum sit. *Senec. de Benef. c. 1, 2.*

2. Quodam die cùm populus è theatro egrederetur, Diogenes adversus populum nitens ingrediebatur. Interrogatus quâ de causâ id faceret: *Hoc, inquit, in omni vitâ facere studeo.* Diog. Laërt. in Diog.

Dicebat Antisthenes: *Satius esse cum paucis viris bonis dissentire ab omnibus malis, quàm cum multis malis dissentire à paucis bonis.* Idem aliquando laudatus ab improbis hominibus: *Quàm timeo, inquit, ne fortè quid mali fecerim!* Et Antimachus poëta, cùm convocatis auditoribus legeret magnum volumen suum, et eum legentem omnes, præter Platonem, reliquissent; *Legam, inquit, nihilominus: Plato enim mihi unus instar omnium est.* Idem in Antist. *Cicer. in Bruto, 191.*

3. Anaxagoras interroganti cuidam, quisnam esset beatus, non parùm prudenter respondit: *Nemo ex his quos tu felices existimas: sed cum in illo numero reperies, qui à te ex miseris constare creditur. Non erit ille divitiis et honoribus abundans: sed aut exigui ruris aut non ambitiõe doctrinæ fidelis ac pertinax cultor; in pectore, quàm in fronte, beator.* Valer. l. vii. c. 2.

Ubi Cræsus Solonem, quem ad se Sardes vocaverat, audivit accedere; ut advenæ oculos perstringeret, eumque aliquâ sui admiratione afficeret, corpus quàm potuit magnificentissimè exornavit, et vestem tum variis coloribus distinctam, tum auro et gemmis fulgentem induit. Quo spectaculo non modò nihil moveri visus est Solon, nullamque emisit vocem, quâ regi, pro ejus expectatione, gratularetur; sed etiam satis ostendit se ejusmodi ineptias contemnere, et angusti animi esse ducere. Jussit ergo Cræsus omnes ei pecuniarum suarum thesauros aperiri, et regium omne instrumentum ac supellectilem ante ejus oculos explicari. Quæ cuncta contemplatus Solon, ut ad regem est reductus; quæsit ab eo rex, *an quem in terris hominem vidisset se beatiorem?* Ille Tellum nominavit popularem suum, virum bonum, qui rebus ad vitam degendam necessariis cum non caruisset, egregiè pugnando vitam pro patriâ profuderat, relictis liberis bene institutis et probatis. Tum verò Cræso et agrestis et insanus Solon est visus, qui beatitudinem non auro neque argento metiretur, et privati hominis vitam atque obitum tantæ opulentæ tantoque imperio præferret. Interrogavit tamen eum denuò, *an post Tellum istum cognosceret aliquem alium se ipso beatiorem?* Beatiore profectò fuisse, respondit Solon, Cleobin et Bitonem; fraternâ inter se amicitia et singulari in matrem pietate insignes viros: qui morantibus bobus, à quibus eorum genitrix ad Junonis delubrum trahi deberet, jugum plaustrum ipsi subierunt, et sacris peractis epulati non surrexerant postridie: sed vitam cum morte sine ullo dolore commutaverunt. *Quid ergo,* inquit jam irâ incensus Cræsus; *nullone nos numero inter beatos penis?* Cui Solon, nec adulari sustinens, nec iram ultra moveri volens: *Nos quidem Græci,* inquit, *et Lydorum rex, quàm variis casibus pateat hominum vita, cernentes, nemini licere existimamus propter præsentia bona animos tollere: neque felicitatem suspicimus, quæ temporis vicissitudinibus obnoxia sit: illum verò solum beatum dici-*

mus, cui vitam feliciter. absolvere Dii concesserunt. Viventis enim et adhuc fortunæ telis propositi hominis beatitudo, non minùs incerta et dubia est, quàm militis in acie decertantis victoria ac corona. His dictis, discessit Solon à rege offensus magis, quàm emendato. Plut. in Solon.

..... Ultima semper

Expectanda dies homini est, dicitur beatus
Ante obitum nemò supremaque funera debet.

Juven. Sat. x. ver. 274.

CAPUT IV.

Corpori indulgendum, non serviendum.

1. Corpus, quia nihil fieri sine illo potest, magis necessariam rem crede, quàm magnam. Vanus suggerit voluptates breves, ac, nisi magnà moderatione temperentur, pœnitendas. *Senec. Ep. 13.*

Fateor insitam esse nobis corporis nostri caritatem. Non nego indulgendum illi, serviendum nego. Multis enim serviet, qui pro illo nimium timet, qui ad illud omnia refert. Honestum ei vile est, cui corpus nimis carum est. Agatur ejus cura: ita tamen, ut, cum exiget ratio, dignitas, fides, in ignem mittatur. *Ep. 14.*

Major sum, inquiebat Seneca, et ad majora genitus, quàm ut mancipium sim mei corporis: quod equidem non aliter aspicio, quàm vinculum, et pondus, et pœnam. Nunquam me caro ista compellet ad metum, nunquam ad indignam bono simulationem: nunquam in honorem hujus corpusculi mentiar. Contemptus corporis sui certa libertas est. *Ep. 65.*

Sapiens corporis, velut oneris necessarii, non amator, sed procurator est: nec se illi, cui imperare debet, subjicit. Nemo liber est, qui corpori servit. Nam multos dominos nimia pro corpore sollicitudo nobis imponit. *Ep. 92.*

2. Memento hanc salubrem vitæ formam tenere, ut corpori tantum indulgeas. quantum bonæ valetudini satiss est. Durius tractandum est, ne animo malè pareat. Cibus famem sedet, potio sitim extinguat, vestis arceat frigus, domus munimentum sit adversus infesta corpori. *Hæc utrùm è congesto cespite, an è vario lapide gentis*

tus; nihil paratum invenis; panem è mensâ suâ tibi apponit villicus malum. Expecta, bonus fiet: etiam illum tenerum tibi et siligineum fames reddet: ideò non est antè edendum, quàm illa imperet. *Senec. Ep. 119.*

4. Cupiditati nihil satîs est: Naturæ satîs est etiam parùm. Parabile est, quod natura desiderat: ad manum est, quod satîs est: ad supervacua sudatur.

Corporis exigua desideria sunt: quidquid altrâ concupiscitur, libidini quæritur, non necessitati. Non est necesse omnia perscrutari maria, nec strage animalium ventrem onerare, nec conchylia ex ignoto litore erure. Dii Dæque istos perdant, quorum luxuria fines imperii Romani transcendit, et undique convehit cibos gulæ omnia nota fastidienti. O miserabiles, quorum palatum non excitatur, nisi ad cibos quos non eximius sapor, sed raritas et difficultas parandi pretiosos facit; et qui cùm famem exiguo pretio possint sedare, magno irritant. *Ad Helv. c. 9. et Ep. 4.*

5. Cn. Pompeio ægrotanti quum præcepisset medicus ut turdum ederet, negarent autem servi eam avem usquam æstivo tempore posse reperiri, nisi apud Lucullum, qui turdos domi saginaret; prohibuit Pompeius inde peti, sed medico dixit: *Ergo nisi Lucullus perditus dilicilis esset, non viveret Pompeius?* et aliam avem, quæ parabilis esset, jussit sibi apponi. *Plutar. in Lucul.*

CAPUT VII.

Platonice et Syracusanæ mensæ.

1. Timotheus dux Atheniensis tam felix in expugnandis urbibus fuit, ut ejus dormientis effigies depicta sit, tenentis rete, in quod Fortuna urbes cogeret. Quod quidem vel assentandi vel irridendi causâ excogitatum est. Certè ejusmodi honores ei ab Atheniensibus habiti sunt, qui antea nemini. Cùm maximè et rerum gloriâ et potentiâ floureret, incidit fortè in Platonem extra Athenarum mœnia cùm discipulis ambulantem. Quem ut aspectu venerabilem conspexit, audivitque non de armis et classibus, non de tributis et stipendio aliis generis rebus disserentem; sed de bono atque honesto; exclamavit; *O beatam vitam! ß veram felicitatem!* quibus

verbis significabat ejusmodi colloquia omnibus divitiis atque honoribus sibi videri potiora. Eundem Timotheum ferunt, cum aliquando in Academiâ cœnavisse apud Platonem, fuissetque frugali mensâ et erudito prudentique colloquio exceptus; eo convivio fuisse mirè delectatum: cumque Platonem vidisset postridie, dixisse: *Vestræ quidem cœna non solùm in præsentiâ sed etiam postero die jucundæ sunt.* Ælian. l. ii. c. 18. Suidas. Cicer. 5. Tusc. n. 100.

2. Est præclara epistola Platonis ad Dionis, qui ipsum in Siciliam vocaverat, propinquos, his ferè verbis: *Quòd cum venissem; vita illa, beata quæ ferebatur, plena Italicarum Syracusanarumque mensarum, nullo modo mihi placuit; bis in die saturum fieri: nunquam pernoctare solum: cateraque, quæ comitantur huic vitæ, in quâ sapiens nemo efficitur unquam, moderatus verò multò minùs.* Neque enim mente rectè uti possumus, multo cibo et potione completi. *Cicer. ibid.*

Idem Plato cum videret Agrigentinos magnis impensis ædificare, nec minoribus cœnare: *Agrigentini, inquit, ædificant, quasi semper victuri: et coenant, quasi ultimùm coenaturi.* Ælian. l. xii. c. 18.

Platonis magister Socrates nonnullos divites ad cœnam vocaverat, et Xantippem uxorem pudebat modici apparatus. Cui Socrates: *Bono esto animo, inquit, nam si homines boni frugique sunt, æquo animo ferent: si mali atque intemperantes, de his nihil curandum.* Diog. Laërt. in Socrat.

CAPUT VIII.

Convivia Lacedæmoniorum.

1. Providit Lycurgus ne quis Lacedæmoniorum prævatim gulæ indulgeret. Itaque instituit ut omnes sine ullo discrimine communi mensâ et frugali victu uterentur. Nemini licebat ad publica convivia venire præsumptis domi cibis expleto. Propterea acriter sese invicem observabant, atque eum, qui non biberet cum ipsis aut vesceretur, irridebant, et objurgabant ut intemperantem et à promiscuo convivio fastidiosè abhorrentem. Singulis mensis quindenii accumbabant ut plurimum, nec quem-

quam abesse, nisi gravissimâ de causâ, licebat. Itaque cum è bello, quo Athenienses vicerat, reversus rex Agis, domi cum uxore vellet cenare; portionem postulanti non miserunt magistratus.

2. Ad hæc convivia pueri quoquè, sicut ad temperantiæ scholam, deducebantur. Ibi crebros de republicâ sermones excipiebant, magistros liberè et facetè cavillantes audiebant assuescebantque et ipsi jocari, et diceria citra scurrilitatem jacere, atque aliorum cavillis non offendi: namquem videbatur in primis Laconicum, cavilla æquo animo sustinere. Si quis tamen se eorum impatientem diceret, à facetiis in illum temperabatur.

Ut quique intrabat, natu maximus comenstratis ei foribus dicebat: *Ex his nihil hic dictorum egreditur.*

Inter opsonia prima laus erat juri nigro, quo senes maximè delectabantur, relictâ juvenibus carne. Ubi medicriter biberant, sine face recipiebant se domum, neque permittebatur ad lumen incedere, ut discerent in tenebris et nocte commeari fidenter. *Plut. in Lycurg.*

3. Sunt quidam delicatuli, mulieribus aliquando ciborum omnium fastidio laborantibus non dissimiles: nam et ipsi solitos cibos fastidiunt. Itaque ut obtusum ferrum novâ acie eget; sic eorum stomachus acui quodam modo postulat nonnunquam, aceto, sive acerbo aliquo condimento. Quantum ab istis differebat Lacon ille! qui cum conspexisset quemdam ejusmodi delicatulum pretiosam aviculam sibi appositam præ fastidio renuere: *At mihi, dixit, etiam vultur et hircus sapiunt.*

CAPUT IX.

Castigata corporis obesitas.

1. Lacedæmoniis lex erat, ne quis vultu præferret mollitiem colore fæmineo, aut corporis nimiam molem haberet: hoc enim segnitiam declarare videbatur, illud animum parùm virilem. Decimo quoquè die adolescentēs Ephoris sese exhibebant conspiciendos. Si essent corpore bene compacto et per exercitia roborato, laudabantur: contrâ, si membra flaccida et molliora viderentur, succrescente per inertiam pinguedine, verberibus plectebantur. Itaque Naclidem Polybiadæ filium, præpinguem per luxuriam factum, cum in mediam

concionem produxissent Ephori, et ibi Lysander eum graviter objurgasset; parùm abfuit quin è civitate ejicerent. Certè exilium minitati sunt, nisi emendaret vitam, quæ Ionica magis quàm Lacedæmonica erat: et corporis habitum, qui patriæ dedecori esse videbatur, temperantiâ et exercitiis corrigeret. *Ælian. l. xiv. c. 6. Athen. l. xv. c. 12.*

Censores Romani equiti nimis pingui equum adimere soliti erant, sive minùs idoneum esse rati hominem tanto corporis pondere ad faciendum equitis munus; sive non omnino desidiæ culpâ vacare videretur, cujus corpus tam immodicè exuberasset. *A. Gell. l. vii. c. 23.*

2. Non inutile erit pauca alia de severitate censoriâ hìc exscribere.

Si quædam coram censoribus erant intempestivè dicta aut facta, ea notatione suâ non carebant. Cujus rei omnium instar erunt hæc exempla duo. Censores P. Scipio Nasica et M. Popilius quum equitum censum agerent; equum nimis strigosum sed equitem ejus admodum succi plenum et pinguem viderunt: *Et cur, inquit, ita est, ut tu sis, quàm equus, curatior? Quoniam, inquit, ego me curo, equum Statius nihili servus.* Visum est parùm reverens esse responsum, relatusque inter ærarios est eque.

Quidam amico apud censores aderat advocatus. Is cum clarè nimis et sonorè oscitasset, parùm abfuit quin plecteretur, et de notâ illi inurendâ deliberatum est. Sed cum ille dejerasset invitissimum se oscitatione victum fuisse, tenerique eo vitio quod oscedo appellatur; tum notæ jam destinatæ exemptus est. *Idem, l. iv. c. 20.*

CAPUT X.

Corporis voluptas non est digna hominis præstantiâ.

1. Nunquam obliviscendum est quantum natura hominis pecudibus reliquisque bestiis antecedit. Illæ nihil sentiunt nisi voluptatem, ad eamque feruntur omni impetu. Si quis verò hominum voluptate capiatur, ad eamque sit paulò propensior; occultat et dissimulat appetitum ejus, propter verecundiam. Ex quo intelligitur, corporis voluptatem non satis esse dignam hominis præ-

stantiâ, eamque contemni et rejici oportere. Si verò sit quispiam, qui aliquid tribuat voluptati; diligenter ei tenendus est ejus fruendæ modus. Itaque victus cultusque corporis ad valetudinem referentur, et ad vires, non ad voluptatem. Atque etiam si considerare volumus, quæ sit in naturâ hominis excellentia et dignitas; intelligemus quàm fit turpe diffuere luxuriâ et delicatè ac molli-ter vivere; quàmque honestum parcè, continenter, severè, sobrie. *Cicer. 1 Offic. n. 105.*

Si divina nostris animis origo est, tenendum ad virtutem, nec voluptatibus corporis serviendum. *Quintil. l. xii. c. 2.*

Dicebat Socrates: *Multos homines propterea velle vivere, ut ederent et biberent: se bibere atque esse, ut viveret.* *A. Gell. l. xix. c. 2.*

2. Corporis voluptas fragilis est, brevis, et eo vicinior fastidio, quò avidius hausta est. Ejus subinde necesse est, aut peniteat hominem aut pudeat. In ea nihil magnificum, aut quod naturam hominis Diis proximi deceat. Imò res humilis est, et fœda. Hæc est voluptas et hómine et viro digna non implere corpus; nec saginare, nec cupiditates irritare, quarum maximè optanda est quies: sed omni animi perturbatione carere. *Senec. 7. Benef. c. 2.*

Lysandro Spartiatæ, cum in Ioniam venisset, hospites ejus inter alia munera bovem et placentam miserunt. Ille oculis in placentam conjectis, quæsit quodnam esset illud cibi genus? Respondit, qui afferebat, ex melle et aliis suavibus condimentis esse confectum. *Hoc ergo,* inquit Lysander, *data helotibus* (qui servi erant) *non est enim hominis liberi cibus.* Bovem verò jussit Lacedæmoniorum more apparari, et libenter jucundèque in cœnâ comedit. *Ælian. l. iii. c. 20.*

Cùm Agesilatus pariter oblata sibi à Thasiis osculenta et poculenta magni pretii multa helotibus distribul jussisset, quærentibus causam Thasiis respondit, *eos qui probitati ac fortitudini studuerunt, non decere istiusmodi irritamenti gula delectari: propterea quod ingenuos homines iis rebus moveri non oporteat, quibus servitia casiantur.* Itaque farinam tantùm ab iis accepit. *Plut. in Apophth.*

CAPUT XI.

Corpus et animum ad patientiam exercere.

1. Exercendum est corpus, et ita afficiendum, ut obedire rationi possit in exequendis negotiis, et in labore tolerando. *Cicer. 1 Offic. n. 79.*

Corpus humanum propè uti ferrum est. Ferrum si exerceas, conteritur; si non exerceas, tamen rubigo consumit. Item homines exercendo videmus conteri: si nihil exerceas, inertia atque torpedo plùs detrimenti affert, quàm exercitatio. *A. Gell. l. xi. c. 2.*

Socrates, ut corpus adversus ea, quæ fortuitò patientia essent, obfirmaret, dicitur, inter alios labores et exercitia, aliquando stare solitus à solis ortu ad solem alterum orientem, inconnivens, immobilis, ore atque oculis eundem in locum directis cogitabundus. In ipso frigore hiemis glaciem nudis pedibus calcabat. Collectà corporis exercitationibus siti, non tamen priùs bibebat, quàm primam è puteo haústam aquæ urnam effudisset. *Idem, l. ii. c. 1. Plut. de garr.*

Diogenes pariter omni ex parte se ad laborum tolerantiam exercens, hieme statuas nive perfusas complectebatur, æstate sese in fervidà arenâ volutabat. *Diog. Laërt. in Diog.*

Quoniam majore corporis sarcinâ animus quasi opprimitur, et minùs agilis est; exerceatur corpus. Sint tamen exercitationes breves: quæ tempori parcant, cujus præcipua ratio habenda est. Citò redi à corpore ad animum. Illum diebus ac noctibus exerce. Hanc exercitationem non frigus, non æstas impedit, ne senectus quidem. *Senec. Epist. 15.*

2. Animum domesticis malis ad patientiam exercebat Socrates. Ejus uxor Xantippe morosa admodum fuisse fertur et jurgiosa, ira ut per diem perque noctem marito molesta esset. Has ejus intemperies demiratus Alcibiades, interrogavit Socratem, quænam ratio esset, cur mulierem tam acerbam domo non exigeret? *Quoniam, inquit Socrates, cum illam domi talem perfetior, exerceor atque insuesco, ut cæterorum quoquè foris petulantiam et*

injuriam facilius feram: equitesque illos imitor, qui ferociorem equum eligunt, quem doment, futurum rati, ut ceteris hostea facilius uti possint. A. Gell. l. ii. c. 1. Xenoph. in Conv.

Cum in conjugem, ipsâ judice, mitissimum, iracunda illa mulier aliquando convitia et maledicta conjecisset, deinde verò sordidam aquam effudisset: *Nonne*, inquit amicis Socrates, *verè dicebam, à Xantippe post tonitru pluviam venturam?* Diog. Laërt, in Socr.

3. Mirâ quâdam ratione se ad ciborum abstinentiam exercebant Pythagorei. Apparato enim omni genere ferculorum, quæ in lautis conviviis apponi solent, cum diutissimè oculos pavissent, eoque spectaculo comedendi cupiditatem excitassent: statim mensam tolli jubebant, et discedebant impransi. *Diodor. Sic. l. vi.*

CAPUT XII.

Bonæ valetudinis mater est frugalitas.

1. Valetudo sustentatur notitiâ sui corporis; et observatione earum rerum quæ prodesse solent aut obesse; et continentiam in victu omni atque cultu, corporis tuendi causâ; et prætermittendis voluptatibus: postremò arte corem, quorum ad scientiam hæc pertinent. *Cic. 2 Offic. n. 86.*

Bonæ valetudinis priscorum Romanorum quasi quædam mater erat frugalitas, inimica luxuriosis epulis. Maximis viris prandere et cænare in propatulo verecundiæ non erat. Nec sanè ullas epulas habebant, quas populi oculis subijcere erubescerent. Deinde ubi mores paulatim in pejus ruissent imperari cœpit, ut patentibus januis pransitaretur et cœnitaretur, sicque civium oculi luxuriæ modum facerent. Deinde variæ leges latæ sunt, quibus non solùm cœnarum sumptus finitus est, sed etiam genus ciborum. *Val. l. ii. c. 5. Macrob. 2. Sat. c. 13. A. Gell. l. ii. c. 14.*

2. Potest aliquatenus nostrâ providentiâ longior progari huic corpulculo mora, si voluptates, quibus pars major hominum perit, poterimus regere, et coërcere. Plato erat quidem corpus validum ac forte fortitus; sed *navigations* ac varia pericula multùm detraxerunt viribus.

Tamen omnia ferè vitæ suæ tempora inoffensâ valetudine traduxit. In illius pestilentiae vastitate, quæ in belli Peloponnesiaci principiis Atheniensium civitatem interencino genere morbi depopulata est, ipse parcè et moderatè vicitando, et iis carendo voluptatibus, quæ corpus et animum frangunt aut debilitant, communi omnium cladi nequaquam obnoxius fuit. Temperantia eum perduxit ad senectutem : et natali suo decessit, quum annum unum atque octogesimum implèssset. Dubium autem esse non debet, quin aliquos ex hæc summâ annos libenter fuisset remissurus. Nam cum eum juberent medici ex Academiâ, loco morbis infesto, demigrare in Lyceum, ut valetudini consuleret ; consilium illud aspernatus, ait : se ne in Atho quidem montem, ubi homines diutiùs quàm alibi vivere credebantur, commigraturum, etiamsi sciret se illum omnium diutissimè victurum. *Senec. Ep. 58. Aul. Gell. l. ii. c. 2. Ælian, l. ix. c. 10.*

3. Medicina quondam paucarum fuit scientia herbarum, quibus sisteretur fluens sanguis et vulnera coirent paulatim. Deinde in hanc pervenit tam multiplicem varietatem. Minus illa negotii habebat, cum homines uterentur facili nec per artem corrupto cibo : qui postquam cæpit non ad tollendam sed ad irritandam famem quæri, et inventæ sunt mille condituræ, quibus aviditas excitaretur ; quæ alimenta erant, onera facta sunt, dum malè assuescit venter plùs capere, quàm potest : hincque exorti innumerabiles morbi, supplicia luxuriæ. Quando homines corpora opere ac vero labore durabant, et eos aut cursu, aut venatu, aut tellure versatâ defatigatos atque esurientes excipiebat domi cibus parabilis et simplex ; nihil opus erat tam magnâ medicorum suppellectile, nec tot ferramentis ac pyxidibus. Multos morbos ac medicos multa fercula fecerunt. Vide quantum rerum per unam gulam transiturarum permisceat luxuria, terrarum marisque vastatrix ; quot coqui, pistores, ministratores ad coquendam et inferendam cœnam discurrant ! Dii boni, quantum hominum unus venter exercet ! *Senec. Ep. 95.*

4. Cum Mandanem filiam et Cyrum nepotem adhuc puerum epulis exciperet Asytages Medorum rex ; patinas eis multas apposuit cum cujusvis generis condimentis ac cibus. Ibi Cyrum dixisse ferunt : *Quantum tibi, mi ave, negotiorum est in coenâ : si ad omnes istas patinas manus extendere necesse est, et cibos hosce tam varios digua-*

rare! Tum Astyages: *Quid? inquit, an non hæc tibi coena multò videtur melior esse Persicâ? Ad quæ Cyrus: Nequaquam, ave. Nam vita multò simplicior apud nos et rectior est ad satietatem, quàm apud vos. Etenim ad eam aliquid carris et panis nos deducit; cùm vos eòdem, quò nos, tendentes, multas per ambages et circuitus sursàm deorsùm vagati, vix eò tandem perveniat, quo dudum nos pervenimus.* Xenoph. Cyrop. l. i.

CAPUT XIII.

Omne vitium ebrietas et incendit et detegit.

1. Turpe est plus sibi quempiam ingerere cibi et vini, quàm capiat, et stomachi sui non nôsse mensuram. Quàm multa ebrii faciunt quibus sobrii erubescunt? Non est animus in suâ potestate ebrietate divinctus. Onerati vino, ut cibum et potum, sic secretum, non continent: quod suum alienumque est pariter effundunt.

Nihil aliud est ebrietas quàm voluntaria insania, et brevis furor. Hinc Alexander carissimum sibi ac fidelissimum amicam Clitum inter epulas transfodit. M. Antonium, magnum virum, et ingenii nobilis, quæ alia res perdidit, quam ebrietas et Cleopatrx amor? Hæc illum res hostem reipublicæ, hæc hostibus suis imparem, hæc crudelem fecit, cùm inter apparatusimas epulas vino gravis, sitiret tamen sanguinem: Solet nempe vinolentiam crudelitas sequi.

Omne vitium ebrietas et incendit et detegit; obstantemque malis conatibus verecundiam removet. Ubi possedit animum nimia vis vini, quidquid mali latebat, emergit: tunc libidinosus cupiditatibus suis, quantum petierunt, sine dilatione permittit: tunc petulans non linguam, non manum continet. Crescit insolenti superbia, crudelitas sævo, malignitas livido: omne vitium laxatur et prodit. Adjice illam ignorancem sui, parùm explanata verba, gradum errantem, vertiginem capitis, stomachi tormenta, cùm effervescit vinum, ac viscera ipsa distendit.

2. Quæ gloria est capere multum vini? Cum penès te palma fuerit, cùm omnes convivas viceris virtute magnificâ, et nemo tam vini capax fuerit; vincêris à dolio. *Senec. Ep. 83.*

Aristippus cuidam glorianti quòd multum bibens non inebriaretur: *Hoc*, inquit, *et mulus facit*. Sic Demosthenes, cùm legati ad Philippum missi, atque inde Athenas reversi, regem eo nomine laudarent quòd plurimum biberet: *Hoc*, inquit, *ei cùm spongiâ commune est*. Diog. Laërt. in Aristip. Plut. in Dem.

Mirabatur Anacharsis quòd Græci initio convivii cyathis parvis uterentur, ubi verò saturati essent, majoribus; judicans potum adhibendum esse tantùm ad sedandam sitim: absurdum igitur esse tum bibere cùm jam sitis esset sedata. Idem interrogatus quo pacto quis vitare posset ne vini potator fieret: *Si*, inquit, *præ oculis habeat ebrium indecora facta dictaque*. Hinc Lacedæmonii, ut liberos ab ebrietate absterrent, servos multum vini bibere coactos, atque ita ebrios, in eorum conspectum jubebant venire. Diog. Laërt. in Anach. Plut. in Lycurg.

Ebrietas hilarem unius horæ insaniam longi temporis tædio sæpiùs pensat. Senec. Ep. 59.

3. Cùm Astyagi mirum videretur, quòd Cyrus puer, pincernam Sacam egregiè imitatus in porrigendo sibi poculo ad bidendum, non prægussasset vinam, ut ille solebat; causam ab eo quæsit. Cui Cyrus: *Metuebam*, inquit, *ne vino admistum venenum esset, Num cùm tu nuper die natali amico convivio exciperes, Sacam istum vobis venenum infudisse animadverti. Videbam vos nec animis nec corporibus constare. Quæ nos pueros facere vetatis, ea faciebatis ipsi. Omnes simul vociferabimini, neque quisquam, quid ab altero diceretur, attendebat. Cantabatis ridiculè admodum, jurabatis tamen tantum illum esse optimum. Quinetiam cùm surrexissetis ad saltandum, non modò non saltare ad numeros, sed ne rectè quidem stare, poteratis: prorsusque obliti eratis, et tu et illi, regem esse te. Tum Astyages: An verò*, inquit, *Alii mi, pator tuus cùm bibit, non sit ebrius? Nunquam profectò, respondit ille: sitire enim tantùm desinit. Xenoph. Cyr. l. i.*

CAPUT XIV.

Coercendus luxus et colenda frugalitas.

1. Diogenes vir ingentis animi, qui se complicavit in dolio, et in eo cubitavit, divitias, sicut et Democritus, projecit, onus illas existimans, et effecit ne quid sibi eripi posset. Servus, quem sibi unicum servaverat, cum effugisset; eum reducere, cum monstraretur, tanti non putavit: *Turpe est*, inquit, *Manem sine Diogene fuisse vivere, Diogenem sine Mane non posse.* Cum vidisset puerum cavam manu bibentem aquam, fregit protinus exemptum à perula calicem, cum hac objurgatione sui: *Quandiu homo stultus supervacuas sarcinulas habui!* Senec. de Tranq. c. 8, 9. Ep. 90.

Quoniam non est tantum roboris nobis, ut tale exemplum sequamur, angustanda certè sunt patrimonialia. Optimus autem pecuniarum modus est, qui nec in paupertatem cadit, nec procul à paupertate discedit. Placebit nobis hæc mensura, si prius parsimonia placuerit, sine qua nullæ opes sufficiunt, et cum qua vel exiguæ satis patent. Poterit ipsa paupertas in divitias se, advocatâ frugalitate, convertere. Hinc Plinius ad Calvinam scribens, cui remittebat grandem pecuniarum summam debitam sibi ab ejus patre, hæc ait: *Non est quod verearis ne sit mihi ista onerosa donatio. Sunt quidem omnino nobis modicæ facultates, dignitas sumptuosa, redditus, propter conditionem agellorum, nescio minor an incertior: sed quod deficit ex reatu, frugalitate suppletur; ex qua, velut à fonte, liberalitas nostra decurrit.* L. ii. Ep. 4.

2. O miserum, quem delectat sui patrimonii liber amplus, et vasta spatia terrarum colenda per servos, et immensi greges pecorum per provincias pascendi, et familia quibusdam nationibus major, et ædificia privata laxitatem urbium vincuntia! Si quicquid habet, ei, quod cupit, comparet, pauper est. Neque enim unquam expletur nec satiatur cupiditatis sitis. Solebat Attalus philosophus hæc imagine uti: Vidisti aliquando canem missa à domino frustra panis aut carnis aperto ore captantem? Quidquid exceperit, protinus integrum devorat; et semper ad spem novorum frustorum hiat. Idem evenit ejusmodi

hominibus semper ad nova fortunæ munera erectis et attentis. *Senec. 7 Benef. c. 10. Cic. 1 parad. Senec. Ep. 71.*

3. Assuescamus à nobis removeere pompam, servis paucioribus serviri, vestes parare ad id cuius causâ inventæ sunt, habitare contractius. Discamus membris nostris inniti, naturæ voluntati parentes, quæ pedes dedit, ut per nos ambularem, sicut oculos, ut per nos videremus. Discamus victum cultumque non ad nova exempla componere, sed ut majorum suadent mores. Discamus continentiam augere, luxuriam coercere, gulam temperare, paupertatem æquis oculis aspicere, frugalitatem colere, desideriis naturalibus parvo parata remedia adhibere, spes effrânatas velut sub vinculis habere : denique id agere ut divitias à nobis potius, quàm à fortunâ, petamus. Facit autem animus sibi divitias, nihil concupiscendo. *Senec. de Tranq. c. 9. Epist. 55. Ep. 87.*

4. Si quis hoc sæculo, inquit Valerius, vir illustris, pellibus hædinis pro stragulâ veste utatur, quingentorum tantum assium sumptu in transmarinam provinciam eat, eodem vino eodemque cibo, quo nautæ, uti contentus sit, tribus servis comitatus Hispaniam regat : nonne mirabilis existimetur ? Atqui hæc libenter facit, ac toleravit Cato superior, propter frugalitatis consuetudinem. Assueverat enim ab adolescentiâ aquam in bellicis expeditionibus portare ; si nimio æstu torqueretur, acetum ; si vires deficerent, paululum vilis vini. Ipse scriptum reliquit, se nunquam vestem induisse, quæ majoris pretii, quàm centum denariorum esset ; cum consulatum gereret, idem vinum bibisse quod opifices, et opsonium ad cœnam è foro comparasse triginta sestertiis : idque reipublicæ causâ fecisse. Unde Seneca ait M. Catonem censorium tam reipublicæ Romanæ profuit nasci, quàm Scipionem : alter enim cum hostibus nostris bellum, alter cum moribus, gessit. Canterio vehebatur, et hippoperis quidem impositis, ut secum utilia portaret. O quantum erat sæculi decus imperatorem triumphalem, censorium, et, quod super omnia hæc est, Catonem, uno caballo fuisse contentum, et ne toto quidem ! partem enim occupabant sarcinæ ab utroque latere dependentes. *Valer. l. iv. c. 3. Plut. in Caton. Senec. Ep. 87.*

3. Scipio Æmilianus, post duos inclytos consulatus, et totidem triumphos, septem servis sequentibus officio legationis functus est : è Carthagini et Numantiæ, quæ deleverat, spoliis comparare certè plures potuerat : *

operum suorum ad se laudem, manubias ad patriam redundare maluit. Itaque cum per populi Romani socios et exterarum nationes iter faceret; non mancipia ejus, sed victoriæ numerabantur: nec quantum auri et argenti, sed quantum dignitatis atque gloriæ, secum ferret, æstimabatur. *Valer. l. iv. c. 3.*

6. Cum Ætolorum gens vasa argentea magni ponderis et exquisitæ artis Q. Ælio Tuberoni consulatum gerenti misisset per legatos, qui se in priore legatione fictilia in ejus mensâ vasa vidisse retulerant: eos cum suis muneribus abire jussit, monitos ne voluntariæ paupertati, quæ à continentia oriretur, succurrendum putarent. Utinam, exclamabat Valerius, hujus frugalitatis exemplum posterior ætas sequi voluisset. At nunc quò ventum est? A servis vix impetrari potest, ne eam suppellectilem fastidiant, quâ tunc consul uti non erubuit. *Valer. l. iv. c. 3, 4.*

Sexdecim eodem tempore Ælii fuerant, quibus una Romæ domuncula erat, et unus in agro Veiente fundus, cultores multo pauciores desiderans, quàm dominos habebat. Princeps civitatis Æmilius Paulus Ælio Tuberoni, cujus tam pauperes Penates videbat, nuptum dedit filiam: quæ viri paupertate ad eò non offensa est, ut illam, propter quam pauper erat, virtutem maximè admiraretur. *Plut. in Æmil.*

7. Qualis P. Scipionis Africani villa fuerit, quale balneum, scribit ad amicum Seneca. In ipsâ Scipionis Africani villâ jacens hæc tibi scribe. Video villam struam lapide quadrato, murum circumdatum sylvæ, turres in propugnaculum villæ erectas, balneolum angustum, tenebrosos ex consuetudine antiquâ. Magna ergo voluptas, simul et pudor, subit, contemplantem Scipionis mores ac nostros. In hoc angulo ille Carthaginis horror abiebat corpus laboribus rusticis fessum: exercebat enim opere se, terramque, ut mos fuit priscis, ipse subiebat. Sub hoc ille tecto tam sordido stetit, hoc pavementum tam vile illum sustinuit. At nunc quis est qui sic lavari sustineat? Sibi quisque pauper videtur ac sordidus, nisi parietes magnis et pretiosis speculis, marmore, ebore, variisque coloribus refulgeant. In hoc Scipionis balneo minimæ sunt rimæ magis quàm fenestræ, ut sine injuriâ muri lumen admitteret. At nunc balnea nolunt, nisi quæ totius diei solem fenestris amplissimis recipiant;

nisi, dum lavantur, agros et maria prospiciant. Sic quæ in usum reperta fuerant, oblectamenta facta sunt. *Senec. Ep. 86.*

CAPUT XV.

*Nihil est agricultura melius, nihil dulcius,
nihil homine libero dignius.*

Cic. 1 Offic. n. 151.

1. In urbe luxuries creatur: ex luxuriâ existat avaritia necesse est: ex avaritiâ erumpit audacia. Inde omnia scelera ac maleficia gignuntur. Vita verò rustica, parsimonix, diligentix justitiæ magistra est. *Pro Rosc. Amer. 75.*

Vita rustica sine dubitatione proxima et quasi consanguinea sapientiæ. *Columel. l. i.*

2. Haud scio an ulla beatorum esse vita possit, quam eorum qui agris colendis dant operam: non solum quod hominum generi universo cultura agrorum est salutaris; sed etiam quod delectationem affert, et copiam omnium rerum, quæ ad victum hominum et ad cultum etiam Deorum pertinent. Apud veteres Romanos summi viri, clarissimique homines, qui omni tempore ad gubernacula reipublicæ sedere debebant, tamen in agris quoque colendis aliquantum operæ temporisque consumpserunt. In agris plerumque vivebant senatores et senes, et à villâ in senatum arcescebantur. Sic. M. Attilium suâ manu serentem agrum invenerunt, qui eum jussu senatûs evocârunt ad imperium populi Romani suscipiendum: unde illi cognomen Serranus fuit. Sed illæ rustico opere attritæ manus salutem publicam stabiliârunt, ingentes hostium copias pessumderunt; et quæ modò arantium bovm jugum rexerant, triumphalis currûs habenas moderatæ sunt: nec fuit deinde iis rubori, eburneo scipione deposito, agrestem stivam aratri repetere. Potest pauperes consolari Attilius: sed multò magis docere locupletes, quam non sit necessaria solidam laudem cupienti nimis anxia divitiarum comparatio. *Cic. de Senec. Pro Rosc. Amor. n. 51. Valer. l. iv. c. 4. Plinius, l. xviii. c. 3.*

3. Ducentis ante Attilii ætatem annis, cum Romam nunciatum esset Minucium consulem atque exercitum

ejus ab Æquis circumsessos teneri; tantus pavor, tanta trepidatio fuit, quanta, si urbem, non castra, hostes obsiderent. Cùm autem in altero consule Nautio parùm esse præsidii videretur, dictatoremque dici placeret, qui rem percussam restitueret; L. Quintius Cincinnatus omnium consensu dictator est dictus. Ille, spes unica imperii Romani, quatuor tantùm jugerum colebat agrum; nam ex septem, quæ priùs possidebat, tria amiserat volens, solutã pro amico multã. Sicque ejus rurã minùs patebant, quàm nunc, inquit Valerius, multorum domus. Hic à legatis senatùs sive fossam fodiens, sive arans, operi certè agresti intentus, inventus est. Salute datã invicem, redditãque, rogatus ut senatùs mandata togatus audiret; togam properè à tugurio proferre uxorem Raciliam jussit. Quã postquam indutus est, et, absterso pulvere ac sudore, se dictatorem à legatis consalutari audivit; Romam venit, et, Minucio obsidione liberato, victos hostes pecudum in modum sub jugum misit, ne à rustici operis imitatione cessaret. Quã quidem tantã velocitate gessit, ut dictaturã in sex menses acceptã, sexto decimo die se abdicaverit: prorsus ut festinãsse ad repetendum opus relictum videretur. Expeditione quippe finitã, rediit ad boves triumphalis agricola. *Livius, l. iii. c. 26, &c. Valer. l. iv. c. 4. Florus, l. i. c. 11.*

4. P. Scipiò Nasica, cùm ædilitatem curulem peteret, manumque cujusdam civis Romani rustico opere duratam more candidatorum tenaciùs apprehendisset: joci gratiã interrogavit eum: *Num manibus solitus esset ambulare?* Quod dictum à circumstantibus exceptum, ad populum manavit, causamque repulsæ Scipioni attulit. Omnes namque rusticæ tribus communem sibi ab eo factam injuriam judicantes, iram suam adversùs contumeliosum ejus dicerium exercuerunt. *Valer. l. vii. c. 5.*

5. Cultura agrorum operã, non impensã, constat. C. Furius Cresinus, cùm in parvo admodum agello largiores fructus perciperet quàm ex amplissimis agris vicinitas; in invidiã magnã erat, quasi fruges alienas in agellum suum pelliceret beneficii. Quapropter die ei dictã ad populum Romanum, damnationem metuens, instrumentum omne rusticum in forum attulit, et duxit filiam validam atque bene curatam et vestitam, ferramenta egregiè facta, graves ligones, vomeres ponderosos, boves saturos. *Postea dixit: Beneficia mea, Quirites, hæc sunt: nec possum*

vobis ostendere aut in forum adducere lucubrationes meas, vigiliasque et sudores. Omnium sententiis obsolutus est. *Plin. l. xviii. c. 6.*

CAPUT XVI.

Omnes corporis motus decorum teneant.

1. Status, incessus, sessio, accubitio, vultus, oculi, manuum motus, teneant decorum, præsertim naturâ ipsâ duce et magistrâ. Quibus in rebus duo maximè fugienda sunt, ne quid effeminatum aut molle, et ne quid durum aut rusticum sit. *Cic. 1 Offic. n. 1. 8.*

2. Cùm pudorem pueris innasci vehementer cuperet Lycurgus; jussit eos in vicis manum utramque intra pallium continere, tacitosque incedere, nusquam circumspicientes; at ea tantùm intuentes, quæ ante pedes essent. *Xenoph. in Lacœ.*

Xenocrates Platonis discipulus dicebat: *Nihil interesse pedesne, an oculos, in alienam domum aliquis defigat: tam enim peccare eum, qui oculos vertat quò non convenit, quàm illum, qui ingrediatur quò non licet.* *Ælian. l. xiv. c. 42.*

Sic cùm prætereunte formoso puero exclamasset Sophocles, *O fucrum fulchrum!* dixit ei Pericles: *At enim non solum manus, sed etiam oculos, habere abstinentes decet.* *Cic. 1 Offic. n. 144.*

3. Cavendum est ne aut tarditatibus utamur in gressu mollioribus, ut pomparum ferculis similes esse videamur, aut tam celeres festinationes nostræ sint, ut anhelitus moveantur, vultus mutantur, ora torqueantur. Hinc Tigellium ridet Horatius, qui interdum currebat, quasi hostem fugeret; aliàs lentus incedebat, tanquam Junonis sacra ferret. *Cic. 1 Offic. n. 131. Horat. l. i. Sat. 3.*

CAPUT XVII.

A formâ removeatur ornatus non dignus viro.

1. Cùm pulchritudinis duo genera sint, quorum in altero venustas sit, in altero dignitas; venustatem rudi-

breem ducere debemus, dignitatem virilem. Ergo à formâ removeatur omnis, viro non dignus, ornatus. Formâ autem dignitas coloris bonitate tuenda est, color exercitationibus corporis. *Cic. 1 Offic. n. 130.*

Sint procul à nobis juvenes, ut fœmina, compti :

Fine coli modico forma virilis amat.

Forma viros neglecta decet.

Ovid. Heroid. Ep. iv. 1 De Arte Aman. ver. 909.

Nôsti juvenes barbâ et comâ præter modum nitidos, elegantes totos? nihil ab illis speraveris forte, nihil solidum. *Senec. Ep. 115.*

Diogenes Cynicus conspiciens adolescentum cultu gestuque parùm virili: *Non te fudet, inquit, qui seipsi sibi velis, quàm ipsa natura voluit? Siquidem illa te virum finxit, tu te ipse refingis in fœminam.* *Diog. Laërt, in Diog.*

Videns quemdam Metium formæ causâ sibi nimis placentem Domitianus: *Vellem, inquit, tam formosus esse, quàm Metius sibi videtur.* *Sueton. Domit. c. 20.*

Anceps forma bonum mortalibus,

Exigui donum breve temporis,

Ut velox celeri pede laberis!

Res est forma fugax; quis sapiens bono

Confidat fragili? *Senec. in Hiph. ver. 758.*

.....Rara est concordia formæ

Atque pudicitia. *Juven. Sat. x. ver. 297.*

2. Complures videas, quibus apud tonsorem multæ horæ transmittuntur, tum decerpitur si quid barbæ proximâ nocte succrevit, dum te singulis capillis in consilium itur, dum disjecta coma restituitur. Quis est istorum qui non sollicitior sit de capitis sui decore, quàm de salute? Qui non comptior esse malit, quàm honestior? O homines inter pectinem et speculum desidiosè occupatos! *Senec. de Brev. c. xii.*

Ea quotidie comminiscimur per quæ virili dignitati fiat injuria. *7 Quest. c. 31.*

Formâ fuit Augustus eximiâ et per omnes ætatis gradus venustissima. Erat tamen omnis lenociniî negligens, et in capite comendo tam incuriosus, ut eo ipso tempore, quo illud tonsoribus committebat, aut legeret aliquid, aut etiam scriberet. *Sueton. in Aug. c. 79.*

3. Regnante apud Lacedæmonios Archidamo, venit Spartam Ceorum legatus, jam senex, vir naturâ ostentator, et qui formosus videri vellet. Itaque cum illum pu-

deret senectutis, crimes suos, qui cani erant, dissimulaverat tincturâ. Ubi in concionem prodiit cum mentitis capillis, et ea dixit, quorum causâ venerat; consurgens Archidamus, qui legati comam alieno colore tinctam deprehenderat: *Quid, inquit, hic veri et sani diceret, qui non in animo tantum, sed etiam in capite circumfert mendacium?* Explositque ejus dicta: de hominis ingenio, ex his quæ videndo cognosci poterant, judicans. *Ælian. l. vii. c. 20.*

Cùm Adrianus imperator cuidam canescenti aliquid negasset; eidem iterum postea accedenti; sed infecto capite, lepidè respondit: *Jam hoc patre tuo negavi.* Spart. in Adr. c. 20.

CAPUT XVIII.

E speculo consilium ad quædam.

1. Ex inventis speculis venit homini primò sui vultus notitiâ, deinde et ad quædam utiliora consilium; formoso, ut vitaret infamiam; deformi, ut sciret redimendum esse virtutibus, quidquid corpori deesset: juveni ut flore ætatis admoneretur, illud tempus esse discendi, et fortia audendi; seni ut indecora cantis deponeret, et de morte aliquid cogitaret. *Senec. l. Quæst. c. 17.*

Habebat quidam filiam turpissimam,
Idemque insigni et pulchrâ facie filium,
Hi speculum, in cathedrâ matris ut positum fuit,
Pueriliter ludentes fortè inspexerant.
Hic se formosum jactat; illa irascitur,
Nec gloriantis sustinet fratris jocos,
Accipiens (quid enim?) cuncta in contumeliam.
Ergo ad patrem cucurrit læsura invicem,
Magnâque invidiâ criminatur filium,
Vir natus quòd rem fœminarum tetigerit.
Amplexus utrumque ille, et carpens oscula,
Dulcemque in ambos caritatem partiens:
*Quotidie, inquit, speculo vos uti volo:
Tu formam ne corrumpas nequitia malis;
Tu faciem ut istam moribus vincas bonis.* Phædr. i.

iii. Fab. 8.

Socrates quoque philosophus dicitur suasisse discipulis, ut qui inspecto speculo formosus sibi videretur, caveret, ne dignitatem corporis malis moribus dedecoraret; qui verò deformis, daret operam ut virtutis, splendore vultus turpitudinem tegeret. *Apol. Soc.*

2. Natura facultatem nobis dedit nosmetipsos videntium. Fons cuique perlucidus imaginem suam reddit. Qualem fuisse putas cultum hominum ad hoc speculum se comentium? *Ætas* illa simplicior beneficium atque inventum naturæ non vertebat in libidinem et luxum. Statis nitidi sibi videbantur, si squalorem opere collectum fluminis aquâ eluerent. Crinem sine arte formosi quatiebant, non aliter quàm jubam generosa animalia. Deinde cum insitus mortalibus sui amor cepit iis dulcem aspectum formæ suæ facere, et à terrâ metalla effossa sunt; hic in poculo, ille in vase ad alios usus comparato speciem suam inspexit curiosius? mox propria huic ministerio specula præparata sunt; et tandem immodestius crescente luxuriâ, totis paria corporibus ex auro argenteoque facta sunt, et gemmis adornata: ita ut unum ex his pluris fœminæ constiterit, quàm antiquorum fuit dos illa, quæ publicè dabatur imperatorum pauperum filiabus. *Seneca, 1 Quæst. c. 17.*

CAPUT XIX.

In vestitu mediocritas optima.

1. Adhibenda est munditia non exquisita nimis: sicut fugienda agrestis negligentia. Eadem ratio est habenda vestitûs: in quo sicut in plerisque rebus, mediocritas optima est. *Cicer. 1 Offic. n. 130.*

Alter se justo plus colit, alter se justo plus negligit. *Senec. Ep. 114.*

Demosthenem, *Atticæ* eloquentiæ principem, tradunt vestitu nimis accurato fuisse. Hinc illi elegans vestis et molles tuniculæ ab æmulis adversariisque probro datæ sunt, nec ab indignis in eum verbis est temperatum.

Hortensius quoque omnium oratorum ætatis suæ, si *M. Tullium* excipias, clarissimus, propterea exagitatus est: multa que in ipsis causis et iudiciis sunt in illum

dicta, quòd munditiâ nimium studiosus, compositè amictus esset, manusque ejus inter dicendum forent argutz admodum et gestuosæ. *A. Gell. l. i. c. 5.*

Hæc ad deridendam Hortensii molliem addit Macrobius. Ut aptè circumamictus incederet Hortensius in speculum intuens, togam corpori sic applicabat. ut rugæ non fortè, sed de industriâ locarentur. Cùm aliquando procederet veste ad speculum ita compositâ; collegæ diem dixit, quòd sibi in angustiis obviis offensus fortuito structuram togæ destruxerat. *Macrob. 2 Sat. c. 9.*

2. Julia, quum Augustum patrem venisset salutatum, senserat oculos ejus licentiore cultu suo offensos, licèt ille tacuisset. Itaque postero die mutato habitu patrem complexa est. At ille, qui pridie dolorem suum continerat, gaudium continerè non potuit, et: *Quantò magis, inquit, hic in filiâ Augusti cultus prohibetur!* Verùm frustrâ Juliæ sæpè præcepit Augustus temperato inter indulgentiam severitatemque sermone, ut molliorem profusio-remque cultum moderaretur. Nam cùm ei amicus, vir gravis, diceret, illam meliùs esse facturam, si se composisset ad exemplar paternæ modestiæ; superbè respondit: *Ille obliuiscitur se Cæsarem esse: ego memini me Cæsaris filiam.* Augustus quippe rarò veste aliâ est usus, quàm confectâ ab uxore, et sorore, et filiâ neptibusque. Quod et ab Alexandro magno factitatum accipimus, antequam Persicos mores et vestes induisset. Nam cùm Sisygambi captivæ matri Darii multam purpuram misisset, admonerique jussisset, ut neptes suas assuefaceret vestes conficere, et dono dare; ubi reginam aspernari id munus audivit, et injuriam sibi factam putare, ipse ad eam venit, et: *Mater, inquit, hanc vestem, quâ indutus sum, sororum non solùm donum sed etiam opus vides. Nostri decètere me mores. Cave, obsecro, in contumeliam accipias ignorationem meam.* Idem, *2 Sat. c. 5.* Sueton. in Aug. c. 73. Q. Curt. l. v. c. 2.

3. Lycurgus juvenibus non ampliùs unâ veste uti toto anno permisit, nec quemquam cultiùs ornatum, quàm alterum, progredi, nec epulari opulentiùs: ne imitatio in luxuriam verteretur. *Justin. l. iii. c. 3.*

Ipse Lacedæmoniorum rex Argesilaus, quatuor anni tempestatibus, unâ tantum veste induebatur; et cùm in castris inter milites ageret, lectum non habebat molliorem quàm alii: hocque sæpè in ore ei erat: *Principem decere,*

non mollitiæ et deliciis, sed temperantiâ et fortitudine privatis hominibus præstare. Eodem vitæ instituto etiam senex factus utebatur; et percontanti cuidam cur per acrem hiemem solo pallio tectus obambulare sine tunicâ illâ ætate? Ut, inquit, juvenes hanc vitæ rationem imitentur, cum exemplum habeant extrema senectutis viros et principes. Apoph.

Quàm dissimilis Agesilao fuit apud Romanos Nero cum multis aliis in rebus, tum in vestitu! Nam nullam vestem bis induit. *Sueton. in Ner. c. 30.*

Cum in regali solio sederet Cræsus pretiosissimis vestibus indutus, Solonem interrogavit, an quid unquam vidisset pulchrius? *Gallus, inquit ille, et phasianos et pavones: naturali enim et inimitabili colore et pulchritudine fulgent.* Diog. Laërt. in Sol.

CAPUT XX.

• *Nihil olere satius est quàm bene olere.*

1. Luxuriam juvat multos odores miscere, et è cunctis unum facere: ita reperta sunt unguenta. Ab Asiaticis videtur venisse unguenti usus; illi madent eo, et accersito odore natum ex ingluvie fœtorem oris extinguunt. *Plin. l. xxiii. init.*

Unguentarios Lacedæmonii urbe expulerunt, et properè cedere finibus suis jusserunt; quòd oleum dispergerent, et mollitiem ac luxum viderentur investuri. *Seneca, Quæst. vi. c. 13. Clemens Alex. 1 strom.*

Cuidam adolescenti unguentis delibutum caput habenti, *Vide, inquit Diogenes, ne bonus capitis odor malum vitæ tuæ ac formæ odorem afferat.* Diog. Laërt. in Diog.

Cum adolescens fragrans unguento accessisset ad Vespasianum, ut pro impetrato magistratu gratias ageret, hic, ne quam occasionem corrigendi disciplinam præmitteret, adolescentem vultu aspernatus, voce etiam gravissimâ increpuit: *Maluisssem allium oboluisse:* Manusque concessum revocavit. *Sueton. in Vesp. c. 7.*

2. In omnem vitam unguento abstinemus (ait ipse de se Seneca) quoniam optimus odor in corpore est nullus. *Senec. Ep. 108.*

Hoc mihi suspectum est quòd oles bene, Postume, semper.

Postume, non bene olet, qui bene, semper olet.

Martial l. ii. Ep. 12.

Rides nos, Coracine, nil olentes :

Malo, quàm bene olere, nil olere. *l. vi. Ep. 55.*

3. Qui in solem venit, colorabitur. Qui in unguentariâ tabernâ resederunt, et paulò diutiùs commorari sunt, odorem secum loci ferunt. Sic qui apud philosophum aut virum probum fuerunt, traxerint aliquid necesse est quòd prosit. *Senec. Ep. 108.*

CAPUT XXI.

Dormi quantum satis est.

1. Naturâ appetit animus aliquid agere semper, neque ullâ conditione quietam sempiternam possit pati: Somnum, nisi requiem corporibus et medicinam quandam laboris afferret, nobis contra naturam datum putaremus: aufert enim sensus, actionemque tollit omnem. Endymionis somnum nobis profectò nolimus dari: idque si accidat, mortis instar putemus. Nam ut quisque optimè natus institutusque est, esse omnino nolit in vitâ, si gerendis negotiis aut doctrinæ studiis orbatu, possit paratissimis frui voluptatibus, et semper inertì quieti indulgere. *Cicer. 5 de Fin. n. 54. Sc.*

Propter nocturnam quietem dimidio tantum quisque spatio vitæ suæ vivit. Extendamus vitam agendo, nam vitæ argumentum et officium actus est. Circumscribatur nox, et aliquid ex illâ in diem transferatur. *Plin. l. vii. c. 50. Senec. Ep. 122.*

Mycerinus Egypti rex ab oraculo monitus sex tantum vitæ annos sibi superesse, hoc excogitavit, ut oraculum, quantum liceret, convinceret mendacii, et duodecim pro sex anni fierent: Quàm minimè potuit, somno indulisit, et accensis, cum nox appeteret, per multis lucernis, aut domi se continebat, aut agros et nemora pervagabatur. *Herodot. l. ii.*

2. Julianus Imperator noctes ad officia dividebat tripartita, quietis, publicæ rei, et musarum. Quòd et Alexandrum magnum fecisse legimus. Nocte verò mediâ

semper exurgebat Julianus, non è plumis vel stragulis sericis ambiguo fulgore nitentibus, sed ex tapete et pelle. *Ammian. l. xvi.*

Laudare solebat Attalus philosophus culcitram quæ resisteret corpori. *Tali utor*, inquit Seneca, *etiam senex, in quâ vestigium asperere non fossit. Brevissimo quoque somno utor.* Senec. Ep. 108. et 83.

S. Vir bonus, qualem ex præceptis Pythagoræ describit Ausonius, Idyllio viii.

Non prius in dulcem declinat lumina somnum,
Omnia quàm longi reputaverit acta diei:
Ut pravis doleat, capiat vel gaudia justis.

Pythag. ver. 40.

Hunc morem secutus Cato Censorius quid quoque die dixerat, audierat, egerat, commemorabat vesperi. *Cicer. de Senec. n. 38.*

Quotidie ad rationem reddendam vocandus est animus. Faciebat hoc Sextius, ut, consummato die, cum se ad nocturnam quietem recepisset, interrogaret animum suum: *Quod hodie malum tuum commisit? cui vitio obstitisti? quâ parte melior es? Quid pulchrius hac consuetudine excutiendi totum diem? Utor*, inquit Seneca, *hac consuetudine, et quotidie apud me causam dico. Cum sublatum è conspecta lumen est, et conticuit uxor moris mei conscia, totum diem meum scrutor, facta ac dicta mea remetior, nihil mihi ipse abscondo, nihil transeo.* Hoc quoque Horatius à se factitari solitum narrat ipse. *Senec. l. iii. de Ira, c. 36. Hor. l. i. Sat. 4.*

Hoc nos pessimos facit, quòd nemo vitam suam respicit. Quid facturi simus, cogitamus, et id raro: quid fecerimus, non cogitamus. Atquè consilium futuri ex præterito venit. *Seneca, Ep. 83.*

4. Turpis est, qui alto sole in lecto dormiens jacet, qui vigilare medio die incipit, qui officia lucis noctisque pervertit. Quanta illa in animo pravitas est aversari diem, et magnam vitæ partem in noctem transferre! Istis, lucifugis causa est ita vivendi, communis vitæ fastidium, et gravis malæ conscientiæ lux. Quomodo vestitu se à cæteris distinguunt, elegantiam cœnarum, munditiis vehiculorum, sic volunt etiam temporum dispositione distingui. Omnes isti, ut ita dicam, retrò vivunt. Omnia vitia contra naturam pugnant. Tenenda nobis via

est, quam illa præscripsit, nec ab eâ declinandum. *Senec. Ep. 122.*

CAPUT XXII.

Nemo ferè saltat sobrius, nisi fortè insanit.

1. Cùm Cato Murænam consulem saltasse accusasset; his verbis respondit ei Cicero in oratione quam habuit pro Murænâ; Saltatorem apellat L. Murænam Cato. Si verè obijcitur saltatio, maledictum est vehementis accusatoris: sin falsò, maledici conviciatoris. Quare cùm istâ sis auctoritate, Marce Cato, non debes temerè consulem populi Romani saltatorem vocare: sed conspicerè quibus præterea vitiiis affectum esse necesse sit eum, cui verè istud obijci possit. Nemo enim ferè saltat sobrius, nisi fortè insanit: neque in solitudine, neque in convivio moderato atque honesto. Intempestivi convivii multarumque deliciarum comes est extrema saltatio. *n. 13.*

Domitianus Quæstorium virum, quòd gesticulandi saltandique studio teneretur, movit senatu. *Sueton. in Domit. c.*

2. Apud Romanos matronæ saltationem non inonestam putabant, quippe quâ inter sacra utebantur: eratque inter probas quoque saltandi cura, sed non usque ad artis perfectionem. Itaque Semproniam reprehendit Sallustius, non quòd saltare, sed quod optimè sciret. Erat, inquit, docta psallere et saltare elegantius quàm necesse est probæ. Multaque alia inerant, quæ instrumenta luxuriæ sunt. *Macrob. l. ii. Sat. c. 10. Sallust. Cat. c. 25.*

Scipio triumphale illud et militare corpus movit ad numeros: non molliter se infringens, ut mos est multis incensu ipso muliebrem mollitiem vincentibus; sed ut illi viri antiqui, qui solebant inter læsum ac festa tempora virilem in modum tripudiare, nec facturi erant famæ detrimentum, etiamsi ab hospitibus suis spectarentur. *Senec. de Tranq. c. 15.*

CAPUT XXIII.

Musica magna vis in utramque partem.

1. Cantu, sidibus, tibiis uti licet, dummodo ea moderata sint. Assentior enim Platoni, nihil tam facile in animos teneros atque molles influere, quam varios canendi sonos; quorum dici vix potest quanta sit vis in utramque partem. Namque et incitat languentes; et languem facit excitates; et tum remittit animos, tum contrahit. *Cicer. 2 de Leg. n. 38.*

Civitatum in Græciâ multarum mores lapsi ad molitiam sunt et pariter immutati cum cantibus.

2. Claros quosdam sapientiâ viros nemo dubitaverit studiosos musices fuisse. Duces maximos et fidibus et tibiis cecinisse traditum est, et exercitus Lacedæmoniorum musices ad prælium accensos fuisse modis. Apud Græcos ille mos fuit, ut in conviviis post cœnam circumferretur lyra: cujus cum se imperitum Themistocles confessus esset, habitus est indoctior. Veterum quoque Romanorum epulis fides ac tibias adhibere fuit moris.

Musicam natura ipsa videtur velut muneri nobis dedisse ad tolerandos facilius labores. Siquidem et remiges cantus excitat; et fatigatos quamlibet rudis modulatio consolatur.

Ut manifestum fiat, inquit Quintilianus, quæ mihi et quatenus, musica placeat, apertè profitendum puto, non hanc à me probari et præcipi, quæ nunc in scenis effeminata quidquid in nobis roboris virilis manebat maxime excidit; sed eam, quæ olim viri fortes virorum fortium laudes canebant. *Quint. l. i. c. 17.*

3. Habent isti iners negotium, qui in componendis, discendis, audiendis canticis operam ponunt: qui vocem, cujus rectum cursum natura optimum fecit, inflectunt et torquent inertissime: quorum, cum ad res serias, sæpè et tristes, adhibiti sunt, exauditur tacita modulatio. *Senec. de Brev. c. 12.*

Quum animis insit naturâ quædam discendi aviditas; ii culpâ non carent, qui circa vana occupantur, honestis atque utilibus præteritis. Præclarè itaque Antisthenes, cum quidem prædicaret insignem tibiciam esse Isme-

niam: *At, inquit, non magni animi: alioquin non sit tam insignis tibicen.* Et Philippus filio Alexandro, cum suaviter admodum et peritè in convivio cecinisset: *Non te fudet tam bene canere?* Sat enim est, si regi audire canentes vacet: et magnum musis honorem habet, si alios de ejusmodi rerum gloriâ certantes spectet. Qui verò ultrò humiles artes exercet, hic suam ad utilia atque honesta sectanda socordiam profert. Post opportunam patris castigationem Alexander leviolem musicæ operam dedit, et delectatus masculo cantu, molles modulationes, ut morum perniciem est aversatus. Accersivit ad se Timotheum tibicinem, quem ferunt, cum primùm artis suæ specimen Alexandro exhiberet, accommodatè ad illius ingenium et mores cecinisse, non mollibus et remissis modis, sed ita acribus et incitatis, ut statim Alexander ad arma rapienda exilierit. *Plut. in Pericle. Dio. Chrys. Or. 1 et 2.*

Cum deinde Alexander in Asiam profectus, campos, ubi veteris Ilii sedes monstrabatur, peragraret: quodam ex incolis lyram Paridis offerente: *Quid, inquit, mihi meliorem deliciarum vile instrumentum offers: Achillis lyram quero, quâ fortis facta vivorum fortium canebat.* *Plut. in Alex. Ælian. l. 9. c. 38.*

4. Demaratus Lacedæmoniorum rex, earum artium contemptor, quæ solummodò delinirent aures, nullam autem publicæ rei veram utilitatem afferrent, audito egregio cantore, id unum dixit: *Næ iste mihi videtur non malè nugari.* Sic Archidamus Lacedæmonius cuidam citharædum admiranti ac laudibus extollenti: *O amice, inquit, quid honoris ac præmii abs te ferent viri boni, cum citharædum tantopore laudes?* *Plut. Apoph.*

Ægyptii musicam non solum inutilem, sed etiam noxiam, ducebant, tanquam virorum animos effeminantem. *Diod. Sicul. l. ii.*

5. Musicæ artis peritos mirari se dicebat Diogenes, qui lyræ chordas ita aptarent, ut suavis concentus existeret, animi verò affectus inconcinnos haberent. *Diog. Laërt. in Diog.*

Ut in fidibus ac tibiis, quamvis paulùm discrepent, tamen id à sciente animadverti solet; sic videndum est in vitâ moribusque nostris, ne fortè quid discrepet: atque

etiam multò magis; quia melior astionum, quàm sonorum, concentus est. *Cicer. 1 Offic. n. 145.*

CAPUT XXIV.

Bonis moribus damnosum est desiderare in spectaculo.

1. Nihil est tam damnosum bonis moribus, quàm in aliquo spectaculo desiderare: tunc enim per voluptatem faciliùs vitia surrepunt. Ego certè confiteor imbecillitatem meam: nunquam mores, quos domo extuli, refero: aliquid ex eò quod composueram, turbatur: aliquid ex his, quæ fugaveram, redit. Quid multa? avarior redeo, ambitiosior, luxuriosior, imò verò crudelior et inhumanior; quia inter homines fui. *Seneca, Ep. 7.*

Dixit Ovidius de fœminis ad publica spectacula euntibus:

Spectatum veniunt, veniunt spectentur ut ipsæ,
Ille locus casti damna pudoris habet.

Ovid. 1 Art. ver. 99.

2. Comoediam ac tragœdiam moribus plurimùm nocere existimavit Cicero. Nam postquam retulit aliquos Cæcillii versus de amore, exclamavit: *O præclaram emendatricem vitæ poëticam! de comoediâ loquor, quæ, si ejusmodi vitia non probaremus, nulla essent omnino.* Allatis quoque non paucis versibus, quibus nobiles tragœdiarum scriptores Sophocles et Æschylus Herculem et Prometheus intoleranter dolentes exhibuerunt, subjungit: *Videsne poëtæ quid mali afferant? lamentantes inducunt fortissimos viros: molliunt animos nostros: ita sunt deinde dulces, ut non audiantur modò et legantur, sed etiam ediscantur.* Sic ad malam domesticam disciplinam vitamque umbratilem et delicatam cum accesserunt etiam poëtæ, nervos omnes virtutis elidunt. Quas illi obducunt tenebras; quos invehunt metus? quas inflammant cupiditates? Rectè igitur à Platone educuntur ex eâ civitate, quam finxit ille, cum mores optimos et optimum reipublicæ statum exquireret. *Cic. 5 Tusc. n. 69. 2 Tusc. n. 27. Cic. fragm.*

3. Cùm Thespis egisset ipse Athenis, ut mos fuit veterum, tragœdiam quam scripserat, audiente Solone jam sene; peractâ fabulâ, convenit hominem Solon, quæsititque an ipsum non puderet tot et talia præferre mendacia in tantâ hominum coronâ? Respondit Thespis, Nihil incommodi esse hæc per ludum fingere ac dicere. Tum indignatus Solon, terrâ baculo graviter percussâ: *Atqui, inquit, si hunc ludum probamus et amplectimur, eum brevè in factionibus cæterisque negotiis nostris reperiemus.* Senec. Ep. 115.

Non desunt inter tragicos, qui affectibus nostris facem subdant, qui divitias velut unicum vitæ ornamentum laudent, qui lucro innocentiam et bonam famam postponent, qui turpes voluptates jactitent. *Ibid.*

4. Omnes fabularum actores, histriones, mimos, è republicâ suâ exulare voluerunt Lacedæmonij: ut cives neminem audirent, qui vel seriò vel joco quicquam in leges publicas et salubriter institutam disciplinam jactaret. Callipedes, actor tragœdiarum totâ Græciâ celeberrimus, occurrens aliquando regi Lacedæmoniorum Agesilao, primùm salutavit eum, deinde confidentior semet admiscuit iis qui regem comitabantur, futurum sperans, ut rex ipsum præ cæteris comiter exciperet, propter celebratam, quâ sibi plurimùm placebat, artem comicam. Quod cùm pro spe non succederet; tandem: *Non agnoscis me, inquit, ð rex?* Tum respiciens eum Agesilaus, id unum respondit: *An non tu es Callipedes mimus?* Plut. in Lac. Plut. in Agesil.

Romæ quoquè, etsi comœdia ac tragœdia populo placebant, omne histrionum genus malè audiebat. Itaque Cicero Roscium comœdum, pro quo orationem habuit, laudans, hæc de illo dixit: *Cum artifex ejusmodi sit Roscius, ut solus dignus videatur esse, qui in scenâ spectetur; vir ejusmodi est, ut solus dignus videatur esse, qui eò non accedat.* Cicer. pro Quint. n. 78.

Imperante Tiberio decretum est, ne domos pantomimorum senator introiret: ne eos egredientes in publicum ullus eques Romanus comitaretur: aut alibi quàm in theatro spectarentur. Quinetiam paulò post histriones omnes Româ atque Italiâ pulsi. *Tacit. An. i. c. 77. An. iv. c. 14.*

Massilia, civitas severitatis custos acerrima, nullum apud se aditum mimis dabit, ne turpia spectandi consuetudo etiam imitandi licentiam afferret. *Valer. l. ii. c. 6.*

CAPUT XXV.

Subducendus est tener animus.

1. Quid tibi vitandum præcipuè existimem, quæris? turbam. Nondum enim illi te tuto commiseris. Inimica est multorum conversatio. Nemo non aliquod nobis vitium aut cominendat, aut imprimit; et quò major est populus cui commiscemur, hoc periculi plus est. Subducendus populo est tener animus et parùm tenax recti; facillè transitur ad plures. Hoc est salutare, non conversari dissimilibus et diversa cupientibus. Socrati, Catoni, Lælio excutere mentem suam dissimilis multitudo potuisset; adeò nemo eorum etiam, qui maximè concinnando ingenio dant operam, ferre potest impetum vitiorum tam magno comitatu venientium. Unum exemplum aut luxuriæ aut avaritiæ multum mali facit; convictor delicatus paulatim enervat et emollit: vicinus dives cupiditatem irritat: quid tu accidere his credis in quos publicè factus est impetus? Discede ergò à turbâ, quantum potes. Cùm his versare, qui te meliorem facturi sunt; illos admitte, quos tu potes facere maliores. Mutuò ista fiunt; nam homines, dum docent, discunt. *Senec. Ep. 52.*

2. Cùm Charondas, multarum apud Thurios legum auctor, videret eos, qui optimam naturam sortiti, et bonis artibus instituti essent, plerumque corrumpi propter junctam cùm flagitiosis hominibus consuetudinem, et multa inde in republicam mala redundare, lege cavet, ne quis perditorum civium familiaritate uteretur; gravemque inoletam ei imponi jussit, qui inicitæ cùm improbis pravisque hominibus consuetudinis convictus esset. *Diod. Sic. l. xii.*

CAPUT XXVI.

Est adolescentis majores natu vereri.

1. Officia non eadem disparibus ætatibus tribuuntur, aliaque sunt juvenum, alia seniorum. *Cic. 1 Offic. n. 122.*

Est adolescentis majores natu vereri; exque his deligere optimos atque probatissimos, quorum consilio atque auctoritate nitatur. Incuntis enim ætatis scientia constituenda et regenda est senum prudentiâ.

Ut adolescentibus bonâ indole præditis sapientes senes delectantur, leviorque fit senectus eorum, qui à juventute coluntur et diliguntur; sic probi adolescentes senum præceptis gaudent, quibus ad virtutum studia ducuntur. *Cicer. de Senec. c. 26.*

Magna fuit quondam capitis reverentia cani:

Inque suo pretio ruga senilis erat.

Ovid. 3 Fast. ver. 57.

Apud antiquos Romanos neque generi neque pecuniæ præstantior honos tribui solitus erat, quàm ætati. Majores natu à minoribus colebantur ad Deum prope et parentum modum, atque in omni loco inque omni re priores potioresque habebantur. *A. Gell. l. ii. c. 15.*

Credebant hoc grande nefas et morte piandum,

Si juvenis vetulo non assurrexerat, et si

Barbato cuicumque puer: licet ipse videret

Plura domi fraga, et majores glandis acervos.

Juven. Sat. xiii. ver. 54.

E convivio quoquè seniores à juvenibus domum deducebantur; eumque morem Romanos ferunt accepisse à Lacedæmoniis, apud quos Lycurgus maximum honorem non divitum et potentium, sed senum, esse voluerat. Itaque nusquam tantum tribuebatur ætati, nusquam erat senectus honoratior: et Lysandrum Lacedæmonium dicere aiunt solitum: *Lacedæmone esse honestissimum domicilium senectutis.* *Justin. l. iii. c. 3. Cic. de Senec. n. 63.*

2. Quum Athenis quidam in theatrum grandis natu venisset ad spectandos ludos; in magno consensu locus ei à suis civibus non est datus. Cum autem ad Lacedæ-

monios accessisset, qui certo in loco, quia legati essent, condecorant; consurrexere omnes, et sedem seni inter ipsos dederunt. Quod ubi fieri populus adspexit, multum plausu comprobavit. Tunc quidam ex illis legatis dixit: *Athenienses scire quæ recta essent, sed facere nolle.* Cicer. *ibid.* Valer. I. iv. c. 5.

3. Legibus cautum erat apud Lacedæmonios, ut adolescentes non solum parentes suos revererentur, eisque obedirent; sed seniores quoque omnes colerent. Itaque de via illis decedebant, à sedibus assurgebant, et consistebant quieti ac verecundantes dum illi transirent.

Cuilibet seni non modò licebat juniores omnes monere et verbis castigare; verum etiam proposita pœna erat hoc officium non præstanti: ita ut qui peccantem juvenem increpare neglexisset, perinde puniretur ac si ipse peccasset. Quin, id moris erat, ut juniores à senioribus sibi obviam factis interrogarentur, quonam, et cujus gratiâ, irent? *Plut. in Lacon.*

4. Solebant Romani adolescentes cupidi doctrinæ et gloriæ ad clarum aliquem virum aut applicare ipsi se, aut à parentibus deduci, quo duce in studiis et in instituendâ vitâ uterentur. *Auctor. Cor. Elog. c. 34.*

Facillimè et in optimam partem cognoscuntur adolescentes, qui se ad claros et sapientes viros, bene consulentes reipublicæ, contulerunt. Quibuscum si frequenter fuerint, opinionem afferunt populo, eorum fore se similes, quos sibi ipsi delegerint ad imitandum. Ego, inquit Cicero, à patre ita eram deductus ad Scævolum, ut, quoad possem et liceret, à senis latere nunquam discederem. Itaque multa ab eò prudenter disputata, multa etiam breviter et commodè dicta memoriæ mandabam, fierique studebam ejus prudentiâ doctior. Quo mortuo me ad pontificem Scævolum contuli, quem unum nostræ civitatis et ingenio et justitiâ præstantissimum audeo dicere. *Cicer. 2 Offic. n. 46. de Amic. n. 1.*

Cicero, in oratione pro Cælio, his verbis ejus adolescentiam ludat. Fuit M. Cælii prima ætas primùm ipsius pudore, deinde etiam patris diligentia disciplinæque, munita: qui, ut filio virilem togam dedit, continuè hunc ad me deduxit. Nemo hunc M. Cælium in illo ætatis flore vidit, nisi aut cum patre, aut mecum, aut in M. Crassi castissimâ domo, cum artibus honestissimis eru-

diretur. Fuit assiduus mecum, prætor me, à me nunquam recessit. *Pro. Coel. n. 9.*

5. Erat antiquit̄s institutum, ut à majoribus natu non auribus modo, verùm etiam oculis, disceremus, quæ facienda essent. Inde adolescentuli statim in castris militaribus præceptis imbuebantur, ut imperare parendo, et duces agere sequendo, alios assuescerent. Inde honores petitari assistebant curiæ foribus, et concilii publici spectatores, antequam consortes erat parens, maximus quisque et vetustissimus pro parente erat. Quæ potestas magistratibus esset, quæ cæteris libertas; ubi cedendum, ubi resistendum; omnem denique senatorium morem, exemplis, quod optimum est præcipiendi genus, adolescentibus docebantur. *Plin. l. viii. Ep. 14.*

CAPUT XXVII.

Vir bonus aspectus et cogitatus emendat.

Nulla res animos in pravum inclinabiles magis revocat ad rectum, quàm bonorum conversatio. Viri boni frequenter auditi, frequenter aspecti, nobis multorum præceptorum instar sunt: occursum meherculè ipse sapientum juvat: et est aliquid, quod ex magno viro vel tante proficias. *Senec. Ep. 94.*

Speusippus, sororis Platonis filius, adolescens omnis officii negligens, iracundus, et libidinosus, cum justas parentum objurgationes pati non posset, ad Platonem avunculum venit: qui eum domo exceptum non verbo ullo, non facto, læsit, sed ipse se placidum, atque ab omni irâ et libidine vacuum quotidie exhibens, hâc arte magnum homini pudorem incussit, et cum illum in admirationem atque imitationem sui rapuit, tum ad philosophiæ studium accendit. Platonem arguebant amicorum nonnulli, quod protervum et contumacem adolescentem non castigaret: *Ego verò, inquiebat, castigo, et quidem maximè, vitæ meæ ratione demonstrans ei diu noctuque, quod sit honestarum et turpium rerum discrimen.* *Plut. de amor. fratern.*

Aliquis vir bonus nobis eligendus est, ac semper ante oculos habendus, ut sic, tanquam illo spectante, vivamus, et omnia, tanquam illo vidente, faciamus. Hunc nobis custodem, hunc prædagogum, datum putemus. Mag-

na pars peccatorum tollitur, si peccaturis testis adsistat. Aliquem itaque habeat animus, quem vereatur, et qui non aspectus tantum, sed etiam cogitatus, emendet. O felicem, qui sic aliquem vereri potest! ipse citò erit verendus. Elige itaque Catonem. Si hic videtur tibi nimis rigidus, elige remissioris animi virum Lælium: elige eum, cujus placuit tibi et vita et oratio, et ipsius animum ac vultum tibi præsentem fingens, illum semper tibi ostende, vel custodem vel exemplum. Opus est, inquam, aliquo, ad quem mores nostri exigantur. Nisi ad regulam, prava non corrigas. *Senec. Ep. 11.*

CAPUT XXVIII.

Multa nobis aliorum judicio et exemplo facienda aut corrigenda sunt.

1. Adolescenti optimum erit propter ætatis inscientiam, in iis, quæ dubitationem afferunt, adhibere doctos homines, vel usu peritos, et quid his placeat exquirere. Ut enim pictores, et ii qui signa fabricantur, suum quisque opus à vulgo considerari vult, ut, si quid reprehensum sit à pluribus, id corrigatur; sic aliorum judicio permulta nobis et facienda et non facienda, et mutanda, et corrigenda sunt. *Cicer. 1 Offic. n. 147.*

Ex vitio alterius sapiens emendat suum. *P. Syrus.*

Omnia mihi studia excussit dolor, quem ex morte Junii Aviti gravissimum cepi. Ita me diligebat, ita verebatur, ut me formatore morum, me quasi magistro, uteretur. Rarum hoc adolescentibus nostris. Nam quotusquisque vel ætati alterius vel auctoritati, ut minor cedit? Statim sapiunt, statim sciunt omnia: neminem verentur, imitantur neminem, atque ipsi sibi exempla sunt. Sed non Avitus, cujus hæc præcipua prudentia, quod aliquos prudentiores arbitrabatur: hæc præcipua eruditio, quod discere volebat. Semper ille aut de studiis aliquid, aut de officiis vitæ consulebat. Semper ita recedebat, ut doctior aut melior factus. *Plin. l. i. Ep. 23.*

Apelles pictor egregius, cum tabulam pinxerat, eam inspiciendam proponebat transeuntibus; et post ipsam *latens*, vitia quæ à quoque notarentur, auscultabat; vul-

gi enim iudicium sæpè præferebat suo. Is aliquando à sutore reprehensus in crepidis pictæ imaginis, statim quòd peccatum fuerat emendavit. At eodem sutore superbè propter priorem admonitionem cavillante circa crus imaginis die postero, indignatus Apelles prospexit, denunciavitque, *Ne sutor supra crepidam iudicaret.* Quod deinde in proverbium venit. *Plin. l. xxxv. c. 10.*

2. Quid aptè fiat, quid à naturâ officioque discrepet, facile et commodum est iudicare ex aliis : ut, si quid deceat alios, vitemus et ipsi. Fit enim nescio quo modo, ut magis in aliis cernamus, quàm in nobismetipsis, si quid delinquitur. Itaque ii facillimè corriguntur in discendo, quorum vitia imitantur, emendandi causâ, magistri. *Cic. l. Offic. n. 146.*

Peras imposuit Jupiter nobis duas ;
Propriis repletam vitis post tergum dedit,
Alienis ante pectus suspendit gravem.
Hâc re videre mala nostra non possumus.
Alii simul delinquent, censores sumus.

Phadrus, l. iv. Fab. 9.

Aliena vitia in oculis habemus : à tergo nostra sunt. *Senec. 2 de Irâ, c. 28.*

Erat inter discipulos Zenonis adolescens quidam mirè edax, qui in convivio nihil ferè obsoniorum sodalibus soleret relinquere. Huic appositum aliquando in mensâ ingentem piscem sustulit Zeno, quasi eum ipse esset solus devoraturus. Cùm verò vorax adolescens in eum intueretur, mirans atque indignabundus : *Quid ergo ? ait Zeno : num socios edacitatem suam quotidie æquo animo ferre vis, qui hodie non fers meam ?* *Diog. Laërt. in Zen.*

CAPUT XXIX.

Adolescentia in labore et patientiâ est exercenda.

1. Adolescentia maximè à libidinibus arcenda est, exercendaque in labore et patientiâ tum animi tum corporis, ut ejus in bellicis et civilibus officiis vigeat industria. Itaque illi, qui Græciæ formam rerumpublicarum

dederunt, corpora juvenum firmari labore voluerunt. *Cicer.*
1 *Offic. n.* 122. 2 *Tusc. n.* 36.

Cùm animadverteret Lycurgus adolescentes plerumque ad injuriam faciendam proclives esse, et cupiditatibus voluptatum vehementius urgeri: Lacedæmonios juvenes laboribus exerceri voluit, venando, currendo, esuriendo, sitiendo, algendo, æstuando: interminatus, omnem ad honores et imperia aditum occlusum iri ei, qui constituta legibus exercitia refugeret. Ut autem assuescerent non labori per reliquam vitam cedere, non hosti; in quotidianis inter ipsos exercitationibus et certaminibus res omnino seriò agebatur, et ad mortem usque victoriæ instabant. Imò ad aram Dianæ certabant inter se pueri ipsi de verberum tolerantia, et qui plura pertulisset, maximam inde gloriam consequabatur. Spartæ, inquit Cicero, pueri ad aram Dianæ sic verberibus accipiuntur, ut multus sanguis exeat: nonnunquam etiam, ut, quum ibi essem, audiebam, ad necem. Quorum non modò nemo exclamavit unquam, sed ne ingemuit quidem. Quinetiam in virgines, quæ cæteris in urbibus mollissimo cultu, parietum umbris occultæ, educantur, laboriosas exercitationes transtulerunt Spartiata: iisque palæstra, cursus, sol, pulvis, studio est. Impelluntur, feriuntur, cadunt: et ipse labor quasi callum quoddam obducit dolori. *Xenoph. in Lacon. Cicer. Tuscul. n.* 34, 36.

Præter doloris ac laboris tolerantiam, hoc maximè edocebantur adolescentes Lacedæmonii, imperium pati, non magistratum solum, parentum, magistrorum, sed etiam quorumvis ætate majorum. Existimaverat quippe Lycurgus satius esse reipublicæ habere cives ad parendum bene institutos et promptos, quàm magistratus ad imperandum idoneos. Hincque Theopompus, quodam dicente Spartam incolumem stare, quia reges scirent imperare: *Imò, inquit, quia cives parere.* Fecit quippe instituta Lycurgi legibus disciplina, ut reges propterea parentiores habuerint exercitus et fortiores. *Plutar. in Lycurg. et Aphoph. Cicer.* 1 *Offic. n.* 76.

2. Persarum liberi, quos veritati maximè et justitiæ studuisse diximus, ad temperantiam quoquè libidinum domitricem instituebantur. Propterea non domi apud matres alebantur, sed apud præceptorem in scholis publicis, ad quas summo mane venientes quotidie, afferebant **pro cibo panem, pro obsonio nasturtium, et, aquæ è proxi-**

mo flumine hauriendæ causâ, poculum. Accedebat multiplex corporis exercitatio, et severa magistris parendi disciplina: ad quam obedientiam maximè excitabantur tum adolescentum tum senum exemplo, quos magistratibus impigrè obsequi cernerent. Postquam è pueris exciserant, per decennium diu noctu permanebant in quodam foro, quod Liberale vocabatur, cibum ibi et somnum capientes, urbis custodiendæ et colendæ temperantiæ causâ. Quantò enim ad vitia proclivior proniorque adolescentiâ est, eò majore curâ et diligentia eam esse instituendam censebant Persæ. Non dabatur huc et illuc discurrendi licentia: et rarò à magistris discedebant, nisi venationis causâ: regem enim tum dimidia adolescentum pars sequebatur, eadem in prandium ferens cibaria et obsonia, quæ pueris dabantur; nec ante venationem peractam licebat prandere. Cui abstinentiæ assuescebant, ut in bello, si quando res cogeret, inediam perpeti possent. *Xenoph. Cyrop. l. i.*

3. Jugurthæ regis adolescentiam sic describit Sallustius: Ubi primùm adolevit Jugurtha, pollens viribus, decorâ facie, ingenio validus, non se luxui neque inertiae corrupendum dedit: sed equitare, jaculari, cursu cum æqualibus contendere, et cum omnes gloriâ anteiret, omnibus tamen carus esse: plurimùm facere, et minimum ipse de se loqui. *Sallust. Jug. c. 6.*

Publius Scipio Æmilianus à tenerâ ætate Græcis literis apprimè imbutus, ut primùm licuit, se Polybio ad optima quæque erudiendum tradidit. Cujus è congressu et contubernio, quod rebus omnibus anteferebat, tantos fructus tulit, ut non modò æquales suos, sed etiam majores natu, omni virtutum genere superaret. Temperantiæ et continentiae laudem, prout ætati conveniebat, ante omnia comparare studuit. Quod quidem valde difficile tunc erat. Mirum enim est, quo impetu ad fœdas libidines et epulas juvenes eo tempore ferrentur. Quippe bello Persico diutiùs tracto, Græcorum in eo genere mollitiem celeriter hauserant Romani, et maximarum divitiarum compotes facti, habebant affatim unde luxuriam suam alerent atque explerent. At Scipio contrarium vitæ institutum secutus, et cum omnibus cupiditatibus tanquam cum teterrimis belluis, colluctatus, intra quinquennium publicam modestiæ ac continentiae laudem est adeptus. Hæc autem voluptatum abstinentia optimam

ei valetudinem corporis attulit, quâ per totum vitæ spatium usus, amplissimam temperantiæ suæ mercedem percepit. At studium pudoris, cuius præcipua et cura fuerat, accessit venandi exercitatio, quæ bellicæ fortitudinis quædam esse disciplina videbatur. *Diod. Sic. l. xxvi. Polyb. l. xxxi.*

4. Draco Atheniensis, vir insignis integritate vitæ, et juris divini atque humani peritus, tulit Athenis multas leges: quæ, quia acerbiores erant, dicebat Demades videri scriptas fuisse sanguine potius quàm atramento. Una ex illis legibus capitali supplicio plecti eum jubebat, qui convictus fuisset desidiæ. *Plutarch. in Solon. A. Gell. l. xi. c. 18.*

Amasis quoquæ Ægyptiorum rex lege sanxerat, ut singuli cives singulis annis accederent ad provinciarum præfectos: quibus quisquis probare non poterat se profiteri artem aliquam certam et honestam unde viveret, tanquam perniciosus humanæ societati civis, morte afficiebatur. *Herod. l. ii.*

Lucani publica judicia instituerant non desidiæ solùm, sed etiam luxuriæ. Quin et si quis his vitii infecto mutuam pecuniam dedisset, eâ pecuniâ mulctabatur. *Nicol. Damas.*

CAPUT XXX.

Plura audiamus, loquamur pauca.

1. Hæc Pythagoræ in recipiendis instituendisque discipulis ratio fuisse traditur. Adolescentium, qui sese ad discendum obtulerant, mores naturamque conabatur per noscere ex oris totiusque corporis habitu. Tum eos, qui explorati ab eo et idonei habiti fuerant, recipiebat in disciplinam, et jubebat tempus certum tacere; non omnes idem, sed alios aliud, pro æstimato captu solertiæ. Quinquennale ut plurimum erat silentium: neque quisquam minus quàm biennium tacere solitus. Ubi res didicerant rerum omnium, ut quidam putant, difficillimas, ut alii, facillimas, tacere audireque; tum potestas erat verba facere, et quærere, quæque audissent scribere, et, quæ ipsi opinarentur, expromere. *A. Gell. l. i. c. 9.*

Erat audiendi studiosus Epaminondas, ex hoc enim facillimè disci arbitrabatur. Itaque cùm in circulum venisset, in quo aut de reipublicâ disputaretur, aut de philosophiâ sermo haberetur; nunquam inde priùs discessit, quàm ad finem sermo esset productus. *Cor. Nest. Epam. c. 3.*

2. Apud Persas lingua castigabatur graviùs, quàm quodvis probrum: nec magnam rem sustineri posse credebant ab eo, cui tacere grave esset: quod homini facillimum voluerat esse natura. Regum arcana mirâ fide celabant: non spes, non metus, eliciebat vocem, quâ proderentur occulta. *Q. Curt. l. iv. c. 6.*

Sic et Hispani sæpè tormentis pro servando rerum creditarum silentio immortui: adeò fortior illis taciturnitatis cura quàm vitæ. *Just. l. xlv. c. 2.*

Pompeii cujusdam, Romani viri, virtus laudatur; qui, dum legationis officio fungeretur, à Gentio Illyriorum rege interceptus, et senatûs consilia prodere jussus, ardenti lucernæ admotum digitum cremandum præbuit, eaque patientiâ regi simul et spem tormentis quicquam ex se cognoscendi abstulit, et expetendæ populi Romani amicitie magnam cupiditatem iniecit. *Valer. l. iii. c. 3.*

Zeno inepto et nihil ad rem loquenti adolescentulo: *Idcirco, inquit, aures habemus duas, et os unum, ut plura audiamus, loquamur pauca.* Idem interrogantibus cum legatis regis Ptolemæi, quid de se renunciari regi vellet: *Senem, inquit, renunciate à vobis conspectum Athenis, quæ inter pocula servare silentium sciat.* *Diog. Laërt. in Zenon.*

Xenocratis philosophi responsum quàm laudabile? Cùm maledico sermoni quorundam hominum interesset, ac taceret; uno ex his quærente, cur solus ita linguam cohiberet: *Quia locutum fuisse me, inquit, aliquando poenituit; tacuisse nunquam.* *Val. l. vii. c. 2.*

Q. Cæcilius Metellus Macedonicus amico cuidam interroganti quid esset acturus? *Tunicam, inquit, meam exurerem, si eam consilium meum scire existimarem.* *A. Vict. c. 61.*

Antigonus Philippo filio, multis præsentibus, quærenti quando castra moturus esset? *Ecquid, inquit, times, ne solus tubam non audias?* *Plut. Apoph.*

Alium silere quod voles, primus sile. *Senec. Hippol. ver. 873.*

3. Sermo, qui in circulis, disputationibus, congregationibus familiarium, conviviis versatur, sit lenis minimè que pertinax. Nec verò, tanquam in possessionem nostram venerimus, excludamus alios: sed cum reliquis in rebus, tum in sermone communi, vicissitudinem non inquam putemus. Videamus, quibus de rebus sit sermo. Si seriis, severitatem adhibeamus; si jocosis, leporem. Sed quomodo rectissimè præcipitur, ut in omni vitâ motus animi nimios rationi non obtemperantes fugiamus; sic ejusmodi motibus sermo debet vacare, ne aut ira existat, aut cupiditas aliqua, aut tale aliquid appareat. Profert enim mores plerumque oratio, et animi secreta detegit. Nec sine causâ Græci prodiderunt, quemque ita dicere, ut vivat. Maximè verò curandum, ut eos, quibuscum sermonem conferimus, et vereri et diligere videamur. *Cicer. 1 Offic. n. 132. 136. Quint. l. xi. c. 1.*

Habentur plerumque sermones aut de domesticis negotiis, aut de republicâ aut de artium studiis atque doctrinâ. Danda igitur opera est, ut, si aberrare ad alia cæperit, ad hæc revocetur oratio: sed utcumque aderunt res. Neque enim omnes iisdem rebus, nec omni tempore, nec similiter delectamur.

Cùm aliquid obscænum coram te dictum fuerit; aut, si opportunità feret, eum objurgabis, qui sermonem illum injecerit: aut silentio saltem, rubore, tristi vultu ostendes eam orationem tibi displicuisse. *Epict. c. 55.*

CAPUT XXXI.

Adolescentium ludis intersint majores natu.

1. Non in eadem intentione semper retinenda mens, sed ad lusus et jocos revocanda. Socrates deprehensus ab Alcibiadè ludens cum filio infante, non erubuit. Agesilaus arundini insidens equitabat cum filio puero: et quum quidam eum derisisset: *Nunc, inquit, tace: cum verò et ipse pater fueris, tunc rem narrabis.* Cæsar Augustus animi laxandi causâ modò piscabatur hamo, modò talis nuci- busque ludebat cum pueris minutis, quos facie et garrulitate amabiles undique conquirebat. Domitianus inter

initia principatûs quotidie secretum sibi per horam unam sumere solebat, et interim muscas captare, ac stylo præacuto configere: ita ut cuidam interroganti, essetne quis intus cum Cæsare, non absurdè responsum sit à Vibio Crispo: *Ne musca quidem.* Senec. de Tranq. c. 15. Ælian. l. xii. c. 15. Sueton. in Aug. c. 83. in Domit. c. 3.

Lælium fuerunt cum Scipione sæpè rusticatum, eosque incredibiliter repuerascere esse solitos, cùm rus ex urbe, tanquàm à vinculis, evolavissent. Vix audeo dicere de tantis viris, sed ita narratur: conchas eos ad Caietam et ad Laurentum legere consuêsse, et ad omnem animi remissionem ludumque descendere. Scilicet quemadmodum volucres videmus fingere et construere nidos, easdem autem, cùm aliquid effecerint, levandi laboris sui causâ passim ac liberè volitare; sic nostri animi negotiis et opere defessi, volitare quodammodo cupiunt. *Cicer. 2 de Orat. n. 22.*

2. Amasim Ægyptiorum regem cùm admonerent amici, eum parùm è regiâ dignitate facere, quòd inter epulas jocaretur: *Qui, inquit, arcum habent, eum, cùm est opus, intendunt, mox remittunt: si enim perpetuò intensus sit, frangatur necesse est, aut eo amplius uti non possint. Eadem est hominis ratio. Si assiduè seria tractare, et nihil sibi ad lusum indulgere velit, sensim membris aut animo captus fiet.* Herod. l. ii.

Puerorum in turbâ quidam ludentem Atticus
 Æsopum nucibus quum vidisset, restitit,
 Et quasi delirum risit. Quod simul sensit
 Derisor potiùs quàm deridendus senex;
 Arcum retensum posuit in mediâ via:
 Heus, inquit, sapiens, expedi quid fecerem,
 Concurrit populus: ille se torquet diu,
 Nec quæstionis positæ causam intelligit:
 Novissimè succumbit. Tum victor sophus:
Citò rumpe arcum, semper si tensum habueris:
At si laxaris, cùm voles, erit utilis.
 Sic lusus animo debent aliquando dari,
 Ad cogitandum melior ut redeat tibi.

Phædr. l. iii. fab. 14.

Danda est remissio animis: meliores acrioresque erunt post quietem. Ut agris non est imperandum singulis annis frumentum, citò enim exhaustiet illos nunquam.

intermissa fecunditas; ita animorum impetum assiduus labor frangit. *Senec. de Tranq. c. 15.*

3. Naturalem quandam voluptatem habent lusus jocusque. At eorum frequens usus omne animis pondus omnemque vim eripiet. Sic somnus refectioni corporis necessarius est; hunc tamen si per diem noctemque continues, mors erit. Itaque subinde tantum indulgendum est animo, et dandum otium, quod ei alimenti ac virium loco sit. *Ibid.*

4. Cum adolescentes relaxare animos, et dare se jucunditati volent, caveant intemperantiam, meminerint verecundiae, sine qua nihil rectum esse potest, nihil honestum. Quod erit facilius, si in ejusmodi quidem rebus majores natu interesse velint. Ipsa quippe seniorum, sicut et magistratum praesentia, verum pudorem et liberalem timorem animis solet infundere. *Cic. 1 Offic. n. 122. 148. Arist. 7 polit. c. 12.*

Proderit sine dubio custodem tibi imposuisse, et habere quem respicias. Cum jam profeceris tantum, ut sit tibi etiam tui reverentia, licebit dimittas paedagogum: Interim te aliquorum auctoritate custodi. *Senec. Epist. 95.*

Verba quis auderet coram sene digna pudore

Dicere?

Ovid. 5. Faste. ver. 69.

Hinc Persæ, qui in liberorum institutione plurimum studii ac diligentiae ponebant, lectos à senioribus viros iis praeficiebant; et Lacedaemonii omnibus suorum ludis majores natu volebant interesse. *Xenoph. Cyrop. l. i. Plut. in Lycurg.*

CAPUT XXXII.

In ludo ac joco modus retinendus.

1. Interrogatus Socrates quænam juvenum virtus esset, respondit: *Ne quid nimis.* Diog. Laërt. in Socr.

Ludendi est quidam modus retinendus, ne nimis omnia profundamus, elatique voluptate in aliquam turpitudinem delabamur. *Cic. 1 Offic. n. 153, &c.*

Appetitus omnes contrahendi sedandique sunt: exci-randa animadversio ac diligentia, ut nihil temerè inconsideratèque agamus. Neque enim ita generati à naturâ sumus, ut ad ludum et jocum facti esse videamur; sed

ad severitatem potiùs, et ad studia quædam graviora atque majora.

Ludo et joco uti quidem licet; sed sicut somno et quietibus cæteris, cum gravibus seriùsque rebus satisfecerimus.

2. Ipsum genus jocandi non profusum nec immodestum, sed ingenuum et facetum esse debet. Ut enim pueris non omnem ludendi licentiam damus, sed eam quæ ab honestis actionibus non sit aliena; sic in ipso joco aliquid probi ingenii lumen eluceat.

Duplex omnino est jocandi genus: unum illiberale, petulans, flagitiosum, obscœnum; alterum elegans, urbanum, ingeniosum, et facetum. Quo genere philosophorum Socraticorum libri referti sunt: multaque multorum tum Græcorum tum Romanorum sunt facetè dicta.

Facilis est distinctio ingenui et illiberalis joci. Alter est libero dignus; alter, ne homine quidem, si rerum turpitudine adhibeatur verborum obscœnitas.

Persæ, quæcunque factu turpia erant, eadem et dictu turpia censebant. Itaque nihil dicere licebat, quod non facere fas esset. *Herodot. l. i.*

Quod facere turpe est, dicere ne honestum puta. *P. Syrus.*

3. Jocis, tanquam sale, parcè utendum. *Diog. apud Stob.*

Vitandum est, ne scurrilis jocus sit aut mimicus. *Cic. 2. de Orat. n. 239.*

Lædere nunquam velimus, longèque absit propositum illud, potiùs amicum, quam dictum, perdere. *Quintil. l. vi. c. 3.*

Adversus miseros inhumanus est jocus.

Ea quæ dicit vir bonus, salvâ dignitate et verecundiâ, decent: nimiùm enim risûs pretium est, si probitatis impendio constat.

Oratori longè recedendum est ab omni obscœnitate et verborum et sensuum. Quædam satiùs est cum causæ detrimento tacere, quam cum verecundiæ dicere. *Senec. Exc. contr. l. i.*

CAPUT XXXIII.

Est cui magno constitit dicterium.

1. Cùm Romæ medio foro quidam mortuus efferretur, accessit ad eum scurra, et in aurem quiddam insurravit. Interrogatus ab iis qui aderant, quidnam dixisset? *Mundasse*, respondit, *ut Augusto nunciaret, nihil dum eorum, quæ moriens plebi legaverat, solutum esse à Tiberio*. Re auditâ, Tiberius accersitum scurræ suâ legatorum parte donavit, et duci ad supplicium jussit, *ut ipse Augusto verum nuncium ferret*.

Longè alio in dicaces animo antea fuerat Tiberius. Nam adversus convicia, malosque rumores, et famosa de se ac suis carmina, firmus ac patiens, subinde jactabat: *In civitate liberâ linguam mentemque liberas esse oportere*. Et aliquando senatu cognitionem de ejusmodi criminibus ac reis flagitante: *Non tantum, inquit, otii habemus, ut implicare nos ejusmodi, negotiis debeamus. Si quis temerè aliquid locutus fuerit, dabo operam ut rationem factorum meorum dictorumque reddam*. Suet. in Tiber. c. 28.

2. Cùm Theocritus Chius duceretur ad Antigonum regem quem offenderat, eumque solarèntur amici, ac spem facerent fore ut regis clementiam experiretur, ubi ob ejus oculos venisset: *Omnem ergo, inquit, mihi spem salutis eripitis*. Erat enim Antigonus uno orbatus oculo. Audito amaro intempestivoque joco rex, qui antea se Theocrito gratiam delicti facturum dixerat, hominem luce privavit. *Macrob. Sat. vii. c. 3*.

3. Thacus Ægyptiorum rex, factus est ex rege privatus, quod Agesilaum Lacedæmoniorum regem dicto falso et amaro vellicasset, quo tempore ad se venerat belli adjutor futurus. Quoniam etiam Agesilaüs brevi corporis staturâ erat, hoc ex Æsopi fabulis memoravit Thacus. *Athen. l. xiv. c. 1*.

Mons parturibat gemitus immanes ciens,

Eratque in terris maxima exspectatio:

Et ille murem peperit. *Phæd. l. iv. fab. 21*.

Quæ cùm audisset Agesilaüs, irâ percitus, *Videbor, inquit, tibi aliquando etiam leo*. Postea regno spoliatus Thacus ad Persas fugere coactus est.

Scipionem Nasicam, cùm ædilitatem pèteret, repul-
sam passum esse suprâ retulimus, quòd civem, cujus
manus erant rustico labore duratæ, interrogasset.

An manibus solitus esset ambulare? Valer. l. vii. c. 5.

Plerumque stulti risum dum captant levem,

Gravi dstringunt alios contumeliâ :

Et sibi nocivum concitant periculum. *Phæd.* l. i. 29.

CAPUT XXXIV.

Facetè dicta aut facta.

1. Cùm ad poëtam Ennium venisset Nasica, eique
à foribus quærenti Ennium ancilla dixisset, domi non
esse; Nasica sensit illam domini jussu ita respondisse,
et eum intus esse. Paucis post diebus cùm ad Nasicam
venisset Ennius, et illum à januâ quæreret; exclamat
Nasica, *se domi non esse*. Tum Ennius: *Quid? ego non
agnosco vocem, inquit, tuam?* Hic Nasica: *Homo es im-
pudens: ego, cùm te quærerem, ancillæ tuæ credidi te domi
non esse; tu mihi non credis ipsi?* Cicer. 2 de Orat.
n. 276.

Siculus quidam, cui prætor Scipiò patronum causæ
dabat hominem nobilem, sed admodum stultum: *Quæso,*
inquit, *Prætor, adversario meo da istum patronum; deinde
mihi neminem dederis.* Idem. n. 280.

Patrono malo, qui vocem in dicendo obtuderat, sua-
debat Granius, ut mulsum frigidum biberet, simul ac
domum redisset: *Perdam,* inquit, *vocem, si id fecero.
Melius est,* respondit Granius, *quàm reum.* n. 282.

Crassum, cùm causam oraret, Lucio Helvio Lamiâ,
homine deformi, odiosè interpellante: *Audiamus,* inquit
Crassus, *fulchellum puerum.* Cùm esset arrisum: *Non
potui,* inquit Lamia, *mihi formam ipse fingere; ingenium
potui.* Tum hic: *Audiamus,* inquit, *disertum.* Multo
etiam arrisum est vehementiùs. n. 262.

2. Cùm Orator malus in epilogo misericordiam se
movisse putaret; rogavit Catulum, videreturne miseri-
cordiam movisse? *Ac magnam quidem,* inquit Catulus:
*neminem enim futo esse tam durum, cui non oratio tua mi-
seranda visa sit.* n. 278.

Poëmatibus scribendis operam dabat Siciliae tyrannus Dionysius: et (quoniam in hoc genere, magis quam in aliis, suum cuique pulchrum est, vixque ullus reperitur poëta, qui sibi non optimus videatur) magis ob carmina, quam propter res bello bene gestas sese jactabat. Accersierat ad se et præcipuo in honore habebat quoscumque usquam arte poëtica nobiles esse audierat, eorumque iudiciis poëmata sua mittebat. At illi, ne regis benevolentiam et munera amitterent, quæ scribebat omnia probabant ac laudabant. Aderat inter eos Philoxenus, celeberrimus dithyramborum versuum artifex: qui unus adulari nescius, cum aliquando inepta à Dionysio recitata carmina audivisset, de iis quid sentiret liberè aperuit. Quà libertate offensus rex poëtæ, reprehensorem suum à satellitibus abripi, et in latomias, qui publicus carcer erat, detrudi iussit. Sed postridie ab amicis, Philoxeno veniam dari postulantibus, exoratus, rursus ad epulas eum adhibuit. Carmina sua, ut solebat, ipse mirum in modum extulit, et de quibusdam versibus, quos omnium optimos existimabat sententiam Philoxeni exquisivit. Ille, nullâ ad regis interrogationem responsione factâ, ejus satellites vocavit, seque ad latomias reduci iussit. Tam facetam libertatem, quæ omnium convivarum risu excepta fuerat, æquo animo tulit Dionysius.

Non multò post admonitus oratusque ab amicis Philoxenus, ut à tam apertâ loquendi licentiâ tandem abstineret, pollicitus est se deinceps effecturum, ut et vera diceret, et Dionysii benevolentiam tamen retineret. Nec sanè fefellit. Nam cum deinde tyrannus, quibusdam versibus, qui miserabiles affectus exprimerent, recitatis, illum interrogasset, quales ei tandem viderentur? *Miserabiles*, respondit. Quâ verbi ambiguitate præstitit quod erat pollicitus. Rex enim ita accepit, quasi Philoxenus versus suos ad movendam commiserationem idoneos esse respondisset, atque ad eò illos laudasset: alii verò sic interpretabantur (quæ erat vera dicterii sententia) quasi miseros, hoc est, pessimos, dixisset versus illos. *Diad. Sic. l. xv. Cicer. 5 Tusc. n. 68.*

3. Lucernam accensam circumferens Diogenes ambulabat in foro clarissimâ luce, quærenti similis. Rogantibus quid ageret, *Hominem*, inquit, *quæro*: notans publi-

cos civitatis mores, in quâ vix quisquam dignus esset hominis nomine.

Animadvertens quemdam imperitè jaculantem, proximè scopum consedit: et cùm ex eo quæreretur, cur id faceret: *Ne fortè, inquit, ille me feriat. Diog. Laërt. in Diog.*

Ad Antisthenem, quem ferre molestius morbi dolores audierat, accessit cum sicâ, et cùm ei dixisset Antisthenes: *Quis me hisce doloribus liberabit?* Ille, ostensâ sicâ, *Hæc, ait. Cui Antisthenes: Doloribus, dixi, non vitâ. Idem. in Ant.*

4. Prætor Prænestinus per timorem segniùs suos in prælium duxerat. Victis hostibus, eum, quum Papirius Cursor consul inambulans ante tentorium, vocari jussisset, lictorem expedire securim jussit. Ad quam vocem exanimi stante Prænestino: *Agedum lictor, inquit, excide radicem hanc incommodam ambulantiibus.* Perculsumque ultimi supplicii metu dimisit. *Liv. l. ix. c. 6.*

Augustus penè nulli se invitanti negabat. Exceptus igitur à quodam cœnâ satis parcâ et penè quotidianâ, hoc tantùm insusurravit: *Non putabam me tibi iam familiarem.* *Macrob. 2 Sat. c. 4.*

Illiensibus paulò seriùs Tiberium consolantibus de morte filii Drusi: *Se quoque, respondit, vicem eorum dolore, quodd egregium civem Hectorem amisissent.* Effluxerant autem tum plùs quàm mille anni à morte Hectoris. *Sueton. in Tiber. c. 52.*

5. Cùm Ciceroni in accusatione Verris aliquid obscuriùs locuto dixisset patronus Verris Hortensius: *Non intelligo hæc enigmata. Atqui debes, inquit Cicero, cùm Sphingem domi habeas.* Acceperat enim Hortensius à Verre Sphingem æneam magni pretii. *Quint. l. vi. c. 4.*

Maximo consule mortuo die Decembris ultimo, Cæsar consulem horâ septimâ in reliquam partem diei renunciaverat Caninium. Quem cùm plerique irent salutatum de more: *Festinemus, inquit Cicero, priusquam abeat magistratu.* De eodem Caninio scripsit Cicero: *Fuit mirificâ vigilantâ Caninius, qui suo toto consulatu somnum non viderit.* *Plut. in Cicer. 7 ad famil. Ep. 30.*

Quidam adolescens, quem fama erat patri venenum dedisse in placentâ, agebat ferociùs, et Ciceroni probra ac maledicta minabatur: cui Cicero: *Hoc, inquit, malo à te, quàm placentam.* *Plut. in Cicer.*

Fabiæ Dolabellæ triginta se annos habere dicenti : *Verum est, inquit Cicero, nam hoc jam viginti annos audio.* Quint. l. vi. c. 4.

6. Cùm partâ Actiacâ victoriâ Romam ingrederetur Augustus, occurrit ei inter gratulantes opifex quidam, corvum tenens quem instituerat hæc dicere : *Ave, Cæsar, victor, imperator.* Miratus Cæsar officiosam avem, viginti millibus nummorum emit. Socius opificis, ad quem nihil ex illâ liberalitate prevenerat, affirmavit Cæsari habere illum et alium corvum, quem afferri postulavit. Allatus corvus, verba quæ didicerat expressit : *Ave, victor, imperator, Antoni.* Nihil propterea exasperatus, Augustus, satis duxit jubere corvorum doctorem dividere acceptum munus cum contubernali. Salutatus similiter à psittaco, emi eum jussit. Idem miratus in picâ, illam quoque mercatus est. Exemplum pauperem sutorem sollicitavit ut corvum institueret ad parem salutationem : sed cùm parùm proficeret, sæpè ad avem non respondentem dicere solebat : *Opera et impensa perit.* Tandem tamen corvus cæpit dicere dictatam salutationem. Hæc auditâ, dum transit, Augustus respondit : *Satis domi saluatorum talium habeo.* Tum corvus illa verba, quibus dominum querentem solebat audire, subrexit : *Opera et impensa perit.* Ad quod Cæsar risit, emique avem jussit quanti nullam adhuc emerat. *Macrob. 2 Sat. c. 4.*

Solebat Græculus quidam descendenti è palatio Cæsari Augusto honorificum aliquod epigramma porrigere. Id cùm frustra sæpè fecisset, et tamen rursus eum idem facturum vidisset Augustus ; breve suâ manu in chartâ exaravit Græcum epigramma, et Græculo venienti ad se obviâ misit. Ille legendo laudare, mirarique tam voce quàm vultu gestuque. Deinde cùm accessit ad sellam, quâ Cæsar vehabatur, demissâ in pauperem crumenam manû paucos denarios protulit, quos principi daret, dixitque : *Se plus daturum fuisse, si filius habuisset.* Secuto omnium risu, dispensatorem Cæsar vocavit, et satis grandem pecuniæ summam numerari Græculo jussit. *Idem.*

7. Cùm M. Pomponius Marcellus ex oratione Tiberii aliquid reprehendisset quasi minimè Latinum, affirmaretque contra Atteius Capito et esse illud Latinum, et, si non esset, futurum : *Cerè mentitur Capito, inquit Pomponius ; tu enim, Cæsar, civitatem dare potes hominibus, verbis non potes.* Sueton. de gram. c. 22.

Quum Favorini, viri Græcæ ac Latinae linguæ peritissimi, verbum quoddam ab Adriano imperatore reprehensum esset, atque ille cessisset: arguentibus eum amicis, quòd malè cederet Adriano de verbo, quod idonei auctores usurpassent; *Non rectè suadetis*, inquit jocans Favorinus, *qui non fatimini me illum doctiorem omnibus credere, qui habet triginta legiones.* Spart. in Adr. c. 15.

8. Cùm inter duos scelestos iudex esset Philippus Macedoniae rex; auditâ causâ, pronunciavit: *Ut alter à Macedonia fugeret, alter illum insequeretur.* Hoc faceto iudicio utrumque exulem esse iussit. *Plut. Apoph.*

Deridenda erat, et sanè derisui ab eodem Philippo habita est, Menecratis medici inanjs superbia. Ille Syracusanus fuit; qui, quia comitialibus morbis medebatur in eam arrogantiam, est prolapsus, ut ipse se Jovem diceret. Hanc autem ab iis quos curabat mercedem paciscebatur, ut se per ubes Græciæ euntem comitarentur, minorum Deorum nomina et ornatum gerentes. Misit aliquando ad Philippum literas, quibus erat hæc præfixa salutatio: *Menecrates Jupiter Philippo felicitatem.* Ad ea Philippus rescripsit: *Philippus Menecrati sanitatem. Suedo tibi ut Anticyram te conferas.* In urbe autem Anticyrâ vel optimum nascebatur, vel optimè temperabatur, helleborum, quo cerebrum purgabatur. Cùm in Macedoniam ad Philippum venisset, lautissimum instrui convivium rex iussit, et novo Jovi ad epulas vocato lectum seorsùm parari, tum pro cibo acerram apponi. Ita suffitus ei fiebat, dum cæteri convivæ exquisitis vescebantur cibis. Gaudere primùm Menecrates tali honore. At ubi, obrepente sensim fame, nihil escæ apponebatur esurienti, seque solo odore thuris à rege pasci tandem intellexit, jejunus et irrisus discessit. *Ælian. l. xii. c. 51. Athen., l. vii. c. 10.*

CAPUT XXXV.

Excitatur laude æmulatio.

1. Cùm Quantilianus expendit utiliusne sit pueros domi atque intra privatos parietes continere, an frequentia scholarum et publicis præceptoribus tradere; inter alia publicæ institutionis commoda hoc præcipuum re-

dicat, quòd in scholâ audiet puer multa quotidie probari, multa corrigi; proderit alicujus objurgata desidia, proderit laudata industria: excitabitur laude æmulatio: turpe ducet cedere pari, pulchrum superâsse majores. Accendunt hæc omnia animos: et licèt ipsa vitium sit ambitio, frequenter tamen causa virtutum est. *Quint. l. i. c. 3.*

Honestum per se esse expetendum indicant pueri, in quibus, ut in speculis, natura cernitur. Quanta studia decertantium sunt! Quanta ipsa certamina! Ut illi efferruntur lætitiâ, cùm vicerunt! Ut pudet victos! Ut se accusari nolunt! Ut cupiunt laudari! Quos illi labores non perferunt, ut æqualium principes sint! *Cicer. 5 de Fin. n. 61.*

Utile est habere quos imitari primùm, mox vincere velis. *Quint. l. i. c. 2.*

2. Noctu ambulabat in publico Themistocles, quòd somnum capere non posset; et causam quærentibus respondēbat, *Miltiadis trophæis se à somno suscitari.* *Cicer. 4 Tusc. n. 4.*

Cui non sunt auditæ Demosthenis vigilæ? qui dolere se aiebat, si quando opificum antelucanâ victus esset industriâ.

Aristoteles vir summo ingenio, mirâ scientiæ copiâ, cùm motus esset Isocratis rhetoris gloriâ, dicere etiam cœpit, et adolescentes docere, et eloquentiam conjungere cùm philosophiâ, ad quam Xenocratis quoquē exemplo incensus accesserat. *1 Tusc. n. 7. Diog. Laërt. in Arist.*

3. Alexander paternæ laudis æmulator, cùm eum urbem aliquam nobilem expugnâsse, aut insigni victoriâ potitum esse, acciperet; adèd non ejusmodi nunciis lætabatur, ut inter æquales exclamaret: *O amici, omnia mihi præripiet pater, nec quidquam magnificum gerendum relinquet!* Achilles quoquē, à quo se originem ducere prædicabat, fortitudinem et gloriam ab Homero carminibus celebratam æmulatus, cùm ad ejus tumulum in Sigeo adstisset! *O fortunate, inquit, adolescens, qui tuæ virtutis Homerum præconem inveneris!* Et verè: nam nisi Ilias extitisset illa, idem tumulus, qui corpus Achilles contexerat, memoriâ obruisset. *Plut. in Alex. Cicer. pro Arch. n. 24.*

Julium Cæsarem ferunt, cum in Hispaniâ, quò reipublicæ causâ missus erat, legendis Alexandri rebus gessisset, vacaret, aliquando diu secum cogitabundum hæsisse, inde lacrymas profudisse. Quarum causam quærentis amicis: *Nonne, inquit, idonea dolendi causa est, quòd hilum præclari egerim, eam ætatem adæptus, quâ Alexander multa regna vincendo peragraverat?* Plut. in Cæsar.

4. Honos alit artes, omnesque incenduntur ad studia oriâ: jacentque ea semper, quæ apud quosque populos approbantur. Itaque quò minus honoris erat poëtis apud ceteros Romanos, eo minora poëtæ artis studia fuerunt: rōdque ab illis poëtæ vel cogniti vel recepti. *Cicer. Tusc. n. 3 et 4.*

CAPUT XXXVI.

Famæ consulendum est.

Cum nobis à naturâ moderationis, temperantiæ, verecundiæ partes sint datæ, cumque eadem natura doceat non negligere quomodo nos erga homines geremus: est dominis ingenui et liberaliter eduçati velle bene audire à ceteris, à propinquis, à bonis viris cæterisque hominibus: ut non solum arrogantis est, sed etiam omnino insoluti, negligere quid de se quisque sentiat. Quæ admodum autem pulchritudo corporis movet oculos, delectat hōc ipso, quòd inter se omnes partes cum eadem lepore consentiunt; sic movemus approbationem ceterorum quibuscum vivimus, ordine, et constantiâ, et moderatione dictorum omnium atque factorum. *Cicer. Offic. n. 98. 3 de fin. n. 97.*

Si cupis bene audire, disce bene dicere, et recte gerere: sic enim perfrueris bonâ famâ. *Stob. serm. 1.*

Præclare Socrates dicebat hanc esse proximam et quasi compendiarium viam ad famam et gloriam, si quis ageret, ut qualis haberi vellet, talis esset. Quòd si ui inani ostentatione, et ficto sermone ac vultu stabilem gloriam consequi possent, vehementer errant. Icta enim omnia celeriter tanquam flosculi decidunt, nec mulatum quidquam potest esse diuturnum. *Cicer. 2 Offic. n. 43.*

Antè conscientiæ consulendum est, quàm famæ,
Paterc. l. ii. c. 115.

CAPUT XXXVII.

Vive ut in publico.

1. Tunc te virum bonum et felicem judica, cum domi tanquam in publico vives, cum te parietes tui tegent, non abscondent. Plerumque parietes nobis esse circumdatos volumus, non ut tutius vivamus, sed ut peccemus occultius. Janitores ædibus nostris tam malefactorum conscientia opposuit, quàm superbia. Quid autem prodest recondere se, et oculos hominum auresque vitare? Mala conscientia etiam in solitudine anxia atque sollicita est: bona turbam advocat. Si honesta sunt quæ facis, omnes sciant: si turpia, quid refert neminem scire, cum tu scias? O te miserum, si contemnis hunc testem! *Senec. Ep. 43.*

Julii Drusi ædes pluribus ex partibus patebant vicinorum prospectui. Hoc incommodum faber, si quinque talenta ei darentur, se correcturum pollicebatur, effecturumque ne pars ulla esset obnoxia prospectui. Tum Drusus: *Decem, inquit, dabo, si talem reddas domum meam, ut non vicini tantum, sed omnes etiam cives videre possint quomodo in eâ vivam.* Plutar. pol. præ.

2. Magna vis est conscientiæ in utramque partem: ut neque timeant, qui nihil commiserint: et pœnam semper ante oculos versari putent, qui peccarint. *Cicer. pro Milane, n. 61.*

Nunquam segura est prava conscientia. *P. Syrus.*

Tuta fortasse scelera esse aliquando possunt, segura non possunt. Prima et maxima peccantium est pœna peccasse, nec ullum scelus, licet publica pœna non sequatur, impunitum est: quoniam sceleris in scelere supplicium est. Mala facinora conscientia flagellantur. Proprium est nocentium timere semper et expavescere. Bona conscientia prodire vult et conspici: ipsas nequitia tenebras timet. *Senec. Ep. 97.*

Hanc Catilinæ et Jugurthæ post patrata flagitia et facinora imaginem expressit Sallustius:

Catilinæ animus impurus, Diis hominibusque infestus, neque vigiliis neque quietibus sedari poterat: ita conscientia mentem excitam vexabat. Igitur color est exsanguis: fœdi oculi: citus modò, modò tardus inensus: prorsus, in facie vultuque vecordia interat. *Bell. Cat.* c. 15.

Neque postea Jugurthæ dies ullæ aut nox quieta fuit: neque loco, neque mortali cuiquam, aut tempori satis credere: cives hostesque juxtà metuere, circumspectare omnia, et omni strepitu pavescere: alio atque alio loco sæpè contra decus regium noctu requiescere: interdum somno excitus arreptis armis tumultum facere: ita formidina, quasi vecordiâ, exagitari. *Bell. Jug.* c. 72.

3. Tiberio quoquè facinora et flagitia sua in supplicium verterant: neque eum fortuna impediabat, quin tormenta pectoris suasque ipse pœnas in literis ad senatum scriptis fateretur. Itaque non frustrà olim affirmavit vir sapientiâ præstantissimus, si recludantur tyrannorum mentes, posse aspici laniatus et ictus: quoniam, ut corpora verberibus, ita sævitiâ, libidine, malis consultis, animus dilaceratur. *Tacit. Annal.* vi. c. 6.

Dionysius major Siciliæ tyrannus indicavit ipse quàm parùm esset beatus. Nam cùm quidam ex ejus assentatoribus Damocles commemoraret in sermone copias ejus, opes, majestatem, magnificentiam ædium regiarum; negaretque unquam beatiorem illo quemquam fuisse: *Visne igitur, inquit, Damocle, quoniam hac te vita delectat, ipsæ eandem degustare et fortunam experiri meam?* Cùm se ille cupere dixisset: collocari jussit hominem in aureo lecto, strato pulcherrimis stragulis: abacosque complures ornavit argento auroque cælato. Tum ad mensam eximiâ formâ pueros delectos jussit consistere, eosque ad nutum illius intuentes diligenter ministrare. Aderant unguenta et coronæ, odores incendebantur, mensæ exquisitissimis epulis erant instructæ. Fortunatus sibi Damocles videbatur. At Dionysius in hoc medio apparatu fulgentem gladium, è lacunari setâ equinâ appensum, demitti jussit, ut impenderet illius beati cervicibus. Itaque nec pulchros illos administratores aspiciebat, nec plenum artis argentum: nec manum porrigebat in mensam: jam ipsæ defluebant coronæ. Denique exoravit tyrannum ut abire liceret, quòd jam beatus esse nollet. Satisne videtur declarasse Dionysius nihil esse ei beatum,

cui semper aliquis terror ex conscientia malefactorum impendeat? *Cicer. 5 Tusc. n. 51, 62.*

CAPUT XXXVIII.

Vitæ genus eligere res difficillima.

1. De eligendo genere vitæ deliberatio est omnium difficillima. Ineunte enim adolescentiâ, cum est maxima imbecillitas consilii, tum id sibi quisque genus degendæ vitæ constituit, quod maximè admavit. Itaque antè implicatur aliquo certo cursu vivendi, quàm potuit judicare quid optimum esset. Plerique parentum præceptis imbuti, ad eorum morem et exemplum deducuntur. Alii multitudinis judicio feruntur, et quæ majori parti pulcherrima videntur, ea maximè exoptant. Nonnulli tamen, sive felicitate quâdam, sive bonitate naturæ, sive parentum disciplinâ, rectam vitæ secuti sunt viam.

2. In constituendo genere vitæ, potissimum habenda est ratio naturæ nostræ, modò non vitiosæ, ut constare nobismet ipsis possimus, nec in ullo officio claudicare; deinde fortunæ. Suum igitur quisque noscat ingenium, acremque se et vitiorum et bonorum suorum judicem præbeat: ut ad quas res aptissimus erit, in iis potissimum elaboret. Si verò aliquando necessitas nos ad ea detruserit, quæ nostri ingenii non erunt; omnis adhibenda erit cura, meditatio, diligentia, ut ea, si non decorè, ut quàm minimè indecorè, facere possimus.

Si natura non feret, ut quis majorum studia atque instituta sequatur; si non poterit sive causas defensitare; sive populum concionibus tenere; sive bella gerere; illa tamen præstare debet, quæ erunt in ipsius potestate, justitiam, fidem, liberalitatem, modestiam, temperantiam; ut minùs ab eo id quod desit requiratur. *Cicer. 1 Offic. n. 114, 121.*

CAPUT XXXIX.

Magistratus non suis, sed civium commodis, consulat.

1. Magistratûs ea potestas, hoc munus est, ut præsit, præscribatque recta et utilia, et conjuncta cum legibus. Ut enim magistratibus leges, ita populo præsumt magistratûs: verèque dici potest, magistratum legem esse loquentem, legem autem mutum magistratum. *Cicer. 3 leg. n. 2.*

Magistratibus opus est, sine quorum prudentiâ ac diligentia esse civitas non potest. Iis non solùm obtemperare atque obedire cives oportet, sed etiam eos colere ac diligere. Plato verò impios, et Titanum, qui Jovî adversati sunt, similes esse statuit eos, qui magistratibus adversentur. *n. 5.*

Qui modestè paret, videtur qui aliquando imperet dignus esse.

Ubi voluisset Alexander Severus aliquos provinciis rectores, præpositos, procuratores dare, nomina eorum publicè præponebat: ut si quis è populo aliquid adversus eos criminis haberet, afferre posset: dicebatque, *Quod Christiani ac Judæi facerent in eligendis sacerdotibus, id fieri debere in provinciarum rectoribus, quibus et fortuna hominum committerentur, et capita.* Lamprid. in Alex. Sev. c. 45.

2. Qui reipublicæ præfuturi sunt, hoc Platonis præceptum teneant, ut quicquid agant, ad eam referant, obliti commodorum suorum. Ut enim tutela, sic procuratio reipublicæ, ad utilitatem eorum, qui commissi sunt, gerenda est, non verò eorum, quibus est commissa. *Cicer. 1 Offic. n. 85, 86.*

Mihi quidem videntur huc omnia esse referenda ab iis qui præsumt aliis, ut ii, qui erunt in eorum imperio, sint quàm beatissimi. Est enim non modò ejus qui civibus, sed etiam qui servis, qui mutis pecudibus præsit, eorum, quibus præsit, commodis utilitatique servire. Itaque gravis, et fortis civis, dignusque principatu, tradet

se totum reipublicæ, eamque sic tuebitur, ut omnibus consulat. Non opes et potentiam consecrabitur, omninoque ita justitiæ et honestati adhaerescit, ut mortem oppetat potius quam eas deserat. 1 *Epist. ad Quins.*

Adrianus, ubi ad imperium est invectus, in concione et in senatu sæpè dixit: *Ita se rempublicam gesturum, ut non obliuisceretur populi rem esse, non propriam.* Spart. c. 8.

3. Nullum vitium tetrius quam avaritia, præsertim in iis qui rempublicam, gubernant. Habere enim quæstui rempublicam, non modò turpe est, sed etiam sceleratum et nefarium. Nullà autem re conciliare faciliùs benevolentiam multitudinis possunt ii qui præsent, quam abstinentià et continentia. Itaque caput est omni procuratione negotii et muneris publici, ut avaritiæ pellatur etiam minima suspicio. *Cic. 2 Offic. n. 77. 79.*

Cùm videret Cimon omnes ætatis suæ magistratus, præter Aristidem et Ephialtem, quæstui habuisse rempublicam Atheniensem, et magnas ex eà prædas collegisse; aliam viam ingressus, incorruptum se et intactum ab omni avaritiæ labe præstitit, dona oblata constantissimè repudiavit, omniaque gratis et innocenter per totam vitam et fecit et dixit. *Plut. in Cimon.*

Valerius Publicola, cùm tres acceptissimos populo Romano consulatus gessisset, mortuus est, gloria ingenti, copiis familiaribus adedò exiguis, ut funeri sumptus deesset. Itaque publicà pecunià est elatus. Menenius quoque Agrippa, quem senatus et plebs Romana pacis inter se faciendæ arbitrum legerant, ita pecuniæ inops decessit, ut sepulturæ honore caruisset, nisi à populo collatis in capita sextantibus funeratus esset. *Valer. l. iv. c. 4. Liv. l. ii. c. 16.*

Omni Macedonum gazà, quæ fuit maxima, potitus est Æmilius Paulus. Tantam in ærarium populi Romani pecuniam invexit, ut unius imperatoris præda fidem attulerit tributorum. At hic non modò nihil ex thesauris regiis concupivit; sed ne ipse quidem spectare eos dignatus, per alios homines cuncta administravit; et nihil in domum suam intulit præter memoriam nominis sempiternam. Quin, si Valerio fides habeatur, adedò inops decessit, ut, nisi fundus, quem unum reliquerat, venundatus esset, non habuisset uxor ejus unde dotem reciperet. Imitatus patrem Scipio Æmilianus, nihilo locuple-

tior, Carthagine eversâ, fuit : nihilo copiosior L. Mummius, cùm copiosissimam urbem Corinthum sustulisset. Italiam ornare, quàm domum suam, illi maluerunt. Quanquam Italiâ ornatâ ipsa eorum domum videtur fuisse ornatio. Sic M. Marcellus, cùm captis Syracusis quædam Romam asportasset, quæ victoriæ populi Romani monumenta et urbis ornamenta essent, nihil in ædibus suis, nihil in hortis, nihil in suburbano posuit ; putavitque, si ejusmodi ornamenta in domum suam non contulisset, domum suam ornamento urbi futuram. Singulorum enim abstinentia domestica publicum civitatis decus est. *Cicer. 2 Offic. n. 76. Polyb. l. viii. c. 4. Valer. l. iv. c. 4. Cic. in Ver. Act. vi. n. 120.*

4. Quum secundo Punico bello Cn. Scipio, Africani patruus, ex Hispaniâ senatui scripsisset : petens ut sibi successor mitteretur, quia filiam virginem adultæ jam ætatis haberet, neque ei sine se dos expediri posset : senatus, ne respublica bono duce careret, patris sibi partes desumpsit, consilioque uxoris ac propinquorum Scipionis constitutam dotem ex ærario erogavit, ac puellam nuptam dedit. Dos autem undecim millia æris fuit. In quo non solùm humanitas senatûs, sed etiam modus veterum patrimoniorum, cognosci potest. Nunquam adeo fuerunt exigua, ut quia Megullia quinquaginta millia æris dotem ad virum attulerat, Dotatæ cognomen invidiosum invenit. *Valer. l. iv. c. 4.*

Illis temporibus bona animi, non divitiæ, in cunctis rebus ponderabantur. Hæc conciliabant magistratus et imperia : hæc jungebant affinitates : hæc in foro, hæc in curiâ, hæc intra privatos parietes plurimùm poterant. Patriæ rem unusquisque, non suam, augere properabat : pauperque, in divite, quàm dives in paupere imperio, versari malebat.

5. Extat C. Gracchi è Sardinia provinciâ Romam reversi oratio, in quâ hæc inter alia de se narrat : Versatus sum in provinciâ quomodo ex usu vestro existimabam esse, non quomodò ambitioni meæ conducere arbitrabar. Nemo possit verè dicere assem aut eo plus in muneribus me accepisse : aut meâ causâ quemquam sumptum fecisse. Zonas, quas Româ proficiscens plenas argenti extulit, eas ex provinciâ inanè retuli. Alii amphoras, quas vini plenas retulerunt, eas argento repletas domum reportarunt. *A. Gell. l. xv. c. 12.*

Contra verò pecunie quam non contemptor fuerit Varus Quinctilius, Syria, cui præfuerat, declaravit: quam pauper divitem ingressus, dives pauperem reliquit. *Pa-
terc. l. ii. c. 117.*

6. Cùm Ser. Sulpicius Galba et Aurelius Cotta con-
sules in senatu contenderent, uter adversus Viriatum in
Hispaniam mitteretur, ac magna inter Patres dissensio
esset: omnibus, quoniam Scipionis Emilianæ sententia
inclinarètur, expectantibus: *Neutrum, inquit, mihi mitti
placet: quia alter nihil habet, alteri nihil est satis.* Impe-
rii, in quo omnia licet pro arbitrio agere, æquè malam
magistram judicans inopiam atque avaritiam. Quo dic-
to, ut neuter in provinciam mitteretur, obtinuit. *Valer.
l. xi. c. 4.*

CAPUT XL.

Varia eorum, qui aliis præsumt, officia.

1. Difficile dictu est, quantopere conciliet animos
hominum comitas affabilitasque sermonis. *Cicer. 2.
Offic. n. 48.*

In gerendo magistratu excercenda est facilitas et al-
titude animi: ne, si irascamur aut intempestivè acceden-
tibus, aut impudenter rogitantibus, in morositatem inuti-
lem atque odiosam incidamus. Anni pauperculæ Philip-
pum regem obsecranti, ut litem suam dijudicaret, cùm
respondisset, sibi tempus ad ista non superesse: *Ne ergo
eis rex,* illa reposuit. Admiratus Philippus liberam ve-
tulæ vocem, non solum ei aures præbuit, sed multam
quoquè jus sibi dici postulantium turbam audivit statim.
1 Offic. n. 88. Plut. Apoph.

Quum Augusto principi optimo quidam libellum sup-
plicem porrigens, præ metu et verecundiâ nunc manum
proferret, nunc retraheret: *Putas, inquit jocans Augus-
tus, te assem elephanto dare?* Jus ipse dixit assidue, et in
noctem nonnunquam: si parùm corpore valeret, lecticâ
ante tribunal collocatâ vel domi etiam cubans. *Macrob.
2 Sat. c. 4. Sueton. in Aug. c. 33.*

Inter alia dicta Trajani hoc fertur egregium. Ami-
cis culpantibus quòd nimium in omnes comis esset, res-

pondit: *Talem se imperatorem esse privatis, quales esse sibi imperatores privatus optaret.* Eutrop. l. viii.

Erat in Miltiade cum summa humanitas, tum mira comitas: ut nemo tam humilis esset, cui non ad eum aditus pateret. Contrà Pausanias conveniendi facultatem petentibus non dabat, superbè respondebat, et crudeliter imperabat. *Corn. Nep. in Miltiad. et Paus.*

2. Ita probanda est mansuetudo atque clementia, ut adhibeatur publicæ utilitatis causâ severitas, sine quâ administrari civitas non potest. Nam ubi discrimen inter malos bonosque sublatus est, confusio sequitur, et vitiorum eruptio. Promiscuam habere et vulgarem clementiam non decet: et tam ignoscere omnibus credulitas est, quàm nulli. *Cicer. 1 Offic. n. 88. Senec. de Clem. l. i. c. 2.*

Bonis nocet, quisquis pepercerit malis.

Invitat culpam, qui peccatum præterit. *P. Syrus.*

Modum tenere debemus. Sed quia difficile est temperamentum; quidquid plus æquo futurum est, in partem humaniorem præponderet.

3. Objurgationes aliquando incidunt necessariae, in quibus utendum est fortasse et vocis contentione majore, et verborum gravitate acriore. Sed, ut ad urendum et secandum medici, sic nos ad hoc genus castigandi rarò invitique veniamus, nec unquam nisi necessariò, si nulla reperietur alia medicina. Sed tamen ira procul absit, cum quâ nihil rectè fieri, nihil consideratè, potest. Atque etiam significandum est, illud ipsum acerbitatis, quod habet objurgatio, ipsius causâ, qui objurgetur, esse susceptum. *Cicer. 1 Offic. n. 156.*

Omnis autem animadversio et castigatio contumeliâ vacare debet: neque referri ad utilitatem ejus qui punit aliquem aut verbis castigat, sed ad reipublicæ commodum. *1 Offic. n. 88.*

4. Cavendum est etiam ne major pœna, quàm culpa, sit: et ne iisdem de causis alii plectantur, alii ne appellentur quidem. *n. 89.*

Prohibenda maximè est ira in puniendo, optandumque, ut ii, qui præsumunt aliis, legum similes sint, quæ ad puniendum æquitate ducuntur, non iracundiâ. Quod vitium cum in privatâ quotidianaque vitâ levis esse animi atque infirmi videtur, tum verò nihil est tam deforme,

quàm ad summum imperium etiam acerbitatem naturæ adjungere. 1 *Epist. ad Quint.*

Cyri et Agesilai, summo in imperio, nemo unquam verbum ullum asperius audivit. 2 *Epist.*

Ad coercitionem errantium sceleratorumque, irato castigatore non opus est. Omne pœnæ genus remedii loco admovebo. Varia in tot animis civium vitia vides, et civitati curandæ adhibitus sum: pro cujusque morbo medicina quærat. Hunc sanet verecundia, hunc mutatio loci, hunc dolor, hunc egestas, hunc ferrum. Procedam in tribunal non furens, non infestus, sed vultu legis: et illa solennia verba damnationis pronuntiabo, non iratus, sed severus. *Senec. l. i. de Ira, 15, 16.*

5. Cicero in egregiâ illâ ad Quintum fratrem Asiæ prætorem epistolâ, quædam eum admonet ut faciat; quædam quod jam fecerit laudat, quæ hic paucis verbis referentur.

Sint hæc fundamenta dignitatis tuæ: tua primùm integritas et continentia; deinde omnium, qui tecum sunt, pudor: delectus in familiaritatibus percautus et diligens: familiæ gravis et constans disciplina. Quid autem erit negotii continere eos quibus præsis, si te ipse contineas?

Sit summa in jure dicendo severitas: dummodo ea non varietur gratiâ, sed conservetur æquabilis.

Sed tamen parvi refert abs te ipso jus dici æqualiter et diligenter, nisi idem ab iis fiet, quibus tu ejus muneris aliquam partem commiseris. Neque enim satis est te ipsum justum esse, et abstinentem, sed omnes ministros imperii tui tales præstare et sociis nostris et reipublicæ debes.

Constanti famâ ad me perlatum est, tibi omnium, quibus præes, salutem, liberos, famam, fortunas esse carissimas: te pecuniæ, te voluptati, te omnium rerum cupiditati sic jam biennium resistere, ut in Asiâ, tam corruptrice provinciâ, nihil te ab summâ integritate continentiaque detraxerit: non itineribus tuis perterreri homines, non sumptu exhauriri: esse, quocumque veneris, et publicè et privatim maximam lætitiâ, cum urbs custodem, non tyrannum, domus hospitem, non expilatorem, recepisse videatur facillimos esse aditus ad te: patere aures tuas querelis omnium: nullius inopiam ac solitudinem, non modò publico accessu ac tribunali sed ne domo

quidem tuâ et cubiculo esse exclusam tuo : toto denique in imperio nihil acerbum esse, nihil crudele, atque omnia plena clementiæ, mansuetudinis, humanitatis.

CAPUT XLI.

Judicis est in causis semper verum sequi.

1. Dicebat Pythagoras, donorum à Deo homini concessorum hæc duo esse præstantissima, veritatem sequi, et benefacere aliis : his enim duobus mortales Deo propè similes fieri. *Cicer. 2 Offic. n. 51. Ælian. l. iv. c. 34.*

Thebis Ægyptiacis viebantur simulacra judicum manibus carentium, et præsidis eorum oculos in terram versos habentis. Quo significabantur, eos, qui jus dicunt, nec donis, nec conspectu reorum moveri oportere. *Plut. in Iside.*

Quoniam magna aut bona aut mala è judiciis aut æquis aut iniquis in publicam rem veniunt, Ægyptiis præcipua judiciorum cura erat. Optimos è majoribus urbibus viros triginta eligebant. Qui consessus nec Areopagitis Atheniensium, nec senatui Lacedæmoniorum, videtur fuisse postponendus. Hi unum ex sese, justitiâ maximè insignem, sibi præsidem dicebant. Stipendium à rege omnibus dabatur in victum et alias res necessarias. Cùm ad judicandum convenissent, præses collo suo torquem aureum circumponebat, è quo suspensa erat, confecta ex pretiosissimis lapillis, imago, quam Veritatem dicebat : et octo volumina, in quibus scriptæ erant leges Ægyptiorum, proponebantur in medium. Actor et reus, non verbis, sed scripto tantùm, causam agebant : et postquam res satùs liquere judicibus visa erat, ferebatur sententia, et præses Veritatis imaginem convertebat in alterum è litigatoribus qui causâ vicerat. Hoc modo cuncta judiciâ peragere Ægyptiis solenne erat. Causidicorum oratione multum caliginis juri offundi arbitrabantur ; et sæpè fieri, ut oratorum artes, actionis præstigiæ, lacrymæ periclitantium, judicum aures, oculos, animos sic afficerent, ut unam Veritatem non ampliùs intuerentur. *Diod. Sic. l. i.*

3. Athenis in senatum Areopagiticum neminem admitti fas erat, nisi et honesto loco natus, et vitæ modesti spectatissimum. *Isocr. in Areop.*

Nihil illis iudicibus constantius, nihil severius, nihil fortius. Qui causam apud eos dicebant, ab iis omnibus, quæ ad conciliandam benevolentiam et movendos affectus valent, jubebantur abstinere: quod si negligere viderentur, præconis voce cohibiti tacere cogebantur. Ne reorum quoque miserando aspectu iudices commoverentur, ipsâ nocte, nullis admotis luminibus, iudicia exercebant: summoque silentio sententiam tabellâ dabant, ita ut alter alterius sententiam ignoraret. Puerum coturnicum oculos eruentem dicuntur damnasse, iudicantes id signum esse perniciosissimæ mentis multisque malo futuræ, si adolevisset. Iidem quid quisque Atheniensium ageret, aut quonam quæstu sustentaretur, diligentissimè inquirebant, ut cives vitæ rationem reddendam esse memores, honestatem sequerentur. *Cicer. l. i. ad Attic. Epist. 14. Quint. l. ii. c. 17. l. vi. c. Lucian, in Hermot. Pollux, l. viii. c. 10. Quint. l. v. c. 9. Valer. l. ii. c. 6.*

3. Sisamnem, unum è Persarum iudicibus, quod pecuniâ acceptâ injustè iudicasset, rex Cambyses morte plecti iussit; interemptoque detractâ pelle contextit tribunal, in quo ille sederat: tum filium ejus Otanem ibidem sedere iudicem voluit, admonitum ut nunquam paternæ culpæ ac pœnæ oblivisceretur. Severior postea Artaxerxes, alius Persarum rex, in quosdam malos iudices fuit: nam vivis pelles detrahi præcepit, iisque aliorum iudicum subsellio insterni, ut recens semper ante oculos haberent exemplum justitiæ non impunè violatæ. *Herod. l. v. Diod. Sic. l. xv.*

4. Qui statuit aliquid parte inauditâ alterâ, Equum licèt statuerit haud æquus fuit.

Senec. in Medea, ver. 200.

Quendam ex inimicis vocaverat in iudicium Aristides: et iudices, auditâ accusatione, confestim sententiam laturi videbantur de reo, quem audire abnuebant, notam omnibus accusatoris justitiam ac fidem reveriti. Tum Aristides in medium processit, et unâ cum reo supplex concidit ad pedes iudicum, orans, ut inimicus audiretur, et ex legibus cum eo ageretur. *Plut. in Arist.*

Alexander primis regni annis cùm in capitalibus causis iudex sederet, loquente accusatore, alteram aurem admotâ manu occludebat. Interrogatus cur id faceret : *Illam, inquit, aurem reo integram servo.* Idem Alex.

5. Nihil contra rempublicam, neque contra jusjurandum ac fidem, amici causâ, vir bonus faciet; ne si iudex quidem erit de ipso amico. Ponit enim personam amici, cùm induit iudicis. Hoc solum dabit amicitiae, ut veram amici causam esse malit, ut perorandæ liti tempus, quoad per leges liceat, accomodet. Itaque præclarum à majoribus accepimus morem ea tantùm roganda iudicis, quæ salvâ fide facere possit. *Cicer. 3 Offic. n. 10.*

Est sapientis iudicis meminisse non solum quid potestati suæ permissum sit à republicâ, sed etiam quid fidei commissum ac creditum : absolvere aliquando, quem oderit : quem verò amet, condemnare : non putare sibi, quodcumque concupierit, licere : sed habere in consilio legem, religionem, æquitatem, fidem : libidinem autem, odium, invidiam, metum, cupiditatesque omnes amovere : maximèque rebus omnibus præferre conscientiam mentis suæ, quàm à Diis immortalibus accepimus, quæ à nobis divelli non potest : quæ si optimorum consiliorum atque factorum testis in omni vitâ nobis erit, sine ullo metu et summâ cum honestate vivemus. *Pro Cluent. n. 159. Pro Rab. Posth. n. 12.*

6. Chilo ille sapiens in re capitali amici sui aliquando iudex fuit cum duobus aliis iudicibus. Itaque aut amicus ei capite plectendus erat, aut legi adhibenda fraus. Consultanti secum quid in tam ancipiti casu faciendum esset, hoc optimum visum est. Sententiam, quâ amicum damnaverat, dissimulans ac tacens, duobus sociis iudicibus, ut eum absolverent, persuasit; sicque se et amici et iudicis officio functum fuisse existimabat. Verùm die vitæ supremo amicos circumstantes allocutus, cùm dixisset nihil à se commissum esse, cujus memoria aliquid ægritudinis afferret morienti; confessus est sibi nondum liquere, rectène, an perperàm, fecisset in illo amici iudicio: hancque se ex facto capere molestiam, quòd metueret ne perfidi hominis fuisset in eadem re, eodemque tempore, et communi negotio, aliis suasisse diversum ab eo, quod ipse justum, et à se faciendum duxerat. Virum

sapientiâ præstantem hæc res meritò anxium et sollicitum habebat. Declinavit enim de viâ, et justitiâ discessit, eùm falsum conservandî amici causâ consilium dedit. *A. Gell. l. i. c. 3.*

7. Antigoni regis frater Marsyas litem habebat, postulabatque ab eo sibi domi iudicium institui: *Meliùs quidem, inquit Antigonus, in foro, et omnibus audientibus, res agetur, si nihil injustè facere in animo est.* Plut. Apoph.

Philippum regem rogabat Harpalus, qui gratiâ plurimum valebat apud eum, ut propinquus et familiaris suus Crates, accusatus injuriarum, multam quidem solveret, sed non damnaretur publico iudicio, ne inimicorum aliorumque hominum maledictis pateret. Cui Philippus: *Satis est istum propter culpam, quàm nos propter illum malè audire.*

Cùm litis inter duos privatos iudex esset Aristides, et alter conciliandæ sibi iudicis benevolentix causâ diceret adversarium multa in Aristidem injuriosè fecisse: *Quin tu potius, inquit, bone vir, si quid ille te læsit, eloquere, Tibi enim nunc, non mihi, iudex sum.* Idem, in Aristide.

CAPUT XLII.

Cives magistratibus pareânt, magistratus legibus.

1. Divina mens prima et summa lex est, alia jubens, alia vetans: ex quâ illa lex, quam Dii humano generi dederunt, profecta est, ratio, ad rectè faciendum impellens, et à delicto avocans. *Cicer. 2 de leg. n. 9. 11. 2 Philip. n. 28.*

Constat profectò ad salutem civium, vitamque omnium quietam et beatam, conditas esse leges: eosque, qui primum ejusmodi scita sanxerunt, populis ostendisse, ea se scripturos atque laturos, quibus susceptis honestè beatèque viverent. Vitiorum enim emendatricem legem oportet esse, commendatricemque virtutum. Ideòque supplicia vitii proponit, præmia virtutibus. *2 de Leg. n. 11. 1 de Leg. n. 58.*

Sicut morbos antè necesse est cognitos esse, quàm remedia eorum; sic cupiditates priùs natæ sunt quàm leges, quæ iis modum facerent. Vetustissimi mortalium,

quorum ætas atrea dicta est, naturam et ducem et legem habentes, sine probro et scelere, atque idem sine coercitionibus et pœnâ, vitam agebant. Nec præmiis nec minis opus erat, cum honesta suoapte ingenio peterent, et nihil contra morem cuperent. At postquam pro modestiâ et pudore, ambitio, vis, aliæque cupiditates incessere; leges conditæ sunt. Sic Cretensibus Minos, Spartanis Lycurgus, Atheniensibus Solon leges perscripsit. *Livius, l. xxxiv. c. 4. Tacit. 3 Ann. c. 26. Senec. Ep. 90.*

2. Lycurgus non habentibus Spartanis leges instituit, et suo exemplo confirmavit: siquidem nihil lege ullâ sanxit, cujus non ipse primus in se documentâ daret. Populum in obsequia principum, principes ad justitiam imperiorum formavit: parsimoniamque omnibus suasit, existimans laborem militiæ assiduâ frugalitatis consuetudine facilitatem fore. Tanto viro neque vitæ summa integritas, neque constantissimus erga patriam amor, neque leges salubriter excogitatæ, auxilio esse potuerunt, quò minùs infestis divibus experiretur. Lapidibus enim aliquando petitus à divibus quibusdam, quorum luxui frænos injeceat, foro ejectus, oculo etiam privatus fuit. Hoc facinus admisit adolescens nomine Alexander, qui Lycurgi è foro fugientis tergo inhærens, respicientem percussit baculo, eique oculum excussit. Illum, sibi à populo traditum ad pœnam, egregiè ultus est Lycurgus: nam cum domi ministrare sibi jusisset; mansuetudinis, frugalitatis, sanctitatisque suæ exemplo tantam in eo morum mutationem fecit, ut ille ex protervo et audaci adolescente in verecundum moderatumque transiret. *Justin. l. iii. c. 2. Valer. l. v. c. 3. Plut. in Lycurg.*

3. Codro rege Athenis extincto pro patriâ, administratio reipublicæ annuis magistratibus permissa est. Sed civitati nullæ tunc leges erant, quia voluntas regum pro legibus habebatur. Læctus est itaque Solon, vir ingenio et justitiâ insignis, qui velut novam civitatem legibus conderet. Hicque tanto temperamento inter plebem senatumque egit, ut ab utrisque parem gratiam traheret. *Justin. l. ii. c. 7.*

Solonem leges condentem arrisit Anacharsis, dixitque: *Leges aranearum telis similes sibi videri. Quemadmodum enim, inquebat, ille infirmiora animalia retinent, valentiora transmittunt: sic pauperes et humiles legibus constringuntur, divites et praesotentes eas ferrunt.* Idem

Anacharsis cùm concioni populi Atheniensis interfuisset: *Mirari se, dixit, quòd apud Græcos verba facerent sapientes, stulti. verò judicarent.* Plut. in Solon. Valer. l. vii. c. 2. Plut. ibid.

Interrogatus Solon, quomodo optimas fieri posset civitatum status? *Si, inquit, cives magistratibus obediant, magistratus autem legibus.* Stob. serm. xli.

4. Archidamus cuidam quærenti, quinam Spartz imperarent? *Leges, inquit, ac secundum leges Magistratus.* Plut. Apoph.

Cùm Agesilaüs, Lacedæmoniorum rex, subactâ Asiæ parte, adversus regem Persarum pergeret, maximamque haberet fiduciam regni ejus potiundi; ab Ephoris revocatus, eorum absentium jussis tam obediens fuit, quàm si privatus in comitio esset Spartzæ; opulentissimo regno præposuit bonam existimationem, multòque gloriosius sibi futurum duxit, si patriæ institutis paruisset, quàm si bellò Asiam superasset. Rediit itaque confestim, dicens: *Bonum imperatorem oportere legibus parere.* Plut. Apoph. Cor. Nep. in Agesil. c. 4.

Antiochus tertius omnibus regni sui civitatibus scripserat: *Si quid fortè per literas jussisset facere quod esset contra leges, ne sibi parerent.* Plut. ibid.

5. Charondas populi conciones ad vim et cruorem usque seditiosas pacaverat, lege cavendo, ut, si quis eas cum ferro intrasset, continuo interficeretur. Interjecto deinde tempore, ipse ex longinquo rure, gladio accinctus, domum repetens, subito indictâ concione, sicut erat armatus, in eam processit. Ubi cùm ab eo, qui proximè constiterat, solutæ à se legis suæ admonitus fuisset; *Idem ego, inquit, illam sanguine meo sanciam.* Ac protinus ferro, quod habebat, districto incubuit. De Zaleuco, vide lib. iii. c. 49. Valer. l. vi. c. 5.

Idem Charondas, ne leges suæ temerè abrogarentur ad arbitrium et libidinem eorum quibus graves essent, hæc ratione præcaverat. Si quis quampiam è sancitis legibus abrogari vellet, et in ejus locum aliam novam inferri; is, collo in laqueum immisso, verba faciebat ad populum de utrâque lege. Ubi, latis suffragiis, visum erat veterem legem abrogandam esse, et novam accipiendam; ille discedebat nihil mali passus. Contrâ verò si prior lex retinenda, et nova rejicienda videretur: temerario novæ legis

suasori guttur perfringebatur eo, quo vincus accesserat, laqueo. *Diod. Sic. l. xii. Stob. serm. 42.*

6. Jus civile neque inflecti gratiâ, neque perfringi potentiâ, neque adulterari pecuniâ debet. Si non modò oppressum, sed etiam desertum aut negligentius adseratum fuerit: nihil est quod quisquam sese habere certum, aut à patre accepturum, aut relicturum liberis, arbitretur. *Cicer. pro Cæcin. n. 73.*

Non ea olim erat, quæ nunc sæculum tenet, legum negligentia: nec interpretando sibi quisque eas aptas faciebat, sed suos potiùs mores ad illas accommodabat. *Livius, l. iii. c. 20.*

7. Dictum est ab eruditissimis viris, nisi sapientem, liberum esse neminem. Quid est enim libertas? potestas vivendi ut velis. Quis igitur vivit ut vult, nisi qui recta sequitur, qui gaudet officio; qui legibus non propter metum paret, sed eas sequitur atque colit, quia id rectum et salutare maximè esse judicat; qui nihil dicit, nihil facit, nihil cogitat denique nisi libenter ac liberè: apud quem nulla res est, quæ plùs polleat, quàm ipsius voluntas ac iudicium? Soli igitur hoc contingit sapienti, ut nihil faciat invitus, nihil dolens, nihil coactus. *Cicer. Parad. 5.*

Non minùs apud viros bonos honestas, quàm apud alios necessitas, valet. *Plin. l. iv. Ep. 10.*

Interrogatus Aristippus, quid præ cæteris hominibus eximium haberent philosophi? *Hoc, inquit, quòd si leges omnes tollantur, æquabiliter tamen victuri simus. Diog. Laërt. in Arist.*

Legem nocens veretur, fortunam innocens. *P. Syrus.*

Quam angusta innocentia sit, ad legem bonum esse? quantò latiùs officiorum patet, quàm juris regula? quàm multa pietas, humanitas, liberalitas, justitia, fides, exigunt, quæ omnia publicæ leges non jubeant? *Senec. ii. de irâ, c. 27.*

Quod non vetat lex, hoc vetat fieri pudor. *Senec. Troas, ver. 332.*

[274]

CAPUT XLIII.

Vitiosi principes plus exemplo, quam peccato nocent.

1. Ut cupiditatibus et vitiis principum infici solet tota civitas, sic emendari et corrigi continentia.

Nam licet videre, si temporum memoriam repetas, qualescunque summi civitatis viri fuerunt, talem civitatem fuisse: et quaecumque mutatio morum in principibus extiterit, eandem in populo secutam esse. *Vicer. 3 de Leg. n. 30. 32.*

Cum L. Lucullo magno viro magnificentia villae Tusculanae objiceretur, respondebat: *Duos se habere vicinos, alterum equitem Romanum, alterum libertinum: quorum cum essent magnifica villa, id sibi concedi oportere, quod illis, qui tenuioris ordinis essent, liceret.* At non videbat ab ipso natum esse, ut illi talia cuperent. Nam Lucullus, summus alioqui vir, profusae id aedificia, convivia, et apparatus luxuriae primus auctor fuit: eumque ob injectas moles mari, et suffossos montes, haud infacetè magnus Pompeius Xerxem togatum vocare assueverat. Pauci autem, atque admodum pauci, honore et gloria amplificati, vel corrumpere mores civitatis, vel corrigere possunt. Itaque eo perniciosius de republica merentur vitiosi principes, quod non solum vitia concipiunt ipsi, sed etiam ea infundunt in civitatem, plusque exemplo, quam peccato, nocent. *Paterc. l. ii. c. 33.*

2. Princeps optimus faciendo docet: et licet sit imperio maximus, exemplo major est. *Paterc. l. ii. c. 126.*

Non tam imperio nobis opus est, quam exemplo: quippe malus recti magister est metus. Melius homines exemplis docentur. *Plinius Paneg.*

Rex velit honesta: nemo non eadem volet.

Senec. in Thyest. ver. 213.

—Componitur orbis

Regis ad exemplum; nec sic inflectere sensus

Humanos edicta valent, ut vita regentis.

Mobile mutatur semper cum principe vulgus.

Claud. de 4. Cons. Honor. ver. 296.

Vespasianus legibus æquissimis, quodque vehementius est, vitæ specie, vitiorum plura Romæ abolevit. *A. Vict. Epit. c. 17.*

Theodosio imperatori, quòd lapsos mores exemplo suo restituerit, his verbis gratulatur Latinus Pacatus : Ubi primùm imperium accepisti, non contentus ipse vitii carere, alienis vitii corrigendis curam adhibuisti, idque moderatè, ut suadere potius honesta, quàm cogere, videreris. Et quia vel longo Orientis usu, vel principum remissione, tantus multos luxus infecerat, ut adulta consuetudo non facillè mutari posse videretur: ne quis se pati injuriam putaret, à te voluisti incipere censuram: impendia imperatoriæ domus minuisti, et ad mensam vix necessarium adhibendo sumptum, quod naturam difficillimum est, emendasti volentes. An quis ferret molestè se ad principis modum coërceri? aut subtractum sibi aliquid doleret de privatâ luxuriâ, cum videret imperatorem rerum potentem, terrarum hominumque dominum, parcè viventem, modico et castrensi cibo contentum? ad hoc aulam omnem laboris, patientiæ, frugalitatis exemplis abundantem? Tuæ, imperator, epulæ mensis communibus sunt parciores. Hinc in omnes, quiescentibus leguminis, luxuriæ pudor et parsimoniæ studium venit. Sic est enim, sic est: *Exasperat homines imperata correctio, blandissimè jubetur exemplo.* Latin. Pacat. c. 18.

3. Cavendum est viro honorato et principi, si ipse domum ædificet, ne extra modum sumptu et magnificentia prodeat. Quo in genere multum mali etiam in exemplo est: studiosè enim plerique, præsertim in hanc partem, facta principum imitantur. At L. Luculli virtutem quis? Multi tantummodò villarum magnificentiam imitati sunt, quarum quidem certus adhibendus modus, et ad mediocritatem revocandus. *Cicer. 1 Offic. n. 138. 140.*

In Agesilao Lacedæmoniorum rege illud in primis admirabile fuit, quòd, cum maxima ei munera à regibus, et dynastis, et civitatibus mitterentur, nihil unquam in domum suam contulerit, nihil de victu, nihil de vestitu Laconum mutaverit. Domo eadem fuit contentus, quâ Eurysthenes progenitor majorum suorum fuerat usus: quam qui intrârat, nullum signum libidinis, nullum luxuriæ videre poterat; contrâ plurima patientiæ atque abstinentiæ: sic enim erat instructa, ut nullâ in re differret à

cujusvis inopis atque privati domo. *Cor. Nep. in Agesil. c. 7.*

M. Cato consularis et censorius villas suas ne tectorio quidem perlitas fuisse scribit ad annum usque ætatis suæ septuagesimum; atque postea addit: *Neque mihi ædificatio, neque vas, neque vestimentum ullum est pretiosum, neque pretiosus servus, neque ancilla. Si quid est quo uti possim, utor: si non est, ego (id est, facilè careo.) Sæo quemque uti et frui per me licet. Mihi vitio quidam vertunt, quia multis ego; at ego illis, quia nequeunt egere.* A. Gell. l. xiii. c. 23.

Crassus ille dives nullam, præter eam, in quâ habitabat, domum ædificavit; dicebatque, homines ædificandi cupidos omnibus everti fortunis solere. *Plut. in Crasso.*

Cùm esset pecuniosus Atticus, nemo illo minùs ædificator fuit. Domum habuit Romæ in Colle Quirinali ab avunculo hæreditate relictam, cujus amœnitas non ædificatio, sed sylvâ constabat. Ipsum tectum antiquitùs ædificatum, magis venustum erat quàm sumptuosum: in quò nihil commutavit, nisi quod vetustate coactus est. *Corn. Nep. in Attico, c. 13.*

Habitavit Augustus in ædibus modicis, neque laxitate neque cultu conspicuis: ubi sine marmore ullo aut insigni pavimento conclavia: ac per annos ampliùs quadraginta in eodem cubiculo hieme et æstate mansit. Instrumentum quoquè ejus et supellex vix privatæ elegantiæ erant. Idem tamen Romam, quam pro majestate imperii non satis ornatam invenerat, ad eò excoluit, ut jure sit gloriosus, marmoream se relinquere, quam lateritiam accepisset. *Sueton. in Aug. c. 72, 73. c. 91.*

Anno urbis conditæ 628, Censores Cassius et Longinus Lepidum Æmilium augurem, virum consularem, coram se adesse jusserunt, quòd sex millibus æris ædes conduxisset. *At nunc, inquit Velleius, qui centum et quinquaginta pòst annis scribebat, si quis tantas habitet, vix ut senator agnoscitur. Ad eò maturè à rectis in præva, à prævis in præcipitiâ pervenitur.* Paterc. l. ii. c. 10.

CAPUT XLIV.

Potentia decori est, si salutaris sit.

1. Neminem ex omnibus hominibus magis quàm rem aut principem decet clementia. Ita enim potentia decori gloriæque est, si salutaris sit. Quæ verò gloria et valere ad nocendum? *Senec. 1 de clement. c. 3.*

Illius demum magnitudo gloriosa et stabilis est, neminem omnes tam pro se esse quàm supra se sciunt; cuius curam pro salute singulorum atque universorum tuentur. quòtidiè experiuntur: quo procedente, non, tanquam periculum animal quod de cubili prosiluerit, diffugiunt, sed nunquam ad clarum et beneficum sidus certatim advolant, sed iurare se pro illo mucronibus insidiaatum puratissimi.

Magnam fortunam magnus animus decet: magni autem animi est proprium placidum esse tranquillumque, iniurias atque offensiones despiciere. Regem sævâ et exorabilis ira non decet. *c. 5.*

Talis sit civibus suis princeps, quales sibi Deos velit. quòd si Dii placabiles et æqui delicta potentium non tantum fulminibus persequuntur; quantò æquius est hominibus hominibus præpositum miti animo exercere imperium? *c. 7.*

Si, quoties homines peccant, sua fulmina mittat
Jupiter, exiguo tempore inermis erit.

Ovid. 2 Trist. Eleg. ii.

Quod principis officium est? quod bonorum parentum, qui objurgare liberos nonnunquam blandè, nonnunquam minaciter solent, aliquando admonere etiam verberibus? Nunquid aliquis sanus filium propter primam offensam exhæredat? Hoc quod parenti, etiam principi faciendum est, quem aliquando patrem patriæ, titulo omnia pulcherrimo, appellamus, ut sciat datam sibi potestatem patriam, quæ est temperatissima. *Senec. de clement. 14.*

2. Nulla regi gloria est ex sævâ animadversione: his enim dubitat eum multum posse? At contrà maxima, si nec suæ nec alienæ iræ serviat. *c. 17.*

Id facere laus est quod licet, non quod libet.

Minimum decet libere, cui multum licet.

Senec. Octa. ver. 455. Troas, ver. 334.

Cùm ab Alexandro magno flagitaret mater Olympias mortem cujusdam insontis, et dicitaret, spe facilius impetrandi quæ vellet, eum se per novem menses utero portasse: prudenter respondit: *Aliam, parens optima, posce mercedem, hominis enim innocentis salus beneficio nullo fiatur.* Ammian. I. xiv.

Antoninus Pius hanc celebratam Scipionis sententiam sæpè in ore habebat: *Male se unum civem servare, quàm mille honestos occidere.* Capitol. c. 9.

Theodosius, conquereute quodam ex familiaribus, quòd sotes morte non multaret, *Utinam, inquit, et mortuos liceret ad vitam revocare.* Joan. Antioch.

Vespasianus nunquam cæde cujusdam lætatus, justis suppliciis illaeramavit etiam et ingemuit. *Sueton. in Vesp. c. 15.*

Præmis annis imperii Neronis, animadversurus in latrones duos Burrhus prætorii cohortibus præfectus, vir egregius, petebat à Nerone, ut scriberet nomina eorum in quos præterea animadverti vellet; hocque sæpè dilatatum, ut tandem fieret, instabat. Invitus invito cùm chartam tradidisset, exclamavit Nero: *Vellem nescire litteras.* Quàm diversa illa vox erat à Caligulæ voto; qui optabat *populus Romanus unam cervicem haberet*, ut ipse uno ictu et uno die crudelitatem expleret! *Senec. 2 de clemen. c. 1. 3. de Ira, c. 19.*

3. Ad Cæsarem Augustum delatum est L. Cinnam insidias ei struere. Dictum est ubi, et quando, et quibus consciis, et quemadmodum aggredi vellet. His auditis Augustus concilium amicorum in posterum diem advocari jussit: ipse interim inquieta nox fuit. Gemens subinde voces emittebat varias et inter se contrarias. *Quid? ego percussorem meum securum ambulare patiar, me sollicito? Ergo non dabis poenas, qui tot civilibus bellis frustra stetitum caput, tot navalibus, tot pedestribus præliis incolume, immolare ad aras constituit, postquam fax terræ marique facta est? Rursus silentio interposito, sibi magis quàm Cinnæ iratus, seque ipse compellans, Quid vivis, inquit, et si ferire te tam multorum interest? quis finis erit suppliciorum? quis sanguinis? Ego sum nobilibus adolescentulis expositum caput, in quod mucrones acuant. Non est ante ferenda vita, ei, ut ego non peream, tam multi perdendi sunt. Interpellavit tandem illam Livia uxor: et, Admittis, inquit, muliere consilium? Fac quod medici solent, qui, ubi vitata re-*

media non procedunt, tentant contraria. Severitate nihil adhuc profecisti: nunc tenta quomodo tibi cedat clementia. Ignosce L. Cinna. Desprehensus est: jam nocere tibi non potest, prodesse fama tua potest.

Bene suadere visa est Livia, gratias ei egit Augustus. Cinna ad se accersivit, dimissisque omnibus è cubiculo, delatum ad se indicium exposuit, adjecit locum, socios, diem, ordinem insidiarum: et cum sua in eum beneficia plurima commemorasset, pro quibus ille infandam cædem paraverat; his verbis dedit: *Vitam tibi, Cinna, iterum do, prius hosti, cum te in hostium meorum castris invenerim, nunc insidiatori ac parricida. Ex hodierno die inter nos amicitia incipiat: et quam libenter ego tibi vitam do, tam libenter tu mihi eam debeas.* Post hæc detulit ei ultrò consulatum, questus quòd non auderet petere: amicissimum fidelissimumque habuit: et nullis amplius insidiis ab ullo petitus est, id clementiæ beneficio consecutus, quod antea severitate frustra quæsierat. I *de Clement. c. 9.*

4. Populis id quod acerbissimum est, quòd tributa pendant, non ita acerbum debet videri. Illud cogitent, nullam à se neque belli externi, neque discordiarum domesticarum, calamitatem abfuturam esse, nisi alicujus imperio regerentur. Id autem imperium cum exerceri sine vectigalibus ac tributis nullo modo possit; æquo animo parte aliquâ suorum fructuum pacem sibi sempiternam redimant atque otium. *Cicer. Ep. ad Quint.*

Neque quies gentium sine armis, neque arma sine stipendiis, neque stipendia sine tributis, haberi queunt. *Tacitus, 4 Hist. c. 74.*

Vectigalia nervi sunt reipublicæ. *Cicer. pro Leg. Man. n. 17.*

Tiberius præsidibus provinciarum onerandas esse tributo provincias scribentibus rescripsit: *Boni pastoris esse tondere pecus, non deglubere.* Sueton. in Tiber. c. 23.

Trajanus exactiones improbens et detestans, *fiscum heni similem esse*, dicebat, *quo crescente, artus reliqui tabescunt.* A. Vict. Epit. c. 6.

FINIS.







